

上海辭書出版社
安徽教育出版社

第三五八册

本書是宋代現存全部文章的總集，包括辭賦、駢散文和詩詞以外的其他散文。收錄兩宋九千餘位作家的各種文章十餘萬篇，總字數約一億。內容遍及歷史、文學、藝術、哲學、宗教、經濟、教育、軍事、法律制度等各個方面。

全

宋

文

全宋文

上海辭書出版社
安徽教育出版社

第三五八册



目錄

全宋文卷八二八八

曹涇

| | | | |
|-----------|---|-------|----|
| 與貴池縣尉胡同年書 | 一 | | 一 |
| 與貴池縣尉胡同年書 | 二 | | 二 |
| 與貴池縣尉胡同年書 | 三 | | 四 |
| 與貴池縣尉胡同年書 | 四 | | 五 |
| 與貴池縣尉胡同年書 | 五 | | 六 |
| 與貴池縣尉胡同年書 | 六 | | 七 |
| 與貴池縣尉胡同年書 | 七 | | 八 |
| 與貴池縣尉胡同年書 | 八 | | 九 |
| 與貴池縣尉胡同年書 | 九 | | 一〇 |

李念祖

| | | |
|----------|-------|----|
| 智林寺道一火蓮記 | | 一一 |
|----------|-------|----|

釋法雲

虛堂智愚禪師行狀 ····· 一三

金大鏞

重建佑聖殿記 ····· 一六

雲巖開闢興復記 ····· 一七

胡以遜

咸淳庚午科盱江擬策問 ····· 一九

全宋文卷八二八九

趙與可

論孟僖子屬說與何忌師事孔子 ····· 二一

趙介如

祭賈似道文 ····· 二四

陳 奎

重修石建寺碑記 ····· 二四

王 逢

孝友先生祠迎享送神詞 ····· 二五

| | |
|----------|----|
| 祭葉西澗丞相文 | 二六 |
| 夏 松 | |
| 築碶石城摩巖碑記 | 二八 |
| 程東鳳 | |
| 上度宗皇帝書 | 二九 |
| 王 寅 | |
| 盱學策問 | 三〇 |
| 徐 端 | |
| 了了道人自贊 | 三二 |
| 繆霆起 | |
| 趙參軍傳 | 三三 |
| 徐公佐 | |
| 桂山平糶倉記 | 三四 |
| 辛 煜 | |
| 趙刺史建容縣學記 | 三六 |
| 唐 棣 | |

彗出上書 三八

李 森

書吊丞相立齋先生墓詩後 三九

全宋文卷八二九〇

李肖龍

跋崔清獻公文集後 四一

自戒銘 四二

蹇應祥

廣州五僊觀古仙詩碑跋 四三

林元復

伸蒙子跋 四四

書先君伸蒙子家傳後 四五

田事深

金廂橋記 四六

周夢孫

大園記 四七

全宋文卷八二九一

何夢桂 一

| | |
|-----------|----|
| 通徐宅聘啓 | 五一 |
| 前啓有劄子 | 五二 |
| 請婚于方宅劄子 | 五三 |
| 贈李景雷序 | 五四 |
| 分陽何皆山序 | 五五 |
| 送方次山序 | 五五 |
| 玄學史提舉序 | 五六 |
| 劉可隱序 | 五七 |
| 雷陽父序 | 五八 |
| 送思院如杭問仕序 | 五八 |
| 何貴德遠游序 | 五九 |
| 宋梅堂干人營後事序 | 五九 |
| 寄項月齋 | 六〇 |
| 李學正遠遊序 | 六〇 |

送王德父遠遊序 六一

贈石崖姪孫序 六一

送翁炳翁序 六二

胡季聲序 六三

全宋文卷八二九二

何夢桂 二

白鷗詩盟序 六四

清溪吟課序 六五

邵梅間詩序 六五

唐月心詩序 六六

金玉詩序 六六

汪斗山詩序 六七

邵西坡詩序 六八

王樵所詩序 六九

題胡直內適安集 六九

文山詩序 七〇

| | | |
|-----------|-------|----|
| 本心先生疏食譜序 | ····· | 七一 |
| 俞竹屋詩序 | ····· | 七一 |
| 吳仲遠詩序 | ····· | 七二 |
| 永嘉林霽山詩序 | ····· | 七三 |
| 鮮于夫人李氏手帖序 | ····· | 七三 |
| 柴謙山詩序 | ····· | 七四 |
| 王希聲陰陽家理學序 | ····· | 七五 |
| 浮漚集序 | ····· | 七六 |
| 姪孫昭德遠遊詩序 | ····· | 七六 |
| 太學正節先生徐公序 | ····· | 七七 |
| 翠庭詩集序 | ····· | 七八 |
| 文勿齋詩序 | ····· | 七八 |
| 唐心月集句序 | ····· | 七九 |
| 汪復心瀟灑集序 | ····· | 七九 |
| 徐祥叔詩序 | ····· | 八〇 |
| 琴所王濟君用詩序 | ····· | 八〇 |

全宋文卷八二九三

何夢桂 三

| | |
|---------|----|
| 姪煜之詩序 | 八二 |
| 晞髮道人詩序 | 八三 |
| 胡汲古詩序 | 八三 |
| 胡柳塘詩序 | 八四 |
| 柯通甫醫藥序 | 八四 |
| 汐社詩集序 | 八五 |
| 洪百照詩集序 | 八六 |
| 何氏祖譜序 | 八六 |
| 易衍序 | 八八 |
| 陳古莊詩序 | 八九 |
| 徐冰壑詩序 | 九〇 |
| 杜學正竹處詩序 | 九〇 |
| 方叔規詩集序 | 九一 |
| 羅濟川詩集序 | 九一 |

| | |
|----------|----|
| 王菊山詩集序 | 九二 |
| 肯堂序 | 九三 |
| 徐雲墅注道德經序 | 九三 |
| 宋梅堂詩序 | 九四 |
| 方仁叟詩序 | 九五 |
| 王蒙泉詩序 | 九五 |
| 貴德詩集序 | 九六 |
| 王梅谷詩序 | 九六 |
| 章明甫詩序 | 九七 |
| 吳愚隱詩序 | 九八 |

全宋文卷八二九四

何夢桂 四

| | |
|----------|-----|
| 倦游錄序 | 九九 |
| 洪石泉知裁集序 | 一〇〇 |
| 凌馭詩序 | 一〇〇 |
| 章中時甫集禮書序 | 一〇一 |

| | |
|-------------|-----|
| 何梅境詩序 | 一〇二 |
| 翁真卿詩序 | 一〇二 |
| 王煒翁詩序 | 一〇三 |
| 陳高士自怡詩序 | 一〇四 |
| 夏德甫易窩吟序 | 一〇四 |
| 胡氏清雅詩集序 | 一〇五 |
| 竹境姚子康詩序 | 一〇五 |
| 吳鼎君實求古村煙草詩序 | 一〇六 |
| 琳溪張兄詩序 | 一〇六 |
| 徐氏墓田誌序 | 一〇七 |
| 宋君巽詩序 | 一〇八 |
| 馬竹泉詩序 | 一〇八 |
| 錢肯堂詩序 | 一〇九 |
| 題鄭松泉詩序 | 一〇九 |
| 余橘所詩序 | 一一〇 |
| 分陽諸公感寓詩集序 | 一一〇 |

| | | |
|-----------------|-------|-----|
| 題方山翁牧歌樵唱詩序 | | 一一一 |
| 題高氏金玉帖後 | | 一一二 |
| 題東麓詩卷 | | 一一二 |
| 題線縣尹孝經古畫圖 | | 一一三 |
| 題韓提幹伯高乃翁障東集 | | 一一三 |
| 跋唐月心詩 | | 一一四 |
| 朱默軒灝與其兄約山請跋詩編 | | 一一四 |
| 趙司理菊梅百咏跋 | | 一一五 |
| 跋譚氏編首 | | 一一五 |
| 陳氏與子請字跋 | | 一一六 |
| 跋馬子恢家藏三賢帖 | | 一一六 |
| 跋何玉華南山八詠集 | | 一一七 |
| 王石澗臨清詩藁跋 | | 一一七 |
| 全宋文卷八二九五 | | |
| 何夢桂 五 | | |
| 試策 | | 一一九 |

| | | |
|-----------------|-------|-----|
| 邵濂翁玉成說 | ····· | 一一二 |
| 胡古澹植竹說 | ····· | 一一二 |
| 南山天寧禪寺山門記 | ····· | 一一三 |
| 西真宮記 | ····· | 一一四 |
| 分陽覺道山麻姑祠記 | ····· | 一二五 |
| 易菴記 | ····· | 一二六 |
| 重脩嚴先生祠堂書院記 | ····· | 一二八 |
| 璇璣觀記 | ····· | 一二九 |
| 洞神宮記 | ····· | 一三一 |
| 白雲山法華院記 | ····· | 一三二 |
| 分水縣學田記 | ····· | 一三四 |
| 玄同齋記 | ····· | 一三五 |
| 安禪寺記 | ····· | 一三七 |
| 全宋文卷八二九六 | | |
| 何夢桂 六 | | |
| 建德路罷金課記 | ····· | 一三九 |

| | | |
|-----------------|-------|-----|
| 羅氏雪翠屏記 | | 一四一 |
| 壽昌縣學記 | | 一四一 |
| 參知政事高公平盜記 | | 一四三 |
| 廬陵養濟買田記 | | 一四四 |
| 寶積院白雲堂圓常閣記 | | 一四五 |
| 吳氏壽慶樓記 | | 一四六 |
| 淳安縣學魁星樓記 | | 一四七 |
| 邵古香行窩記 | | 一四九 |
| 建德路新創三皇廟記 | | 一五〇 |
| 百丈溪書院 | | 一五一 |
| 嗣守堂記 | | 一五三 |
| 全宋文卷八二九七 | | |
| 何夢桂 七 | | |
| 徐主簿仲修老子畫像贊 | | 一五五 |
| 夾谷簽事生祠贊 | | 一五五 |
| 石崖姪孫寫神求贊 | | 一五六 |

| | |
|------------|-----|
| 壽星畫像贊 | 一五六 |
| 贊汪愛蓮諭食牛 | 一五六 |
| 林同舍求初心大字并贊 | 一五七 |
| 富山方表叔求寫神贊 | 一五七 |
| 蛟峰先生畫像贊 | 一五七 |
| 林子敬寫神求贊 | 一五八 |
| 明叟髯弟寫真贊 | 一五八 |
| 毅齋畫像贊 | 一五八 |
| 寫神自贊 | 一五九 |
| 何子東墓誌 | 一五九 |
| 先叔何養正朝奉墓誌 | 一六〇 |
| 方深之墓誌 | 一六一 |
| 宋夫人何氏墓誌 | 一六二 |
| 祭蛟峰先生文 | 一六二 |
| 祭山房先生文 | 一六三 |
| 分陽麻姑橋疏 | 一六四 |

| | | |
|-----------|-------|-----|
| 麻嶺造菴疏 并序 | | 一六五 |
| 童道人立菴 | | 一六五 |
| 葉道判修天樂觀疏 | | 一六六 |
| 狀元坊施茶疏 | | 一六六 |
| 修章嶺路疏 | | 一六七 |
| 鶴鳴寺修造疏 | | 一六七 |
| 爲僧作聖節道場疏 | | 一六八 |
| 青原禪師題化修造疏 | | 一六八 |
| 柵嶺修路疏 | | 一六九 |
| 巖下修路疏 | | 一七〇 |
| 醮羣仙疏 | | 一七〇 |
| 僧化供疏 | | 一七一 |
| 祝香文 | | 一七一 |
| 還醮疏文 | | 一七二 |
| 代上元普度青詞 | | 一七三 |
| 薦弟青詞 | | 一七三 |

謝土醮詞 一七四

答貢院元許醮青詞 一七四

天慶宮建醮青詞 一七五

宴交代寶府判全器樂語 一七五

絲竹致語 一七六

全宋文卷八二九八

文天祥 一

贈人鑑蕭才夫談命 一七九

吳伯海自號滄浪為徐徑畝所喜携諸公詩來訪因有感作滄浪歌并呈巽齋先生 一七九

擬進御筆 一八〇

又擬進御筆 一八〇

擬册立皇太子文 一八一

己未上皇帝書 一八二

全宋文卷八二九九

文天祥 二

癸亥上皇帝書 一九五

| | |
|------------------|-----|
| 輪對劄子 | 一九八 |
| 乞斬呂師孟疏 | 二〇〇 |
| 論宜分天下爲四鎮奏 | 二〇一 |
| 門謝表 | 二〇四 |
| 湖南提刑到任謝皇帝表 | 二〇五 |
| 謝皇太后表 | 二〇六 |
| 謝皇后牋 | 二〇六 |
| 皇太子生日賀皇帝表 | 二〇七 |
| 賀皇太后表 | 二〇七 |
| 賀皇后牋 | 二〇八 |
| 皇子進封左衛上將軍嘉國公賀皇帝表 | 二〇八 |
| 賀皇太后表 | 二〇九 |
| 賀皇后牋 | 二〇九 |
| 皇女進封同壽公主賀皇帝表 | 二一〇 |
| 賀皇太后表 | 二一〇 |
| 賀皇后牋 | 二一一 |

全宋文卷八三〇〇

文天祥 三

| | |
|--------------|-----|
| 知贛州到任謝皇帝表 | 二二二 |
| 謝皇太后表 | 二二三 |
| 謝皇后牋 | 二二三 |
| 壽崇節本州賀皇帝表 | 二二四 |
| 賀皇太后表 | 二二四 |
| 賀皇后牋 | 二二五 |
| 壽崇節兵馬鈐轄司賀皇帝表 | 二二五 |
| 賀皇太后表 | 二二六 |
| 賀皇后牋 | 二二六 |
| 乾會節本州賀皇帝表 | 二二七 |
| 賀皇太后表 | 二二七 |
| 賀皇后牋 | 二二八 |
| 乾會節鈐司賀皇帝表 | 二二八 |
| 賀皇太后表 | 二二九 |

| | |
|---------------|-----|
| 賀皇后牋 | 二一九 |
| 皇子賜名本州賀皇帝表 | 二二〇 |
| 賀皇太后表 | 二二〇 |
| 賀皇后牋 | 二二一 |
| 皇子賜名鈐司賀皇帝表 | 二二一 |
| 賀皇太后表 | 二二二 |
| 賀皇后牋 | 二二二 |
| 皇帝登寶位本州賀皇帝表 | 二二三 |
| 賀太皇太后表 | 二二三 |
| 賀皇太后表 | 二二四 |
| 皇帝登寶位鈐司賀皇帝表 | 二二四 |
| 賀太皇太后表 | 二二五 |
| 賀皇太后表 | 二二五 |
| 謝皇帝登極赦文表 | 二二六 |
| 太皇太后加尊號本州賀皇帝表 | 二二六 |
| 賀太皇太后表 | 二二七 |

| | |
|---------------|------|
| 賀皇太后表 | 一二二七 |
| 太皇太后加尊號鈐司賀皇帝表 | 一二二八 |
| 賀太皇太后表 | 一二二八 |
| 賀皇太后表 | 一二二九 |
| 皇太后加尊號本州賀皇帝表 | 一二二九 |
| 賀太皇太后表 | 一二三〇 |
| 賀皇太后表 | 一二三〇 |
| 皇太后加尊號鈐司賀皇帝表 | 一二三一 |
| 賀太皇太后表 | 一二三一 |
| 賀皇太后表 | 一二三一 |
| 大行皇帝升遐本州慰皇帝表 | 一二三一 |
| 慰太皇太后表 | 一二三三 |
| 慰皇太后表 | 一二三三 |
| 大行皇帝升遐鈐司慰皇帝表 | 一二三四 |
| 慰太皇太后表 | 一二三四 |
| 慰皇太后表 | 一二三五 |

| | | |
|--------|-------|-----|
| 百日慰皇帝表 | ····· | 二三五 |
| 慰太皇太后表 | ····· | 二三五 |
| 慰皇太后表 | ····· | 二三六 |
| 期年慰皇帝表 | ····· | 二三六 |
| 慰太皇太后表 | ····· | 二三七 |
| 慰皇太后表 | ····· | 二三七 |
| 再期慰皇帝表 | ····· | 二三七 |
| 慰太皇太后表 | ····· | 二三八 |
| 慰皇太后表 | ····· | 二三八 |

全宋文卷八三〇一

文天祥 四

| | | |
|-----------|-------|-----|
| 禫祭慰皇帝表 | ····· | 二三九 |
| 慰太皇太后表 | ····· | 二三九 |
| 慰皇太后表 | ····· | 二四〇 |
| 賀皇帝聽政表 | ····· | 二四〇 |
| 賀太皇太后同聽政表 | ····· | 二四一 |

| | |
|--------------|-----|
| 天瑞節本州賀皇帝表 | 二四一 |
| 賀太皇太后表 | 二四二 |
| 賀皇太后表 | 二四二 |
| 天瑞節鈐司賀皇帝表 | 二四三 |
| 賀太皇太后表 | 二四三 |
| 賀皇太后表 | 二四四 |
| 大行皇帝謚號本州慰皇帝表 | 二四四 |
| 慰太皇太后表 | 二四五 |
| 慰皇太后表 | 二四五 |
| 大行皇帝謚號鈐司慰皇帝表 | 二四六 |
| 慰太皇太后表 | 二四六 |
| 慰皇太后表 | 二四七 |
| 冬至節本州慰皇帝表 | 二四七 |
| 慰太皇太后表 | 二四八 |
| 慰皇太后表 | 二四八 |
| 啓殯慰皇帝表 | 二四八 |

| | |
|--------|-----|
| 慰太皇太后表 | 二四九 |
| 慰皇太后表 | 二四九 |
| 發引慰皇帝表 | 二五〇 |
| 慰太皇太后表 | 二五〇 |
| 慰皇太后表 | 二五〇 |
| 祔廟慰皇帝表 | 二五一 |
| 慰太皇太后表 | 二五一 |
| 慰皇太后表 | 二五二 |
| 正旦慰皇帝表 | 二五二 |
| 慰太皇太后表 | 二五二 |
| 慰皇太后表 | 二五三 |
| 改元賀皇帝表 | 二五三 |
| 賀太皇太后表 | 二五四 |
| 賀皇太后表 | 二五四 |
| 曆日謝皇帝表 | 二五五 |
| 謝太皇太后表 | 二五五 |

謝皇太后表 二五六

宣州勸農文 二五六

湖南憲司咸淳九年隆冬疏決批牌判 二五七

斷配典吏侯必隆判 二五八

委僉幕審問楊小三死事批牌判 二五九

平反楊小三死事判 二五九

門示茶陵周上舍爲訴劉權縣事判 二六〇

全宋文卷八三〇二

文天祥 五

辭免新除秘書省正字狀 二六二

再狀 二六三

辭免知寧國府狀 二六三

與湖南大帥江丞相論秦寇事宜劄子 二六四

提刑節制司與安撫司平寇循環曆 二六五

十月十三日 二六六

十月二十二日 二六九

| | |
|------------|-----|
| 十一月初五日 | 二七一 |
| 十一月十八日 | 二七二 |
| 十一月二十六日 | 二七五 |
| 乞將所部義兵赴闕申狀 | 二七七 |

全宋文卷八三〇三

文天祥 六

| | |
|-------------|-----|
| 回胡僉判請交割書 | 二七九 |
| 賀吳提舉西林書 | 二八〇 |
| 回聶吉甫書 | 二八一 |
| 賀何尉書 | 二八二 |
| 上丞相書 | 二八三 |
| 通廟堂書 | 二八四 |
| 通江參政古心書 | 二八六 |
| 通潭州安撫大使江丞相書 | 二八七 |
| 與李復卿書 | 二八八 |
| 與孫子載書 | 二八八 |

| | |
|------------|-----|
| 與胡觀洲季從書 | 二八九 |
| 與楊學錄懋卿書 | 二九〇 |
| 回秘書巽齋歐陽先生書 | 二九〇 |
| 與秘書巽齋歐陽先生書 | 二九一 |
| 與秘書巽齋歐陽先生書 | 二九二 |
| 回劉架閣會孟書 | 二九二 |
| 回衢教曾鳳先生書 | 二九三 |
| 回李宮教應革書 | 二九四 |
| 與朱太博埴書 | 二九四 |
| 與朱太博埴書 | 二九五 |
| 與朱太博埴書 | 二九五 |
| 回鄧縣尉中甫書 | 二九六 |
| 與顏縣尉復古書 | 二九七 |
| 與顏縣尉復古書 | 二九七 |
| 與聶吉甫書 | 二九八 |
| 與聶吉甫書 | 二九九 |

全宋文卷八三〇四

文天祥 七

| | |
|-----------|-----|
| 回王國智書 | 三〇〇 |
| 與劉司戶三異書 | 三〇〇 |
| 與胡端逸書 | 三〇一 |
| 與黃主簿景登書 | 三〇一 |
| 與劉正伯書 一 | 三〇二 |
| 與劉正伯書 二 | 三〇二 |
| 回鍾叔玉三帖 | 三〇三 |
| 與隆興黎節判立武書 | 三〇四 |
| 與劉民章書 | 三〇四 |
| 與梅制幹書 | 三〇五 |
| 與杜教授抑之書 | 三〇六 |
| 回謝教授愛山四帖 | 三〇六 |
| 與廬陵劉知縣庭薦書 | 三〇七 |
| 與廬陵李知縣訖孫書 | 三〇八 |

與廬陵陳知縣堯舉書 三〇九

回樂安唐知縣元齡書 三一〇

回劉運使應龍書 一 三一〇

回劉運使應龍書 二 三一〇

與袁守雷侍郎宜中書 三一〇

與中書祭酒知贛州翁丹山書 一 三一〇

與中書祭酒知贛州翁丹山書 二 三一〇

賀翁丹山兼憲書 三一〇

賀江東憲方逢辰書 三一〇

賀前人除江西漕書 三一〇

回許秘丞自書 三一〇

賀倪提舉普書 三一〇

與新知太平州趙月山書 一 三一〇

與新知太平州趙月山書 二 三一〇

全宋文卷八三〇五

文天祥 八

| | |
|-------------|-----|
| 與游提刑汶書 | 三三三 |
| 與趙知郡孟邁書 | 三三四 |
| 賀前人得盱守書 | 三三四 |
| 與趙監丞淇書 | 三三五 |
| 慰趙監丞淇書 | 三三六 |
| 回安福趙宰與拏書 | 三三七 |
| 回安福趙宰與拏書 | 三三七 |
| 回寧國交代孟兵部之縉書 | 三三八 |

全宋文卷八三〇六

文天祥 九

| | |
|-----------------|-----|
| 回寧國陳節推容書 | 三三九 |
| 與吳提刑觀書 | 三四〇 |
| 與湖南陳提舉合書 | 三四一 |
| 回林學士希逸書 | 三四一 |
| 回贛守李宗丞雷應書 | 三四二 |
| 回交代湖南憲新除湖北漕李宗丞書 | 三四二 |

| | | |
|-------------|----|-----|
| 與江西黃提刑震書 | …… | 三四三 |
| 回林司業應炎書 | …… | 三四四 |
| 回信豐羅宰子遠書 | 一 | 三四五 |
| 回信豐羅宰子遠書 | 二 | 三四五 |
| 回羅子遠就賀除京權書 | 一 | 三四六 |
| 回羅子遠就賀除京權書 | 二 | 三四七 |
| 與汪安撫立信書 | …… | 三四七 |
| 回汪安撫立信書 | …… | 三四八 |
| 與胡都承穎書 | 一 | 三四九 |
| 與胡都承穎書 | 二 | 三五〇 |
| 慰饒州胡通判書 | …… | 三五〇 |
| 與安撫李大卿芾書 | …… | 三五一 |
| 回永州楊守履順書 | …… | 三五一 |
| 回林侍郎卿孫書 | …… | 三五二 |
| 回前知衡州楊秘監文仲書 | …… | 三五三 |
| 與劉尚書黻書 | …… | 三五三 |

| | | |
|---------|-------------|-----|
| 與陳察院文龍書 | 一 | 三五四 |
| 與陳察院文龍書 | 二 | 三五五 |
| 與鄧校勘林書 | · · · · · · | 三五六 |
| 與陳直院維善書 | 一 | 三五七 |
| 與陳直院維善書 | 二 | 三五七 |
| 與曾縣尉先之書 | · · · · · · | 三五八 |

全宋文卷八三〇七

文天祥 一〇

| | | |
|-----------|-------------|-----|
| 與曾架閣書 | · · · · · · | 三六〇 |
| 回吉守王提舉秘書 | · · · · · · | 三六一 |
| 與廬陵龔知縣日昇書 | · · · · · · | 三六二 |
| 與贛縣許權縣書 | · · · · · · | 三六二 |
| 賀劉敬德補入太學書 | · · · · · · | 三六三 |
| 賀鍾有謙補入太學 | · · · · · · | 三六三 |
| 與周德甫 | · · · · · · | 三六四 |
| 與文侍郎及翁書 | · · · · · · | 三六四 |

| | | |
|------------|----|-----|
| 與楊大卿文仲書 | …… | 三六五 |
| 與趙戶部平遠書 一 | …… | 三六六 |
| 與趙戶部平遠書 二 | …… | 三六六 |
| 與陳侍郎伯大書 | …… | 三六七 |
| 與宋衡州書 | …… | 三六八 |
| 與知江州錢運使書 一 | …… | 三六八 |
| 與知江州錢運使書 二 | …… | 三六九 |
| 與廣東曹提刑書 | …… | 三七〇 |
| 回汀州陳守書 | …… | 三七一 |
| 與趙大卿孟傳書 | …… | 三七二 |
| 與前江西趙倉與櫛書 | …… | 三七三 |
| 與吉州劉守漢傳書 一 | …… | 三七三 |
| 與吉州劉守漢傳書 二 | …… | 三七四 |
| 回吉州趙倅書 | …… | 三七五 |
| 回袁州鄒倅書 | …… | 三七六 |
| 回臨江婁倅書 | …… | 三七六 |

| | |
|----------|-----|
| 回隆興熊倅震龍書 | 三七七 |
| 與楊縣尉如圭書 | 三七八 |
| 回唐書記書 | 三七八 |
| 回黃強立書 | 三七九 |
| 回文教書 | 三七九 |
| 與胡節推幼黃書 | 三八〇 |

全宋文卷八三〇八

文天祥 一一

| | |
|---------------|-----|
| 繳奏藁上中書札子 | 三八一 |
| 賀簽書樞密江端明古心書 一 | 三八二 |
| 賀簽書樞密江端明古心書 二 | 三八四 |
| 與江端明古心書 | 三八五 |
| 與吉守李寺丞芾書 | 三八六 |
| 回廣東曹提刑書 | 三八七 |
| 回陳侍郎書 | 三八七 |
| 與湖南交代廖提刑書 | 三八八 |

| | |
|-------------|-----|
| 與前浙西安撫李大卿書 | 三八九 |
| 與劉吉州漢傳書 | 三九〇 |
| 回兩淮制使李端明庭芝書 | 三九一 |
| 回岳縣尉書 | 三九一 |
| 與洪端明雲巖書 | 三九二 |
| 與贛州屬縣宰書 | 三九三 |
| 回袁永州書 | 三九三 |
| 賀京尹曾尚書書 | 三九四 |
| 回曾知縣晞顏書 | 三九四 |
| 回曾連推宗甫書 | 三九五 |
| 回李本中書 | 三九六 |
| 回長沙傅縣尉合書 | 三九七 |
| 與府理錢昇叟書 | 三九七 |
| 燕山與外氏書 | 三九八 |
| 答朱古平書 | 三九九 |
| 正月書 | 四〇〇 |

移陸秀夫書 四〇〇

復王積翁謝昌元書 四〇一

獄中與弟書 四〇一

與弟訣別書 四〇二

全宋文卷八三〇九

文天祥 一一一

與包宏齋書 四〇三

遺所知書 四〇五

與吳架閣劄子 一 四〇六

與吳架閣劄子 二 四〇六

與吳架閣劄子 三 四〇七

與妹書 四〇七

邳州哭母小祥 四〇七

過淮 四〇八

亂離歌六首 四〇八

上權郡陳通判高謝解啓 四〇九

| | |
|-----------|-----|
| 上倉守李愛梅謝解啓 | 四一一 |
| 賀吳丞相革啓 | 四一二 |
| 及第謝吳丞相啓 | 四一三 |
| 謝丞相啓 | 四一四 |
| 謝皮樞密龍榮啓 | 四一五 |
| 謝何樞密夢然啓 | 四一五 |
| 謝江樞密萬里啓 | 四一六 |
| 賀江左相啓 | 四一八 |
| 賀馬右相廷鸞啓 | 四一九 |

全宋文卷八三一〇

文天祥 一三三

| | |
|-----------|-----|
| 通章簽書鑑啓 | 四二一 |
| 賀倉守趙編修端齋啓 | 四二二 |
| 回瑞州羅權府啓 | 四二三 |
| 回吉州繆守送端午啓 | 四二三 |
| 回朱約山賀生日啓 | 四二三 |

| | |
|-------------|-----|
| 餽朱約山歲禮啓 | 四二四 |
| 回前人餽歲啓 | 四二四 |
| 回前人賀生日啓 | 四二五 |
| 回彭知縣賀生日啓 | 四二五 |
| 回太和趙宰賀生日啓 | 四二六 |
| 回太和趙尉賀生日啓 | 四二六 |
| 回胡宣教賀生日啓 | 四二六 |
| 回蕭子蒼賀造居啓 | 四二七 |
| 賀朱太博得祠啓 | 四二七 |
| 送韋主簿成功赴宏詞科啓 | 四二七 |
| 回廬陵趙簿投贄啓 | 四二八 |
| 回吉州陳守緯啓 | 四二八 |
| 賀前人除福建倉啓 | 四二九 |
| 賀劉省元夢薦登科啓 | 四二九 |
| 迎寧國交代孟知府啓 | 四三〇 |
| 除湖南憲通交代李樓峰啓 | 四三〇 |

| | |
|-----------------|-----|
| 賀前人改除湖北漕兼知鄂州啓 | 四三一 |
| 賀前人生日啓 | 四三二 |
| 賀化地冬啓 | 四三二 |
| 賀化地正啓 | 四三三 |
| 賀簽書冬啓 | 四三四 |
| 賀參政正啓 | 四三四 |
| 賀江丞相除湖南安撫大使判潭州啓 | 四三五 |
| 賀前人除特進啓 | 四三六 |
| 回前人除特進送禮啓 | 四三六 |
| 行部潭州謝江丞宴啓 | 四三七 |
| 送前人九日禮啓 | 四三七 |
| 回前人送九日禮啓 | 四三七 |
| 賀前人冬啓 | 四三八 |
| 送前人折筵啓 | 四三八 |
| 回前人送冬酒啓 | 四三九 |
| 賀前人正啓 | 四三九 |

| | | |
|--------|----|-----|
| 送前人酒啓 | …… | 四四〇 |
| 回前人送春啓 | …… | 四四〇 |
| 賀前人赴召啓 | …… | 四四〇 |

全宋文卷八二八八

曹 涇

曹涇（一一三三—一一三五），字清甫，號弘齋，徽州休寧（今安徽休寧）人，遷居歙縣（今安徽歙縣）。登咸淳四年進士第，授昌化縣主簿。博學知名，馬端臨曾師事之。入元，爲紫陽書院山長。延祐二年卒，年八十二。著有《講義》四卷，《書稿》、《文稿》、《韻稿》、《儷稿》各五卷，及《服膺錄》、《讀書記》、《雜作管見》、《三場管見》、《泣血錄》、《過庭錄》、《課餘雜記》、《曹氏家錄》、《古文選》等。見《新安文獻志》卷九五上《曹主簿傳》、《宋元學案》卷八九。

與貴池縣尉胡同年書 一

涇去冬拜別後，無何亦理歸裝，以十一月十九日抵舍，又以正月三日過相居。隨波上下，正自可笑，濟鼎應憐之也。去冬鈞翰曾得力否？嘗見孫同年朝瑞云，自秋浦來曾得會面，又謂倉使見所投啓事，以爲上庠人物可敬，亦果然否？朱府教榮上，涇見附賀書，因併拜此。朱丈在翹館，從容屢誦才

美，欲其相與扶持，渠亦謂願得一好朋友求益也，今于書中又申言之，併乞台意。涇身事未有涯，姑置度外，所可喜者與東閣諸君心腹稍孚，亦頗有心功再意。濟鼎近况想佳。諸公有相念者否？月廩足支吾否？區區之心，以爲迎親之署乃第一樂事，此外皆可爲也。何日過昌化，得吃菜根，亦所甘心。性急馬遲，爲之奈何，臨風惟有健羨而已。人去，速拏楮拜此，恃至契，不及緣飾爲恭，仰告台照。

《梅巖文集》卷一〇附錄。

與貴池縣尉胡同年書 二 三月二十四日

某頃繇迅便，率拜稟函，念心交莫如吾同年，故一切浮文悉用刊置，然亦愧其疎矣。來教介來，伏領謙答，小楷何謹，件教何詳，了不以先施爲譏，匪至情安得爾。字字研詠，感極無言。雖然，所謂里年先生云者，非所宜蒙也。執事于某有數年之長，當年利見之文，某手抄口吟，心降氣懾，願一北面不可得，嘉藉慈思之契，許以兄弟之好，已爲望外之榮，今爲斯言，當作何顏拜受？夫世之以「先生」一字加于人者，爲其聞道在先，或以年長，否則直以權勢在焉爾矣。三者某無一有，而謂之先生，先生欺予哉？記去冬賜翰亦有之，失于控謝，今敢百拜，併懇願從茲勿復以云，恐傳他日，謂執事繆于施，某傲于受，俱非禮也。鈞翰委折謹悉，嘗以台翰過鈞覽矣，內帖所求格式一節并呈，亦笑領盛意矣。然聶守近有回書，首曰「某去冬恭拜鈞劄，謂以胡尉之才之美，敬嘗齋沐回申」云云，則是

未嘗不仔細也。老師謂入僉一事，潔堂雖嘗移文，執事實未供職，則所謂按堵云者，因其已入者也。據某思之，忱如台諭，爲一畝投劄子，只平直叙其卑猥困苦之狀，否則宛覓朱丈一語，某已力于府教書中言之，語又爲穩貼，又托兩俗神各書力言之。不如求此著爲最密，寧可少緩得之，不可欲速。如俱不可，則且甘苦忍貧俟之。畢竟亦是時運所制，無如之何。少刻卑己求人，瑣細已甚，縱小有小得，所失已多，又不如清苦之爲浩然也。依綠從紅，聊復爾聞。士大夫得時行道，有大于此者矣。伯誥尉聞有便郵專寄一緘，見到，已就道寄音矣。此翁近況甚適，但頗患細瘡，爬搔不禁，蓋自掌珠發之，延于聖善，以及頑尊。謾供一笑。廬江之役，雪前大爽，手自申牘，豈邊機耶？蕪蕪滹沱之事，萬乘有之，況一尉也？遠翔佳況，想如來教。看來富者常有餘，貧者常不足，此一定之理分，奈之何也。濟鼎今所以浩嘆者，一以官卑，一以俸薄，然官卑實自爲之，不得尤人。既爲是官，合得是俸，此亦謂之天命。今却是稍納青衿，薄助滫瀡，乃爲本行生活也。士大夫聞貧乏不能自存，此是好消息。學以本政，才以任事，又廉介主脚，有不遇，遇則南溟天池矣。若某之事，却是可笑。前冬之出僉，謂向陽一到，即得鈞翰過淮，不可謂之無力；去之數月，杳不見報，而主翁丐歸東，果成行矣，獨非命耶？今爲此來，敢作妄念，近在爐缺之側，固如此而止矣，其又能甕箒耶？僂指戍期，以刻爲歲，欲一學廬江雪景，不可得也。先生應重念之，意何幸。傾倒臨風拳拳，餘俟裔拜。伏于台照。

《梅巖文集》卷一〇附錄。

與貴池縣尉胡同年書 三

某幸托同年，相視當如兄弟，而先生長五歲，文學復出其上，則師表也。然距今三十餘年，驟而講師生禮，見謂非情，正當以《記禮》兄事之禮爲斷。然相距數百里，兄年七十一，某六十有六，而書問之交，一用滑稽，既乖平仲久敬之義，又犯先賢戲謔害事之戒。茲謹釐革前例，一用竿櫝正式，首告尊亮。某正月抵館，二月東宇來會，謂知有華翰在浩古處。至三月十一日，始克領教，蓋浩古來極遲也。即欲拜狀，而東宇言四月初方歸。數日前聞在月半，今初五日，忽聞即歸，遂亟拜此，以叙前書之謝。來書雖曰諧謔，而尊愛之真，未嘗不寓于其間。以自愉玩則忘疲，以示他人則絕倒，無所不樂，而心終以爲善謔不如純誠，變而之道，固未嘗不如正聲《韶》《濩》之在耳也。先生才高學富，發而爲文，實是可敬。某向來謂若減得二三十年年紀，謹當北面，而惜也老矣，每見高作，輒如武庫乍開，劍戟森然，一一銛利，又耐檢點。近又于東宇處見所爲《醉意記》，復是滂沛奇詭，發藥我多，敬謝敬謝。來喻年前頭目之窘備悉。使戶之爲金也，決于忠告者之一言，所謂忙中之錯，危途之非，聽言之難如此。事既失手，何可追悔，忍之而已。今日得浩古數字，曰表叔餘翁、家學二蒙老而益進，長表弟尤爲富人，其能謝俗耽書，嘲弄風月，調笑戲謔，宜也。浩古以所親見爲此語，當無釀飾，幸先生欣領焉。《醉意》之文既高，字畫亦復清勁。某兩眼如蒙霧，作字善欵，向去此當日甚一

日。生年少先生五歲，蒲柳不耐乃爾。春來賤體却少病，能早起，能晝坐，事文墨不打瞌睡。然傍人籬落，爲分文百陌計，是謂老醜，不若歸而以意眠起，閒來繙書，或弄幼孫，從事蔬食，待盡山中，斯爲全是。今冬遂當結局，所見決矣。次孫秋後當娶，家無贏財，歲爲多費，此生竟是如此波查，苦中作樂而止。雖然，亦天也。賜教元日諸詩，當摘和；專賜一詩，當謹和。盡數遣歸，示舍弟小兒輩，以誇所蒙。元韻不能悉記牢，嗣貢。東宇在近，浩古非遠，時時有便可寄。遠翔令嗣障教者已歸，元鎮近不交信，弗齋已葬，程山窗子名昭祖者即世已久，皆謾一知，總幾尊照。不備。《梅巖文集》卷一〇附錄。

與貴池縣尉胡同年書 四

某啓：五月十一日東宇來，領四月晦日書。時辛卯生令孫，因冗，賜字差略，然猶能訝吾孫利市之負欠。以愚意所欲釐革爲遁辭，則無所不怡，正自可喜。謹俟次孫畢娶併償。先生六孫，某少一，員有出剩。政雖頽景迫，我兩家子弟能通知二父意，安知無餘味耶？茲言類于自惑，屏息竢譴。某六月望作暑假，巧值亢旱，加以老孟光失步如受病，閱月方能出戶，一是無聊。二十三日甫抵館，今日爲二十五日，東宇意言初一又暫歸，急拜此。新秋，尊候康佳，使媿均慶。辛卯生令孫勿藥久矣，某之同年孫可以入學，而猶嬉。厥祖父或教之誦詩若他文，能調十字爲一連，而瀏亮，但欲聽人讀，而

默記之，既乃單聲自讀，每不肯隨口隨聲讀也，乃祖亦嗒然付之一笑。諸令小孫亦當可教讀，岐嶷可人也。近公行不以是何投充編役之說，儒戶似有動搖，今而知月山之謂餘學必爲淘采者，范六丈真聖人也。前諭衡甫府教惠書，意未有可以奉承之理。東宇知之，見答衡甫一書，煩授其令似，併致此意。某積欠次韻之作，尚容續控。東宇之柬，忽棄盛年，乃祖隧碑，恐成擔閣，賴高文傳抄已廣，亦不假金石而壽也。却恨一字三縑之酬不如皇甫，幽冥之間其或能結草亢杜回乎，悶事悶事。某乍到百冗，復以暑盛，且此草草。歐公謂杜郎中曰：「吾徒老大，朋遊零落殆盡，存者無幾，又苦乖離。就使幸而相容，索然數衰弱翁，豈復昔時情緒，徒益可悲爾。」斯言似爲吾二人發，尊見以爲何如？東宇來，或能賜數字爲幸。伏乞尊照。《梅巖文集》卷一〇附錄。

與貴池縣尉胡同年書 五

某七月末一書附東宇行，計必達必報，暨其來，則言台旆適入州。夫能出，則康強可賀。令孫久已勿藥〔二〕，則團欒之適尤可賀，雖不書猶書矣，何慰如之。先是王浩古將歸，信來，問有無問訊，不欲贅瀆，近歸矣，入十一月必來，尚可賜書，勿遐遺也。今拜此者，同里地理人程樂山，純靜老成，遊仙里日久，古修與之甚熟，欽仰大名，欲一拜識，干吹送，知某托年契厚，特來索書爲容。某與言：胡判簿與某是一般貧苦人，宜自知之，又必古修書乃可往。設其造門，幸與之進，而隨宜度事以

應之，不費錢財而費筆舌，諒亦台慈之所不深拒也。儒役仍免，亦芘之及。尊旆入州，爲戶門何事？老而傳矣，而猶出乎？可念也。樂山立竢書，草草，伏幾尊照。《梅巖文集》卷一〇附錄。

〔二〕令：原作「念」，據上篇改。

與貴池縣尉胡同年書 六

某乃八月初東字歸上狀，越月而來覓答字，無之，曰尊旆如州也。十月初，同里人談地理者曰程樂山索書求見洵拜字，戒以必得古修書乃往，否則不可，未知已至否。茲遂入臘，計自九月後不知尊履，自三月後不得尊翰，其爲尊仰，豈任下情。東字歸，遂又拜此。某之近事，領累幸安。次孫以前月十四辛卯娶姑女成禮，前承戲徵長孫利市，宜併究之，然兩家相值，亦成畫餅談河耳，謹不敢以爲對。最負愧者，日坐猥冗，積欠和詩，遄解，明歸當奮力併作，俟明春附東字或王浩古之便。尊候清佳，尊媿康共。即日又慶尊年七十二歲，某雖晚後，亦六十有七。三十年前之事，絕不入夢，見諸公哀哀，此心亦如死灰。想見康強有子孫，亦是人生一福，其貧且賤，當安之耳。先生與某大率相類，但未必如某之極貧，而胸中筆下飽滿伉壯，高出於某萬萬，則某劣也明矣。雖然，天者不可強，人者猶可勉也，如何如何？來年更有新條在，撓亂春風猝未休。冀勿遐遺。伏乞尊照。《梅巖文集》卷一〇

附錄。

與貴池縣尉胡同年書 七

某去年八月後三拜書，意必蒙一答。正月二十二日過程樂山，僅見《風水說》而止。夫猝猝間能爲一篇翫縷，又書之，又朱其句，不憚煩，而不能以一字酬八月之欠耶？抵館後，知東宇至，未見間，遇令姪胡東，嘗試問令伯有答書否，曰不知。然東宇至已久，審有之，曷不以貺？亦疑其遂欲答，其爲恕我決矣。至初九，東宇方携尊翰至，值某寓外，明曉始克領讀。紙極佳，爲之深感；語純謔，頗似寡味，畢竟尊意如此，故嘗欣受而謹藏之。七十二歲人，筆精墨好如許，非奇事耶？未還謁東宇間，忽聞其歸，又怪東宇不以語我，欠上狀。茲爲二月二十九日東宇伯姪忽來，領社日所賜尊翰，只就元日拙吟內翻騰，無數議論，意盡止是爲一書，善哉謔乎，比前書稍稍有味矣。其爲真清江割，前後一色堅瑩，恐是咸淳、德祐間物，某窶人，安得有此，感感，又以起敬。樂山不併覓古修書，而見蒙即與之共飯，併飯贈之言，所得多矣，某何愧謝如之！所欠和詩甚多，固是不暇，亦以不勝和也，望而難之。厥既聲迹闊疎，不相考擊，掣以他冗，寢成繆悠。此真語也，先生所料近于深文矣，丐少寬之。元日只當一首、二首，或三四五，而極才拙思澀，不能以少爲多，遂以一首狀，一意逐旋砌成。姑留以爲案沓，使它日孫息輩見之，知當時景物况味如此爾，不敢以示外人。東宇乃于一

舍姪處見之，不惜抄傳，至塵尊覽。賴得是吾兄見之，或當行人，必當忍笑不住也，駟不及舌矣。近吟併已入抄，旦夕一一治報。伴食乃宰相事，某不敢當。「俟來世」三字，此前輩著書立言不靳今人知之之意，然高作大篇短章，每出爲汗漫奇詭，有一瀉千萬里之勢，有爬痒鑑貌之快，令人駭視退立，亦何待來世而後知之哉！年高氣衰，病痛宜多，儻未至甚，姑以爲樂可也。某于書味自真，比來漸覺精神減怯，最是兩視花眩，常如在雲霧中；肢節酸疼，亦不耐煩苦，只飽飯而嬉。某又不甘如此，姑當順其力之所堪勝而爲之。生老病死，時至即行，不怛化也。聞先生飲啖健甚，此壽之理。方虛谷今年七十四歲亦然。更告致重爲禱，此外勿吝時時交書。所謂謔語，亦難盡絕要好，誠謔相半如何？要之，吾二人至契，只說着自身及家事，及閒談文字，亦何嘗不樂，何嘗無味，而必欲滿幅滑稽，何哉？前嘗稟，似端切矣，不吾聽，亦惟命。即日尊年嫂恭人尊懿候多福，令子令孫，合堂台媿均安。某謹謹附起居問，兼謝。東宇言即有人回，便急拜此，伏乞尊照。《梅巖文集》卷一〇附錄。

與貴池縣尉胡同年書 八

某二月三十日拜答後，非無拜書之志，而東宇于其令嗣之來而即去。與其自爲納婦而歸也，率不令知之，某又實不及知，以是忽忽六閱月無嗣音，未始不慊然也。秋半涼新，尊候康佳，尊媿均祉。近作必富，無從借抄，徒切跂慕。某淺于學、弱于才，茲事終不能與作者抗衡。年益高，聲望日益

下，已矣已矣！惟天地父母所以與我之本然者，兢兢自持，毋致玷失，甘貧耐辱，老當益堅，他日或可全而歸之。此爲僅僅者，而猶未敢謂之能也。所許屢和高作，一蹉過後，終是鼓舞不起，欠負欠負！然亦有由。某自三月後，率是易病難愈，可笑。四月初十起連三日吐瀉，既小定，將理及月，而後全安，然口飯比常減半，至邇日甫覺差勝耳。交秋隨例感冒，痰癩大作，亦看看一月，始得復常。大率年邁則氣衰，氣衰則宜其病之易而愈之難也。前輩曰：「安知他日不難于今日乎？」一笑復一笑。累輩相扶持，苟安如常。最小孫甲午十二月生者，今年三月甫入學，頗易教，稍慰意。先生六孫，比某多其一，近有所增益否？當次第授讀。此一件關係老人況味，逸少公所爲絕甘分少以爲樂者也。穡事大稔，庚子遂爲樂歲，奇遇奇遇！方虛谷獨處古杭十年，健于飲啖，其爲文益閎肆研密，當爲獨步。吳元鎮賀州杜門著書，有真樂。汪遠翔三子皆仕，少者尤佳，諸孫鼎盛。陳弗齋二子，一仕一求仕。生蒙厚，三女適人皆得男，輒天，二子尚未有男也，恐欲一知。令姪寓老子宫甚適，尚不失本來面目。某似無所措力，而不敢不稱美也。春中承尊諭，欠報，惶恐。某冬歸，遂決意跼伏，不堪復出矣。儘歲除前尚可寄書，未間，珍重是禱。《梅巖文集》卷一〇附錄。

與貴池縣尉胡同年書 九

某十月初三日，東字以九月二十二日尊翰至，真是答書，雜以諧語，每書之末爲寄聲累輩。同年

有情如此，感喜何限。然所謂「未卜嗣會」、「未卜嗣音」者，語意欠密。嗣會誠未易言，若東宇在此，嗣音易矣。縱子不嗣，某忘之乎？前二年是元鎮書來曰「相見欲期」，夫兩地相距可一二日程，而云爾，何愒也？元鎮是形容其杜門堅壁之意，然其語無味，姑置之。東宇歸，謹奉狀。輒因示教內所和雲峰之作，次韻八首，更奏二首，共爲十首，因償前欠，而第六孫之和亦在其中。不揆蕪穢，亦不能一一具題，併仰體尊意，稍入滑稽。東坡忍笑讀李端叔詩，某不敢避笑，特以是獻笑也，忍否一唯尊意。某藉庇，入秋後穩健，明年仍未能辭舊館。東宇易館仍相近。正二月之交又望報書，二月以後又可拜書矣。未間，爲斯文珍重是祝。尊嫂太安人齊眉尊安。令嗣二位詩學兩優，六令孫聰明日發，俊茂可人。某敢附拜興居問，不備。《梅巖文集》卷一〇附錄。（以上劉琳校點）

李念祖

李念祖，宋末人，生平不詳。按《姑蘇志》卷二二載李念祖寶祐中知平江府長洲縣，或即此人。

智林寺道一火蓮記

咸淳十年

火蓮因緣，昔陶善繼嘗記之。其辭曰：「讀浮圖書，知祖師西來，或拈花，或面壁，不立階梯，

不立文字，單傳直指，寶鏡當軒。然後成佛作祖，闡大機，提大用，虛空現前，活卓卓地，蓋不可以有心知，不可以無心得也。又閱高僧諸傳，見其鐵石脊梁，瀾翻舌本，回天輪，轉地軸，指南作北，截鐵斬釘，然後燈燈相承，八字打開，千差坐斷，一塵不染，萬法流通，蓋又不可以智慧求，不可以寂滅默也。昔鳩摩什生龜茲，而宏法于秦，義契佛心，證登四果，焚身之日，舌不焦爛。法進，梁州張掖人，少以苦行聞，晚割肉療飢者，闍維七日而舌不壞，建三層塔以藏之。又有火燼而一指不受燃者，又有生而黑脊，火後白皙者，又有闍維烟成五色良久而生異香者。如此等類，不可概舉。大抵行成于身，道堅于心，故能出生死，絕知見，超凡聖。適來適去，透聲透色，風鳴谷應，水到渠成，自有不期然而然者。是豈有心無心、智慧寂默者之所能致力哉！嗟夫！佛道陵夷，聲實俱泯，處頽波橫流中而能水不濡、火不焦者，誠不多得也。講師道一，俗姓陶氏，生長蘇臺，受業智林。一錫一瓶，隨緣作主，聞聲悟道，見色明心，拈本分于鈴鎚，作自己之生活，得失俱喪，是非兩忘，納須彌于芥子，擲大千于方外。曹谿滴水、臨濟風聲既斷而復續者，微吾師，其誰與歸？師生世七十有一年，以壬寅十一月十二日預寫偈頌，端坐而逝。越十有六日闍維，天氣晴燠，送千餘人，群鶴翔空，隨龕飛舞。又明日，弟子收骨散之，惟舌根不灰，宛如蓮花，敷榮七葉，真罕見也。弟子五人乃藏其舌花于一室，崇奉香燈，今凡二十八載矣。其高足定復慮久湮沒，實之塔，以詔後來。求余記顛末，見父子瓣香之義。余曰：生滅滅已，寂滅爲樂。透徹宗師，如擊石火，如閃電光，所謂一條白練赤灑灑地去，未嘗不欲影滅跡絕。師有知者也，亦豈欲以遺骸餘醜夸示于人哉！雖然，靈臺虛寂，歷劫不磨，

烈焰光中，法身常住，此又非凡眼之所能測知也。師遺世偈曰：『踏破玉峰山，惟心其淨土。』師其知之矣。」此陶筆發明其指者也，已勒堅珉。由嘉定己巳而來六十有六載，中燬于數。今雲孫良蜜欲再鑿石以壽其傳，囑余書，更下一轉語。嗟乎！師往矣。火蓮，色相也，不以色相觀，斯知其爲法相之形見也，初未易假物以莊嚴之也。經不云乎：「莊嚴佛土，即非莊嚴，是名莊嚴。」又曰：「不應住色生心，應生無所住心。」作如是見，則真有得于火蓮之本體，如月當天，余何言哉！《海虞文徵》卷一四。又見《虞邑遺文錄》卷一。（向以鮮校點）

釋法雲

法雲，咸淳十年住持慶元府清涼禪寺。

虛堂智愚禪師行狀

咸淳十年十月

師諱智愚，四明象山陳氏子，虛堂其號也。家近邑之普明寺，相距一里許，有山。其祖欲卜壽穴，相者謂：「此地高則廕子孫富盛，低則當出異僧。」祖曰：「願得僧以副吾崇佛之志。」及祖葬未數年，母鄭氏嘗夢一老僧脩而癯，長挹乞飯，因而娠焉。逮生之夕，母復夢如前。年十二，父母携師拜祖

墳，言其事，師若有所憶。至十六歲，無經世意，父母見有異相，舌貫鼻端，聽其依普明寺僧師蘊出家。一日，聞誦杜工部《天河》詩：「長時任顯晦，秋至輒分明。縱被微雲掩，終能永夜清。」忽有警發。辭親出鄉，首依雪竇煥和尚、淨慈中庵皎和尚。公務外惟坐禪，一老撫愛，常置之左右。道過金山，掩室和尚一見甚器重，通夕與語無倦。是時運庵師祖謝事真之天寧，解后語話，見其氣宇不凡，未幾赴道場，携師過雪上，薙染爲不釐務侍者。凡入室，常舉古帆未掛因緣，不許下語。思之，古帆未掛話有甚難會，其實只是一漚未發已前事，何得不教人下語？造方丈，通見解，聲未絕，庵云：「何不合取狗口，靜地裏密密體取去？」歸寮不覺躁悶。忽然會得古帆未掛話，清淨行者不入涅槃話。次日入室，却問南泉斬猫兒如何，師云：「大地載不起。」庵低頭微笑。自此遍歷諸大老之門，與石帆衍叔結盟，游江、淮、湘、漢，巡禮祖塔。坐夏荆門玉泉，因思虞察院於疎山壽塔因緣發明，孜孜參究。因過廬山，大雪彌月，在東林旦過堂，夜坐，無心中會得大嶺古佛放光時節，自此凝滯泮然。其時無二月和尚主福嚴，奔走龍象，師往依之，即命典藏。有脩首座飽參碩學，歸隱南嶽，影不出山，未嘗容易肯可諸方。師與商略古今，反覆博約，深相契合。有北禪禮和尚，機辯峻捷，衲子少得登其門者。師一日訪之，厲聲曰：「新到相看。」禮云：「長老不在。」師云：「已得真人好消息。」禮出，喚行者云：「新到僧在那裏？」師指露柱云：「和尚問，爾何不答？」禮云：「甚處來？」師云：「福嚴。」禮云：「行李在甚麼處？」師云：「在旦過堂。」禮云：「我不問爾者箇行李。」師云：「若是那箇行李，北禪門下著不得。」傾倒不忍舍。由是回浙，到淨慈見淨和尚。淨問云：「爾

還知所生父母通身紅爛，在荆棘林中麼？」師云：「好事不在匆忙。」淨隨後打一拳，師展兩手云：「且緩緩。」時笑翁和尚住靈隱，以虎丘舊職，命師再尸藏事，舉住杭之廣覺，力辭。忠獻史衛王秉鈞軸，嘉禾天寧別浦以師名聞之，出世興聖，實紹定二年也。復遷報恩，開府存畊趙公以明之顯孝，力請開山。復遷瑞巖。二年丐退，掩關啓霞，萃成頌古代別。延福虛席，侍郎黃公堅請主之。繼遷婺之寶林。五年，嬰強寇之難，歸松源塔下。東谷和尚主冷泉，欲舉立僧，恐不俯就，衲子再三禮請，師從之。開室普說，垂三轉語，罔有湊泊。寶祐戊午，育王虛席，禪衲毅然陳乞。有司節齋尚書陳公嘉其公議，特與敷奏。是年四月領寺事。三年，吳制相信讒懷隙，辱師，欲損其德，師怡然自若，始終拒抗，略無變色。聖旨宣諭釋放，作偈奉謝云：「去時曉露消祥暑，歸日秋聲滿夕陽。恩渥重重何以報，望無雲處祝天長。」古愚余尚書典鄉郡，特以金文延之，迫於晚景，退閑明覺塔下，作終焉計。景定甲子有旨，詔住淨慈。衲子奔集，堂單無以容，半居堂外。上徹宸聽，賜絹百疋，造帳米伍伯碩，楮券十萬貫。是年秋，又賜田參阡餘畝，即今天錫莊是也。十月，帝崩，召師入內，對靈普說，兩宮宣賚憂渥。丁卯秋，遷徑山。冬十月，朝廷降香，遣使禱雪，問師期應。師曰：「今夕。」果至期無爽，回奏，賜綾牒貳拾道、銀券等，一新僧堂、浴室、行堂。區區工役中，猶勵衆無怠。師感兩朝恩遇之寵，將所賜帑帛創小庵於望雲亭之東，扁曰「天澤」，就築塔爲歸藏之地。師平生性不通方，與時寡合，臨事無所寬假，言纔脫口，則釋然無間，以是學者畏而仰之二十年。常舉靈雲兩處，不答，徵問衲子，少有契其意者。己巳十月五日，祖忌，拈香罷忽感微疾。越二日，書偈沐浴，端坐而

逝，春秋八十五，夏臘五十三。嗣法十數人，《語錄》二帙，已行於世。門人奉全身瘞于塔焉。咸淳十年十月十一日，新劄差住持慶元府清涼禪寺嗣法小師法雲謹狀。《虛堂智愚禪師語錄》卷一〇，續藏經第二編第二六套第四冊。（尹波校點）

金大鏞

金大鏞，徽州休寧（今安徽休寧）人。宋末曾爲沿海制置司參議官。見《齊雲山志》卷二、三。

重建佑聖殿記

或曰：泰和之山，真武開跡之所；中和之山，真武寄跡之所。雖大小不侔，而棲真降聖迥出塵表，風雲神異，其理則一。茲山自宇宙來，氣靈秀鍾，隱顯固有數也，不有神人指之於先，諸君子述之於後，終秘於烟霞之隅。今固爲萬載祝聖之道場矣。葉介夫，一鄉善士，老於文學，不慕聲華，由是闢雲巖山房，一意著述。如《治安龜鑑》、《藥石》等編。自號雲厓山人。予方贊參沿海制置，王事靡盬，雲厓備述顛末，不遠千里，請予記。他日或扶杖而登茲山，雲厓必無逃予之足音矣。《齊雲山

志》卷一，萬曆刻本。

雲巖開闢興復記

吾邑休陽縣西三十里，有山曰齊雲，備載《新安圖》中。齊雲一石插天，直入雲漢，謂之齊雲，真可與雲齊也。有巖在其中，是曰雲巖。坐南向北，一丹臺卓乎其前，而夾出於兩山之間，黃山三十六峰環列排衙，其外儼如畫屏，惟天都一峰最高，與齊雲相顧盼，若賓主。然右挾石門、石臺、石洞、天碧、蓮池，左挾獨聳巖、聚仙瀛、五老峰、桃花澗，是所謂三巖也。然石門獨聳，兩環卑下，若拱侍其旁，惟齊雲一巖則雄壓萬山，尊居巍巍。寶慶丁亥間，有方士天谷子余道元自黟北來游，謁地於城居金公安禮士龍，宏闢重拓，創殿一所，名曰「佑聖真武祠」。請額於內相程公洺水先生，大書「雲巖」二字，歸而刊之石。道元自記其下，備載請地之由，與金氏慨然樂與之意。後士龍由市徙中和山，結草菴於獨聳巖下，凡相與戮力雲巖香火者甚力。其三巖田山歸之齊雲，意可見矣。中經水火二變，雖契字不存，幸內相之碑在焉。其雲巖丁山癸向，鄰於丙午，山高至己丑。火災烈焰，品物一空，獨玄帝神相頂天，一髮不動，而火不能燎矣。葉介夫與金士龍乃重建真武殿宇，以及兩廊樓房。淳祐辛丑，又水火，風雨晦冥，石崩瓦裂，從天而下。祐聖障頂，揚沙飛石，淋漓之漬，障幕穿而神光愈烜，聖像儼然，而水不能滲矣。天地之變，莫大於水火，水火所不能及，神之靈實昭昭矣。至庚午僅四十二載，惟佑聖殿巋然獨存，兩廊顛頽，前樓欹側，幾不能支。葉介夫又與程大有、胡道

祥會緝衆緣，闢三清閣、四聚樓，修整結蓋，殿宇箔水，從廊廡厨堂直舍，煥然一新。歙邑侍郎程公元嶽載書「雲巖」一扁於樓上。又慮丙山午火無以鎮也，遂於殿前壬癸方鑿石池一口，立「水位之精」四字於石，繫四語於下，曰「靜而能定，潔不可污。中潛龜蛇，上應虛危」。以北方壬癸之神，面北方壬癸之水，取太陰化生之正氣，神之由是靈也，益淵淵其遠矣。近咸淳丙寅，朝廷覈實，始鑿定殿基四至，立冊赴官印押，築墻石以限，永爲不朽之基。他所未暇也，以俟後之君子。但雲巖地段皆石，山不能墾，而田又少，每歲建會醮，不可無道侶住山，於是里人朱經略、孫一鳳，與道友金道大、胡道清、胡晉龍，翕然愿助田畝，以備洒掃醮壇之需。由是樂助此志者源源不絕。琢兩石在山，一石紀《雲巖開闢興復記》，一石記《雲巖修造上梁文》，并本殿基址、田山、助田契字。吁！有雲巖爲祝聖道場，又有雲巖田山及道友田畝供備洒掃，崇奉醮壇，則此一草一木自是添鮮碧，殆不知何時而已耶！德祐元年記。《齊雲山志》卷三。（以上王曉波校點）

胡以遜

胡以遜，字幼謙，撫州崇仁（今江西崇仁）人，一說宜黃（今江西宜黃）人。登咸淳四年進士第，授永福主簿、清江尉。丁艱，不復仕，家居以詩文自娛。著有《莊子補劄》十卷，詩文五十卷，《千金裘》、《齊瑟》各二卷，《待問》二卷。見雍正《江西通志》卷五一、八〇，《隱居通議》卷二〇。

咸淳庚午科盱江擬策問

問：天高地下，古往今來，悠悠風塵，俛仰千載。賢者留芳簡冊，不肖者蕪穢埃埏。榮華富貴，如浮雲過太空，起滅瞬息，獨士君子立身大節，垂之千古，與穹壤相爲不朽耳。當此蕉鹿酣夢之場，宜有磊落軒昂、睥睨天地之士，翛然長往、萬牛莫挽之風以警醒之，此有司所以喜談而樂道者，不知諸君所志何如也？古之君子，內重而外輕，己大而物小。其視富貴利達，舉世之所攘袂而爭者，猶如蠛蠓之過吾前，舉無足以動其心，故于進退行藏，無一不合。後世名羶利飴，沈酣骨髓，直欲以有限之光陰，爭無窮之宇宙。不知逆旅之炊梁未熟，而人閒之大夢已覺矣。回視疇昔所營，了無所得，徒使後人而復哀後人也。東山雅志，每形言色；黃公酒壚，邈若山河。功名富貴駸駸迫人，朝市山林從此永隔矣，悲夫！一日父子東歸，初無奇節，初非甚高難行之事，送者車數百兩，至泣下咨嗟，至寫爲圖畫以傳，豈出其創見故耶？「老子婆娑，正坐諸君輩」，雖位極人臣，貲埒公上，曾不如雲孫聊爾弦歌，蕭然環堵，歸來三徑，出岫無心，釋子候門，班荆共酌，爲差樂而無苦耳。古今賢相名卿士大夫不少，率於茲事不滿人意。立初節易，保晚節難，豈亦有所感而爲是論歟？消搖堂聽雨早歸之約，快閣歸船橫笛之盟，二公心事，皎如日月，山川鬼神，實與聞之。異時宦海風濤，卒不如志，豈士君子之出處亦天邪？功成謝事，幅巾東歸，誰不願此？由我者人，非我者天。晝錦故鄉，黃華晚

節，耆英洛社，白髮蒼顏，高名全節，照映古今，千載而下想望猶天人也。乃有望復位而目穿，一斥去而涕泗。上待輔臣如此，曾無氣節高邁、不貪祿位之人以感動之。故年方四十即求致仕而歸者，意有在矣。好事之徒，乃謂急流勇退。是蓋仙風道骨之人，無乃見其面而未識其心歟？自古被這般官爵引壞名節，以君子觀之，此理自不難見。言者乃曰：「此事今人不及，須于古人求之。」而天子亦曰：「只辭樞密一節，朕自即位以來僅見此人，若他人，雖推之亦不去矣。」不知先朝盛時，難進易退之風，乃爾寂寥邪！當時固有不好官爵，不好奉養之人，辭官之章，多至十七八上。一語不合，即稱疾而求去者，或又詆之爲不情，何邪？再召赴闕，倍道兼行，投老鍾山，書空咄咄，何以間執議者之口？豈矯于始者不能不改于終邪？至若不念舊惡，稱爲長者，常候人主之意，未厭先求去，故能三入，殊非執拗不聽人言者比。不知當時諸公唯唯，書紙尾而不敢輒有所豫者，何所疑憚而若是也？不寧惟是，平生所志，不在溫飽，榮進素定，何有不爲？而晚思再入，甘于自媒，去就如此，果能保其不以待復古者待我否？雖然，平生名節爲後生描畫盡，惟有早退以全晚節，吾愛之慕之；居廟堂之高則憂其民，處江湖之遠則憂其君，吾亦愛之慕之，曾何優劣之敢云。況四郊多壘，人物渺然，宇宙內事，莫非己分內事。進居廊廟而無充位行文書之譏，退處山林而無晚節浮沈之誚，果何道而可？諸君里巷間，與諸長老游從，其于出處大致講之熟矣，洗除場屋爛熟之談，脫去常人喔促之態，而以胸中梗梗者吐之，有司于此觀其人。敢問。《隱居通議》卷二〇。（劉文剛校點）

全宋文卷八二八九

趙與可

趙與可，宗室。景定三年爲兩浙運判，試將作監。五年，除兩浙總領。咸淳元年六月兼權鎮江府事。咸淳末知寧國府。德祐元年初，元兵至，棄城遁，除名。復起爲都督府參議官，爲浙西安撫使。此年末，元軍次安吉州，與可以城降，元仍命爲湖州路總管。見《咸淳臨安志》卷五〇，《錢塘遺事》卷七，《至順鎮江志》卷一五、一七，《宋史》卷四七，《元史》卷八、九，《平宋錄》卷中，雍正《浙江通志》卷一六。

論孟僖子屬說與何忌師事孔子

孟僖子從昭公於楚而歸，以不能相禮而病，而講學之，苟能禮者則從之。而其屬續之言，獨拳拳使其子說與何忌師事吾夫子，其言曰：「將有達者曰孔某。」孟僖子何以能知之也？斯亦甚奇矣。七十二國之君大夫不能知吾夫子，而一孟僖子能知之，僖子之見亦絕人遠矣。僖子之所以知吾夫子者，

以其聖人之後，而其祖孔父嘉有死難之忠，弗父何有讓國之賢，正考父有三命益共之美，故引臧孫紇之言曰：「聖人有明德者，若不當世，其後必有達人。」然意其於聖人之儀刑氣象，必有得於目擊之際者，非徒以其世考之也。其後孟僖子、南宮敬叔師事仲尼，雖未見其爲聖人門之高弟，而春秋之末，孔子所謂三桓之子孫微矣者，蓋三家子孫非復舊比。而又傳百餘年爲戰國，孟子以魯公族孟孫之後，卓然爲聖人之亞，千萬世之下，至今傳之曰孔孟。孟氏之子孫乃有甚不微者，而其斯文一脉，實自孟僖子始。愚每讀書至此，見得人家祖父苟知尊聖賢，鄉儒學，其子孫未有不食其報，而報之光明盛大，未有如孟僖子者。異時爲人祖父，知以詩書教子孫，亦不過利其可以擢科第，取富貴，買田宅，雄鄉里而已，豈謂其子孫可以爲聖賢哉？自科舉廢，儒效迂，爲人祖父者已視書冊爲不切，況其子孫哉？吾於是乎有感。然又有一說。契教民，稷養民，有大功德於唐虞之世，故稷、契之子孫皆有天下。天以爲是未足以償稷、契之功德也。商之後而生一夫子，猶契之澤也；周之後而生孟子，猶稷之澤也。天理之不爽如此，今之爲人祖父者，固不敢望其家家而稷、契，其平日處心積慮，當有一日之積累以遺其子孫否乎？固宜其無子孫爲聖賢之望也。吾於是乎有感，抑天時人事之不齊，又有可爲永慨者。孟子之生距孔子百有餘歲耳，當孔子時，有力而可以行夫子之道者惟三家，而墮三都之役，叔孫則墮郈矣，季氏則墮費矣，而孟氏之成，乃獨以公斂處父一言而卒不肯墮。《春秋》定公十年〔一〕，再書「叔孫州仇、仲孫何忌帥師圍郈」。十二年〔二〕，季孫斯、仲孫何忌帥師墮費，「公圍成」〔三〕，公至自圍成。叔孫州仇即叔孫武叔也，仲孫何忌即孟懿子也。毀仲尼之武叔，尚甘心於墮

郈，而師事仲尼之懿子，乃崛起於墮成，謂之何哉？且孟懿子亦既與於墮郈、墮費之役矣，墮他人之邑則欣然而從之，墮己之邑則有難色，平日之所學於聖門者果如是乎？心之不同，事之難料有如此者。使孟子生乎百年之前，得與夫子同時，以夫子之聖，輔之以孟子之賢，而因三家之力，雖挽東周而西周可也，何至蹙春秋而戰國也哉？孟子曰「予未得爲孔子徒也」，自傷之辭也。吾於是乎有感。

同治《廬陵縣志》卷五一。（曾棗莊校點）

〔一〕十年：原作「十四年」，據《春秋》經文改。

〔二〕十二年：原無，據右引補。

〔三〕「墮費公」三字原脫，據右引補。

趙介如

趙介如，字元道，饒州浮梁（今江西景德鎮東北）人。登寶祐元年進士第。依附賈似道，爲門下客。歷通判饒州。德祐初知漳州。時賈似道謫漳，介如護之，未果，爲鄭虎臣殺。入元，起爲雙溪書院山長。見元蔣子正《山房隨筆》，雍正《江西通志》卷五一、八八。

祭賈似道文

德祐元年

嗚呼，履齋死循，死于宗申。先生死閩，死于虎臣。嗚呼！元蔣子正《山房隨筆》，宛委山房本《說郭》弓四〇。又見《西湖游覽志餘》卷五，雍正《福建通志》卷六七。（曾棗莊校點）

陳 奎

陳奎，字肇方，一字偉節，饒州（治今江西波陽）人。咸淳元年進士及第，調滁州司戶參軍。改荆闔糧料院。調胸山主簿。制置使印應雷辟入幕。德祐元年秋，授南安軍教授，不就，還家。謝枋得起兵，拔入幕府。益王即位，遷太府丞、領江東安撫使。出上饒，接應郡縣，兵敗被執，遁去。後三年復起兵，尋敗，入積煙山中自刎死。有《鶴心集》。《宋史》卷四五四有傳。

重修石建寺碑記

咸淳六年

咸淳庚午秋，石建寺僧大靖揚其師祖如鑄中興之績，介石張公程命請記於予。靖之言曰：「寺肇

自唐光化中，熙寧時李日新重建之。歷年多，屋老且壓，賴同里長者之力，寺得不廢。我祖住持發宏願，嘉熙庚子構法堂，壬寅構鐘樓飯堂，癸卯構中門，丙午構大雄殿，甲寅構明閣等樓及聖僧兩廡。凡十有五載乃成，以俟來哲請記焉。」靖之來也，予嘉其意之誠，則告之曰：「中興美名也，而中者末之漸，興者衰之復，日中則昃，陽極而陰，理固然也。矧釋氏處四民之外，不自食其力，得之易，守之難，寧知其難歟？老石蹲虎泉如建瓴，青山白雲，截斷世諦。請諸佛子入是關，視予記而熟讀，寧爾猷，毋縛爾律；出是關，顧予記而深思，謹爾行，毋破爾戒。毋爲如鎬羞，使中興之美常保，則斯記其有助乎。」道光《（江西）東鄉縣志》卷末，道光三年增刻本。（羅國威校點）

王 逢

王逢，吳人，受業于秦觀後裔秦玉。玉卒，門人共議私謚孝友，請祠于州庠。見《吳都文粹續集》卷一六。

孝友先生祠迎享送神詞

東海隅兮三州，宅龜鼉兮蛟龍湫。羌聲教兮悠悠，靈斯藏兮道修。

道不行兮長邁，祠學宮兮子孫永賴。日薄堵兮風林鳴，如聞音之警歎。

楚葵青兮靡靡，牲甚肥兮酒旨。白駒兮猷馳，儼衣冠兮戾止。有聖賢兮依歸，魚川泳兮鳥雲飛。靡潛伏兮弗昭著，靈自今兮欽孰違。《吳都文粹續集》卷一六。（李文澤校點）

王所

王所，字喻叔，號南峰，台州黃巖（今屬浙江台州）人，咸淳元年進士（《浙江通志》作咸淳十年進士）。宋亡不仕，歸營書院于溪之濱，中藏圖書，旁藝花竹，有陶淵明遺風。著有《五經類編》、《南峰集》，葉夢鼎爲之序，稱其爲固窮君子。見萬曆《黃巖縣志》卷六，雍正《浙江通志》卷一二九，《宋元學案補遺》別附卷二。

祭葉西澗丞相文

嗚呼！聖賢通塞，莫不有時，時不我與，位亦奚施？如丘軻之不遇，信唐虞之難再，或共鯨之得肆，縱臯夔其曷支？惟公三朝魁弼，衆正表儀，斯文之準，帝者之師。及物則桑麻穀粟，用世則權衡著龜。以王沂公之留，而亦有呂文穆嫌間之慮；以司馬公之學，而亦有呂吉甫反覆之疑；以富韓公之

壽，而亦有還政以後色之憂、氣之疰；以王魏公之福，而亦有臨終不滿，僧其髮，緇其衣。然則四名相之德有餘而心不足者，迄我炎錄，豈不兼有而五之？嗚呼！朝端之光明俊偉，閩外之威鬯恩熙，爲非不效，知非不爲。奈何咸淳之該輔，彼已太阿之倒持。方漸莽而漸卓，我乃欲呂而欲伊。川既楫而鱷怒，歲欲霖而魃痴。所謂立商皇於梟獍之側，專刀匕於沉痼之危。此時此際，已而已而。使公當日得行其志，決未有今日。抑開闢以來所未有之變，合於此而創見，東南數百萬之生聚合於此而爛糜耶？天生一代之耆碩，固將辦千載之偉事，而使其遂至於此，某所以恨不醢似道之肉，而鞭似道之屍。嗚呼已已！引年之謝累百，於道之歸，公不出此，事未可知。然則保身之哲，見機之勇，白璧一規而表裏無瑕，精金百煉而始終不虧。此殆學力之真積，抑亦天意之所私。不然，桃源之避，海舟之維，何里袞之獨宴，婁公之獨夷。公之一心最白，公之年已耆。儒澤之在海宇者百世而不泯，德業之在史碣者雖百變而不移。當防意書屏之歲，忽空中甲馬之馳。其人其齒，若步而隨。邦之既殄，天不憖遺。今其已矣，屋烏其誰？某自憐寒苦，最辱盼知。梯萬山而一慟，潔雞黍之古儀。非但哭吾私，繫爲天下哭；非但哭公之不可復見，哭公不得賦康節平時之詩。嗚呼哀哉！《三台文獻錄》卷一六。（李文澤校點）

夏 松

夏松，安豐軍壽春（今安徽壽縣）人，夏貴子。咸淳間武將，守淮，嘗奉令築硤石城。力戰被殺。見王應麟《四明文獻集》卷五《夏松特贈保康軍節度使誥》。

築硤石城摩巖碑記

咸淳十年八月

硤石兩岸對峙，舊立二城，以爲長淮津要。去臆已城築東岸，西岸猶榛蕪荆棘。今歲松馳檄總統舟師攻勦正陽虜巢，給假。秋，奉闕命創築。同都統孫位、都統彭宗立、都統孫應武，率步將士，協力用工，不一月城成，以復版圖之舊。咸淳甲戌仲秋朔日，壽陽夏松題石。民國《安徽通志稿》金石古物考卷一三。又見光緒《鳳陽府志》卷一六下。（李文澤校點）

程東鳳

程東鳳，字朝陽，饒州浮梁（今江西景德鎮東北）人。咸淳元年登進士第，官縣尉。嘗上書度宗論時

政。見正德《饒州府志》卷二，乾隆《浮梁縣志》卷一一。

上度宗皇帝書

臣伏念國無賢才，何以爲治？爲治尚不能，况兼欲撥亂乎？臣觀此江南半壁，可謂無人矣，何以言之？浙東公田買，致畿甸之民愈擾；楚中榷場置，致襄樊之守遂離。今日舛謬之大，更無過於此者。而舉朝之臣，心雖有是非，而外胥恬處之而不敢論，則天下事猶可爲哉？倘有一經國之才，亟起而策濟時之略，辨孰者爲是，則舉其是者而行之，辨孰者爲非，則舉其非者而去之，國勢當亦不至決裂如此之甚也！頃者，先皇帝崇經術，重德行，雍容名位者有人，求其展布倉卒者甚少。蓋由於立端揆之上，進退百官者非其人也。劉向曰：「正臣進者治之表也，正臣退者亂之幾也。」自古極亂至危之際，豈無賢哉？不正之臣舉正臣而逐之，而辱之，而戮之，彼折衝禦侮，奮不顧身之士，有遠引而去之不暇，知建明之無日，而身名徒喪無益也。臣無庸遠引，謹舉南渡以來之事爲陛下陳之。建炎之初，非謂無人，李綱、趙鼎、張浚、韓世忠、劉琦、岳飛之流，皆有奠安宗社之才，興衰定亂之志，竟爲權奸掣其手足。爪牙之臣既屈，則人主孤危。始而建康，既而臨安，旋而維揚，旋而四明，蒙塵四出，不遑寧處，問誰使之，以至如此，則必有任其責者矣。夫國家之安危繫將相，而將相之忠邪繫朝廷，倘爲人君者毅然改圖，知吾之天下吾祖宗安全之天下也，何可任非其人而壞之？倘爲人臣者毅

然改圖，謂今之天下吾君之天下，吾君祖宗安全之天下也，吾君與祖宗欲臣鄰共安全之天下也，何可行非其道而敗之？上下交勉，端緒可循，則再造之功不細矣。思古今君臣未嘗不樂安存而惡危亡，而究其所行之事，往往趨危亡而遠安存，繇登用者非戡定之才，而言聽計施者多奸回之黨。迨疆場日蹙，聊且求安，亦可羞矣。矧天心猶可回，人事猶可盡，一日起而求治，賢才尚左宜而右有，今亦何苦而不爲哉！臣本江右一介之微，忝恩簡於草茆之下，幸與拔於南宮，目擊時危，欲緘默而弗能，知抗言而有罪。然皆依阿逐隊，爲旅進旅退之流，陛下又安用此科目爲乎？臣所以冒昧不揆，上干天譴，雷霆之下，希鑑微忱。乾隆《浮梁縣志》卷一一，乾隆四十八年刻本。（李文澤校點）

王 寅

王寅，吉州廬陵（今江西吉安）人。咸淳初自江西轉運司混試入國子監。四年，中省試。以內舍生得注教官，爲建昌軍學教授，改南安軍教授。見《隱居通議》卷二〇，雍正《江西通志》卷五一。

盱學策問

至人無己，神人無功，聖人無名。邀雲將兮游鴻濛，躡天根，問倏忽：大辯何訥，大智何愚，大

勇何怯，大肆若拘。許由巢父，何子子而居；龍逢比干，何蹇蹇而誅？我將釐是非，混有無，旁薄萬物，與天爲徒。薦紳大夫劃然而笑曰：子殆未知天乎！古今，天之晝夜；晝夜，天之一息也。陰絀而陽施，陽蒸而陰摩，呼而炎，噓而冷。天且爲物絃，爲氣化，爲形驅，子焉能違世而與道俱？且夫乾吾父也，坤吾母也。其出也或爲之君，其處也或爲之友。雖尼山之老、鄒嶧之叟，尚役役焉同世趨，子又焉能一爾汝，忘形軀？使青州饑民尚數十萬，耆英會上忍家食以嬉乎？使西師怙虐，羶膽未寒，晝錦堂中忍委身以歸乎？二龍閒卧，洛水無波，清則清矣，青苗手實，滿桴俱敗，忍不爲斯民活一著乎？晨窗林景，雲谷自春，高則高矣，潛邸舊人，出幽入明，忍不爲國家伸一喙乎？借曰太平無事，我可擊伊川之壤，都督有人，我可織東湖之履，然名教一家，中原萬里，彼能忘之乎？四道狼煙，萬宇俱盡，戎馬迹獨不到西山南浦間乎？倚梧而暝，隱几而笑，當爲是深長思，而奚以靜爲高？或曰：我且直之，何如？大夫曰：唯。夫靜專動直，乾道也，子奚迂？而況盲風夜收，天宇爲霽，狂瀾不驚，上下一碧，非神龍出游瞬息八極時乎？天下憂患一疏，大鳴于奸宄饑鼎之交，而慶曆以後，大事若默，僅聞今日爭濮議，明日爭濮議，何故？河朔三鎮一奏，力爭于袞鋒奔逆之衝，而建炎以來，晚節浮沈，舍典學數語外，寂寂無聞，何居？或曰：自仁祖朝優容言者太過。其始也以詆訐而去爲賢，其終也侵尋而入于諛。靜與直，胥失之，此數百年通患。而爭新法之罪，吾黨所以平之也。然則容言非朝廷福，諱言反爲朝廷福乎？直言非吾黨幸，隱言反爲吾黨幸乎？語涉太后，忤之者固僭也，隨之罷，誰速之乎？籠錦有聞，傳之者固諂也，介之去，誰實激之乎？批答弗稱，疑之者固輕也，鎮之

出，誰迫之乎？天章十條，撓之者僥倖乎，抑有出于僥倖之外乎？伯紀十議，忌之者僭叛乎，抑有出于僭叛之外乎？燈前夜雨，掩卷悠思，未嘗不爲志士一慨，而亦未知所適從也。顧鳳岡之隆聳，想直講之高風，銅陵石磴，遁賢棲客，亦與倘佯乎其中，必有能祛世迷者。敢問。《隱居通議》卷二〇。（李文澤校點）

徐端

徐端，字矩叔，宋末隆興府豐城（今江西豐城）人。弱冠以文學知名，晚歲號絜矩病叟，又號了了道人。嘗自作祭文、挽歌，超然無所芥蒂。臨終作《了了道人自贊》，投筆而逝。著有《易發揮》、《莊子章句》。見雍正《江西通志》卷六七。

了了道人自贊

若以爲了，多少未了。以爲未了，何時而了？光緒《江西通志》卷一三五，光緒七年刻本。（吳洪澤校

點）

繆霆起

繆霆起，德祐元年十月以公幹自臨安至建平縣，適元兵攻城，逸去，得免於難。見所撰《趙參軍傳》。

趙參軍傳

公趙氏，諱時踐，字容月，宋末人也。僑居太平采石，爵從仕郎。初調廣德司戶參軍，以廉能名，知軍雅敬其才，俾兼攝司法。雖下曹猥職，而戶籍倉廩，詳刑議法，事務充積，爲他曹劇，公並任之，事悉縷解。歲甲戌冬，攝建平縣，時邊警繹騷矣。乙亥春，風塵外薄，惡戾內挺，萑苻聯屬，警邏空單，縣治移置于鄉，居無何，復還。夏五月，邑中戴、趙二凶構怨，聚黨狙擊，乘間鷓鬪期死，焚蕩室廬，然及官廩，既焚卒旅供億，登呼首山。公朝搜暮給，裕如也。予以孟冬下澣公幹，自杭而至，急迫相遇，義同兄弟。于邑于野，班荆與語，歷旬日莫知所由。屆嗣月十日，天戈指南，追風先驅，擁東北門。予與公臨高遠眺，騎卒且綿三十里餘矣。是夜共坐於縣廳達曙，公於中夜嘆曰：「事勢如此，覆亡可知，詰朝惟有死耳。」予曰：「若家何？」公曰：「皮之不存，毛將安附？子非職守祿仕，可逸去。」及早微明，公指前溪曰：「我與妻孥訣，懷石是中。」因與予泊縣尉王君擢、直學

陳夢常登縣樓，椎鼓橫笛以示暇。俄而排桀盡仆，鋒鏑交鳴，羸兵弱卒殲盡。公與妻子僕妾共九人俱死溪潭，無噍類。予幸逸免。越四日，有縣卒告予曰：「趙縣官一家死溪中，吾已焚其屍，埋于溪岸。餘八人悉瘞沙中。」嗚呼！疾懷斯人，楚惻惕裂。因思欒布哭彭越，田叔隨張敖，今不能一對忠義士，寧不飲愧。若趙公孤忠高節，千古罕儔。昔季橙之身雖死，橙之家未嘗以俱死。今公曠矢，忠義殞身，滅家覆祀而不顧，卓冠今古，真可爲後世忠臣義士之砥礪。倘終泯沒而不顯，則殞身滅家者不獲表暴於天下，何以視將來？霆起謹以自見傳於篇，使今之史官搜求死節遺臣，庶可備采錄之萬一云。嘉靖《建平縣志》卷七，天一閣藏明代地方志選刊本。（吳洪澤校點）

徐公佐

徐公佐，台州（治今浙江臨海）人，德祐初爲慶元府教授。

桂山平糶倉記

德祐元年八月

桂山平糶倉者，越新昌陳君所建也。置田地若干畝，有規以遺其家，有籍以傳于官矣。而又謁余文以記。其請之之辭曰：「余家故約也，而聞天下之事，甚美者莫若義，苟近於義，余力所能至，必

趨也。於鄉塾以義建，於里役以義舉，於族廩以義置，義濟有局，義葬有阡也，皆得筆於聞人矣。今是倉方經始，而田方續廣，弗圖其永，將有遺憾矣。台，越鄰也，子故所聞也，敢以記累子。非徒曰余名是揭也，斯文在焉。庶余之若子若孫徘徊顧瞻，片石巋然，竦焉詔誥之在耳。不以衆故彌吾規，不以利故悖吾說，則吾成不壞，吾生不滅也。」嗚呼〔一〕，王政不行，則仁義之任歸於素王矣〔二〕。古者鄉遂之制明，井牧之經正。郊內則大司徒詔之，五家爲比，比以相保；五比爲閭，閭以相受；四閭爲族，族以相睦；五族爲黨，黨以相救；五黨爲州，州以相調；五州爲鄉，鄉以相賓。郊外則遂人治之，易比爲鄰，易閭爲里，易族爲鄣，易黨爲鄉，易州爲縣，易鄉爲遂。易之之名雖異，而相扶相助之意則同。其爲民慮，可謂周且悉矣〔三〕。然而內有遺人所掌之委積以待艱阨而賑兇荒，有族師所聚之王粟以平頒而時施。是皆爲上之法制經紀，而不使下之人自爲之也。孔子與原憲粟，而辭，子曰：「毋以，與爾鄰里鄉黨乎。」噫，此古之義也，周衰而失之矣，雖憲亦未之思耳。夫子身任王政之責，故於憲發之。天下者，鄰里鄉黨之積也。老者安之，少者懷之，則王政行矣。以王政而歸於素王，天下之事，真可太息矣。予之記是倉者，不獨樂道君之美，所以重有慨乎王政之不復也〔四〕。君之用心仁矣，其子若孫將世世多賢，其有不能守君之規者哉？斯君之傳固有在也。德祐元年八月日，教授徐公佐記。成化《新昌縣志》卷六，正德十六年刻本。（吳洪澤校點）

〔一〕嗚呼：原作「呼嗚」，據文意乙。

〔二〕素王：原作「素世」，據下文改。

〔三〕周：原作「閭」，據文意改。

〔四〕慨：原作「既」，據文意改。

辛 煜

辛煜，曾官從仕郎、肇慶軍節度推官，德祐元年權容州州學教授。

趙刺史建容縣學記

德祐元年五月

維我宋受命，五星聚奎，秦漢以來學術之陋，至於今純尚儒化，慶曆、熙寧間學校之官遂達天下。容在唐列五筦，國初因之，以節度鎮撫其地。若稽往志，舊學建於郡之東，既而遷之城南，狼藉於景泰暴客之闖關〔一〕，灰燼於咸淳鬱攸之煽焰，典章文物之具蕩然無遺。方冊既毀，前言往往不可復識。前爲守者相度城西高崗，拓數楹而構焉，建置苟而勢傾軋，榛莽雜而迹荒涼，青青乎子衿，達兮佻兮，誰爲之所顧。學雖廢，道終未嘗廢也，剥極必復，否將返泰。太守東蜀趙侯奉聖天子德風惠雨之訓來牧斯邦，當侯度久曠，寇攘矯虔，披荆棘，立官府，日不暇給，閔閔焉軫教法不競，首以學

宮移檄愚陋，蓋將有事於脩泮焉。煜稽舊籍，則積蠹經費粗見其贏，猶懼力屈，侯毅然輟俸以倡其後。於時度材召匠，擇日興工，衆手皆作，晨夜展力。始事於厥冬陽月，遂事於次年正月，克用告成。侯莅學視之，顧予曰：「子之職舉矣，盍紀顛末，以諗來者？」煜惟容之學其來遠矣，賢師帥急先務，力舉而新之，豈但曰廣藏修遊息之所，俾士於此呻吟佔畢釣祿利而已？《學記》曰：「化民成俗，其必由學。」化民有道，自正風俗始，士風又俗之根源也。冠章甫，衣縫掖，名教中自有樂地。處家庭以孝弟，居鄉黨以揖遜，嚴義利之限，顧言行之樞，金玉自將，行著習察，於以企前修而挹淳風，俾自成俗，以究成德之歸，將見咸淳以後之容俊又輩出，選舉連茹，文運復振，成乎亞魁，天下之遺響，乾坤不斷之秀氣，三洞天豈得而闕之？然則侯之修泮，人所能也，而以時考之，感應氣運，無往不復，詎非道之將行，而侯實有大振之歟？侯名若詵，字子振，辛丑春官試第一，今以正六品官容州。體博而用廣，才大而不矜，重義輕財，信厚君子也。煜既承侯之命以身其責，探侯之心以記其事。丁丑〔二〕，德祐改元夏五月既望，從仕郎、前肇慶軍節度推官、權容州學校教授辛煜記并書。

《粵西文載》卷二五。又見嘉慶《廣西通志》卷一三七。（黃錦君校點）

〔一〕景泰：疑有誤，「景泰」乃明代宗年號。

〔二〕丁丑：按德祐改元乃乙亥歲，丁丑乃景炎二年，當有誤。

唐 棣

唐棣，景定、咸淳間爲太學生，德祐元年補承信郎。見《宋史》卷四七《瀛國公紀》、《齊東野語》卷一七。

彗出上書

景定五年七月

大臣德不足以居功名之高，量不足以展經綸之大，率意紛更，殊駭觀聽。七司條例，悉從更變，世胄延賞，巧摘瑕疵。薪茗擗藏，香椒積壓，與商賈爭微利。強買民田，貽禍浙右。自今天下無稔歲，浙路無富家矣。夾袋不收拾人才，而遍儲賤妓之姓名；化地不斡旋陶冶，而務行非僻之方術。縱不肖之駸弟，以卿月而醉風月於花衢；籠博奕之舊徒，以秋壑而壓溪壑之淵藪。踏青泛綠，不思閭巷之蕭條；醉釀飽鮮，違恤物價之騰踊。劉良貴，賤丈夫也，乃深倚之，以揚鷹犬之威；董宋臣，巨姦宄也，乃優縱之，以出虎兕之柙。人心怨怒，致此彗妖，誰秉國鈞，盍執其咎！方且抗章誣上，文過飾非，借端拱禍敗不應之說以力解。亂而至此，怨而至此，上干天怒，彗星埽之未已，天火又從而災之，其尚可揚揚入政事堂耶？《齊東野語》卷一七。（黃錦君校點）

李 森

李森，宋末台州黃巖（今屬浙江台州）人。

書吊丞相立齋先生墓詩後

祥興二年三月

淳祐甲辰冬十一月，公即家大拜，乙巳春赴闕，夏四月薨于位。先是，故相史嵩之既丁艱，朝廷起復之。俄而御筆起劉公漢弼爲侍御史。既入見，首疏史公不當再相，於是三學諸生相繼伏闕，史公卒去位。公時既罷樞密府歸里第，負天下望，制下之日，朝野相賀。諸賢方聚闕廷，天下想望風采，而公僊遊矣。未幾，劉公及祭酒徐公元杰俱暴死，中外汹汹，三學再伏闕，言者遂有丙午厄運之憂。公以是年七月歸葬，所在扶老携幼，奔走聚觀，有不遠數百里而來者，道路往往痛悼嗟惜，以爲蒼生無祿。僕時方十歲餘，具能聞見其事。自是三十年間，局面日異，風聲氣習日下，陵遲至于今日，而大變及之。嗚呼！國家之敗，非一朝一夕之故，其所由來者漸矣。東南衣冠道盡，大較貪、侈、虛、僞四者之習實爲之。僕猶記兒時見鄉之大人行一行，出一言，大抵存名教，顧倫理，雖閭閻下俚，亦有所欲爲，亦或未至於無聊，蓋四維猶未蕩也。向使公大用於是時久，則庶乎約狂瀾於濫觴，扶病脉

於未瘠，而民社猶有賴於一溉之復枯也。惜乎！天不憖遺，而繼之者無復有是清節盛德矣。國家盛衰之機，實決於此。僕幸生公之鄉，又竊忝壻公之門，松楸之蔭，幸被蓬藿。然生也後，不獲拜公床下，以徼福於李文定一日之雅，豈非命歟？歲在單闕上巳前一日，始往拜公新阡，感三庚七巳之有數，而嘆九原之不可作也。作詩敬吊，既痛而書其概于後。《三台文獻錄》卷一三。又見《杜清獻公集》卷末。（李文澤校點）

全宋文卷八二九〇

李肖龍

李肖龍（一二三五——一二九二），字叔膺，廣州增城（今廣東增城）人。咸淳七年登進士第，調贛州司戶，改循州興寧縣主簿，攝長樂縣事。累遷朝請大夫。入元不仕，至元中爲增江提學，助成郡學。曾編輯《崔清獻公（與之）言行錄》三卷（存）。至元二十九年卒，年五十八。見《朝散大夫李君墓誌銘》（《東莞遺民錄》卷下）、《廣州人物傳》卷九。

跋崔清獻公文集後

至元十九年

清獻崔公以嶺海間氣，爲聖代偉人。出仕也得尹之任，應物也得惠之和，遁世也得夷之清。仕止久速，各當其可，其庶幾於聖之時乎！聞其風者油然興，入其鄉者竦然敬。况生公之里，薰其德，挹其馨，客有問公之言行者，而曰莫之知，其可乎？肖龍生而有知，公已仙去，聞諸耆老，語焉而未詳也。因誦後村劉公醇公之文曰：「如公所立，百世猶興。」喟然嘆曰：公平生出處，細行斬斬，大節

揭揭，是不可以無傳也。歷仕官至麾節，功被于遐氓，名震于異域，見諸施用，泰山之毫芒耳。西歸不起，猶曰中堂非伴食之地。端平更化，天子虛揆席延佇，將舉國以聽，而高蹈完節之志堅壁如初，天下莫得以窺其遠識，人有屯施未光之恨。九原不可作也，併與其所可見者晦焉而弗彰，吾黨責也。高山仰止，僕竊有志於斯。昭往哲，垂方來，將求名世屬之筆。世路風塵，前脩凋謝。壬午冬，偶遊寶邑，訪求殘編，僅得一二，哀集詮次，即正於梅先生、李處士，乃壽諸梓。繪畫日月，多見不知量也，聊姑述其概云。俾因公之所以試，覘公之所未試，因僕之所得聞，廣僕之所未聞，猶有望於來者。雖然，求之於世，豈公志哉！《宋丞相崔清獻公全錄》卷九。

自戒銘

怒如炎火，焚燎自傷。觸來勿競，事過清涼。《廣州人物傳》卷九。（以上向以鮮校點）

蹇應祥

蹇應祥，宋末道士，廣州五僊觀觀主。見道光《廣東通志》卷二〇五。

廣州五僊觀古仙詩碑跋〔一〕

古仙舊題：「撥破紅塵入紫烟，五羊壇上訪神僊。人間自覺無閑地，城裏誰知有洞天。竹葉影繁籠藥圃，桃花香煖映芝田。吟餘池畔聊欹枕，風雨蕭蕭吹白蓮。」「元元分古觀，南鎮越王城。五石空留瑞，羣仙不記名。丹砂雖久煉，雞犬自長生。檻簇鰲頭景，門通鶴頸程。煙霞沿砌起，花木逐時榮。古井涵虛碧，深鐘入竹清。芳蕪延野色，寒溜引秋聲。藥竈封苔老，芝田積雨平。風光齊嶽麓，音信接朱明。願得身從此，乘雲到玉京。」

右唐律五十六字、古風五言，紫虛真仙雍熙間所題也。真仙姓古名成之，字亞奭，國初歲所貢，闔一路會試，正薦一人，古君貫廣州增城縣，雍熙元年被薦。洎到南宮，考中第二。張賀、劉師道惡其南人，名居其上，遂於唱名前一夕召古君夜飲，潛置瘖瘂藥於杯中。黎明赴唱名，語不出。太宗皇帝宣諭之曰：「明年再來，必不掩卿。」雍熙四年，又取州解。次年改元端拱，在程宿榜及第。淳化二年召試館職，除秘書省校書郎。聞漢州萃聚神仙之地，授綿竹令，淳化四年到任。遇至人韓泳遺書，啓緘披誦，移寢東廡。自此絕食，日惟飲酒。忽一日，取誥身，於後題詩云：「物外乾坤誰得到，壺中日月我曾遊。留今留古爭留得，一笑浮生萬□休。」寫畢，擲筆於地而卒。縣佐方申其化去，而古君已先至漢州謁太守。後有人見之，嘗往來成都市藥，或涉仙都觀，或遊眉山，或入九隴。熙寧

中，雷霹武夷山石，有字一行云：「古成之於此上升。」舊綿竹邑東門外有古仙亭，張忠定公刻石以紀其事。今廣州之西城有紫虛古真仙祠，迺經略安撫劉尚書重建。比因五仙祠宇復新，謹以真仙所題本觀之遺什再勒翠珉，庶傳不朽云。施工石羣。龍社進士黃宗石、李□□、知觀事卷應祥拜手謹題。進士李□□。林□刻。道光《廣東通志》卷二〇五。又見道光《南海縣志》卷二八。（劉琳校點）

〔二〕《廣東通志》原按：「跋不著時代年月，文中『國初』字、『太宗皇帝』字並空一字書，其為宋刻無疑。文又云『紫虛真仙祠迺經略安撫劉尚書』重建，考《宋史·劉應龍傳》，景定末以顯謨閣待制知廣州、廣東經略安撫使，德祐元年遷工部尚書、寶章閣學士。則所稱劉尚書，當為應龍，是刻當在德祐間矣。」

林元復

林元復（一二三五——？），字仁初，福州閩縣（今福建福州）人。登寶祐四年進士第，時年二十一。咸淳末為奉議郎、知泉州南安縣事。見《寶祐四年登科錄》及所撰《伸蒙子跋》。

伸蒙子跋

咸淳九年正月

右《伸蒙子》三卷，先祖唐宏詞、水部郎慎思所著書也。孔氏沒，諸子百家之言盈天下。至於季

代，如皮日休《隱書》、宋齊丘《化書》，皆傳於世。惟先仲蒙之書藏於屋壁者數百年，雖一志於□□〔一〕，又再紀於皇朝《崇文總目》，又述於夾漈先生《通志略》，而學士大夫猶有未見其書者。蓋其不幸而不生於大曆、貞元之前，與韓、柳諸公以文章之名顯也；又不幸而不生於天聖、明道之後，與周、程諸賢以性命之學著也。然其節不屈於當時，其言可傳於來世，其見錄於太史氏也尚矣。元復世守遺文，日惟廢墜是懼。去歲始至，既刊《續孟子》學宮，迺者詔下郡國采訪遺書，以充秘府，《仲蒙子》之書於是可出矣，復校是書三卷，俾與《續孟》並行。嗟夫，垂憲言以詒後人，仲蒙子之志遠矣，天之未喪斯文也，倘在茲乎！敬書其概，以昭聖朝右文之治。歲昭陽作噩咸淳九年正月朔，奉議郎、新知泉州南安縣事林元復謹識。《仲蒙子》卷首，知不足齋叢書本。

〔一〕此處之缺文，疑爲「唐書」二字。

書先君仲蒙子家傳後

《仲蒙子家傳》，先君茂林翁所撰次也。既刊二書，併以此傳附其後，尚不忘祖父之訓，君子或有取焉。元復誌。《仲蒙子》卷首。（以上刁忠民校點）

田事深

田事深，德祐間人。

金廂橋記

德祐元年正月

直耒江之東八十里，民物阜繁，路徑平直，兩山互相迎送，作翠浪滾滾，見其來，不見其去。中有細流，傾注成澗，澗深且闊，非橋不可通。余連捧臺檄，見有立木伐石而經之營之者，未暇問也。比再至三至，而橋成矣。望之隱隱然，如虹之跨而玉其腰，如鼈之負而金其背，亦湘中一壯觀也。方徘徊登眺間，旁有父老爲余言，此鄉地之總名曰金廂，江廣之路胥此焉出。不半里有市，數百家聚焉。晨雞一號，羣動俱作，其憧憧往來，不但商販者，車輕馬肥，亦無日無之。前是編木以渡，踐之者毛髮爲慄，而春夏尤甚，乃今不然。信矣，鄉之不可無善士也，贊歎靡已。又言，橋之兩涯，舊皆民田沮澆，既買入而增築矣。工昉於咸淳九年之七月，越明年六月橋始成。廣十有五尺，長九十餘尺，總費米五百石，錢一千八百緡有奇。且將屋其上，以圖可久。信矣，鄉之不可無善士也。余因諗其人，則曰金廂李氏也。費出一力，而鄉人不與知。李君應詳其名，家世積德。其子名說，以幼選官

嶺海間邑佐，有能稱。今家食而爲此，庸非明道先生所謂苟存心於愛物，於人必有所濟者乎？井地不均，民風益散，成徒杠，成輿梁，非復王政之舊，而區區於溱洧者，始得以惠稱。橋之利雖少，其所以濟不通，蓋與舟楫等。使人同此心，則東西南北焉往非通衢，何病涉之有？李君來訪，且請所以名此橋者，余以所見所聞質之而信，於法所得書，因摘地名名其橋曰金廂橋，從而爲之記。德祐改元，正月望日，進義校尉、瓊州瓊山縣尉李說立石。光緒《湖南通志》卷四四。又見嘉慶《湖南通志》卷二九。
（曾棗莊校點）

周夢孫

周夢孫，宋末婺州永康（今浙江永康）人。

大園記

德祐元年十二月

德祐乙亥冬十二月望日，邑士夫徵《大園記》，曰：「吾邑柳侯，當時耜耜之際，而能使民姓之安寧，可謂大德及民者耳。慮其已還浦江之莫可挽也，故卜城西大園。因其地，可以居吾侯也；因其鄰，可以侶吾侯也；因其俗，可以無疵吾侯也；因其植物園衛，可以供吾侯之行樂也；因其溪瀨迴

抱，可以孚吾侯降衷之智也；因其山巒迎顧，可以契吾侯固有之仁也；因其或可見之名山，或所存之古跡，可以俟吾侯閑暇而遊觀也；因其或感應之靈祠，或靜深之梵宇，可以俟吾侯遊觀而舒嘯也；因其或左右之闐闐，或東西之都鄙，可以俟吾侯接士大夫而譚道義也；又因其可以充吾侯之至願者，得以瞻石彈之先隴而遂孝思于不忘也。故于其中直取其百，衷三倍之，民競納卷于侯。侯既發俸償價，方而市材鳩工，輦石陶瓦以經始，而民之助者倍之。及成，居室數十楹，前堂後寢，夾以廂廡，迎吾侯處于是矣。謹徵其義。」予曰：「居官以至德而及民，居民以至德而報德，此人情之至願而不可以必得者。何也？昔人居官以德者，金不入囊，苴不入室，蒲以示辱，犢以却廉，其乃處常者之易；詎若柳縣尉之于蘭民人，當檉杙，保安寧，而處變者之爲難。昔人有以德報德者，甘棠之愛，桐鄉之思，留而卧轍，送而饋餞，其乃處小者之易；詎若蘭民人之於柳縣尉，卜世業，建世居，而處大者之爲難。知乎此，始可得以紀其義也。子其知乎哉？」答曰：「得聞，幸也。」予又曰：浙江爲海內大藩，金華爲浙內大郡，蘭谿爲郡內大邑，大園爲邑內大地。夫唯學問有大制作，處事有大力量，治民有大政蹟，庶可以居是大園之大地。柳邑尉讀書之學問有大制作矣，行己之處事有大力量矣，爲治之得民有大政蹟矣，宜其具是大德者，以居是地之大，而無曰大園之大，若郊內四十里之大者焉。盍知民之因之者，乃謂之大耳。民曰，因地可以居吾侯，而地也若城垣，若塙埤，不圯圮，不坎壞，則地可以培柳侯之德而大也。民曰，因鄰可以侶吾侯，而鄰也若郛、鄒，若邠、郇，不鄙陋、不邪邨，則鄰可以祈柳侯之德而大也。民曰，因俗可以無疵乎吾侯，而俗也不傲不僞，且仁且佳，是又可以償柳

侯之德而大也。又曰，因植物可以怡吾侯之情。彼植物而爲木則松栢梧檟，爲竹則筍箝籊篔，爲花則芝蘭葵蕙，爲果則杏梅李柰，是植物可以怡柳侯之情而謂園之大焉。又曰，因溪瀨可以孚吾侯之智，是溪瀨也，若清而渚則澄漪泠澗，若清而流則泅泮沸湧，兩川不息，往來重衛，或深而虬龍潛，或潛而鷗鷺浴，或浩而魚鼈生，或蕩而貨財植，是曲是折而皆可以孚柳侯之智，非其園之大乎？又曰，因山巒可以契吾侯之仁。是山巒也，若崗而嵬則岳嵩峩峩，若崗而墮則嵒嵒含岳，四顧宛轉，千態萬轉，或岵而草木多，或岫而巖穴險，或岷而水泉生，或嶮而殿臺勢，是起是伏而皆可以契柳侯之仁，非其園之大乎？有曰，因名山古蹟可以俟吾侯之遊觀。名山伊何？若曰蘭陰名山，若曰洞巖名山，若曰南佳名山者是也。古蹟維何？若曰義莊古蹟，若曰擂鼓古蹟，若曰披雲古蹟者是也。山也，蹟也，他日而柳侯之遊焉觀焉，得以豁吟眸于海外，此園之所克者大也。有曰，因神祠梵宇可以俟吾侯之舒嘯。神祠伊何？若曰嘉應神祠，若曰忠祐神祠，若曰仁惠神祠者是也。梵院維何？若曰聖壽梵院，若曰能仁梵院，若曰保寧梵院者是也。祠也，院也，他日而柳侯之舒焉笑焉，得以吐豪氣于天表，此園之所廓者大也。有曰，因所入之闐闐，因所往之都鄙，則吾侯可以接士夫，合和好矣。侯也他日遊闐闐，則有闐有闐，有閭有閭；他日過都鄙，則有鄙有衢，有鄙有鄆。邦名地傑，士夫之多，若皇祐范先生隱之，嘉祐江先生巨源，元祐范先生安禮，大觀潘先生雅明者。話今古以投機，講聖賢而樂意，曰川流，曰敦化，小德大德，發而爲聲，存而爲息，則居大園之和好，莫有大于此矣。民之情又云，園可以瞻先隴者爲之至報。噫，民知侯之心者歟，故其報之者在于斯歟，又何也？侯，浦人也，而來

尉于斯，迎祖父就養而憾其終于斯，因途戈莫返而又竊柩于斯，是宜蘭民援柳侯之居于斯，而俾其克盡春秋之孝思于其斯也。噫！蘭之民人也，知其一而不知其二。獨不念浦之祖而非爾侯之祖乎？而胡可以寘之于彼而不顧乎？非也。蘭之民人處柳侯之兩難，其顧彼而忘此不可也，顧此而忘彼亦不可也。度其禮而以其親親推之：蘭之墓，父也，祖也，服隆也；浦之墓，曾也，高也，服殺也。矧夫在于浦者則子嗣森森，而非若蘭之始居者之子子矣。與其顧于彼，孰若顧于此而親其所當親，重其所當重耳。噫，誠哉，蘭民人知柳侯之心者歟！故其報之者在于柳侯之心者歟！然蘭民人以德而報柳侯之德，于其所因之目有十，大則孝思，次在講學，而其涵仁養智以至于舒嘯遊觀之事則又其次者，而謂大園之美大矣夫！侯名叙，字元德，咸淳丁卯右科進士金之兄弟。其徵士夫則盧君栗之。予之記之者，永康周夢孫也。《金華文徵》卷五。（沈治宏校點）

全宋文卷八二九一

何夢桂 一

何夢桂（一二二九——？），幼名應祈，字申甫，後改名，更字巖叟，號潛齋。嚴州淳安（今浙江淳安西）人。咸淳元年進士及第，授文林郎、台州軍事判官。尋改太學錄，遷博士，通判吉州。入爲太學博士、監察御史，遷軍器監。帝昺即位，爲太府卿、大理寺卿，引疾去。至元初，授江西儒學提舉，不赴，著書自娛。有《易衍》、《大學說》、《中庸致用》、《潛齋文集》等。見本集卷一〇《王石澗臨清詩稿跋》，何淳《何先生家傳》（《潛齋集》附錄）。

傳世《潛齋先生文集》十一卷，乃明成化中夢桂八世孫淳以舊本編纂刊行。今以文淵閣四庫全書本《潛齋集》爲底本。此本含文七卷，又輯得集外文一篇，仍釐爲七卷。

通徐宅聘啓

某啓：伏以瓊霏瑞臘，玉蕊迎年，共惟某官大呂斲幽，嘉平燕酒，穹屋翼扶，台候動止曼福。某

肅修函牘，奏記史籤，惠徼鑑省。

某啓：爲江天雪宴，水澤冰堅，修祀蜡以佐陽，磔土牛而驅凍，惠綏天序，茂介時禧，式副善頌。

具位某。右，某伏承某官以第某院愛玉孺封與姪某爲婚者啓：言念桂府元戎，再世之金貂猶在；柏臺御史，十年之白簡已陳。人言草木之味同，天俾絲蘿之好合。恭惟令愛玉孺封公宮蘋藻，女誠素閑，而姪孫某家學箕裘，父書粗讀，未能種世間之雙璧，敢意牽屏下之一絲。特以兩家等爲忠厚之門，而又累世未墜詩書之澤，爰得蹇修之借重，遂令晉向之干盟。薄纈玄纁，肅隲采徵。擇壻不必門戶，山公固是奇人；娶婦毋論貲財，涑水尚存好樣。一言金石，百世葭莩。謹專人奉啓申聞，伏惟台慈俯垂鑑念。不宣。謹啓。《潛齋集》卷一一。

前啓有劄子

維時蜡樽紀臘，幽雅祈年。恭惟某官晞髮陽阿，乘虬縣圃，有翼有嚴，台候動止萬福。某謹魚香搢笏，贊名氏于下執事，惠徼鑑省。

惟四時代序，天地冰霜，肖翹者萎，蟬動者蟄，納燠祛寒，所以惠天時、迪人事也。至於游息溫元，太和磅礴，其糠粃猶是陶鑄陰陽，煦嫗動植。區區節宣之禱，謹不敢爲二御瀆。

某惟層城天峻，莽渺無極，思欲褰雲旗，曳月裳，以周旋下風。莎夷復隔，余懷渺渺，日折瓊枝。

竊謂斯文年來凋瘵，談詩書落落如晨星，兒曹庸碌，袖中佔畢，固不保其他日之遺忘也。每願儒閥托爲婚姻，有婦翁如樂廣、婦黨如李膺者，使之濡染道德，庶幾不墜弓冶。比介中齋先生偕竹林諸阮居中之援，妄意第二院愛玉孺封與某請昏焉。政以徼福斯文，輒犯不韙，敢圖高誼略去齊鄭大小之分，降心而許之盟，今而後敬仲有後於媯氏矣。穀旦于差，謹奉筐幣，以贄初虔，惠敦永好。載命行簡，敢弗于從。辱泣成盟，使百世宗祏永有依歸，某敢重拜。伏楮凌兢，仰干台照。

端肅加拜，申詞令嫂親家、伯孀宜人壽躔，明炯判闔親家宜人淑候清寧。以次竹梧蒼翠，蘭玉芬馨，霞靄烟霏，何鄉非福。荒村有委，聞命敬共。《潛齋集》卷一一。

請婚于方宅劄子

揆辰十月既望，七日方來，恭惟某官有直大方，爲耆壽俊，靈修貺止，福履將之。某髀肉已生，頭顱可笑。意怠姑廁群飛之列，鷓鴣幸棲君屋之巢。俯啄無驚，舉頭知自。載肅尺書之素，惠微一盼之青。

少壯相期，幾從鞭弭；老來無似，莫逐鞶韞。徒瞻峻閱之凌青，敢望層樓之倚翠。欽聞某人令愛

玉君封毓秀金閨，尚闕月下老人之籍；而某姪孫某玷名璧水，慙非監中舉子之材。比借重於斧柯，願依榮於玉樹。蕞爾小國，齊侯固非鄭之敢昏；念我先人，康公實爲晉之自出。葭版之盟猶在，藍橋之好方新。儻降心以相從，敢拜手而重請。程伯淳羣居庠序，或見取於彭公；王逸少獨坦廂牀，必無嫌於郗氏。願徼大惠，俯泣初盟。肅贄寅恭，伏祈丙鑑。

肅瞻環珮之仙，藐在羣玉之府，元吉所萃，勿問已孚。有飢役乎，必恭敬止。《潛齋集》卷一一。

贈李景雷序

地理家有李子景雷者，家世是業。其伯父良玉，挾錦囊游諸貴公之門，爭羅致擢用，景雷得肘後訣。余於三十年前早識之，從余游至今如一日。其爲學刻苦自勵，於古地理奧僻書有未解，忘寢食求之，弗得弗措，繇是所業益精。其與人交不苟得，不爲欺僞；其不合，寧不唯以去。將挾所得，以汗漫四方，請余言。余謂士大夫讀聖賢書，學聖賢道，學言與行不相顧者，或不免焉。況以一技自名，其志將以求食。至於依阿取容、顛翻希合者，往往皆是，如斯人者，真陰陽家之墨守也。子持此以往，焉往而不遇哉！於其行也，贈之以言。《潛齋集》卷五。

分陽何皆山序 名錡

皆山何君正則當年壯氣盛時，以宦業自期，汗漫半天下。暮年倦飛，將絕迹息影，以歸休乎山樊。屬邑市災逮其居，平生蓄租與燬俱燼，仰而歎曰：「吾家無廬，吾業無書，吾其托宿於黃帝之囿，假道於老氏之塗歟。」天目山之東有宮焉，曰生仙瑞慶，蓋天師第一代祖降靈之所也。一日訪舊，因止宿宇下，夜半神交，恍惚中若有所遇焉。此豈前生宿緣，嘗鞭鸞笞鳳，以從祖師羽蓋霓旌於金庭玉宇之下，今謫業已盡，當復返其故耶？明發振衣，裴回周覽，竊喜而計曰：「此吾菟裘也，吾老焉於此矣。菑畲畎畝，將爲子孫播穫者，輟若干以附益諸宮中，所以引養吾餘年也。」士章甫逢掖，學爲孔氏，推其餘猶將大芘生民，使棟宇宮室，絲枲粟粒，舉不失其所。乃有自不得所，蓋藉而逸歸於老氏者，道之隆污，豈固有時耶？吾以是重爲皆山三歎也。皆山以書來，道出處，且徵余說，於是乎書。《潛齋集》卷五。

送方次山序

方君次山一日携短軸訪易菴散人於萬山中，謂之曰：「余始也輕以出，於都邑無所遇，名公大人

有賦《伐木》勸我以歸者。歸矣而又無所依，好事者則又誦司馬子長序說我以遊。橫於兩端，進退無所擇，吾其爲塗中之曳龜乎？爲道旁之髑髏乎？」余聞其言而悲之曰：「嘻，甚矣，吾次山之窮也！上天下地之宇未始有極也，以吾次山浮遊其中，不似壘空之在大澤乎？奚用戚戚若是！鳥莫小於鷓鴣，莫大於意怠。鷓鴣之畏夫人也，雖落其實而不敢給視，然不免襲諸人間；意怠之於行列也，引援而飛，迫脅而棲，然免於害。子其逍遙以遊天地間，則傾蓋之雅，杯酒之歡，皆吾友也，奚必歸睨舊業，指爲陸氏一莊乎？子持吾說以往，當有卒然相遇於子所不期然而然者，子何患焉？如曰今之天下皆龍蛇也，皆虎豹也，將無所於避，不知龍蛇虎豹滿天下久矣，子何避之晚乎！」《潛齋集》卷五。

玄學史提舉序

四明人，轉委徐雲墅求序文。

存初高士提舉玄學史志潛，宋故參相雲麓之子、衛王之孫、越王之曾孫也。夫以三世勳德，其鼎銘載在盟府，子孫金貂華笏，錦裘羅襦，其與黃冠羽衣固有間矣。采懸溜，家鏡湖，昔之人視棄官爵如棄敝屣，人固有自見也。楚大姓昭、屈、景也，其食於楚非一世矣，屠羊說之肆豈重於楚王之國哉？故大第高門，穹官膺仕，安知非造物者之拘拘也？犛牛之來繫，文狸豐豹之來田，角與鞞爲之災耳。吾釋然去之，吾非詭異以求絕世也，是謂帝之懸解也。吾返吾素，抱吾朴，吾與天根日游於殷陽，吾觀吾身且猶蛇蚺蜩翼，况其他乎？余故謂君天下智人也。老氏謂仁義爲先王之蘧廬，君今毋乃

以老氏爲蘧廬乎？余方襲諸人間，竊高下風爲之書，君當亦爲一莞。《潛齋集》卷五。

劉可隱序

余卧病山中，杜門謝客久。有客叩扃入，曰潤甫劉君，號可隱，蓋宣司檄按行郡邑掾屬也。私竊怪之，謂：「君方有事一世，而以隱自命，毋乃不可？請試問君可隱之義。夫當其可之謂時，孔子聖之時者也，可仕則仕，可止則止，可速則速，可久則久，此聖人所以無可無不可者也。世之隱者則不然。巢由可老死於箕山，而不可一畝揖遜之水；夷齊可餓死於首陽，而不可一啖征伐之粟。彼雖未必盡合乎中行，然其隱居求志，確乎其不可拔，蓋千萬世四人而已。君將爲四子之隱乎？抑將爲夫子之仕止久速無可無不可乎？」劉君矍然起曰：「子言何居！夫子之不可及也久矣，四子之事抑可易言哉！姑置可也。吾以魯男子之不可，學柳下惠之可，斯爲善學古人者。夫有際可之仕、行可之仕。際可、行可，吾仕可矣，吾固未信吾之可否也。不可則止，吾如彼何哉？吾返吾故，有田可秣，有園可蔬，釣水可魚，采山可茹，白石可漱，清泉可枕，吾俯仰取之無不可，則吾可隱，豈不綽綽然有餘裕哉！」余應之曰「可」，書以贈其行。《潛齋集》卷六。

雷陽父序

武當山介均、房兩州之間，鳳鸞巋然於武當之後。清秀泠飈，朝霞沆瀣，峻絕不可攀企，蓋人迹之所罕及也。方外士雷陽父年十五辭謝交舊，躡其巔而廬焉。居六年，忽焉若與神人遇，授之神符、《易》象數，使之下人間活衆生，俟十年盡責業而後至。陽父歸試其法，則麾叱鬼神，噓呵風雨，無不如意，至於談吉凶、驗福禍，特其遊戲餘技耳。誠若是，亦異矣哉！桃源何許，世異晉秦，丹霞如故，不知桑田滄海至今幾變。神仙渺茫，不可復詰，鳳兮鳳兮，吾衰久矣，安得高歌以從楚狂之後邪？明年春，陽父將行踐前盟，於其行也，爲之書，以識他日。《潛齋集》卷六。

送思院如杭問仕序

前文思院景文姪，咸淳乙丑科出榜下。時年少氣盛，如驂騮出東華門，將奔宵逐景，一日千里。命與事違，今猶夫人也。堂有偏慈八十，貧無以養，仕時乎爲貧爲養也。曾子逮親，雖祿三釜而心樂。邑校升斗，不足濡煦，其爲養抑末矣。士窮至此，則出疆載贄，皇皇焉固不暇計。茲將西嘯以干王公大人，庶幾一盼，幸而得三釜遺，出所望升斗之外，以奉餽粥，亦既多矣。當代諸明公當路，方

弘萬間、芘寒士，使風雨無恐，其視子猶醢雞，豈靳太倉一稊粒哉！子姑往，當必有遇。若曰不由其道以苟利祿，有畔於聖人之教，則非老夫所望於吾子也，寧死無仕。尚其勗哉！《潛齋集》卷六。

何貴德遠游序

天地一爐，萬木焦死，葛衣流汗，思坐水底爲秋菰寒玉不可得，襜褕觸熱，以奔走畏途，嘻，其甚矣！夏六月既望，族子驥將有遠遊，業扉屨已在堂下〔二〕。先數日過門，將乞言以行，予以前說告之，不可，曰：「子行矣！抑世豈無有尋園之木植諸道旁，疏冷風，散靈氛，雖結駟千乘，猶將芘其所賴，況子一身猶蜉蝣螻蟻而託焉，木豈厭擇而拒子哉？子姑持此以往。」遂爲之書。《潛齋集》卷六。

〔二〕扉：原作「扉」。按扉，隱也，義不合。當作「屨」，履也。據改。

宋梅堂干人營後事序

梅堂一日過我，語間貌若甚戚者，歎曰：「余老矣，死不足計，獨未能如漆園叟之厚烏鳶螻蟻，至如劉伯倫荷鍤相隨，亦未知所於止。黃腸銀鏤，夢不及此，雖布被懸棺，斂手足形，亦非空談可

了。若此，固非蚤計者之爲也。士大夫樂善調急固多，然不得知我者一言，則雖輕貨易撼者固亦難矣。君其愛我，儻不愛其言，庶乎仁人君子當有動心者。」雖然，空言不足以感人，謾掇己先之，遂書以贈。《潛齋集》卷六。

寄項月齋

項君月齋疾緩且瘳，借或人問答之辭以自廣。客有持以問潛齋道人曰：「達矣乎？」曰：「幾矣，猶未離乎造物之囿也。夫大塊埏埴，囿我以形，故目能視，耳能聽，鼻能嗅，口能言，手足能舉履，凡皆形也。夫形必有非形者，故視聽嗅味、言語舉履不在耳目鼻口手足。於此會得，將有千手從爾身根迸出，千口從爾舌根迸出，方將與萬事萬物泛應而不窮，又奚以此一臂與三寸舌徇徇之憊哉？」客曰：「唯，請持以復月齋翁，病庶其有瘳乎。」《潛齋集》卷六。

李學正遠遊序

李君忠甫舊職教吾邑，別去再來，問仕進則鄙學正，亦既踐更，問所如往，則將奉保剡趨上京。上下五年間，君之修程如展驥千里，亦壯矣哉！試問君揚州鶴與腰纏何在，曰：「政將借羽翰於舊識

故交，吾將以千金買解飛人，則朝遊扶桑，夕濟西澨，焉往而不利哉？」余喜而起曰：「君行矣，伐木未亡，必有爲君動心者。」書此以贈。《潛齋集》卷七。

送王德父遠遊序

樵隱王德父將遠遊，來別，求贈言。余問樵隱：「游將焉求？豈將汎臨淮，望如魯子敬指米困三千斛邪？抑止下姑蘇，覬有如范堯夫者惠麥舟五百斛也？」樵隱勃然曰：「君奚鄙我，我豈爲彼哉！大丈夫生天地間，不見天下名山巨川，不識當世名公大人，爲虛生虛死，吾爲是故游。使吾爲三千里困、五百麥舟而若是栖栖開口告人，鄙亦甚矣！吾將跨揚州鶴，闊視四海，買新豐酒，濯足高歌，視一世人物，將不可概數，豈無傾蓋相歡者。則吾耿耿者，將無往不在，豈不綽綽有餘裕哉！」余聞其言而壯之，曰：「子持此以遊於世也，雖無求於人，安知人無求于子者。子行矣！」姑爲序以贈之。

《潛齋集》卷七。

贈石崖姪孫序

羣從姪孫石崖子還里展墓，暇日相從問學，語及《中庸》，余曰：是善學者。《中庸》蓋子思子所

得於孔門之至深切著明者也。法筵第一句曰「天命謂性」，又一篇之至深切著明者也。知得天命謂性，然後知率性之謂道；不知性，則所謂率者爲何事，道者爲何物耶？孟子傳於子思，故其言曰盡心、知性、知天。能知性，而後爲真知，不然口耳焉爾，何益哉！三尺之童授之句讀，孰不能口誦《中庸》，問其所謂性，不知也。今世學者膠於口耳，曰「我知性」，此與三尺童子何異。人有羣聚觀畫虎者，孰不曰我知虎之形狀盡於此。一人者觀之，爲之色動神變，蓋嘗真見虎者也。子思子言性，猶畫虎也，即指畫虎爲真虎，非真知性者也。天付予於人性，非由外鑠我也，故凡四端五常，萬事萬物，皆從一性中流出，人之日用之而不自知者，滔滔皆是，亦可哀也已。子其於此體認切己，真知親見，使天命之性昭昭靈靈於日用間，則縱橫變化，無往而非《中庸》之道矣。所謂吾道一以貫之，若曰文字而已，則非吾之所謂學，而《中庸》之書亦糟粕爾。子其勗哉！他日有得，當信余言之不爾欺也。愚聞之子思，子思聞諸夫子，若此而已。將行，書此以贈。大德庚子六月朔日書。《潛齋集》卷七。

送翁炳翁序

余一日山中讀《易》，至《繫辭》窮理盡性至命，有客過門，問其能，曰：「吾嘗受《易》於吾父，售於世不遇，姑挾《列子·力命》之說以餬其口於四方。」余延之坐，語之曰：「子知《易》，即以吾所讀《易》與子言命，可乎？夫大塊載我以形，勞我以生，豈私富貴貧賤我哉？至於不得爲而不

得不爲者，命也。毀於叔孫，厄於陽虎，絕糧於陳，伐木於宋，仲尼豈有以致此哉？制於命者然也。苟制於命，則凡所以富我貧我，貴我賤我，聽之天而已。我以喜怒哀感介於其間，爲不受命者矣。至於天之所以與我者，則不以貧賤富貴爲之損益，此《中庸》所謂『天命之謂性』是也。於此窮理盡性，即所以至命矣。今安知子之說？又安知子之師所謂列子者邪？子謂子之《易》不遇，將易其術以幸其或遇，不知子之命然，雖百變而術，猶子之《易》也。子其歸返子業，復取父書讀之，以待時之或遇，其庶幾矣。」客躍然而起曰：「命之矣。」求余爲序，於是乎書。《潛齋集》卷七。

胡季聲序

昔范公堯夫過姑蘇，運麥舟五百斛，適有父執之親喪未舉者，悉以所載麥與之。蘇公子瞻居家絕祿，會有舊友之親喪未葬者，亦輟縑一束贈之。以二公所惠多寡不同，而其敦故舊、厚喪葬之心則未嘗不一也。郭溪胡季聲，二親久在淺土，欲畢襄大事不能。雖斂手足形，稱家有無可也，然封之四尺不爲過，亦期少悅人子之心而已。俯仰偏側，皇皇焉若無所赴告。內之比閭黨族，外之親故，親者毋失其爲親，故者毋失其爲故，尚忍使吾季聲窮乏至此，而不得盡於其親乎？輒序古誼，以介其行，季聲持此以往，當有爲之惻然動心者矣。《潛齋集》卷七。

全宋文卷八二九二

何夢桂 二

白鷗詩盟序

一日，有客款門，右手挾黃冊，左手持丹雞，請於余曰：「吾將與諸生尋詩盟，敢載冊敵雞翼。君爲盟主，尚泣斯盟耶？」余語之曰：「詩難，子將於何詩？」客曰：「君不見劉禹錫《玄都篇》與白樂天《新井篇》，轉喉荆棘，抑世之黃間固紛紛也。吾求天地間無心可與爲盟者惟江上白鷗，白浪蒼煙，浩蕩萬里，興亡理亂，榮辱毀譽，一不與人世預。吾將相從浮游，以寫宇宙萬物之所自適，何如？」余矍然起曰：「子將此與鷗盟，鷗必無子疑矣。顧余方乘莽渺，游混茫，以天地爲一鷗，尚復能爲江上主人哉！」客曰：「唯命。」《潛齋集》卷五。

清溪吟課序

《詩》始三百篇，其上公卿大夫，其下樵夫賤隸，其性情之所發，皆得以託於詩。古詩逸，五言始李陵，七言始沈宋。詩非古意，去古猶近。科舉興，併與五、七言俱廢，士非阨於山林，逸於湖海，與夫矢志於朝廷之上，而竄逐遐荒者，不暇於詩。清溪詩友暇日有詩課，蓋其不用於舉子業，而用於詩。夫春雨時至，草木怒生，銚耨迺芟，而倒植者過半。斯文在天地間，未始一日泯滅，輟於彼者，此或茁焉，生意固無往不在也。雖然，詩未易言也。玄默敦牂歲夷則月朔日序。《潛齋集》卷五。

邵梅間詩序

天地冰霜，萬木凍折，而冰姿鐵骨，玉蕊瓊英，傲然獨出於萬物之表。故於是時，上下塵世無一物得與梅齒。其清徹寒絕雅宜在梅間者，惟雪與月。清溪有詩人，癯然一髯翁，江空歲暮，顧影無儔，獨於梅花樹下，抱膝浪吟，醜酒酌花，若將與雪月分席者，因自號曰梅間。夫風塵澆人，滿目皆是，踉空足音，跽然以喜。梅雖無言，余必知無拒子也。潛齋何某爲作《梅間序》。梅間邵之才，字德翁。《潛齋集》卷五。

唐月心詩序

西風萬壑，明河在天，水月相涵，上下一碧。有客扣門，曰：「月心。亟起揖入，坐之月下，曰：『吾方醺酒邀月，顧影躊躇，自謂三友，曠絕塵表。子以是心至，尚相與酬酌以問，子所見月，與我同否歟？』我歌月徘徊，我舞影凌亂，太白所見如此；『只益丹心苦，能添白髮明』，少陵所見又如彼。二子之詩，其趣况不同，相去遠甚，豈其見月本異，抑月同而境異，境同而心異歟？古人今月，今人古月，同歸流水，不知雲衢海嶠，子之所見，何似昔時，還與此山松間竹外同一光景否？子爲我速道若見，見同則月同，不然，則吾與子猶二月。」月心不答，袖出詩稿曰：「月盡在是。」余蹶然驚喜，爲之展卷長歌，歌罷長嘯曰：「子去，我醉且卧矣。」一揖而別，蓋明月猶在天津析木間也。至元癸未秋八月序。《潛齋集》卷五。

金玉詩序

棋溪徐君奇之一日訪余於雙溪之上，袖出《金玉詩集》，曰：「此蓋所以搜采名公鉅卿、騷人墨客之所吟咏之瑰章傑句，將以爲家庭惡稿借重也。世謂至寶，萃在是間，方托諸梨棗，以與好事者共

之。然麗水之金，遇善冶而後貴；荆山之玉，遇善琢而後珍。長編巨帙，富則富矣，而文價高下，視君一言以爲軒輊，何如？」余應之曰：「子言過矣！良金美玉，自有定價。使余亡言，豈能使黃金爲土，白玉爲石哉！抑通都大國，萬金之所儲，羣玉之所積，其色如黃龍，氣如白虹，固有連城不足以易者。至於鑿鏐鉞，瓊瑛琳琅，橫陳而錯出者，殆非一品，豈必盡與裹蹄麟趾、金名。懸黎結綠玉名。同價？天下有目者，隨其所得皆寶也，余何言哉！余何言哉！」棋溪曰：「唯。」於是乎書。《潛齋集》卷五。

汪斗山詩序

嘗聞丹崖石柱多有奇人，恨不得泠然御風，汗漫其間，以誦李翰林丹砂白鶴之句，黃屯田黃精青鹿之篇，嬖姍易菴中。一日，有客汪君得一履戶外，挾詩冊升堂，與之坐，目擊道存，固已見溫伯雪手。旋取其詩讀之，則意圓而語澤，骨勁而神清，似其人。時方采菊籬下，因漉巾醜酒，與二三友共歌之。南山在望，西風襲人，亦柴桑中一大快事也。歌罷，爲之序云。《潛齋集》卷五。

邵西坡詩序

客有挾西坡邵君詩踵門者，余讀而喜之，因徵余序。余曰：「序姑俟他日。」客三四返不得序，且怒去，余曰：「毋怒，且止，余有癖，余非靳序也。余有道癖，方其有事，尸坐一室，吾視吾鼎中雄陽玄施，雌陰黃包，方滴滴狎獵起，吾何暇序？及其無事，又有懶癖，破緼蒙頭，曝日簷下，方熙怡怡，休休于于，嗒然忘吾之有四肢，亦何暇序？無是，則又有世癖，經生學士，談詩說書，劍客棋翁，鳴楸彈鋏，坐觀卧聽，更僕未已；倦則杖履臯田，與畊夫芸子、樵童牧豎相爾汝，逮暮而後返，吾又何暇序？必俟吾三癖盡去，然後取西坡詩，燕坐讀之，如親見其人，使吾所欲序西坡者橫潰突出於吾胸中而不可禦，而後使童子研墨，濡筆亟書，則序可以拱手得矣。今吾癖未去，而子亟吾序，故序止此。子持此以語西坡，可乎？」客笑曰：「此君自序，非序西坡也。」余曰：「子持此去，非序西坡，實與西坡作詩法也。使能於吾言下領會，不惟西坡一大公案，東坡復生，亦當印可。」《潛

王樵所詩序

先輩謂杜工部以詩爲史，韓吏部以文爲詩，繇其胸中儲貯博碩，然後信筆拈出，自成宮商，非抉摘刻削，求工於筆墨言語以爲詩也。太白豪放發於氣，郊島窮悴迫於時，降是無以議爲矣。近代坡詩，如駿馬詭銜，不可羈鼻；山谷、後山詩，如風天秋隼，霜崖枯槎，不可攀企。要皆各得其所，得，自成一家，尚論譜緒，當不在昔人刪後也。邇來詩社豪雋，疊見層出，豈能多遜諸賢下耶？然至於氣彫意耗，骨弱肉浮者，或未免如沈休文所謂八病，釋皎然所謂六迷者也。樵所詩，思婉以清，語勁以澤，不惟後輩當望避三舍，使休文、皎然及見之，固當印可。繇是進進，使之橫驅長騫，迅掣高騫，出意趣於尋常言語筆墨之外，吾當問子於韓、杜諸公壇上矣。《潛齋集》卷五。

題胡直內適安集

胡君直內挾詩冊過余，題曰《適安》，請余言。余謂：「子苦思於詩，將不免飯顆山之譏，亦奚安之適，而自謂若此？」直內曰：「人徒見吾之爲詩苦，亦孰知吾之有詩樂哉！夫羈臣寡婦，細夫窶人，其憂思感憤之所鬱積而發於怨刺者，若甚苦矣；至於尸居環堵，抱膝微吟，得句則曳蹤長歌，聲

滿天地。凡世間富貴貧賤，利害得喪，可喜可慕，可悲可感者，一不入於吾心。夫孰有以易吾之天樂耶！故其所適，適此而已。」余蹶然起曰：「詩抑末耳，斯言也，其幾於道乎。尚其勗哉！」《潛齋集》卷五。

文山詩序

生而不屈者，氣也；死而不泯者，心也。氣之不屈者，忠義而已；心之不泯者，亦忠義而已。忠義之道，塞天地，冠日月，亘古今，通生死，而一之者也。宋丞相文公平生文章在方冊，官爵在史書，皆不足爲公道。德祐乙亥，天步阻艱，朝野駭震，公從江西率子弟七千人勤王於京師，事之不濟，天也。間關奔走，卒爲繫囚，奉首朔庭，萬折不變以死。古今死節，惟以一顏、張、許爲稱首，然兩軍交綏，不勝即死，無可擬議者。至於紓之以歲月，錮之於不能進退之間，宗廟且不血食，使回顧却慮，而爲身後子孫雞豚霜露之計，鮮有不屈膝者矣，而猶若是，真古今忠義士也。沙場青冢，千古南音，其所流落人間者，惟有流離中吟嘯《詩史》，與狴犴中《杜詩集句》耳。使人讀之，至今凜凜有生氣。嗚呼！公真死矣，不自意其死後猶能以詩寫其平生之耿耿而未盡者乎？豈公果不死乎？一點烈烈者，無在不在故也。天地無窮，事會無極，有能起生魄於九京之下，非公，吾誰與歸？生芻一束，醢酒北酌，爲之序云。《潛齋集》卷五。

本心先生疏食譜序

客有問本心先生《疏食譜》於門人何某者曰：「先生固嘗長丹屏、貳黃扉矣，饗人膳夫，宜有致天下滋味以自奉者，而日食若此，毋乃太簡乎？」曰：子非知先生者也。世固有一食數萬錢猶若不足饜者，此所謂肉食人也。司馬溫國、晏元獻二公仕至宰相，癯瘠如未仕時，此其志趣豈直食前方丈而遽易其平生之素者哉！若然，則蔬食菜羹，啜菽飲水，固有甘於三牲列鼎者矣。予從師門久，暇日見其焚香燕坐，對客清談，時瀹清泉，美荔丹，漉玉塵，餌青杞，以餉在座者。使當時有飫羊豕、嚼乳酪者得借一筋，猶將爲之洗滌腸胃，况先生玉雪其人乎！故未嘗一及先生之門，而親見其人何如者，固未信《疏食譜》爲炮牂淳母也。唐侯舉師善面受先生錄譜，將與世之知味者共之，且徵余言，敬拜手爲之序。時柔兆掩茂歲夷則月望前三日也。《潛齋集》卷五。

俞竹屋詩序

凡物有詩趣，而物之潔雅靜逸、迢絕塵表者，莫如竹。老坡詩仙，平生得意句，正謂「不可使居無竹」耳。俞仲疇妙齡工詩，人不知其詩趣所自得。仲疇築吟屋於山中，環萬玉於其外，日與此君周

旋，觸目會心皆趣也。春宜雨，色娟娟然；夏宜風，聲泠泠然；秋宜月，影刁刁然；冬宜雪，節蒼蒼然。仲疇室於斯，詩於斯，故其得句也秀以貞，澤以勁，誦之而其音清越以圓。想其成詩，遍題竹間，使文與可及見之，真篔簹谷中一幅奇畫也。君其斲竹爲洞，結竹爲樓，暇日嘯咏其間，當日益高遠。他日直造竹所，與君商確古今詩未晚。姑序其篇端，以識初識。歲在旃蒙作噩中呂月晦前三日。

《潛齋集》卷五。

吳仲遠詩序

九仙山下有詩人曰吳仲遠，詩聲在吳會間。友人唐師善挾詩冊示余，徵余序。余讀之喜曰：「杭東南奇勝，固詩人之多也，抑知余有感於杭者乎？陌上歌謠，坡仙遺墨未乾也，不知萬錦軍前駟車猶無恙否？梅邊吟咏，老逋香句未歇也，不知孤山林外高臺尚復存否？錢塘之潮汐吐吞，吳山之煙雨出沒，不知騷人墨客尚有登高眺睨，觸景徘徊，悲嘯酣歌，噫嗚泣下而不能去者乎？此其詩思豈直在灞橋風雪、春草池塘而已！子試持問仲遠曰奚居。」師善曰「諾」。歲旃蒙作噩中呂月晦前三日序。《潛

齋集》卷五。

永嘉林霽山詩序

名景熙

永嘉舊同舍郎霽山林德陽不遠數百里寄詩冊，屬嚴陵潛齋何某商略近詩。三復唱歎，竊於詩之變而有感焉。方庠序羣居，高談闊論，不過頌《猗那》，歌《清廟》，誦《魚麗》，《天保》，《鳧鷖》，《既醉》之什，變風變雅不忍言之矣，况復齒及魏、晉、梁、陳以下窮苦愁怨等語，如細夫窶人、羈旅寡婦之爲者？相望十年間，而士大夫聲詩率一變而爲窮苦愁怨之語，而吾霽山詩亦若此，世喪文邪？文喪世耶？古今以杜少陵詩爲詩史，至其長篇短章橫鶩逸出者，多在流離奔走失意中得之。霽山詩僅見三十篇，其辭意皆婉婉悽惻，使人讀之，如異代遺黎及見渭南銅盤、長安金爵，有不動其心者哉？夜半壑舟，有力者負之以去，飛鴻印雪，爪距儼然，吾是以重有感於霽山之詩也，吾是以重有感於詩之變也。時至元丙戌夏五望前三日序。《潛齋集》卷五。

鮮于夫人李氏手帖序

伯機鮮于氏，中原文獻家也，持其故太母夫人李氏手筆，與夫縉紳先生之女傳詩史，徵序於當世之能言者，曰：「此先人所以屬諸孤也，尚託一言，以載不朽。」夫人夙遭閔凶，間關兵盜，夫沒，

二雛呱呱，拮據將茶，以免於育鞠。末年亂離顛沛，幽路遭徊，而玉質冰心，烈烈不泯以死。厥孤子初僅能奉持其夷居手抄《屏山歸田》十詞爲連城完璧耳。未幾蘭亭繭紙，流落人間，幾不可復詰。子初易簣，詔厥子曰：「夫人書在，必得是，以無忘吾在莒時也。」歲月云邁，悠悠我思，我須我友。一旦有以枕中故藏歸我伯機者。生前遺墨，手澤如新，黽黹藜藿之墟，聞似人足音以喜，况焄蒿悽愴，若有優然以見乎其位者，有不一動其心乎？君子是以重歎夫一門而孝義之道四也。夫人爲婦而節，爲母而賢，子初孝子，伯機慈孫，於以敦彝倫，媿教化，興起人心，而愧死天下後世之不盡其分者也。天高地下，萬古無窮，人極不可以一日不立，故書著媿泐，詩詠凱風，貞節孝行，傳於國史，要皆勸善懲惡，繫三綱於不墜而已矣，豈直觚翰云乎哉！持此以往，他日當有執彤管、書汗青以補史官之缺者，尚俟余言。至元二十四年歲在丁亥春二月既望序。《潛齋集》卷五。

柴謙山詩序

謙山柴聲伯，故同寮從子也。僕仕天台，及與其大阮游。咸淳己巳，君滿秩先歸。庚午春，余亦被命爲太學錄，不相聞問六年。乙亥春，復解后於杭，君病，僕煮藥饋之。病間謀歸，則已憊矣。途窮垂橐，時不能割鷺股少資之，平生負此欠事。相距十四年間，不知存在何似。一日得謙山書，知君物故。邯鄲昨夢，回首儼然，雷霆焚槐，天地大絃，萬物之摧拉泯滅者何限，而吾故人亦復彫落無

幾，不意猶及見其子姪，能以詩篇商略可否。千里似人，踉空蹶然以喜，若此者，豈復千里似人之比哉！既喜且悲，悲且歎惋，不能已已，書其篇端以歸，且志予感。謙山少壯，詩方進巨量，他日携卷再見未晚。至元戊子序。《潛齋集》卷五。

王希聲陰陽家理學序

世人嚶嚶然曰地理，地理果孰從而來哉？大塊洩，溟滓決，蒼然而上，胡然而天，隕然而下，胡然而地。山胡爲而峙，川胡爲而流，星辰胡爲而錯布，榮馬洛龜胡爲一六二七三八四九之數，四七之宿又胡與於齊瓶吳蝎之分哉？至於大崗小阜，宛委頓息，蜿蜒蹲踞，千態萬狀，若不可詰。乃有望其落而知其所起，觀其發而知其所止，非有神授而使之然者，又胡爲若是哉？歸而求之，亦冥於理而已矣。夫陰陽家，小數也，而有理焉，推而上之，則大而天地之所以推移，細而昆蟲草木之所以動植，前乎八萬六千之所以往，後乎十二萬九千六百之所以來，一以貫之，盡在吾目睫矣。王君希聲，儒家流也，少好山水，壯而益精。輯次諸家之說，斷之己意，以成一書，名曰《陰陽理學》，徵余爲序。愚於理之說而有感焉，張而大之，非爲荒唐誕謾，以欺天下也，安得天下之知理如王君者，與之共談天地萬物之理於此書之外哉！壬申春仲書。《潛齋集》卷五。

浮漚集序

胡君子陽，方外士也。秋八月，自塔峰書院翩然引去，所與友者一琴二笛而已。其將躡匡廬，跨衡嶠，泠然御風，以極莽渺而後已耶？其兄飯牛子招隱不返，得其平昔所爲詩，哀集成帙，徵余爲序。余謂子陽高蹈物表，惟恐影響之不幽，豈意詩名流落人間，使人得以俎豆於詩人之列，重爲子陽累矣，而又使予序之，不知我累子陽耶？子陽累我耶？雖然，子陽詩之，予序之，等於鷄音而已，累不累又安足筭耶？故爲之書。《潛齋集》卷五。

姪孫昭德遠遊詩序

羣從中子弟年來多學詩，存耕子年最大，學亦最先，詩自厲甚刻苦。一日，挾冊來前，曰：「某將有遠適，願乞一言以資其行。」予謂詩天下公器也，以吾情之私，雖許子，不足證。若詩之得與否，若工與否，持以問四方之明師益友如何？晉有老師僧，遣其徒三人遊，與之期曰：「有得，歸以告我。」三年而歸，問所得，不告，師猶以常徒畜之。他日，師誦經窗下，適蜂鑽窗紙不達，徒呵之曰：「世間田地無限，汝即鑽那一邊故紙作麼生？」師亟起坐謝曰：「聞汝言甚異，願以告我。」其

弟子攝跣趺坐，爲說最上乘，老師因得悟入。余老且惰，併故紙忘久矣，子他日有得於四方師友而歸，或以相告，使余得如老師僧，奇甚奇甚。至元辛卯春正月望日，潛齋翁書。《潛齋集》卷五。

太學正節先生徐公序

夫國之危亡，必有死節，然死者人情之所甚難，而食人祿、死人事，義有不得不然者，故其忠肝義膽之所激烈，雖太華頽乎前不吾壓，况嬰斧鉞、蹈鼎鑊、赴水火，尚復回顧却慮哉！抑古今不能多見。吾於戰國得一人曰王蠋，於晉得一人曰嵇紹，於唐得二顏、張、許而下六人，五代得王彥章、姚洪而下十一人，如此而已。宋三百年宗社覆墜於怙權誤國者之手，忠臣義士死社稷、死封疆、死學校者相繼，固未可謂國無人也。太學生徐應鑣巨卿不忍從三宮以北，將蹈火死，不竟，迄沉諸井以死，且與二男一女俱。夫國亡，當事操兵者任其咎，六館諸生亦微矣，豈義有不得不死者！而若此亦既難矣，况兒女睨睨，能使之駢首相從於九地而無懟色，難矣哉！臣爲君死，子爲父死，一舉而忠孝萃焉，所以敦彝倫、媿教化，而懼天下後世之爲亂臣賊子者也。嗚呼！天地無窮，事會無極，世安有無君無父之國哉？微斯人，吾誰與歸！義士劉汝鈞倡義葬之，畢事，以私謚「正節」易名，且徵予序其事。君經德諸生，僕亦經德舊人也，義不得辭，三歎爲之書。《潛齋集》卷五。

翠庭詩集序

翠庭好唸，每握筆輒就，隨所得付之小奚奴，日積月累，歸視囊中，已充斥矣。昔人有吟一字未安，而捩髭斷數莖者，使翠庭若是，則于鬢將變爲一婆久矣。余是以健羨翠庭得詩之易易也。子其汗漫四海，以旁搜名山大川之奇氣，博采明師益友之奇論，而後歸返故吾，解衣盤薄，畜其浩漫者而澤之以淵微，斂其浮葩者而質之以真實，他日舉筆試吟，故雖須刻百篇不爲多，終日一字不爲少。至此，則詩之妙趣，又非難易所可槩論矣。子持此以語四方吟友，當有信予言之不妄者。歸而求之有餘師。翠庭贖，告之不答，書而示之，粲然領去。時柔兆掩茂榆火前一日，潛齋老兄書贈。《潛齋集》卷五。

文勿齋詩序

本心長子，諱本仁，字性之。

詩者，所以載民風、繫世變也。商之詩慤而思，周文、武之詩憺怛而優柔，邶、鄘、衛、陳、鄭之詩哀，幽、厲之詩怨，要皆時使然也。魏晉而下，詩大抵出於羈臣逆旅，窮迫憔悴，不得志於時者之所爲，故其悲憤之辭多，而和平之氣少，尚論其時可知矣。勿齋少好詩，有志於古，讀其詩，其思

易以幽，其辭淡以味，夫必有所得。《詩》三百五篇刪後，無能得其彷彿者，而吾子有志焉則幾矣。抑知夫詩之所起乎？詩之起，由人心生也，心感物而動，故形於聲，聲成文謂之詩。然其聲之擘緩噍殺，廉柔散厲，錯出而不同者，豈人心之異哉！時之變者爲之也。變風不企乎二《南》，變雅不競乎二《雅》，故詩者所以載民風、繫世變也。勿齋居今學古，試問吾子所自執焉，余老且未死，尚觀商周之遺聲也。歲在屠維赤奮若，月在蕤賓，哉生明序。《潛齋集》卷五。

唐心月集句序

荆公晚年好作集句，正不免黃太史一笑。余謂不然，集句雖古人糟粕，然用之如諸葛孔明學黃帝兵法，作八陣圖，必其方圓曲直、縱橫離合悉在吾胸中，而後可以應敵而不窮。不然齟齬牽合倉卒，鮮有不敗者。月心集句政類此。吾方羨其三多，而心手相應，隨取輒得，固未暇以涪翁之說少之。潛齋何某書。《潛齋集》卷五。

汪復心瀟灑集序

人心感於物而成聲，詩爲甚。志高山則峨峨然，志流水則洋洋然，非聲不同，所感之異也。琴且

爾，况詩乎？錦峰繡嶺，雲水吞吐，又有披羊裘、把魚釣，嘯傲其間者，昔人以瀟灑名郡，真不妄。詩人汪復心在嚴陵得詩若干篇，題曰《瀟灑集》，其思與辭稱是，於此可以觀所感矣。堪輿無窮，物之感乎吾前者何限，可喜可慕，可哆可愕，可悲可樂，有萬差不齊，子其慎所以感之者。《潛齋集》卷五。

徐祥叔詩序

徐凝《廬山瀑布》非惡詩也，坡翁「飛泉濺沫」之句欲與凝之洗惡，蓋其泄漏太甚，故為廬山解嘲，非惡凝詩也。靜山徐祥叔，凝之雲初，其所為詩以《惡稿》自命。騷人墨客好自矜大，從古而然，祥叔乃獨取衆人所共惡者以自號，此其志豈淺淺者所能識！蓋將翻廬山之泉，以與古人一洗之，凝在九江當復起生魄。《潛齋集》卷五。

琴所王濟君用詩序

越人

琴所詩者，鼓絃而吟也。琴之趣清，而詩似之，朱絃疏越，使聽之者一倡三歎而有遺音。世無賞識，固無怪高山流水之不諧於俚耳也。善琴者固難，而聽琴者之尤不易也。《廣陵散》絕矣，不知琴

所之詩爲長清乎？短清乎？抑爲長側短側乎？魯東門之曲已不能不動尼山之感，汾亭何時能使漁父不重歎於南風之操乎？然則琴所之詩，其琴心必有所寄矣。試爲我聞琴所，毋謂世無鍾子期。《潛齋集》

卷五。

全宋文卷八二九三

何夢桂 三

姪煜之詩序

猶子煜之一日持所業詩來前，請所以教。夫堦庭子弟操觚弄墨，從事詞章，愈於綴珠作鳳，拾香爲囊，以嬉玩於諸父間者多矣。詩不易作，亦不易談也。古之詩人名蓋一時而流芳百代，惟杜工部一人，後世雌黃所不敢到。若元輕白俗，島瘦郊寒，率不免譏議，況其下者乎！故詩古今視爲難事，童而習之，有皓首不得其闡域者。今汝以年少學詩，當如前輩所謂熟讀三百篇及楚詞，至漢魏間詩人好處，以博其識，而後約而歸諸理，殆庶幾乎。嘗誦少陵《贈阿勤》詩有云：「汝身已見唾成珠，汝伯何由髮如漆。」予老矣，無能爲矣，汝其勉旃。他日坐使玄輩以八千輕師破百萬於淮淝水上，亦騷壇一奇也。《潛齋集》卷五。

晞髮道人詩序

閩人謝翱，字臯羽。

晞髮道人詩原於《騷》，《騷》蓋古詩變風、變雅之遺也。《騷》深於怨，古詩怨而不傷，而《騷》近之，怨非詩之正聲也。商之聲直以肆，周之聲和以柔，一變而爲國風，再變而爲《黍離》，甚矣，而《騷》又甚焉。道人詩蓋《騷》之墨守也，故其詩思遠而悲，微而不訐，而辭稱之。詩之所至，志亦至焉，於此可以觀道人之所志矣。駕言晞髮，將以浮游於世垢之外。濯之洧盤，晞之陽阿，適矣，抑知夫終朝采綠，而余髮之曲局否乎？首如飛蓬，膏沐誰容，其於衛國風之詩固命之矣。知我謂我心憂，不知者固謂被髮行歌者同一調也。《反騷》之作，正恐如漢黃門郎者不少。折瓊枝，結佩纓，吾非斯人之徒與而誰與？至元庚寅長至日序。《潛齋集》卷六。

胡汲古詩序

胡汲古，余忘年友也。汗漫吳越者十年，歸問所業，出袖間詩冊，疾起亟讀，其辭溫潤以栗，其思遠而優游，夫必有所得。昌黎詩得於潮，燕公詩得於岳，工部詩得於秦、夔、巴、閬，子於何游而詩進若此？踐吳跨越，豈果足以盡四海之大觀？然其觸目駭心，有感於詩，莫近於是。湖山落日，錢

塘怒潮，顧眺徘徊，祇見夫挾萬弩以射子胥之衝，醜樽酒以酌錢王之魄者，而鴟夷魚腹，闕角烏巢，千古英雄，今復安在？塗山已矣，禹穴茫然，君其問諸海濱，不知石窆玉環今尚存否？孤臣嫠婦，逆旅亡臣，感發而爲幽憂悽憤之聲，至於不能不詩。詩者所以道情性也。汲古行將覽東南名山大川之勝，盡收奇氣以歸於詩，他日載詩以歸，當復告我。《潛齋集》卷六。

胡柳塘詩序

詩有譜，而家譜尤親。歆、向家於文，談、遷家於史，故詩不可以無家。胡氏家世於詩，詩源於靜軒，派於庸齋、坦齋，而流衍於諸孫，若植芸，若飯牛，若天放，若象先，皆攻詩。柳塘最晚出，詩鋒疊疊逼人，政似諸王子弟綴珠作鳳、下牀虎跳，總自不凡。余是以嘉柳塘伯仲之昌於詩，而喜靜軒諸老詩世之不墜也。遠來訂我，書其篇端以歸，他日相逢，當又刮目。《潛齋集》卷六。

柯通甫醫藥序

醫書祖黃帝內外經，非通儒率不盡解，故太史公序儒家而下九流，醫列其一，惟儒而後能攻於醫。《易》曰：「精義入神以致用。」不能精義入神，於致用乎何有！世之庸人號名曰醫，授之書，有

讀不能以句者。彼豈天降地出，不由書而自得神聖工巧之妙邪？此吾所以深有取於儒而醫者也。通甫儒者，其有得於醫本於書，其自得於心非書，惟通甫而後可以語此。至元戊子序。《潛齋集》卷六。

汐社詩集序

海朝謂潮，夕謂汐，兩名也，汐社以偏名何？志感也。社期於信，而又適居時之窮與。人之衰暮，偶而猶蘄以自立者，視汐雖逮暮夜，而不爽其期，若有信然者類此。謝君臯羽所以盟詩社之微意也。澤中雷隨，《易》有取於嚮晦宴息，坎爲北斗，卦曰勞卦，亦以夫萬物之所歸也。物晝動則夜靜，晝作則夜止，皆然。潮以朝盈，汐不以夕虧，君有取諸此，固將以信夫盟，抑以爲夫人之衰頹窮塞，卒至陸沉而不能自拔以死者之深悲也！抑月者水之候也，月升于天，海水涌沸，月降于地，涌沸亦然。月之升降無窮，水之爲潮汐者亦更禪而無底極。方北浪駕山，魚龍掀舞，陽侯海若橫江而揚靈，意謂海水竭於歸虛矣，不知夫龍門未平，而九淵之下已溇溇矣。至於陽運而蝕，陰轉而勃，大鳥播濤於靈嶽，五龍噴水於北玄，則靈機吐翕，九海溢虧者，天地一大消息庸有既耶？計人在天地間，猶大海壘空爾，其不能無旦夜之常者天也，而猶數數然爲暮年衰世之戚，則惑矣。君其謂我言然否？曰然，遂識於卷末以歸。癸巳二月望。《潛齋集》卷六。

洪百照詩集序

百照洪肅甫以明經學業舉子文，少頡頏場屋，流輩率免胄避風。卒至不偶以死，猶有詩卷流落身後。其子耕道挾故冊與諸縉紳先生昔序，復徵予言。予謂百照文士也，宜不攻於詩，觸景遇物，興至而詩亦從之，詩蓋百照筆硯膏馥之遺餘耳。驂騮逸騁，超影奔電，將一日萬里，乃絡首鬚足，使之折旋鉤百於蟻封間者，政懼不足以盡夫才也。文人之技折而歸諸詩正類此。頃嘗與友人譚詩，謂文人之詩與詩人之詩異，友曰：「不然，詩患不到好處，詩到好處，又奚文人詩人之辨哉？」此語真詩家陽秋也。嗚呼！百照往矣，安得復起生魄，試與商確此事。壬辰三月三日。《潛齋集》卷六。

何氏祖譜序

何氏祖於韓。韓，晉出也。晉，唐叔虞之適胤，周武王之裔緒也。周本后稷，稷本黃帝公孫氏，其所繇來遠矣。叔虞爲成王同母弟，成王即位，雖曰剪桐戲封以有土於唐，然兄爲天子，爲之弟者縱不得食於唐，獨無分土而已乎？再世而變父爲晉侯，亦惟王命故也。桓叔封於曲沃，爲晉謀則不臧，所以開韓侯三晉之業者，其在是歟。越十一世，而不幸遭虎狼之秦，蠶食六國，韓滅，固力不競也。

安王子允易姓遁身，實爲千萬世子孫興亡絕續之會，千鈞一縷，亦危矣！夷考厥後，在西漢則何並守潁川，在東都則何敞守汝南，曹魏則晏侯關內，江左則充錄尚書。曾、劭父子繼仕西晉，或進爵太宰，或庀職司徒。尚之父子濟美劉宋，或位列台輔，或抗志自高。雖人品高下不可以一槩律，而其簪紱蟬聯，冠蓋相望，汗青簡冊，代不乏人。自漢末逮晉、齊，椒房之貴，照映三朝。原其譜系，雖不皆出一派，然史傳所錄，大抵出於廬江、扶風、陳留、南陽，要皆安王子允之子孫散在四海而綿諸歷代者也。本派自晉吏部侍郎相士，肇基於永嘉八年間，蓋千載於此矣。獨恨的公以下、茂公以上，中間不續者數世，使人掩卷歎歎，感慨不能已已。然有絕譜而無絕人，天未覆墜，式克至於今日。夫以一人之身所以上承祖宗，下開後嗣者，悉繫於此，其事顧不甚重歟！以昔視今，則前日之祖宗，今日之一身也。由今視後，則今日之一身，他日之祖宗也。以一人之身分而爲百千萬人，人見其爲百千萬人，而不見其一人之身也。故兄弟而爲比鄰者有之矣，再世三世而爲路人者有之矣，四世五世數世而爲仇讎者有之矣，又安知百世千世萬世上下，其初不過一人之身而已？祇今二子之在吾膝下，以至他日子子孫孫讀吾譜，而退省其私，或有似吾前所云者，可以惻然動心，以亟反其初矣。祖宗在天，實聞斯言。某年某月日，漢牧亭侯三十九代孫、前承議郎、監察御史某齋沐百拜書。《潛齋集》卷六。

易衍序

《易》之道變化不窮，而其致一而已矣。《易》始於一，一者太極也，故曰《易》有太極。自一分爲二，而爲兩儀，兩儀錯而爲四象，四象錯而爲八卦，八卦錯而爲六十四卦。八卦錯行，而萬物錯出，窮天下善算者，不能盡其數，而《易》以一陰一陽盡之。非曰一陰一陽之能盡夫物也，錯之所以成變化也。盈天地間諸萬物，而天地亦物也。《乾》上爲天，《坤》下爲地，包餘卦於其中爲萬彙，萬有相錯，故物雖其類，無一物相肖者，非天地物物而造物，而物物自造固如此。故《易》者，天地萬物變化不窮之象也。孔子曰：「知變化之道者，其知神之所爲乎。」夫《易》之象爲天爲地，爲風爲雷，爲水火，爲山澤。八卦，八象耳，而其動其靜、其闔其闢、其升降往來，茲其故已不可究詰；況萬生在宇宙間，相構相揉，相推相代，且變化萬狀，而《易》亦與之變化爲不窮。故《易》之道大無不包，細無不入，仰觀俯觀，遠取近取，蓋無物非《易》，無《易》非物。學者所以格物致知，聖人所以窮神知化，國祚所以祈天永命，率繇此道也。子曰：「範圍天地之化而不過，曲成萬物而不遺，故神無方，《易》無體。」此《易》道所以爲無盡也。《易》有卦畫，伏羲盡之矣，卦畫有辭，文王、姬、孔盡之矣。然伏羲之意盡於卦畫，文王、姬、孔之意殆未盡於辭也，何也？事物萬殊，辭貞於一而已耳，聖人非固有靳也。子曰「書不盡言，言不盡意」，聖人之意固非言之所能盡也。故舍辭求

《易》者，非知《易》者也；求《易》而止於辭者，亦非知《易》者也。善求《易》者，質辭而通諸卦畫，吾見一物之爲萬物也；徵卦畫而會諸太極，吾見萬物之爲一物也。散《易》爲萬，《易》在天地；斂萬爲一，天地在《易》。此《易》道所以爲變化不窮，此變化所以爲《易》道之至神也。子曰：「變而通之以盡利，鼓之舞之以盡神。」嗚呼！《易》盡於此矣。愚以固陋，夙嗜《易》，《易》幽蹟不易入，探索既久，若有窺見聖人之迹之萬一者，意曰《易》近之矣。然不期於言也，日書諸佔畢，聊識吾私，然不期於傳也。謂《易衍》者，取衍其大義焉耳。言不文，傳不遠，固非敢望於今與後之知《易》者也。《太玄》覆瓿，或有揚子雲者好之，吾言固不足以載《易》，因是而求之天地萬物，則太極流行，無往非《易》，是《易》不在吾言，而在天地間矣。雖然，《易》不易知也。歲旃蒙大淵獻月應黃鍾閉關日，嚴陵何某謹序。《潛齋集》卷六。

陳古莊詩序

古莊，錢塘詩家流也。錢塘多名詩人，諸老佳句流落湖山，不遜逋老。古莊後出，刻厲於詩。好事者挾冊子過余徵序，讀而喜之愛之，益信錢塘詩稱不苟。得古莊詩，如幽閨處女，靚妝綽約，而愁情怨思間復鬱發於妍姿媚態中，美矣！乍見謝夫人蕭散林下，猶似羞澀，歸而淨洗鉛華，徐與天下婦人鬪好，又一奇也。予非知詩者，竊復好詩，輒妄評如此，隔簾畫西施，政恐不肖似。《潛齋集》卷六。

徐冰壑詩序

近詩派盛於武林，故士生武林多攻詩。徐君冰壑蓋詩中一派也。客有携詩冊遠徵予序者，亟起展卷長誦，其遣辭與思清炯照人。時暑酷熾，天地焦熱，畏塗伏暍，誰復以清冷沃之？方坐我於凌陰壑中，斲冰積雪，亦一奇也。誦終謝客，且去，客復請曰：「語止此乎？」曰：「止此。」客退，遂爲之書。《潛齋集》卷六。

杜學正竹處詩序

古今言詩者祖少陵，蓋世之常談也。少陵祖修文而孫書記，則詩之源益遠矣。竹處杜君蓋少陵耳孫也。人知少陵之詩在方冊，而不知枕中之法、肘後之方必有世所不傳；而君獨得之者，是鼻祖之文脉詩派殆私於君，而不可與世之學詩者同日語也。少陵詩如泰山喬嶽，不可攀躋，修文、書記或可企而到。君其步驟二家，而後造極於少陵，則詩之大成盡在是矣，奚必他求哉！家雞野鷲，得失固有辨也。竹處攻於詩者也，其自命猶曰「待刪」，則其詩之進，豈淺淺所能窺哉！爲之序以歸。《潛齋集》

卷六。

方叔規詩集序

史稱平原君翩翩濁世佳公子也。世之貴介，綺襦紈袴，彈絲弄竹，猶是素態，今世迺有華靴臺笠，以與惡少年游狎者，雖以房、杜門戶，寧不爲李英公所笑邪？其有弄墨操觚，下友寒畯，以文字相頡頏者，非世之所謂佳公子乎？方君叔規蓋南峰先生之冢嗣，蛟峰、山房二先生之猶子也，濡染家庭詩書之澤舊矣。平日吟詠，著之篇章，皆燦然可觀，進境殆未易量。坡翁譽邁，牧之稱阿宜，以是知蘇氏之有子、杜家之有姪矣。余老矣，猶及見之，此亦一快也。執卷徵序，喜爲之書。《潛齋集》卷六。

羅濟川詩集序

世之評詩者取少陵夔州以後詩、昌黎潮州以後詩，豈非以其氣老識老而詩隨之？至於王勃《滕王閣》之句，李賀《古樂府》之辭，又皆其妙齡絕筆，遂謂詩之工不係於老少，抑不知其後日所作視前又當何如？二君亦當遜韓、杜爲丈人行矣。羅君濟川，年少能詩，其思清，其語俊，似其人。嘗挾冊求余說，余惜其才之方進而未涯矣，曰「姑老之」，非簡也，意將以速成也。請三四反，茲益堅。余

非愛予言，子其識諸。後三年見子，子自壓前日之所作，則詩進矣。後十年見子，子又自壓三年之所作，則詩益進矣，而猶未也。余髮種種矣，嘗自視前日惡蘖，後日悉焚之，皆余所自試者也。醫三折肱，方匕不繆，子他日當信余言，則雖三年十年一變，猶竊遲之。誠若此，子安、長吉諸君正笑韓、杜於地下矣。《潛齋集》卷六。

王菊山詩集序

詩止五七言，尋行數墨，紙不盈尺，不過文章一小技耳，宜若易然。三尺童子調之聲律，握管可就，乃至白首不能名家。甚矣，詩之難也！試數古詩人，亦不多得。建安七子、開元九公，奚寥寥若是，一聯半句流落人間不與焉。近世談詩尤多，造詣絕少。中叟有志於詩，尚矣。中叟詩辭雅而不野，氣溫而不浮，詩進矣。毋謂詩止此，學古人詩如登高山，始莫不急足疾走，暨絕頂在咫尺，則跬步不能進。甚矣，古人之難至也！余非能詩者，每好詩，力不及，則歎曰詩難。中叟，余諸少行也，不敢以尋常語相誇詡，敢以其所見告，中叟其勗哉！《潛齋集》卷六。

肯堂序

蜀阜錢君鑑扁其新居之室曰「肯堂」，示不忘親也。不忘親，非孝子不能也。孝之道非一端，莫大於繼志述事。父有志而事未卒功者，子能繼述而成之，夫是謂孝。厥考作室既底法，而子肯堂，猶以爲善，況未底法，而子肯構，其肯堂孰大於是？君子是以嘉錢氏之有子也。《記》曰「幸哉有子」，《書》曰「予有後，弗棄基」，茲匪不辨賢否而槩謂之有子，惟其克篤前人成烈，爲子克家，而後謂之有子也。始宜房、杜家辛苦立門戶，不能保身後之不貽笑平園花木，至拳拳爲後世子孫之託而不吾置，則前人之所望於其後也蓋可知。故子能以其父之心爲心，則孝矣。爲人子止於孝，君其懋哉！乙酉春二月書。《潛齋集》卷六。又見光緒《淳安縣志》卷一四。

徐雲墅注道德經序

談六經者宗孔氏，《道德經》出於老氏，好論議者多詆之，謂清淨則以黃老合言，謂虛無則以老莊合言，是蒙莊爲老氏懸疣，而老氏爲黃帝枝指也。世之人固未一窺蒙莊影似，奚至攘臂而仍黃老之闖域哉？老氏之學雖不屑於孔氏，然其儉以慈，靜而不擾，以之治天下，將使民退讓敦朴以反於遼

古。使世之治皆若此，則亦何嫌於老氏哉？至於希夷，微不可見，聞不可得，而玄之又玄者，茲固衆人之所不識，其詆之也固無怪也。雲墅徐君仲修夙好老氏學，服久，其得益深。閱古今傳釋，皆不當其意，悉掃其陋，而以己意注說，發幽抉微，以大暢道德之旨，其爲老氏之意亦勤矣。世有峨冠大帶、張拱翼趨以適市者，而狂且醉者執而僂之；從旁者見之，爲之解，而狂且醉者舍其所執，而移僂於其所解者。今子之爲老氏忠矣，吾懼子之值夫狂醉，而不免於其旁，將子爲老氏受詆乎？抑老氏與子受詆乎？子必審於此矣。徵予序，序之，將以解夫所解者，吾又懼矣。嗟吾後者之復爲吾解，則詆與解將相尋，而未知其所終也。《潛齋集》卷六。

宋梅堂詩序

子厚以謫而文工，屈原以放而騷工，杜子美以蹇而詩工。嗚呼！文以窮而工，文之不幸也甚矣。宋君梅堂少好吟，今老矣不遇，方挾耿耿者游天地間。觸景得句，若出金石，歸探囊中，收拾其餘而輯次之，蓋已盈軸矣。一日携以過我，曰：「吾旦夕將復有事于四方，願祈一言以自壯，何如？」余謂梅堂志未衰，行未倦，吟愈未可量。他日有大尹遇道上驢，天子問新豐逆旅，誰謂梅堂終老不遇邪？子姑持以往。《潛齋集》卷六。

方仁叟詩序

方君仁叟，故人伯巖山翁之冢子也。山翁存日酷好吟，今其子復好吟。其於詩家榘度，得於枕中之所藏襲，疇非其平昔肘後之所秘而不屑以與人者。家雞野鷲，去取固有間矣，然古今義理無窮，而天地間詩思日新月盛，來者固未有紀極也。子其益取四方之明師良友，以尚論古之人，如建安七子、開元諸公，以至近代之歐、蘇、黃、陳。長篇短章，散在方冊，其奇形詭態如風雲龍虎，不可執捉，豈待鬪長於一方一技、半聯隻字而已哉？子其旁搜博采，潛探密索，而有得焉。子將昌子之詩，他日突破煙樓，而翁伯巖亦將一笑於地下。《潛齋集》卷六。

王蒙泉詩序

《蒙》取象山泉，蓋山下出泉，蒙而始達，泉之本性未失也。蒙泉自號蓋取諸此。蒙泉家深谷，日招青山，畝泠泉，寄興於吟，心靜而思清，其得句亦峭刻峻潔如此。蒙泉詩脫藁，將有遠游，徵余爲說。余謂萬水一水也，在山爲泉，出流爲澗，演而爲河，澎湃爲江海，益遠益瀾，非泉之性異，地使之然也。子其汗漫四方，溥泉之用至於不可窮，如江河注海，極其大，將沐龜鼉而澤蛟龍，謂海之

水非泉不可也，毋使失泉之性斯可矣。蒙泉子從予遊久，於其出也，懼其遠而或失，因頌其詩而規焉，子其勗哉！辛卯春三月既望序。《潛齋集》卷六。

貴德詩集序

晉魏而上詩古，律詩初盛於唐，唐以下豈少詩，詩終不競於唐耳。近世詩滿南北，當軼唐、凌厲晉魏。然詩難，操觚弄墨，抽黃對白，四聲八音，人人亦能求其彷彿古人，卓成一家者不多見。余嘗漫吟，擬學古人語言，卒不到，以是知詩不易言也。山泉以年少攻詩，詩思雋發，方氣盛疾步。譬猶挾策登泰山，及半環道，仰見前行者履底猶歷歷，俯視後至者之髻端已猝猝，至此則跬步懸絕，不易進矣。政當努力攀躋，以登造極頂，然後周覽旁睨，見下界碌碌，如在一井，則詩之大觀盡於此矣，毋曰詩止此。徵余序，爲書以歸。尚其懋哉，聿觀厥成。《潛齋集》卷六。

王梅谷詩序

梅，幽花也；谷，幽地也。樹梅於谷，幽之幽者也。王君林叟以幽人間於幽花幽谷，吟咏其間。人見其詩思與辭幽致可挹，不知其自託者固不凡也。夫江梅清絕，嶺梅孤高，猶嫌以其皎皎表暴。至

若閣於水部，宮於壽陽，薛氏之玉堂，坡翁之雲砌，逋仙之水籬，不免以顏色媚人，殆與桃李爭春妍者無異。孰若梅谷之雪骨冰魂，離羣獨立，影響幽幽，以自全其天者之爲得耶！徵予序，爲之書以歸。《潛齋集》卷七。

章明甫詩序

詩志至焉，氣次之。志百變而不折，故氣亦百變而不衰，知此可與言詩矣。杜少陵在秦、夔，柳子厚在永、柳，坡翁在惠，山谷在宜，皆窘束不自聊賴，而所爲詩益浩漫峻厲，是豈無故而然耶？其養完，故其發碩茂如此。石溪子罹亂來，且貧且瘁以窮，其事與位又非可與諸先正同日語。隨寓成詩，思深辭苦，淺者悽惋，深者幽憂，若甚蜷局不舒者。然其悲壯憤烈，逸氣橫出，讀之如聽武昌笛，如聞雍門琴，如垓下歌、塞上曲，令人噫嗚噓噉不能已已。吾是以悲子所遭若是困踣，而其志卒不屈不撓也。雲嶼徐君既爲之序矣，復蘄予言。此如羈臣嫠婦，政自罹鞠，握管爲書，秋聲瑟瑟，復在夕陽庭樹間也。《潛齋集》卷七。

吳愚隱詩序

大道之行與天下爲公，故毀譽出於一世之所同。道隱，而毀譽不見於天下，而後出於士大夫之抗節義、矜名稱者之所獨，抑狹矣，然猶賴其有是也。東漢之微，如膺、滂、固、喬，更相標榜，將以噓揚一燼之火而燃之，而卒不競。君子原其始，謂子陵高節，實養成之，狂奴之號，後世以此少劉文叔，謂光之不屈也固宜，不知光之政樂，其得是名也，則志遂矣。此東都風俗之媿，所以卓冠漢唐也。古括吳君愚隱以詩文相證，讀之氣勁辭直。至於言議之公，雖親者不附，疎者不遺，予是以嘉君用志之獨如此也。來壻白雲，與閩人謝翱、臯羽、婺人方景山爲友，結詩社於雙臺下，蓋高子陵之風久矣。且將徵微言以自信。以君篤信不遷，而猶俟予言以信，豈以其毀譽之不苟然也？予頃嘗識臯羽，每見其談林德陽、吳某忠誼不可企，心敬之愛之；復談愚隱，曰「好義不屈人也」，亦敬之愛之。今臯羽下地，林、吳隔闊，及見君所作，益信臯羽之不妄許人，與予之不妄交臯羽也。尚友古人，幸使得齒於君、厨、俊、及，吾猶懼世之不樂人善者之不吾知也。九京可作，無已則申屠蟠矣乎！君有志於道者，敢以予所自信者告之。《潛齋集》卷七。

全宋文卷八二九四

何夢桂 四

倦游錄序

《倦游錄》，潘君德玉繇北南還以後之所作也。德玉爲吾故人竹村正言子，亂離後生死不相聞問。及見君挾琴冊來鄉校，坐客氈寒，暇日持所爲詩詞商可否，三復降嘆。君流離顛沛，區脫服匿，不至乏絕以歸，幸矣，而暇操觚弄墨，以從事乎文哉？非徒文且博，雲笈金經、稗官雜俎，紛錯前陳，此騷人墨客芸窗斐几，皓首不得其肯綮者，君負羈紲以行而能若此，豈邊韶經在經笥，抑王充書在書市，否則司馬子長之在天下名山大川耶？吾固羨君之篤於文，且重嘉吾故人身後之有子如此也，爲之書。《潛齋集》卷七。

洪石泉知裁集序

學以狂失，亦以狂得。狂之失未合乎中行也，一裁而約之中，則得之矣。孔子嘆吾黨小子狂簡，成章不知所裁，不名爲誰，孟氏以琴張、曾皙、牧皮當之。蓋狂者能致其知於高明廣大，至於精微中庸或略焉。故狂而至於簡也固也，非得聖人中立而裁之，則狂而無所歸矣。然觀曾皙浴沂詠歸之趣，夫子獨與可之，吾故未敢例以二子之狂者少之也。石泉洪子好古，竊取聖門知裁之義以名其詩篇，蓋亦自懼其狂，將求有以裁之，而卒歸乎中道也。愚謂誠狂如曾點，無傷也，政患其不果狂耳。狂而進取於道，則將爲古之肆，而不爲今之蕩。亦有超然自得於事物之表者，則吟風弄月以歸，即是吾與點也之意，於詩奚有哉！石泉才高志廣，而自所知裁，蓋近於道矣。因吾言而歸，求之有餘師，將爲曾點一洗狂名於千載之下。石泉曰「唯」，爲之書。《潛齋集》卷七。

凌馭詩序

馳世名者無逸步，喧市利者乏緩聲，居使然也。一行作吏，此事便廢，政古人不免，況今握刀筆以逐縣吏者，尚暇吟乎哉？凌馭本宦家子，與吏伍以干升斗，然未始廢吟。老焉歸田，益自奮勵，久

焉詩詞成帙，思婉媚而語清新。夫詩詞不易工，故有操觚弄墨，皓首不得其徑庭者。黑風緇塵，將四方易處，而於其所能不易其志如此，其賢於汨汨名利以逐市朝而不知返者遠矣。茲挾所業介岳父趙宰公，因子鄉友求贈言，余嘉其志與事，爲之書以歸。勗哉！當益進，毋謂止此，則幾矣。《潛齋集》卷七。

章中時甫集禮書序

禮樂二帝三王所以飾治者，竊嘗有志，而病無承焉。樂之制，金石絲竹匏土革木，器存而意亡久矣；禮蓋厪有存者，而世之由禮者鮮。不復古禮，不變今樂，而欲致治，濂溪周子已不能不重歎於斯也。學者章中時甫取古聖賢格言有及於禮者，輯次成書，曰《二範》，殆汲汲乎爲表以坊民，且患倡之而世無應之者。夫天理流行，穹壤間未嘗一日泯滅，得民心之所同，與古先哲王之所遺，猶懼其不興起，吾未之信也。考亭朱子平生精力盡於諸書，獨於禮經若未滿，豈以考古之難，抑居今行古之不易也？故欲議禮，惟德與位稱，復際夫時，而後經禮三百，曲禮三千，將周旋二帝三王於一堂之上，放而橫之四海無難矣。子其審於三者而致意焉，則於禮其庶幾矣。《潛齋集》卷七。

何梅境詩序

余方卅時，梅境當妙年，已聞文聲獵獵在吳會間。及壯，游上庠，爲同舍郎，益親密。梅境鼻祖首丘在吾里，黃庭堅與渥逸譜復合，蓋非拜汾陽比也。乃翁東園公爲文場老詞伯，晚掇科第，陞仕路，及見梅境世科。喬梓一門，拜前拜後，鄉黨榮事也。梅境早好吟，得意於四靈，人或未之知也。趙白雲嘗宰鄉邑，賞其文，與爲忘年交，自是詩聲益起。中年進學老杜，故詩日益工。騷人墨客挾筴登壇，論詩閥，宗詩派，吾梅境不在王、謝風流下也。世變陵谷，冠裳彫謝，房、杜寂寂，蓋不特梅境家爲然。近得其第三子某持舊藁不遠相屬，曰：「先子手澤所存僅此，知故宜莫如公，願蘄一言，以託永久。」夫身後有子，能復葺厥考箕裘，庶免李英公笑人於地下矣。三復感愴，重賦《角弓》，蓋不特如黃公酒壚念舊而已，爲之序以歸。《潛齋集》卷七。

翁真卿詩序

余與真卿生同邑里，而不相識若相避，然世無陳仲舉，豈許子將以其峻介不見邪？里有荀朗陵，抑陳太丘，不能馳車往見也。近得真卿詩編曰《吹映錄》，讀不終卷，益恨見真卿之晚也。古之詩人

當志得氣盛，詩未必名，至於流落不偶，困苦無聊，賴而後進於詩。真卿惟貧，故鮮與聲利接，老於授徒，故益安於讀書，遂得肆其餘力以爲詩。士操觚弄墨，學爲詞章，有皓首不得其肯綮者，外澤而中乾故也。真卿詩，事質而辭縝，韻遠而意深。夫物必有本，溉根食實，具眼者當自知之。織離騷，躡景奔霄，而蟻封鈎百，閒逸步驟，安可與欸段同價哉！爲之序而歸之，則知余與真卿未嘗不相與周旋於琴冊間也。《潛齋集》卷七。

王煒翁詩序

東臯子王煒翁，吾甥也，以其讀書餘力學詩，詩縝密而思鬯達，渾厚而氣勁嚴，並游諸英相推率如此。不幸中歿，其孤方髫髻，篋中手澤散亂不可尋繹。其尊翁月庭老人繙故帙，得遺詩若干篇，追悼不自己，以書囑余爲序，曰「幸藉以勿墜」。余媿劉牢之，安敢以何無忌酷似自多？王武子見衛甥，每以珠玉形穢自失。余老矣，得子詩，三復賞嘆，且爲之掩卷歛歔久之。記舊所見，遺逸尚多，姑序其篇端，以歸子於地下，聞吾言亦當一慨。《潛齋集》卷七。

陳高士自怡詩序

自怡堂蓋道家者流，而實出於儒者也。舊爲儒，嘗有古莊詩，予愛之序之，今復以自怡詩相示，視舊加多而益工。夫詩在天地間，固不間儒與道也，然求道之趣，則身之所接者玄都之仙客、丹丘之羽人，其心契神交，則鴻濛殷陽，日戴華陽巾，披鶴氅，寄興於吟，以自怡悅，故其詩之所得，今昔又隔幾塵矣。他時石鼎高唱，侯喜輩謹毋撩虎鬚。再爲之序以歸。《潛齋集》卷七。

夏德甫易窩吟序

《易窩吟》，自然夏德甫之詩也。德甫吟不爲詩人章句，徒玩弄光景而已，而必於易窩，蓋有得於康節窩中之趣也，故其詩曰：「安樂窩中事事無，惟存一卷伏羲書。」康節二十年工夫，全在一窩中，其柳風蓉月，隨寓成功，猶是長物。復姤中間，弄丸得手，樂意無極，此無名公之至妙至妙者歟。德甫詩必有得諸此，此惟可與知道者言之，詩抑末耳。雖然，詩亦道也。大德己亥春二月既望。《潛齋

胡氏清雅詩集序

古之詩人以詩聞世多矣，而鮮世其家。杜審言有孫甫，牧之有子荀鶴，謝氏有連、運，陸氏有機、雲，然僅間一再世見而已。清溪胡氏一家四世十二人皆以詩名，詩集題曰《清雅》，蓋取開禧誥詞褒語也。詩豈獨昌於胡氏一家耶？由靜軒先生至西塘凡三世，擢儒科，躋膺仕，聯簪疊組，亦華矣。世之紈褲子生長膏粱，彈絲品竹，流連忘返，不知人之笑房，杜於其後者政自不少也。胡氏世業詩書，等於寒素，然觀其家子弟多風流醞藉，不減王、謝家，固無怪其一門詩派特清雅，爲四世青氈。其視世之習富貴以益其子孫之愚者，蓋不侔矣。植芸遠貽詩集，獲觀濟美與諸老先生之所品題，三復嘉嘆，爲之後序以歸。《潛齋集》卷七。

竹境姚子康詩序

杜元凱有《左傳》癖，王武子有馬癖，二公各以所好成癖，亦異矣。杭人姚安道好種竹，自謂愛竹成癖，視前二癖抑又異矣。癖於竹未瘳，又有詩癖、畫癖、琴癖，何其多癖耶！世之人競利癖於利，逐祿癖於祿，之二者世所同好而專焉，必有攘臂者仍於其後。今子四癖，亦既多矣，而皆辟於世

好，故世鮮有爭者，而得以遂子之癖。暇日嬾姍竹間，得句則書之竹上；又暇則繫翠袖，彈長清短清；已則解衣盤薄，畫一山一水。由他人觀之，謂子爲癖宜矣，不知子之樂此也，其免於世患夫？

《潛齋集》卷七。

吳鼎君實求古村煙草詩序

《古村煙草》，蓋詩人懷古之遺意也。古村居九仙山下，九仙多古遺蹟，葛老仙丹井猶煖，蘇坡翁詩墨未乾。追想流風，已令人永嘅。軍前老樹衣錦彫零，陌上飛花行歌絕響，上下三百年，往事如彼，山前故老尚有能言，聞者莫不噫嗚泣下也。古詞人「橘里漁村半煙草」之句，橘渚漁汀，藐在何許，豈若登錦山，臨繡水，觸目盡心，俯仰今昔之異者邪？故古村詩多幽憂感發，使人一唱三歎，如清廟遺音。曷時載酒擔詩，直造金堂玉室，與古村一醉長歌，以弔昔人於九京下也？古村徵余序，遂爲書以識他日。《潛齋集》卷七。

琳溪張兄詩序

學詩易，學詩而工難，三尺童髻卽而詩之，至紛白而不得其徑庭者，故詩不易言也。古今評詩者

稱盛唐，蓋開元上下諸公也。唐詩自陳子昂一唱，至李、杜大成，爲不可及；其他諸作，視魏建安七子與晉陶、謝數子，又彼此一時也，况晚唐以下詩乎？今之學詩未夢到唐人影響，其去魏晉益遠矣，故詩未易言也。琳溪張君老於學，故其詩事核而思遠，不事時世粧以偵逐近好者，駸駸乎古人邯鄲之步矣。學詩如參洞山禪，須不犯正位，而後縱橫變化，其用不窮。若只傍古人籬落，終是鈍漢。余老，詩不能工，而所見落落如此。琳溪有得於詩者，故商確及之，當必以愚言爲然，爲之後序以歸。《潛齋集》卷七。

徐氏墓田誌序

丘墓，古所重也，識之所以詔他日也。孔子葬其父於防，曰：「丘東西南北人也，不可以不識。」封之，崇四尺。延陵季子葬其子於贏、博之間，廣輪揜坎足矣，而墳之，其高可隱，亦所以識也。古人若此，蓋恐千秋百歲後，子孫不知其先墓，而委之於狐兔荆棘者。至於墓爲田，松柏爲薪、高碑爲柱石，而不知其爲誰氏者，尚忍言哉！故丘墓不可以不識也。吾觀徐氏墓域圖，深有嘉於其子孫之不忘於前世，及今識之，所以爲後世計也。爲之書其篇端，亦所以識感也。《潛齋集》卷七。

宋君巽詩序

柘臯宋君巽少以文鳴場屋，嘗領薦冰壺。時不在邦侯舉送者須朝士保員，然後得上春官。余時爲太學官，嘗奉保劄。余未幾補外，更迭不常，君巽亦漫遊，不相聞問久之。近一再見，則君巽鬚髮盡白，吾衰益又甚矣，相顧駭愕，蓋不翅如桃源之隔世逢是人也。問近業，出袖中詩相示曰：「士技窮至此。」展卷亟讀，其詩不苟作，意圓語澤。必嘗馳騁昔人徑庭而得其邯鄲之善步者，吾固重嘉君巽之有得於詩也。科舉業廢，士以醅噫之氣鬱發於詩，詩之工而文之窮也。時異世殊，士之技亟變如此，則夫今昔老少之變無足怪者，安知變有甚於此者哉！徵余序，爲之書，且識吾感。《潛齋集》卷七。

馬竹泉詩序

夙聞竹泉馬君可人也，近得見其詩，詩復可人，信矣，竹泉名不虛得。夫騷人墨客滿湖海，聞名不如見面，今見子詩，其爲見面多矣，奚必傾蓋握手而後爲相知哉？張文潛評郊、島詩，陸龜蒙評李賀詩，皆隔世不相及而相知者，况吾與竹泉，非若此其邈也。讀其詩，想其人，爲之序以歸。他日邂逅一笑，當信子我之爲故知也久矣。《潛齋集》卷七。

錢肯堂詩序

平易者，詩之正聲也。心形於聲，心正而後聲正，故知聲可以觀心。肯堂錢君，修謹士也，以其讀書餘暇，發之吟詠，不肯鑄心鏤肝，以爲艱深刻苦之語，其辭氣平易似其人。先正融堂先生學派慈湖，其爲文若詩，皆根本義理，肯堂爲融堂羣從子弟，意必得其遺餘也。康節先生曰：「吟自在詩。」自在者，平易之謂也。夫布帛不麗於紈綺，菽粟不美於膏粱，不知布帛之有餘用、菽粟之有餘味，而紈綺膏粱，知道者厭之。肯堂詩，吾於是乎觀之矣。嘗挾冊徵余序，爲之書。《潛齋集》卷七。

題鄭松泉詩序

陶淵明一部詩在菊邊，林和靖一部詩在梅邊。夫菊梅非詩，觸目會心，自不能不詩耳。鄭若春叟築屋松間，暇日嬾其下，采花撫實，時汲清泉咀嚼之，故其詩思多得於此。日新月長，松泉之趣無窮，君之詩所得亦未渠央也。「學詩如學仙，時至骨自換」，君試持問陶、林二公，當爲印可。《潛齋集》卷七。

余橘所詩序

余姓陸名吉，嘗仕楚，與楚大臣黃甘論事不合，退家巴山之大盎中，將老焉。純坤之月，天地閉塞，霜風怒號，萬木萎落，世徒見吾實朽然以大，取而剝之。余方與諸老相顧一笑，將答蒼龍，乘莽渺以去，有客歎門謂予曰：「某有友曰橘所者，意亦巴邛譜也，願從先生游，如何？」予曰：「世固有苦樂殊趣，甘酸異味者，不可以一軌律也。不知子之友，其居之所果雲夢之墟乎？抑洞庭之墅乎？余雖不及入其室，見其人，聞有《橘所詩集》，膾炙萬口，溉根食實，其將以千頭爲子孫世襲。其自託得所，其於致福未涯也，焉用數數以效世之枯槁者爲哉？其深根固蒂，每歲霜後食甘，有欲致之於千里外以詫東西之產，雖徇焉可也；設好事者欲移種他所，慎勿徇。橘踰淮以北，不三年化成枳，實色香味盡變，雖欲復爲故橘，不可得已。子與我持此語橘所。」橘所姓余，名揚。陸吉自號亡是公，因序其事，囑潛齋何某爲之書，以授客周嗣孫。《潛齋集》卷七。

分陽諸公感寓詩集序

陳子昂賦《感遇》〔一〕，朱子陽賦《感興》，今玉華諸君又賦《感寓》，賦不同而感則均也。詩以

感而賦，不感則無詩。詩之感寓，不知所謂寓何也？予嘗觀之，宇宙間無一非寓。天地至大，物在太虛中亦寓耳，天地猶寓，況萬物乎！故日月星辰寓於天，山川草木寓於地，鳶寓於風，魚寓於水，蛟龍寓雲，螻蟻寓壤，蠋寓桑，蝸寓菀柳。其所寓大小不翅泰山毫末、大海壘空之相去，至於適其所適，各足其分而已。今諸君於詩隨寓而適，則天地間何物非吾言之寓乎？故其往者復者、作者止者、榮者瘁者、蠢者蟄者、得者失者、隆者汙者，一以吾身寓焉。情隨寓感，詩隨寓得，故凡可興可觀、可羣可怨，至於千態萬狀不可紀極者，皆吾寓中之隨形變化者也。又安用拘拘於物之小大，以來漆園老吏之譏乎？夫寓舟於壑，寓山於澤，夜半有力者負之以去，寓之不可常也如此，況於詩，欲不寓，得乎？此吾所以重感而三歎也。《潛齋集》卷七。又見光緒《分水縣志》卷七。

〔二〕感遇：原作「感寓」，據陳子昂原詩題改。

題方山翁牧歌樵唱詩序

余每愛牧歌樵唱之出於人心自然之韻。晞陽出沒，煙雨陰晴，時聽欵乃之發於柳邊竹外者，聲若出金石，是豈世間宮商之所能宣，丹青之所能繪哉！是意也，惟吾友方君起巖得之。暇日，請與君披襪，騎馱，君歌且唱，余當吹拍以和君之後云。《潛齋集》卷七。

題高氏金玉帖後

高氏自齊太公八代孫，僖以王父公子高字得姓始爾，後代不乏聞人，如《北史》之伯恭、敖曹，尤爲磊砢者也。譜獨爲宋著姓，其所從來遠矣。樞使公昆弟一時勳業相焜耀，鶴山魏公亦同父所自出也。諸老彫謝，東南文獻盡矣，其從子某叙次其先世往來筆帖，手澤儼然。余雖不及識，而其典刑猶在目也。唐世嘗購諸王書於王方慶家，自十一世祖導以下，得書十卷以進，以故諸王書至今猶有流落人間。君其寶之，安知此帖他日不在東壁圖書府耶？至元癸未秋七月題。《潛齋集》卷一〇。

題東麓詩卷

久不見東麓談詩，忽一日以吟藁寄示，亟展亟讀，其清灑可愛，啓發弘多。「學詩如學仙，時至骨自換。」安期生神樓妙散，得方匕服之，縱未駕飛龍，周八極，控白鶴，遍九陔，而其肌骨輕爽，耳目精明，早有塵表風度。他日洗髓脫胎，回視宿習，又不知隔幾塵矣。子其勉之！輒書篇端以歸。

《潛齋集》卷一〇。

題線縣尹孝經古畫圖

《孝經》蓋聖人以孝道而告諸曾子者也，昔人之所注釋、先儒之所刊正亦甚詳矣，未聞圖之以爲畫者，其於聖經疑若儼然。上都線君子華出此卷相示，魚香展覽，其隸書章句奇古，水墨像曲盡其情，若親拜尼山劍履，日觀曾子所以磬折答問之狀，使人容肅氣莊，不敢以褻，而知聖人之教人也嚴，則其親炙也可知矣。夫孝所以修身，事親事君，涖官治民，事天地、通神明之大經大義也，學者於此焉求之，放而準諸四海，至足矣。大德庚子春三月既望。《潛齋集》卷一〇。

題韓提幹伯高乃翁障東集

三山韓君載叔《障東誌》，特鄉邑一事耳，至於蹈危履險，而志不爲詘，氣不爲衰，其一點烈烈在天地間，不肯與世俗同流者，蓋可知也。夫水之東西流，利於一邑與否，非一人之私也，且無官守言責，而爭之不置，雖掇禍不之恤，茲固人之難能也。嗟夫！人心陷溺，滔滔者天下皆是也，安得強有力如載叔者出而障之，以復其故性哉！戊戌孟夏望，嚴陵何某書於廬陵西司馬廨。《潛齋集》卷一〇。

跋唐月心詩

猶記十年前月心携吟藁訪余山中，於是詩未脫藁，嘗爲作《月心序》，茲復以棗墨全帙相示。別十年久，詩益富益工，三復降歎。羣公序引復尋冕於前，驪珠蒼璧，蓋將繅藉，而與世之有識者共寶之。一繅三盆手，君之詩緒，來者固未渠央也。姑跋卷尾，捲錦以歸。《潛齋集》卷一〇。

朱默軒灝與其兄約山請跋詩編

江西詩逸響久矣，金口木舌，振餘韻於千載之下者，約山老子爲巨擘焉。長篇巨帙，固未盡見聞於騷人墨客，唱和間掇拾咳唾，便覺鏘然有聲，詩在江西固未嘗亡也。至於華樓燕暇，伯仲墳簞，工曲異同，不必一律，而其性情之所感發者若出金石，豈其詩脉獨在約山乎？老逋仙去，孤山梅月猶有主人默軒在，約山遺韻未泯也。默軒他日持樽酒，舉似余言以酌之，亦當一笑於地下矣。辛酉夏五。

趙司理菊梅百咏跋

梅菊比羣卉獨清絕，其自立於寒風凍雪中而不變其操，以之況高人逸士爲最宜。古今詠者不一，而真愛梅愛菊者不多見。前理掾趙君字時賽，以《梅菊百詠》見寄，可以觀君所志矣。僕咸淳辛酉歲爲廬陵司馬〔一〕，而君適來，見其清苦冰蘖，出於天性。亂離歸來，而貧益甚，清苦益自勵，世之人竊笑之，君之自處澹如也。君持此以友梅菊，無愧色。夫穠桃艷李，世之所愛，知梅菊者蓋鮮矣，而君獨愛之，故惟君知梅菊，梅菊知君。吾是以三歎而取其節焉耳，謹書其卷末以歸。《潛齋集》卷一〇。

〔一〕辛酉：按咸淳無辛酉年，或是「辛未」（咸淳七年）之誤。

跋譚氏編首

勳、勳、勃，王家三珠樹也，第乃翁福時有諛兒癖。雖然，有子如此，亦豈易然哉！譚氏一門，父子昆弟，長編巨帙，照映鄉國，獨以乃翁平生所著揭之篇首而歸尊焉，其賢於諛兒也遠矣。《潛齋

集》卷一〇。

陳氏與子請字跋

陳檢閱以倉扁術過余，爲其子請字。子既冠，竊有志於學，父執名之曰景仁。余謂仁之道大，不可若是其幾也，字之曰恕翁。求仁之道，於此爲近。夫子曰：「有一言而可以終身行之者，其恕乎！」子其勉之。《潛齋集》卷一〇。

跋馬子恢家藏三賢帖

觀紫陽先生筆帖於百載之下，於其人不於其書。論鶴山先生交道於百載之上，觀其人亦觀其所與而已。愚於此得二道焉。後學潛齋何某端拜敬書。

或問于湖字帖於晦翁先生曰：「世人重于湖字，何也？」曰：「好是他不把持，愛放逸故也。」嘗恨不得一見其真蹟。今於馬君子恢家藏得觀其所與，乃先公鶴山交際之帖，三復信然，拜手敬書。

昔人評山谷帖，謂其書入神品，蓋山谷縱橫變化，自成一家，不肯隨人後，其司馬穰苴兵法之奇陣也。後之人未夢見太史而好奇者，鮮有不血指者矣。《潛齋集》卷一〇。

跋何玉華南山八詠集

宗家逢原儒諭以高使君《南山八詠》寄教，且徵和篇，蓋南山，何氏祖塋在焉。至元戊子，嘗道分陽，適與諸公清明上塚之集，陵前八景，猶依依在目。今得詩，如見《蘭亭》繭紙，尚想山陰遺事儼然也。敬次前韻以歸，且書尾以證他日云。《潛齋集》卷一〇。

王石澗臨清詩藁跋

石澗兄，我先人甥也，長予六年。幼學時，隨吾先姑歸吾家。予方童丱，兄與兒輩爭念詩文，已跨人先。及長，爲舉子業，不肯落人後。近世學者廢舉子業，好尚爲詩，石澗於好尚中獨如曾子嗜羊棗膾炙之美，不能以易。每一過予，輒以所自爲詩奮髯高歌，如曾子歌商，聲滿天地，閒居聞此，一大樂事也。今年春，予卧病菟裘，石澗來訪，出詩一大編，曰：「予近作也，願求一言以自信。」開卷讀之，盤空硬語，擲地金聲，使人驚喜。以年考之，石澗八十一矣，其精力不衰，筆力愈勁如此。

病鄉持玩紆憂，娛老之一助也。石澗進而年過九十授尚書，九十五作《抑》詩，使吾及見，會當黃髮相看一笑。大德癸卯正月既望，潛齋何夢桂敬序。《潛齋集》卷一〇。

全宋文卷八二九五

何夢桂 五

試策 問《易》《春秋》之元及時政六事。

《易》六十有四卦而始於《乾》，《乾》之四德而始於元；《春秋》二百四十二年而始於君之始年，紀年之首則又始於元。元者，其天地方開之運，帝王出治之端，最不可不謹者也。夫子彖《易》既曰「大哉乾元，萬物資始」；仲舒說《春秋》亦曰「《春秋》謂一爲元，所以視大始也」。大哉，始之爲義乎！此《易》與《春秋》所以首之以元之一字乎。恭惟皇上嗣登大寶，丕纘皇圖，以不世出之資，當大有爲之會，渙號改元，嘉與天下更始。猗歟休哉！此正君子得輿、小人剝廬之時也，此正中國太陽、四夷爝火之日也。執事先生發策禮闈，首以《易》、《春秋》之元爲問，且有感乎咸平、淳熙改元之盛，而拳拳於方今之新政，大哉問也！鯁生拭目明盛，方當頌元之時，其敢無說以對？竊謂帝王出而體大《易》之資始，故能運初心之元；帝王出而法《春秋》之正始，故能新初政之元。一元之氣，

渾淪磅礴，充塞宇宙，在四端爲仁，在四時爲春，運之於心則爲大善，發之於政則爲大始，歷數於此焉起，政事於此焉出。陰陽有消長，而崇陽抑陰當於此而始分；王伯有純駁，而貴王賤霸當於此而始決。《易》於此而嚴其始，則小人不得以比君子；《春秋》於此而正其始，則夷狄不得以干中國。爲人君者，惟謹諸此而已。愚嘗歛衽肅容，拜觀國史，竊窺章聖之咸平、壽皇之淳熙，其改元也，固無一事之不謹，而於君子小人之幾爲尤謹；固無一事之不嚴，而於中國、夷狄之辨爲尤嚴。選明經而置之講席，召舊臣而處以平章，自是班行無少年輕薄之人；閱軍士而飭邊屯，重兵謀以圖狄虜，自是朝廷寬西顧之憂。茲非咸平改元之始乎？揭公道於政府而輔臣重，修成法於吏部而真才出，自是無奸邪冒濫之弊；分兩淮地而邊境嚴，閱諸路兵而軍器振，自是無諸夷乘間之虞。茲非淳熙改元之始乎？皇上遙繩祖武，率由舊章，今日之咸淳，即前日之咸平、淳熙也。鯁生憂治危明，以爲最可喜者固今日也，最可慮者亦今日也。天地間有一即有二，有陽即有陰，是以君子與小人常相勝負，中國與夷狄常相盛衰。今也魚水一堂，雲龍千載，正人固翕聚矣，然同人於野，豈無伏戎於莽陰伺其傍者乎？泰山四維，盤石九鼎，國勢固尊安矣，然諸侯朝王，豈無裔夷謀夏竊窺於外者乎？蓋初心者萬事之綱領，初政者四方之觀瞻，如機之始發而中否決焉，如樞之始運而闔闢分焉。此正伊尹告太甲以「罔不在初」之日，此正召公告成王以「王乃初服」之年，此正申公勸武帝以「力行何如」之時也。而況方今之政事，始於元而未極於亨，猶有如執事所云者。人心當平也，必於四方僭望之始，使之有懽愉而無戚嗟可也；政令當孚也，必於象魏布政之始，使之有信從而無惶惑可也；物情當比也，必於懋遷有無

之始，使之爲稱物平施之方，而無什百倍蓰之算可也。量地取民，賦斂當始均一也，非有輕重適中之制可乎？利權經國，錢帛當始流通也，非有子母相權之術可乎？公私積蓄，財用當始充足也，非有周府泉流之蓄、漢都貫朽之實可乎？皇上嘉慕乎咸平、淳熙之盛，以二祖之初心，行二祖之初政，世道不患其不成平、淳熙矣。然而欲法二祖，當法聖經。夫元者固《易》之始，至於陰陽柔順、消息變化之理，實詳於六十四卦之中。凡陽而剛者內之，陰而柔者外之。聖人於《泰》之初九既曰「拔茅征吉」，於《否》之初六又曰「拔茅征亨」，蓋亦慮小人之盛而謹於其初也。元者固《春秋》之始，至於王伯夷夏、正邪義利之交，實著於二百四十二年之間。凡內而中國者進之，外而夷狄者退之。聖人於隱之二年始書戎，於莊之十年始書荆，戎以好舉，荆以州言，皆不與夷狄之進，而嚴於其初也。由是觀之，天下最不容於不謹者，人君之初政初心也。自初心而謹之，則事事皆善，此《易》所謂「元善之長」；自初政而謹之，則事事皆正，此《春秋》之所以正次王也。雖然，元者所以始萬物也，亦所以終萬物也。元亨利貞之通復，此元無一息之不存；元會運世之推移，此元無一日而不在。蓋運行不息之謂元，變化不窮之謂元。所貴乎體元之君者，以其終始惟一也。闢門明目，厚德允元，此舜之謹於元日者然也，而舜則終始一幾康。新民宅邑，位在德元，此周王之謹於初服者然也，而成王則終始一緝熙。「萬事墮哉」，常警戒於「庶事康哉」之後；「無疆惟恤」，亦申飭於「無疆惟休」之餘。此有虞所以常保其雍熙，成周所以常保其泰和也。《詩》曰：「靡不有初，鮮克有終。」《書》曰：「罔不能厥初，惟其終。」此皆當今之龜鑑也。愚既以《易》、《春秋》之謹其始者爲今日獻，敢以《詩》、

《書》之謹其終者爲今日勉，惟執事以復於上。謹對。《南宋文範》卷三九。又見光緒《淳安縣志》卷一二。

邵濂翁玉成說

天之於人，猶父母於子。父母之命子不無勞逸之異，其於愛子一也。天生民厚，而命之不能無貧富貴賤之不同者，天豈故爲是厚薄之私哉，要其致而歸於成。此天與父母之心也。世之人與人之子或不能知此，故處逸而不忘親者易，處勞而不怨者難；居富貴而不忘天者易，居貧賤而不怨者難。故能知親者，父母之孝子也；能知天者，天地之仁人也。《西銘》一書，擴千古所未發，至其卒章曰「貧賤憂戚，庸玉汝於成」，若此者可謂知親知天者矣。邵君濂翁以玉成自號，則其素貧賤也可知。玉必琢而後成器，所以成玉之德也。然則今日之貧賤，安知非天之所以厚子以成子之德者。不然，乾父坤母，豈獨偏於子哉！徵余說，因爲之書。《潛齋集》卷一〇。

胡古澹植竹說

魯桓公六年子同生，以子與公生日同，故名曰同。後漢鄭玄生孫，與玄年同，名曰小同。夫以桓公之子爲同，則玄之孫爲小同矣。父子祖孫之偶同也，古人以之紀名，以見其重同也如此。庸齋先生

手植庭竹，歲在大壬辰；其孫國器植竹於其地，爲小壬辰。茲固僞同爾，抑若有數。然後庸齋六十年，竹與主人化爲青寧久矣，後人重植不於他物，必於竹，植竹不於他日，必于此年，非無意也。非有老成能言者識之，雖子孫不知其然者，此豈與尋常所偶同者比哉？昔人有見其祖故坐磐石，輒泫然涕下，况乃翁三逕，常與二仲遊息者乎？感物懷人，故宜諸孫之眷眷不能忘情也。國器賦詩識感，與其昆玉及其朋友載賡，凡若干篇，求余說，遂爲之書。《潛齋集》卷一〇。

南山天寧禪寺山門記

南山天寧禪寺堂頭無竭禪師如川主席此山之八年，重作山門，大書特書曰「華嚴法界」。書者何？所以大其門也。門大，則其華於佛之居與僧之堂若室也可知已。世謂佛善爲大言以聳動一世，然觀其徒之果於事爲，有的然可稱者，非夸語也。古今言教門者有三，曰儒曰釋曰老。儒自羲軒至孔氏，與天地並立，老氏中出，釋最後。二氏宜非儒抗也，然自近世以來，釋氏之宮滿天下，老氏半之，儒之宮若州若縣各一而已，儒已不競於二氏矣。至元一統，獨推釋氏爲三家首，紺園貝宇，日新月盛，宏傑詭偉，蔚炳麗靡，陟其門者將目眩氣奪，儒者尚敢望其彷彿哉！雖老氏之徒亦將自遜其不逮矣。豈西方之教果優於洙泗之仁義禮樂歟？抑其徒代有能者以興起其法，而孔氏之後獨無其人歟？抑亦拘於世與化，而有不得不然者歟？不然，何以釋氏之獨盛，而軼出於儒與老若是也？師既以扁屬

余書，遄復求記，以昭不朽。師也，蚤契佛乘，智慧而材幹，有功於其教門也固宜。他日而子孫有問作門者誰，余固不得以沒師之實也。百世而下，或於今之世與教而將有考焉者，欲弗記得乎？門作於至元甲申冬十二月，越二年丙戌秋八月既望始記，遲之也。《潛齋集》卷八。

西真宮記

建德縣境西直銅官山二十五里之半，有宮曰西真，江山之奇勝萃焉。東北三峰巋然起於蒼莽之間，奔驟雲矗，兩崖翼然，以蔽虧江濤之上下，崑崙虎踞，巉峭壁立，江流啣於崖趾，激湍停淵，噴薄洄洑。西南羣巘林旅奔赴，蒼翠詭狀，綺束繡錯。作宮是間，望之知其爲神仙官府也。其初未有是宮也，惟見夫藜藿之墟、鼯狸之徑，固好事者屐齒之所不至、馬迹之所不及也，豈天作而地藏之，若有待而後畀焉者？道士諸葛與權始乞地於鄉寓黃迪功，請武強廢額於朝而兆基焉，蓋宋寶慶丙戌也。於是鄉人士之驟見而駭觀者曰：「世之所謂洞天福地顧在是乎！」意有鬼神怪物始推輓以出也。其未底績，而與權沒，亦或有待而後成也。地輪廣得若干步，外樹以垣，垣周於宮，堂室門廡舍館樓閣祠藏周於殿。其薨棟參差，金碧炳綉，蓋師之再世曰邵含光、徐景仁協力圖究，有以踵成之也。其後復撤法堂庫堂之圯者新之，補方丈齋堂路亭之缺者完之，則其三世曰黃處信有以迄成其功，而畢其前人未償之志也。其在常住田若桑爲畝者百二十有奇，其百畝則含光之所菑畲也，二十畝則處信之所播殖

也。今食衆且百指，而歲賴以不匱者，皆二師衣鉢所私推以與其徒公共之也。夫以上下六十年間，父子祖孫黽勉育蓄而後成此，吁，亦難矣！處信遠來乞記，其將詔今以傳後也。抑余竊有感焉者。今夫齊民，田有賦，夫有役，户有科配，雖尺地占籍不免焉，貪官虐吏又舞法而乘之，民之至貧病且徙以死者何限！而老、釋二氏獨得不與齊民齒，顧非幸歟？況以宮中與民比，計其畝則贏於一夫之井矣，數其衆則溢於八口之家矣，而獨不賦不役，又科配之所不及，而其教門復無陪尅鞭笞，以拂亂其心志。故老氏之徒尤佚於釋，其所以安居暇食以優游生死者，顧非大幸歟？嗚呼！堯舜禹湯文武之遺民，後世曾不得以復被其澤，而老氏之子孫得以百世食其福，俛仰慨嘆，爲之記而繫之歲月云。至正丙戌八月記。《潛齋集》卷八。

分陽覺道山麻姑祠記

麻姑仙壇本盱江丹霞小有洞天，在唐爲撫之南城屬縣，顏魯公刻石誌事，蓋可證也。分陽邑西四十里曰生仙鄉，亦有麻姑祠，無所於證。然以地考之，源曰麻溪，村曰麻村，曰麻嶺、麻逕，皆托仙以名，而其鄉亦併都仙號，則仙之著靈茲土由來舊矣，豈仙之神在天地間如風霆雲雨，變化倏忽，將無處不有耶？覺道山巋然獨高於萬山，父老相傳，謂麻姑壇若祠舊宅其巔，水旱疾疫，隨禱輒應，民不堪登陟，徙之山下祠焉。山西北隅瞰麻溪，石壁峭立，昔有道士修煉其上，一日羽化，倒影滅沒，

巖石間常遺人影，冠服儼然。遠邇神之，強名之曰覺道，於其山亦曰覺道山。夫二仙相去世代不可復考，而遺風餘烈流落人間，則雖千載猶一日也。憶昔仙人王方平見麻姑於吳蔡經家，已謂三見海變桑田矣。天地無情，日運而往，二仙不可復作，不知桑田滄海至今幾變，安得乘風來下，以拔巔崖蒼生，使之亟蘇息乎？鄉士何自明懼事久迹湮，磨碣乞記，俛仰世變，重增歎息，姑誌其槩云。覺道仙，圖記逸名氏，不知何代人，或謂姓陳名一真，茲配祀麻姑祠。歲在至元丙戌夏五七日，潛齋何某記。《潛齋集》卷八。

易菴記

文昌山水爲東里勝，何氏家世其間。前瞰雙溪，後枕三阜，湍流清泚，林木鬱葱。其人端靖樸茂，有淳古風。三阜中間盤旋成谷，深可六七里，清泉白石，古樹幽花，邈在人世風雨外。潛陽子廬於谷口，廬西偏穿徑通山，盤屈而入，遡澗可二百步，監橋三小間，下俯清流。跨澗陟山，西南轉，縈迂而上，有山巋然，前踞後矗，中若蝸然，廣迤數畝。築室三間，扁曰「易菴」。從衡楹二十，中爲潛陽子居游之室，翼以兩齋，四面闢牖戶，貯書史，左置牀榻。四時徜徉俯仰，食於斯，息於斯，詩於斯，酒於斯，學於斯，得於斯，且將老死於斯，蓋不知穹壤之高下、寒暑之推遷也。暇日隱几，嗒然而起，虛室坐忘，吉祥止止。於是招青鸞，引清泉，呼松竹，侶魚鳶，與之語曰：予與若居三載

矣，若知吾易菴之趣乎？異哉，吾之「易」乎！義不能畫，文不能彖，姬孔不能贊，吾俯仰取之無不足，吾以強名吾菴。雙扉闔闢，《乾》、《坤》兩關。一闔一闢，《復》、《姤》中間。位《坎》、《離》而左右，乘《震》、《艮》而往還。然未足以盡吾易之妙用也。至於雲霞聚散，煙雨陰晴，水月吐吞，晞陽出沒，山光泉色，隨景變態，不可名狀。而又古松老杉，修柯戛雲，如龍蛇夭矯，叢蘿蔓薜，掩翳蒙霧，鳥巢其間，呼鳴啾唧。飛泉瀑布，下濺危石，霖潦則怒號如雷霆，潺湲則鏘鳴如環珮琴瑟。樵逕出半山，仰望如在雲際。畊鋤晨入，樵牧晚歸，眇在蒼煙細雨中，髣髴如畫。前歌後答，但聞人聲隱隱飛落半空。凡此皆天地間自然之易也。景物無窮，千態萬狀，不過一陰一陽，往來變化，觸目會心，何者非易！吾以一身，窮年偃蹇，不出是間。吾將以天地爲一室，日月爲兩戶，衆山爲壁牖，萬物爲徒御，其能蓄於環堵之內，如蝸牛蟻蠓，自認以爲已足乎？或者不察吾言，謂其大而無當，往而不返，且將驚怖，以爲荒唐誕謾也。夫有實而無乎處者宇也，有長而無本剽者宙也，有目有趾，同囿其中，而不知道者衆也。使其不以吾言爲荒唐、爲誕謾，則天下之知其道者固衆矣。吾將大而小之，往而復之，則又入於無所紀極，而天下愈不可知矣。雖然，余妄言之，而亦妄聽之。奚吾將歸來乎無有，逍遙乎不測，浮游乎環中，以爲之室。無門無旁，無處無入，大包宇宙，細入芒芴。凡吾生死窮通，動靜語默，不出其域。此蓋千聖之所歸，萬生之所息也。至此，則不惟或者不知，吾欲知之而亦不可得矣。《道德經》曰：「天地中間，其猶橐籥乎！虛而不屈，動而愈出。」意者天地其知之乎？《繫辭》曰：「聖人以此洗心，退藏於密。」意者聖人其知之乎？問諸天地，天地無言，問諸聖人，聖

人不容吾言，吾欲言而終忘吾言矣。或者不得問，拱默而退，姑記其事，以俟來者。潛陽子，不記姓氏，或云派出先天，包犧氏名之曰復，漆園子字之曰天根。歲在強圉赤奮若夏五望，潛陽子記。《潛齋集》卷八。又見光緒《淳安縣志》卷一三。

重修嚴先生祠堂書院記

嚴陵瀨，繇漢逸民嚴先生以得名也。羣峰巒岼，一江帶其下。雙巖離立，巉絕矗起者，先生之釣臺也。雲烟上下，而巍簷岿棟，半出於喬林叢薄間者，先生之祠也。祠之前曰羊裘軒，其東曰燕居堂，西曰遂高樓，樓之前曰清風堂，又前爲雲峰煙水閣，介兩間爲書堂。堂廳門廡、齋廬厨湑具。祠創於范公仲淹，書院創於陸公子適，而又諸賢相繼緣飾，迺底於成。歲久屋敝，更亂離，益就隳圯。至元辛巳，浙西道宣慰同知按部道祠下，登臺謁拜，俯仰慨歎，議飾而新之。劄下書院官，捐米廩助費，計庸即功。堂與前軒蓋葺粗完，以費匱告，公改命府判官以司存董其事。判官承檄，召桐、建兩邑尹相役分隸焉，早暮展力。自冬十一月丁未經始，迨十二月乙未竣事。斲腹咸新，惟清風堂四齋未就。又明年癸未春三月，書院官以書來徵余記，曰：「斯役也，其斯文絕續之會乎！尚磨雙崖之石，以昭不朽。」夫光武以帝室之胄，挈漢鼎於羣盜之手而洗濯之，雲臺諸臣殫智畢力，惟恐奔走或後。而玄纁物色，下逮微賤之故交，迺三返不能致，至則偃蹇傲兀，視漢爵祿若將浼焉。是豈挾朋友之私

以蓋君臣之義，猶有不足於光武耶？甘心漁釣，沒齒羊裘，彼固自有見也。世之人尸而祝之，果可起先生死魄於九京下，則此江之水，詎足以洗巢由之耳哉？天地無情，萬物之漸盡者何限。渭南銅盤，長安金爵，今復安在？而陰崖陽林，白雲英英，千古無恙，參差百楹，巋然魯靈光，不與兵燬俱燼，而蓬藿足音，猶有曠異代而相感，以引前人之緒而勿替者，此豈先生嘗斬於後之人以至此哉！姱修昭質之在天下，直烈烈與日月齊光，而人心天理橫四海，亘古今，固未始泯絕也。山高水長，萬世下猶將聞風興起。嗚呼，先生豈獨爲東漢重哉！宣慰劉公宣，府判趙公祥，書院官邑人駱正大。郡人潛齋何某記。《潛齋集》卷八。

璇璣觀記

宣授浙西道道教都提點董高士德時，乃至元丁亥秋八月，成璇璣觀於杭之城北隅，於庚寅冬遠求記於嚴陵山人何某，曰：「璇璣觀者，蓋取北斗魁四星以名也。斗魁四星爲璇璣，杓三星爲玉衡。璇璣名者，尊名所以嚴事也。」余聞其說而愕焉，謂宜登天游霧，挑撓無極，以貌在野馬塵埃之外，若桐柏金庭，青崖碧樹，丹霞洞府，碧蓮翠杉，而後仙翁客都之，足以棲真靈而輅靈貺。而此也乃混於九衢車馬之衝，萬家歌舞之會，榻外市聲日夜囂焉，愚意魁躔景曜未必下臨茲土也。主人勃然起曰：「有是哉！誠如君言，其何異於刻舟求劍、膠柱鼓瑟者之爲也？君謂璇璣之在天中也，獨不照臨四方

乎？夫天自北極以距南軸，地自暘谷以入太濛，固孰非璇璣之所運也？今畫地方尺，即具四方，謂北非璇璣，南非玉衡，可乎？至於一身縱橫逆順，運以斗宿，亦無不具。吾左肘屈爲璇璣，右指信則爲杓；吾右肘復屈爲璇璣，左指信又復爲杓。吾取璇璣於吾兩趾與膝，則杓上直於頂，左右易皆如之。吾取璇璣於吾兩肩與乳，則杓下直於拇，左右易亦如之。吾布吾十掌指而左右按之，又舉吾足而左右跽步之，皆斗璇璣與杓之象。吾證一物、驗一事，且無適非斗，豈於吾宮獨不戴斗乎？吾推而擴之，斗之所以統陰陽、宰列曜，而又靡不在也。故斗上戴紫極，營旗柱厨，蕃衛翼翼者，天帝之宮也；下履階符，棊步項反槍矛盾，芒角濡濡者，三台之府也。東携蒼精，攝提載清，西挾咸池，罕車伏馳，南輅朱鶉，北軼玄武，閑我天駟，豐我天庫。夫如是，則四海平、萬事康，皆斗之所以庀天職而亮天功也。故吾內觀形神，見斗於心，外觀躔舍，見斗於目，乃至出入起居，皆隨寓見斗。前吾於宋見斗於越，後吾於元見斗於燕，斗蓋無在不在也。今吾之官於斯，以夤事斗於斯，則百雉之城，萬井之邑，環周廬而拱之，亦由帝車中運，而庶民之星羅布於外，歲時禱祠禳禱悉於斯，則吾觀之以璇璣得名也宜無忝，君奚惑焉？」余謂天地開闢，至於今不知幾變矣，雖天柱或折，地維或闕，而斗居中天，乃亘萬古而不移其所，豈若夫物之縱縱而總總者，以隨化生死成毀起滅而靡有定極哉？余固有感於此，輒復因子而遂言之，以彰斯觀之徽號，使觀與名等垂於無窮也。德時逮事宋朝，景定臈蜡，以祈雪應，咸淳郊禋，以祈晴應，錫號修真演道法師，職龍翔之祐聖，階勅補鑑義全真齋高士。至元戊寅，被徵北覲，承旨禱旱而甘雨澍，禱雪而瑞霙霏，晉號修真通元體妙法師，宣授今官，開元宮都監

住持；尋晉號修淨通妙太極五雷宗教法師，職掌如故。歲癸未，以母老給告歸。越五祀觀成，授其徒杭州路道錄陳天錫領觀事，欽上命也。茲將鑿碣以告績，則書曰某年某月某人，而領事者不與焉。至元辛卯三月既望記。《潛齋集》卷八。

洞神宮記

通真宏道崇玄法師、教門提點、住持洞神宮黃智遠，以至元乙酉改作法堂大門兩廡成，其師孫楊處潛復創作中門成。越三年，遠乞記於潛齋何某，久弗得請，或日記不足作故也。余謂宇宙間事所不足者固不在老氏也。世之僨驕喬鶯，相刁相靡，方相尋於無所紀極，至於老氏之徒離羣立獨，其於世殆若未數數然也。夫域於封疆之內皆民也，古之爲民四，後之爲民六，是老佛之徒亦民耳。戴天履地，食粟米，衣絲枲，孰能不在人世間哉！自漢文帝受河上《道德經》而老氏出，自明帝迎竺法蘭於西域而佛氏入中國。道之宮起於元封，而盛於李唐；釋之刹起於永平，而大盛於宋、齊、梁、陳。以至歷代興仆因革，雖不能不異，然其徒與民悉統諸有司，一其號令，而均其政刑，上下未始相戾。厥今隸有司者惟占籍爲氓，其計戶而不隸於氓者各建官以署其事。十羊九牧，疾驅而亟鞭之，交受其弊，僂焉胥顧，以至於死且徙者比比也。儒有官不競，不得與巫醫虞羅齒，貪官虐吏復越俎而魚肉之，故儒下與黔愚駢首繫頸就吏而已。惟道與釋概得不治於有司，而釋之官，震之以權，壓之以威，

其受弊殆與民類。惟道之教易以平，簡以靜，故其徒得以佚於民而優於釋，獨若不在人世間者。有廩得以食，有筐篚得以衣，而橐中之所貯蓄不至凜凜於叫囂隳突者之所揭篋，故假之以暇而養其力，得以棟宇宮室而安焉。世之人得一投足於老氏之門者幸也，吾於洞神宮觀之矣。其門前陌塵，墻外市聲，擾擾者固已復隔風雨。築徑樹木，浚池畜魚，觸目成趣，虛堂靜院，花卉蔽虧。時冠鹿皮，衣鶴氅，焚香燕坐，誦《黃庭》，歌《南華》，聲若出金石。倦則登樓馮虛，仰招山雲，俯吸溪月，蒼翠繡錯，澄鮮流麗，詭態百出，皆可納之几席上。凡此者皆吾之所獨私，而世人不得有焉者也。其視荒墟野刹，至有終歲流逋而不得以一食黔其突者，虛廊空階，往往鞠爲苔蘚；而況崇臺大宅化爲禾黍荆榛者何限，而窮閭破屋渺莽於蒼煙白水間，尚堪屬目邪？然則老氏之徒得以安居飽食，以生死於其宮中，其相距懸絕甚矣。嗚呼！孔堂絲竹，千載寥寥，斯民苟不得蒙詩書禮樂之澤，使老氏清淨之說得以孤行於天下，而民與受其庇，尚庶幾哉！時至元庚寅冬長至節記。《潛齋集》卷八。

白雲山法華院記

天地萬類，一性而已；人物萬形，一心而已；宇宙萬古，一佛而已。性外無心，心外無佛，圓顛方趾，耳目口鼻，佛蓋天地間一人耳。造物怒流，萬生錯錯，含靈蠢動，惟人最靈。天地此性，即人此性；佛有此心，即人此心。見性即見心，見心即見佛，心無二心，故佛無二佛。人見過去七佛，見

在十佛，未來千佛萬佛億佛，遂謂佛異，不知七佛一佛，十佛一佛，千萬億佛亦一佛而已。人欲見佛，見心即是，何以故？以心見佛故。祇此一心，照天照地，照古照今，生法生（一），心滅法滅。心清淨，故佛應心現；心塵垢，故佛隨心隱。文佛涅槃，心佛固在。迦葉後至，達摩西來，遞傳心印，燈燈見佛，在夷夷見，在狄狄見，在中國中國見，佛固未嘗往也。世謂佛入滅後不復見佛，亦謗佛甚矣。佛之徒不善見佛，指丈六土偶爲佛身，是以色相見佛；指布地黃金爲佛主，是以緣相見佛。不知佛以無爲法，世間一切有相可作可壞，故此佛身佛土有力者能作之，有力者能壞之，而固不可常也。至於佛之不生不滅，不垢不淨，大包六合，細入塵微，諸相俱空，真常獨立者，固人人之所同得，亦人人之所同見。若執我見人見，終不足以見佛。且以千百億化身而謂之佛，有人信得一佛能化爲千百億佛，則於一剎那間佛當隨處應化，則亦當有千百億人於一剎那間隨處見佛。若復千百億人認千百億佛說，言我佛非彼，彼佛非我，無有是處。譬猶東海見水，曰與西海異，西海之見亦復如是，不知水本一水，彼妄見者認水爲二。燕人見月，曰與越人異，越人之見亦復如是，不知月本一月，彼病見者指月爲二。而况佛說四大部洲，東佛于逮，西瞿耶尼，南閻浮提，北鬱單越，盡諸國土所有，其人如恒河沙數，人見一佛，亦復如恒河沙，見人人異，又豈特見水與見月者之異而已哉！建德之慈順鄉曰某里，古無佛寺，歲時水旱疾沴，生死福禍，民之禱且禱者無所於託，衆謂非宜。鄉士王一桂、王某諗于衆，將創置焉，度地於白雲山之阿。方範土輦木，衆歡喜踴躍，輸財若力，不日竣事。請於僧司，得兜率子院廢額曰法華。南北諸山主僧爲之開堂設法，竟，請記於余。余按郡圖志，睦諸寺自宋

昇平迄宋南渡紹興凡百三十有九，隸此邑者三十八，其在此鄉者五，今益其一，固未見其贏也，或者駭焉。原晉以上州未始有一寺，佛非昔無；迨宋以來累百累千，佛非今有。其後遞興不知其幾，佛非加多；遞仆不知其幾，佛非加少。而況來者之興仆未可知也，而或者駭之，非真見佛者也。使真見佛，則地獄天堂均爲佛國，無明真如等爲佛乘，將大千世界無處無佛，一切衆生無人非佛，而佛奚彼此之擇哉？同見見佛，名爲正見；異見見佛，名爲邪見。余非學佛者也，然直信己心與佛不異，敢以聞諸佛者，試以告之佛之徒，遂爲記。至元戊子四月日，何某記。《潛齋集》卷八。

〔二〕生法生：似當作「心生法生」。

分水縣學田記

學校之法二，教與養而已。三代學校法出諸公上，而不出於私，故司成樂正，國爲設官，所以教也，公田米廩，國爲給事，所以養也。自王公國都以至比廬族黨，莫不有學；自王太子、王子，與夫羣后之世子、卿大夫元士之適子，以至國之俊選，莫不有教，亦莫不有養。故其四時誦絃禮書，干戈羽籥，若貴者賤者皆得以一志於學而責其成。三代學廢，其僅存於後世者惟國學與郡縣學耳。教法不備，而養之道益狹，故鄉民之秀者羣居自爲師友，而詩書禮樂之化不盡出於公上，齊民或竊取而私

之，亦既非古意矣。而況學校之在郡縣者，復不能以概舉也。其幸而僅存於郡縣，又幸而隸於大都大邑，地方千里，計畝萬億，地方百里，計畝百億，歲取其贏，以供學校之不給，是猶太倉損一稊粒，稱員餼廩，特易易耳；乃不幸處於窮陋，竭地之力不足以食農夫，尚復問田以祿不耕之士子乎？芹藻榛蕪，衿佩落落，顧瞻城闕，上之人亦不得不分任其責矣。分陽爲睦最下邑，隸學田僅二十五畝，東北偏池六十畝，歲以蓮芡易粒纔數石，人日給二缶，養生徒不能十人。至元丙子，學士解散，前學官何鳴鳳、何壽老葺理復完，章掖甫集，在籍至三十人。今學官徐會龍席氈未煖，掇己田三十畝隸之學籍，曰：姑以繼廩粟也，士未必宿飽，吾爲義倡爾。嗚呼！學校之設，茲固古先聖王所以公天下者，茲乃逸而歸諸邑人士之私。使人人若此，則大道之行，三代之英也，推而放諸四海，且將與天下爲公也，州里云乎哉！諸生龔碣乞記，以誌永久。余嘉徐君之誼，重諸君之有請，將善鄭以勸來者，遂爲之記。至元戊子二月既望。《潛齋集》卷八。

玄同齋記

玄同邵君桂子德芳一日致書諭於無名人何某曰：「玄同云者，某所自號也。嘗讀猶龍翁玄德章，默若有契，因竊取其義，揭之座右，爲求道指歸。而未能盡得其解，願聞一言自信。」余竊自笑曰：世方嗤吾玄之尚白，吾又烏識夫玄之然不然。雖然，嘗聞其似。夫玄，天地之始，萬物之母也。天地

異勢，萬物異體，而同出於玄，玄則無不同矣。夫物之初固有混茫無象，反衍無端，舉天下萬有對待之可以兩名者，不足以載，有同而已。陰陽錯行，天地大絃，萬異出焉。雷霆之所鼓，風雨之所奮，日月之所運行，參差不齊，故萬形所受爲羽爲毛，爲鱗爲介，爲草爲木，亦萬有不類。一受其成形，而生死於二氣，而又榮者瘁者、得者喪者、譽者非者、從者違者交乎吾前，而耳目口鼻心思之所欲惡，日與萬物相接爲構者惟人爲甚，是人也萬物之役也。人以一身爲萬物役，則雖一俛仰之間，而形骸肝膈固已恣睢搖蕩而不能以相攝。而況天下之離跂攘臂，忿觸而怒抗者，方相尋於無所紀極，則其所大不同者，將捷出於天下。夫太虛無形，玄之本體，其聚散不同者，氣化之客形也。至寂無感，玄之淵源，其起滅不同者，物交之客感也。無形無感至於客形客感，惟玄之又玄者能一之。是故物我雖萬殊而同於性，事物雖萬變而同於道，則禍福利害等爲一致。如此，而後天下之德始玄同矣。散一爲萬，而玄非離，會萬爲一，而玄非合，非合非離，復歸無極，強名之曰玄，故玄者千聖之所出入，而萬生之所終始也。而不知者指爲老氏之私言，而後玄德始隱。今子以玄號於天下，固將以同而一天下之不同也。余恐天下之不同於子適自此始。老氏固曰不笑不足以爲道，子其默默獨守吾玄，則幾矣將無同。歲在玄默敦牂，月在無射既望，潛齋何某記。《潛齋集》卷八。

安禪寺記

安禪寺比丘思如師以至元乙酉作觀音閣成，後幾年遠來乞記，曰：「此某與某之徒所以莊嚴佛土如此，事已迹陳，懼至湮沒，願得一言以傳末世，何如？」余曰：「可也，然所傳不易也。」師曰：「豈以一閣爲不足傳歟？顧所乞亦不獨此閣是爲也。窮山蘭若，屋且餘百楹，殿堂樓閣門窗房雷翼翼，土木彫繪金碧熠熠，鐘鼓魚板樅樅，皆四方檀施與吾徒桑門捐貲出力，而後成此。儻按其顛末而惠識諸碣石，庶有傳乎。請數其概。寺蓋肇基於蕭梁大同之二年，於今蓋八百載餘矣。宋咸淳己巳，悉燬於火，焦土餘燼，露宿草棲，蔑如也。賴好施者倡義，與衆共圖之。明年始成佛殿，旁附庫堂，巋然離立而已。又明年，始塑佛像，他事蓋未遑也。又明年壬申，成鐘樓。又五年至元丙子，成山門。又十六年辛卯，成僧堂，旁翼接待雲水室，樓上范金爲豐鐘一，閣上幻木爲大權菩薩像二十。凡若此者，大之興廢，小之成毀，願大書特書，使來者有所考證。」余聞其言而嘉之曰：「甚哉，師之有志於傳也！抑余竊有感焉者何也？師，佛之徒也，佛以空爲宗，空則萬法俱空，山河大地抑空華爾，室廬諸所有物寄於山河大地，等爲空華。復計其初爲平野荒草，俄爲棟宇榱桷，中爲煨燼瓦礫，終復爲棟宇榱桷，猶是空華。亂起亂滅，於太虛空中，無有實相。况天地劫運，流變無極，而獨不向胡僧問昆明池底事耶？大劫小劫，同歸變壞，爲此世間微塵諸相，疇非空華？誰實作者，誰實居者，誰實施

者，誰實受者？取作者、施者，是有我相；取居者、受者，是有人相。人我俱空，誰實爲主？乃欲託言語以傳不朽，是倚言語之獨不爲空華起滅也，雖記何爲？」師矍然起曰：「我聞佛說空亦如是，抑聞世出世間固有不空者在也。君其與我記諸，將留所謂不空者與此山無窮。」余曰：「善，可記也。」佛殿庫堂，蓋葉浩首出囊橐與衆協成者也。觀音閣直佛殿後下以爲法堂，蓋思如與其徒惟新、淨惠共輟衣鉢構架，復藉衆緣以卒成者也。法堂前爲亭，穿殿門，揭板署額，出思如己費。僧堂三門，扁曰：選佛場，接待室一門，扁曰棲雲，思如買民屋，藉衆力徙置。鐘樓，俞某妻徐氏出奩資獨成。山門，洪氏捐木，僧惟新、道人朱覺崧鳩衆竣事。大權像，行者袁靜因捐己及募衆圓成。記畢授師，師踴躍作禮曰：「若此傳矣。」至元壬辰春二月日。《潛齋集》卷八。

全宋文卷八二一九六

何夢桂 六

建德路罷金課記

大元跨有東南，初推金課，蓋履山澤之所產而斲取焉。始繇饒、歙諸路，次逮建德。建德，古睦州也，睦爲古揚州分，荆揚貢金，在《禹貢》不廢。睦萬岫千峰，二江十八瀨，意亦鑿鑿銀銑之所生也，然考古圖志，金非其土產，如瑤琨齒貝皆產於揚，而睦亡是。睦視揚爲最僻陋，其土物之數固亦不得與他壤齒也。夷攷前代金所於取，秦漢而下，雖冶山鑄海以竭天下之利，然載之史志，自銅錫鉛鐵之外無聞焉。唐有陝西暨宣、潤等州歲銀而已。近代固嘗徵陝與宣、饒、歙、撫、南安諸州金，遄亦中廢。試數其地，其隸於揚者惟饒、歙、撫、南安四州耳，而睦不與數焉，茲豈天產而地藏之，睦固不能化無以爲有也。至元己丑，始籍六邑民爲金戶，民創見且駭，方俛首就事，官授之方，督具器物，使之披沙抉石而汰焉。民喜，殆謂天雨而鬼之輸也。初歲粗給，再歲而虧，三歲而竭，其故何

哉？蓋陸居歛下流，歲春夏潦漲，歛之江濱揚濤吹沙，澎湃而下，故金之瑣屑如糠粃者從之，遇洄汨而伏焉爲洲，轟焉爲嶼，民日爬擿於此，所得蓋錙銖而已。抑不知幾千百年之所積，猶不能以供旦夕之所采取，欲久而弗窮，得乎？况遠鄉下邑，距江踰絕，民棄家輟業，裹糧以從，畚鍤未至，而力已困矣。而其所司又重之以掊剋槌剝、羈縻笞捶之害，故上下二三年間，大戶病，中戶貧，下戶賣妻鬻子，不足於償，而逮及鄰比親姻，至於流離轉徙者比比也。郡侯爲民疾苦無所於愬，上之江浙等處行尚書省，省聞於朝。省官阿喇卜丹平章入覲條奏，凡諸路之不便於民者，如鷹房河泊除之，商稅酒稅輕之，金課特罷建德一路，從所請也。世之務財用而長國家者，雖竭民力而漁之不卹也，而公之用心如此，其過人也亦遠矣。迺今年二月旨下，省檄諸路管民官詳究奉行，本府總管朝列管侯承命以歸，與府長貳率其屬登進其民而告之曰：「是公朝之至恩，而省府官之嘉惠也。」民父老感激權舞，則又曰：「微我侯不及此，今而後得釋此以耕鑿飲食作息而免於患者，德至厚也。願鑿石以誌不朽。」雖然，茲固幸吾一路之私也。天地生物止有此數，窮人力乃取之，未有不受其弊者。天子富有四海，所寶固不在此數也。世有觀民風者得焉，推而放之，以幸東南，庶乎其可，遂爲記。至元二十九年四月

日記。《潛齋集》卷九。

羅氏雪翠屏記

天地陰凌，朔風飛翼，黃臺白登凍僵而死相藉者何限，其視陰山大窖嚼旃嚙鼠而曾不夷其毫髮者，其死生異致相去萬萬，吾於羅氏雪翠屏有感焉。方積雪斲冰，萬木摧折，而柏壓擁勇，鬱於是間，而節不爲易，是亦奇矣。夫物有正性，使彼植根於荆山新甫，披風雲、澤雨露爲宜。迺若先漢諸葛孔明古廟，其久至於拔地倚天，猶未至於失其性。今也揉之遏之，剪之束之，支離擁腫其形質，以夸世人之盱矚，而謂吾奇，非其志也。雖然，其卒不易色，其受命於天也固若此，余既感而嘉之，遂爲之記。《潛齋集》卷九。

壽昌縣學記

天生人，謂之天民，民心曷常一日無天理哉。其命於天，謂之天性；其得於人，謂之天德；其見之君臣父子夫婦兄弟朋友，謂之天常；曰天理者，又包內外、該顯微、會精粗而統名之也。天將扶天理於一世以至千萬世而不至覆墜，故必寄諸人以繼天立極，代天之功，而後天之生人，自開闢以至於今，不至胥爲禽獸也。以此皇帝王霸所以治，禮樂詩書所以教，皆天之所流行而不息者也。天生夫子

於衰周，蓋將使之執禮樂詩書之權而行皇帝王霸之事，故治之隆汙、教之興廢悉寄於夫子之身，以爲一世千萬世無窮之託。故夫子於宋人之害，曰「天生德於予」，於匡人之圍，曰「天之未喪斯文也，文不在茲乎」，於此可以觀天意矣。故學校者，又夫子之所寄以行其治與教，而使民之常存其天而勿失者也。壽爲嚴中邑，邑有庠舊矣。宋建炎二年，規創有加焉。至元丙子，寇燬民室廬俱燼，惟夫子宮墻巋然爲魯靈光〔一〕，天也。大元以神武一天下，事定不遑他務，汲汲惟學校是崇，使斯文不至泯滅，皆天之所留以遺斯世者也。至元甲申，邑令李炳既至之明年，首撤明倫堂而新之，以觀示一邑。尉李思誠復建兩廡齋室，厨福悉具，又建大門，建翼教堂，像肖邑先賢，以厲風化。又建高明亭，左翼茶爐，右翼琴堂。登眺者於斯，游息者於斯，而後章甫逢掖翕然知所於歸矣。惟大成殿費夥未及議，令王瑀諭於衆，共圖之。經始於壬辰之三月，落成於癸巳之七月，視舊制加崇五尺，加廣亦如之。今令吳恕復新像十哲，繪七十二子，凡欄楯門牖之未完者，至是悉完。邑長官巴勒扎卜元弼、學官邵尚翁、洪克復咸出貲相役，以底厥績。朔望奠拜，謹鼓升堂，民改視易聽勿敢褻。今而後得以壽吾夫子於無窮，而夫子之道亦將得所於寄，要皆邑之諸賢大夫之功，與夫學之職教者之力，皆遜不有，吾併得以歸乎其天。克復遠貽書乞記顛末，遂爲記。元貞丙申三月朔記。《潛齋集》卷九。

〔一〕惟：原作「爲」，據文意改。

參知政事高公平盜記

至元二十七年庚寅春，歙寇構亂，朝命起前江淮行尚書省參知政事高公徂征，夏六月底平振旅。會建德路淳安縣之長樂鄉九都愚黔弗靖，公提兵繇歙至淳，道跨永平，距長樂境，以七月朔次八都嶺西治盜劫，事竟，越五日，移次屏門。明日，進九都之方村。又明日，入次湛村，以逼盜巢窟。餘兩旬肅清。八月朔，師入次邑治，訪問民疾苦。郡以長甫定，稅無所於取，議徵諸鄉以補不給，公命出已橐代輸，凡絲萬二千兩有奇。官徵諸鄉提備兵器，勒民出費，凡萬五千兩，公悉命放罷。夫淳之隸鄉十四，其敢於起戎者特一鄉耳；長之隸都四，其敢於首惡者一都耳。邑遠地僻，民狃於逸，而不逮於教，構仇相賊，殺人焚廬，由有司致辟可也。事上省府，弗遽加誅，命杭萬戶姜鎮國將旨下本路劉萬戶、成同知，入札治中，就縣檄尉劉天澤諭諸父老。招撫弗率，方負固陸梁，至虔劉齊民，燬掠善地。官軍進陘口臨之，乃敢嘯聚逆鬪，遄衄却走。爾後官軍進攻，困獸猶鬪，復却信宿。公提大軍實來，長驅深入，悉望風奔潰。公移檄鄰鄉邑控其隘，然後縱兵四蒐，若山川夷險，道里通塞，分畫指授，如示指掌。俘其爲魁與其徒若干人，械送省府，餘從者議罪以戮，其屬之麗於戮者奴之，若兵之所殺與虜者不與焉。獲一囚必親泣，反覆詰問，脅從者悉杖而遣，情可矜與羸老者原之，自降者隨地置柵，擇官營護，取其名隸盜籍者殺之，餘皆安堵如故。初，太平鄉汪楊村民相挺剽竊，姜萬戶至，

招捕外，公班師之日，命縣官諭餘黨出首官，獲八十餘輩，致之軍前，公悉命縱釋之。公威望在四海，雖里巷童卒知公名，虎士林旅所至，如雷霆震物，當有血利劍耳，公乃一不妄殺，至師所過，戒秋毫毋得犯，在《易》所謂「師貞丈人吉」者，惟公有焉。事定，迺且代溢賦，蠲橫征，以爲民利，於《春秋》有取施舍已責之義，亦惟公有焉。《孟子》稱「殺人以政，無以異於殺人以刃」，公亦曰：「吾每將兵，不忍殺人以刃，今獨忍以政殺人乎？」返旆之日，鄉邑之民父子相歡，戚屬相慶，曰：「今而後知公之殺人者，法之不得已，而其所以活人者，公之本心也。」因請圖像學宮，併鑱石，以昭德於不朽。維公盛美休烈，他日固有筆之汗青，勒之彝鼎，與河岳相爲無窮者，於此特以誌邑人之不忘公也。公名興，字公起，蔡汝南人也，邇以新命除守前官。乃八月既望記。《潛齋集》卷九。

廬陵養濟買田記

員外司馬何某佐郡無善狀，每出，覩疲癯殘疾乞呼食於道旁者，未嘗不疾蹙，力不競，徒哀焉耳。一日有事郊外，適見髻髻雨立者尪羸垂盡，惻然動心，携以歸告於邦侯。侯矜之，俾隸慈幼，既以月廩。某於是問諸左右曰：「慈幼有廩，養濟獨無廩乎？」或對曰：「養濟曩給常平米，開慶兵興，移助邊餉，不及養濟久矣。」會有廖氏交易訟，願納鍰贖罪，始難其請，有間，惕然悔曰：「昔之所見而哀焉者，欲賑之而未能也。使得鍰買田以活此輩，是刑之所失者小，而惠之所及者大。」亟

白於邦君侯與部使者，君侯曰可，使者亦曰可。乃委郡法曹謝公昕董其事，囑報恩東堂老定智物色膏田，得苗屯白米二百一十碩有奇，計直若干，展糴得贏二十一碩，歲可給四十人。嗚呼！天地之廣，兆民之衆，若今所惠，亦大狹矣，雖然，吾亦視吾力而已矣。賢君侯許益充拓之，則其所以惠利者當不止此數，民之無蓋其庶幾乎！經營告成，定智請鑱石，以昭永久，於是乎書。戊戌季夏月圓前二日，何某記。《潛齋集》卷九。

寶積院白雲堂圓常閣記

自釋氏法入中國，而梵刹浮屠遍天下。大悲大士，佛法中龍象一人也，見釋迦猶見大士，安有二乎哉？近江南多崇大悲像，若堂與閣，比比有焉。或疑大士與如來爲二，不知釋迦牟尼名毗盧遮那，遍在一切處，大弟子有三，曰觀世音，曰文殊師利，曰普賢。觀音耳宗，文殊眼宗，普賢心宗，各得如來一體，亦遍在一切處。夫苟一切皆遍，將大地微塵處處見之，蓋即心即佛，佛無二心，即心無二佛也。至於三十二應、十四無畏施、四不思議，由其說若恢誕詭怪，然其願力深，法力普，隨心赴感，皆大悲之應迹爾；若堂若閣，而爲千首千目手像，又其迹之迹者也。世之人見其迹者或寡，况能知其悲觀淨觀、妙音潮音之所以迹者哉！寶積山有僧戒月，作大悲閣於院之西偏白雲堂上，如法莊嚴，婆羅門信士女咸施舍樂成之。復鳩田七十餘畝以贍香水，祈男女悉如願。蓋其融形復聞，明照無

二，特其三昧妙力變現之一端耳。若其普門示現，將窮恒沙算數之所不及，大悲可勝量哉！戒月心純直，行修潔，爲過去尊宿普無方嗣法孫，故能信受聞思修，而爲檀波羅信向如此。曩介無方乞記，未暇，茲無方圓寂，復因梅谷張震請不置，不得遜，爲之記以歸。若讚嘆大悲，窮辯不能盡，其於無方宿緣固在，猶若見於三摩提地、淨土國中也。大德元年丁酉歲秋星夕記。《潛齋集》卷九。

吳氏壽慶樓記

璜源，休陽溪山勝處也，君玉吳氏世居之。堂偏崇樓，非以蓄歌童、貯舞女也，扁曰「壽慶」，以娛偏慈，此人子之至情，而天下之至樂事也。夫壽，天之與人常嗇，況得全於慶，非天之所以厚吾生乎？黃髮兒齒，撫子弄孫，美矣，況復抱曾孫乎？有子若孫若婦，盥沃巾帨，扶搔唯意，宜也。使家無食力，則異糧宿肉奚所於備，醴醢滷醢脯截奚所於取乎？惟有壽與子孫與養，而後慶全；慶與壽相成，而後樂全；樂全，而後爲人子者盡於人心。《詩》言壽必言福，《範》言壽必言富，信矣，茲事之難并也！文忠富公年五十入中書，太夫人在堂，躬被寵命，婦爲元獻家女，敬事無斁，榮矣；及其存，見孫紹庭而已。文正范公微時，與婦躬饗奉母，至甘旨不常給。迨貴得厚祿，每憾諸子享富貴，而太夫人不待養。夫以二公位極人臣，而其事不齊猶若此，而況其凡乎！今以君玉事評之，固不必追企文忠而後爲榮也。燕喜在堂，坐拜家慶，亦豈少於彼哉！至於甘毳迨親，以厚吾養，而免貽文正終

身之憾，亦至足矣。想其登斯樓也，昏昕几席，歲時豆觴，子携二孫二曾，婦與二媳羅拜屢舞，迭起爲壽，慈顏怡愉，含飴戲弄，人世間樂事有大於此者哉？夫士抗聲名，樹勳業，勒名彝鼎，時偶卽爲之，惟子之於親，年與養不相待，一毫或缺，後悔奚追？故曾子千鍾百乘，不如三釜之及祿也；子路累茵列鼎，不如負米之及養也。今子解官釋組，導輿以歸，其貴於三釜多矣；閒居色養，有旨有嘉，其富於負米多矣。八袞康強，及見四世，是天之所以惠我也至矣。推羸振乏，錫類及人，天之祚之，流慶固未艾也。茲不遠貽書，屬余爲記，記之，非徒侈斯樓爲觀美也，嘉其事以勸後之爲人子者，庶以敦世教云。大德戊戌三月既望，嚴陵何某記。《潛齋集》卷九。

淳安縣學魁星樓記

魁星樓，蓋取北斗第一星名也。魁居斗一爲天樞，樞所以旋斗杓而行乎周天也。志天文者謂斗璇璣四星皆爲魁，號不同，而其爲魁首義一也。然則取以名樓，何也？樓爲邑庠作也。作樓以魁名，以崇科目也，何也？繇唐宋以科目拔擢天下士，其名在舉首者率曰魁，大廷親策曰廷魁，省闈奏名曰省魁，由三學選曰舍魁，由列郡薦曰鄉魁，其他大小科異等，六經異議各有魁，惟廷試及第爲天下魁。淳祐丁未廷唱亞魁，庚戌廷唱大魁，蓋皆邑庠魁彥也。以其在人爲魁名，在天爲魁象，故特書魁星樓者，昭其名也。或謂於古無證，非也。考之史志，謂太微六星爲三公，少微四星爲處士，奎爲武庫，

壁爲圖書，是豈天降地出，以得此名哉，亦惟星家追步，舉而號之云爾。苟跡其故，則知魁星樓之不爲徒名也。至元丙子，寇燬官舍，民廬俱燼，惟邑庠巋然，爲魯靈光。事定，僅能補葺宮墻，而樓久化爲荆榛瓦礫矣。大元以武功定天下，固未遑事科目，然德音屢降，所以嘉惠學校者備至，餼之廩而蠲其科役，士莫不彈冠結綬，以幸明時之嚮用也。線君榮來尹茲邑，實董學事，每奠謁事畢，與章掖周旋，親履故基，有志興復焉。越兩年，政明訟簡，吏肅民恬，爰始規畫，首輟己俸以倡，且寅協贊襄。乃刲羊醞酒，登進諸生而告諭之，衆莫敢不敬聽度力，相役有差。經營於大德戊戌之某月，落成於己亥之某月。有鼓譟鳴，有鐘於論。簪佩朋集，登斯樓也，舉觴相慶，且幸斯文之有所託也，闔辭請曰：「盍記諸？」尹曰：「記之。」或曰：「盍新其名，以改視易聽？」尹曰：「名固舊也，仍之。」乃屬何某爲之記，使執事者就請焉。揖之進而語之曰：「夫魁之麗於天也，豈直借其名爲一樓觀美哉？斗爲天之號令，於以斟酌元氣，運乎四時。故其行，日周十二辰，歲建十二月。其軌度有常，則五氣不失其序，列曜不失其經，民物不失其理，觀文察微，斯可以候機祥而占吉凶矣。然則魁之所主豈不甚重，魁之所運豈不甚大矣乎！故魁所以總七星而爲中天之樞也，學校所以風四方而爲萬化之樞也。推其極致，蓋將齊七政，平泰階，躋至治，何莫非魁斗之功用，則亦何莫非儒道之利澤哉？茲蓋尹君作樓存名之微意也。」二三子拱手曰：「命之矣。」以復於尹。尹喜而起曰：「旨哉！請遂爲記。」大德二年冬長至日記。《潛齋集》卷九。又見光緒《淳安縣志》卷一三。

邵古香行窩記

玄同邵某，古睦清溪家也，而贅寓於嘉禾之雲間。時玄同有母在，出非其志也。母氏敦命之弗得，爲家營壽樂堂，所以娛母也。堂之面與其背豎亭二，以爲游憩也。歲時歸省，着綵稱觴，母子之天躍如也。《蓼莪》篇廢，事與願違，顧瞻維桑，此心未始一息不在白雲下也。雲間近創行窩，亦參其亭，規制悉視壽樂，此豈爲蓄姬妓、貯歌舞地哉，示不忘故也。康節先生營安樂窩，其別寓爲行窩，今取此以名，蓋行者亦聊寄焉爾，非終止之地也。吾日於是間，視吾一窩之與亭也猶蘧廬然，詎能如蝟蠅烝在桑野乎？或游或休，故家在目，吾處而見吾壽樂於墻也，吾食而見吾壽樂於羹也。有身羈如，有足蠶如，而湯沐故鄉，依依喬木，吾於夢寐若或見之，堂下雞犬蓋不知新豐廬巷之實非其故也。六一翁信天下士，將去鄉邦而居穎，獨不念汎掃瀧岡乎？文定公寓宅於許，猶謂百歲後將丘首眉山，可以觀君子之所存矣。夫羽毛之類，非人類比也，偶失其故，歷時而復巡其鄉，將悲鳴躑躅而不忍去。世之人忘其故者多矣，尚忍乎哉！吾於行藏之誼，深有感於玄同之不忘其故也。行窩成，諸公作記以落之者抑衆矣，復徵余言，言非所靳也，得毋復重玄同之感乎？知玄同之心宜莫余若，遂爲後記。大德戊戌仲秋朔記。《潛齋集》卷九。

建德路新創三皇廟記

三皇廟，國朝所以祀羲、農、黃帝爲醫家祖也。廟之門曰開天，所以繼天立極而發民冥迷，以爲有生立命也。三皇代作，功在生民，擬議形容，是天可俄度、地可俄測也，其道豈直爲一藝私哉！民之初生，林林總總，標枝野鹿，不知六氣之外盪，而七情之內動也。溢節過度，爲結爲搏，爲鬱爲散，而疾沴夭枉生焉。聖人上窮天紀，下極地理，取萬物之精，以佐佑生民，故民自邃古以至於今，不至泯滅。然求其遺經，伏羲初造書契，已無所於考，其曰《本草經》，神農之書也，曰《內經》，黃帝之書也，二經非得書契將不足以載，故謂三聖人之功一也，然特其迹也。序《尚書》者言三皇之書謂之三墳。墳，大也，三墳蓋言大道也，世遠不可得聞。豈三聖人取其精微者以治心，緒餘者以治身，土苴者以治天下，盡在是歟？三代而降，聖道不傳，漢唐以其存書列之醫學，付之伎藝之流，而縉紳先生談道所不及，已重可惜矣；歷代祀事不修，將使萬世之功不著於天下，豈不重可惜哉！共工氏之子勾龍得祀於社，厲山氏之子農得祀於稷，社主乎土，稷主乎穀，世祀宜也，使民得平土以居，播穀以粒，而疾病死亡無以生且養，民能獨存乎？稽之《易繫》，包犧氏觀象於天，觀法於地，始作八卦，以通神明，以類萬物；神農、黃帝氏繼作，爲耒耜、舟楫、杵臼、宮室、衣裳、棺槨，以濟利天下，將與天地同功。今取其以萬物方術而救夫民，特其功用中一事爾，尸而祝之，使世世廟饗，猶

懼勿稱，况缺而不祀可乎？《記》稱祀五帝，蓋以三皇合少昊、顓頊而言也，不過以配五方、應五行爾，非祀功如社稷比也。皇元啓運，國都既有廟祀，州郡禮儀祀殆遍天下，此郡猶或缺焉，不可。昭毅大將軍、建德路達嚕噶齊兼管內勸農事布呼齊實任其事，捐己俸以倡，總管呂師仲而下咸寅協助之。經始於大德元年之十月，迨十有一日辛未構架，越明年某月訖工，以三月丙申落成謁奠，所以闡揚三聖人之化也弘矣。廟貌翼嚴，牲醴旨甘，神妥以厭，民肅以瞻，歛福弗僭，壽我黎黔。刊之琬琰，將使遺教千萬世而西被東漸也。大德三年正月一日記。《潛齋集》卷九。

百丈溪書院

百丈山，唐昌之巨鎮也。按圖志，堯之時洛水懷襄，此山浸不沒者餘百丈，因以名。水源發山趾，其委流成溪，亦以百丈名，宗所從出也。俯溪流爲書院，所以居其勝也。書院主者誰，蓋鄉人士陳氏子斗龍始作也。斗龍字南仲，好學讀書，要不爲時世習所變者。一日遠來乞記，曰：「書院，吾私塾也，吾將與鄉邑同志於此講習焉。臨此溪以挹注此水，猶《易》麗澤兌以朋友講習也。吾先君子玉巖蚤師承葉平巖先生采〔一〕，平巖爲晦菴朱夫子高弟果齋李方子門人，其淵源講習有自來矣。書院之作，所以繼先志也。」余聞其言而嘉之，作而言曰：子讀書於百丈溪上，亦嘗觀於水乎？子在川上曰：「逝者如斯夫！」孟子曰：「源泉混混，不舍晝夜。」夫何取於水也？有道存焉。道在天地，往

過來續，未嘗俄頃或息也，惟水亦然。其源涓涓，其流淵淵，疏澗浚川，匯之江而注之海，浩浩乎其
滔滔而洄漩。故觀道者莫近於觀水也。天開地闢，人物萬殊，受形於是間，蠕者動者、肖者翹者、信
者屈者、行者息者、生者死者、榮者瘁者，日夜相代乎吾前，而莫知其所底極者，是孰使之然哉？包
犧氏以傳之堯，堯以傳舜，舜以傳禹、湯、文、武、周公，周公傳孔子，孔子傳曾子、子思、孟子，
其所傳者又果何物哉？唐虞以揖遜官天下，殷周以征伐家天下，雖其事不同，而同於行道。夏曰校，
殷曰序，周曰庠，雖其教不同，而同於明道。在國爲學，在家爲塾，名雖異而道則一矣。由詩書禮樂
以探其理，由射御書數以服習其藝，學者凡所以學此道也。上下數千百世，其間萬變不齊，而其三綱
五常、大經大法流行宇宙，民不胥爲禽獸者，其必有故也。道原於天，人原於道，圓顛方趾，均受此
以生。亘古迄今，人之生未始一日息，而道固與之俱生而不息。使道不可見，則生人之類滅矣。蓋道
者與人爲體，而人者與道爲用者也。夫道大包天地，細入芒芴，而其著惟存乎人而已。得乎此者爲聖
人、爲賢人、吉人，失乎此者爲衆人、爲愚人、凶人。鈞是人也，而其或爲此，或爲彼者，得失之異
然也。人能反而求諸道，則道固在人而不在他也。子思子曰「道不遠人」，人之爲道而遠人，不可以
爲道。子其藏於斯，修於斯，游且息於斯，苟於夫人日用之間瞻前忽後，無往而不見道，則其動靜語
默亦無往而不與道俱矣。他日浴而風，雩舞而詠歸，樂趣不在沂濱，而在此溪之上矣，千載而下，曾
點將鬱有生氣。書院成，爲堂奉祀先聖，以群賢從，釋奠菜如常儀。堂東偏爲室，祀果齋、平巖暨其
先子玉巖。玉巖諱天澤，字澤民，嘗領鄉郡薦。弓冶有子，其不墜先業也固宜，遂爲記。大德庚子夏

五既望，某記。《潛齋集》卷九。

〔一〕「業」原作「業」，徑改，葉采參《宋元學案》卷六五。

嗣守堂記

創業易，守成難，古有是言也。然人知守成之難，而未知世守之爲尤難也。曷爲其難於守也？物成之難，而壞之易也。其守之善者得之，不善者失之矣。守孰爲大？守家爲大。諸侯以守社稷，卿大夫以守宗廟，士以守其家。家一也，守之一世者有之，蓋再世希不失矣；再世而守者有之，蓋三世希不失矣。一世而守，守成者也；再世、三世而守，世守者也。守成而勿失者固難矣，世守而勿失者爲尤難也。華亭曹氏爲東南望姓，蓋武惠王之世家也。提幹府君號守齋先生，又東南望人也。厥考省倉府君，克昌厥家者也。子府戶由太學登甲戌第〔一〕，蚤下世，有孫曰和甫，字仲達，扁其家之堂曰「嗣守」。嗣之爲言似也，嗣守，蓋將以似守齋也。守齋守之於其前，以子而守成者也；嗣守守之於其後，以孫而世守者也。以守齋而有是父，故守齋之難也難爲子；以嗣守而有是祖，故嗣守之難也難爲孫。東漢名族爲累世相門，惟楊與袁，然當時輿論則謂袁氏子弟奢僭，不如楊氏之能守其家風，是袁氏無後而楊氏有子矣。漢陳仲弓、荀季和父子以德望聚一時，當時指爲德星。至陳之孫羣仕魏爲司

空，苟之孫或爲魏尚書令，由他人觀之亦榮矣，文公朱子評之若猶不滿，而歎其嗣守之難，則不能不減於乃祖之風烈也。尚論曹氏世胄，固不遜於彼四家者，至其一門四世相望，有子得如守齋，有孫復如嗣守，則其善守莫大於是，茲固君子之所深嘉而樂道之也。夫富貴固人之所同欲也，然世之富貴，其即人也無常，而其去人也甚易。即人無常，故其成之也若累土而爲山也；去人甚易，故其壞之也猶潰堤而決水也。一家以一人成，以一人壞，其要繫乎人而已矣。古今名門右族，其成也莫不由於其人之勤儉積累也，其壞也莫不由於其人之驕奢縱肆也。故善觀人之家者，觀於其人斯可矣。經曰「高而不危，所以長守貴；滿而不溢，所以長守富」，蓋善守者所以爲長守計也，守之時義大矣哉！譬之牧然，人之子若孫受其祖父之牛羊而爲之牧之者，日荷箠而隨之，約其羣，以時適飲食，使之歲月肥息，歸而復命於其祖父，而後牧之責始塞。前人付于有家，以望其後之善守者，亦若牧而已。全而付之，受之而全歸之，然後爲孝子、爲慈孫，不然則否。茲蓋吾守齋翁之所以深望其孫之能嗣守也。使翁起九原，必曰幸哉，有孫如此。人亦曰，武惠王之胤也固宜，殆將世守於無窮也。堂既落成，介玄同先生邵君遠徵余記。仲達，玄同內弟，玄同，余外兄弟也。遂爲記。大德庚子四月既望，何某記。

《潛齋集》卷九。

〔一〕府尸：疑當作「府君」。

全宋文卷八二九七

何夢桂 七

徐主簿仲修老子畫像贊

頎然其顙，華然其顛。身有極後，心無極先。人謂爾生，壽八百年，孰知既死，壽亘乾坤。人謂爾教，經五千言，孰知一嘿，言滿八埏。無名可名，強號玄元。參前如見，在天地根。《潛齋集》卷一。

夾谷簽事生祠贊

昔日何居，取我衣冠而褚之；今昔誰居，於吾乎厦屋渠渠。四牡維騏，六轡如絲。望之儼然而威，即之溫然而慈。噫！天不復興禮樂則已，如其禮樂，微公吾誰與歸！《潛齋集》卷一。

石崖姪孫寫神求贊

有類其類，有澤其頰。警乎其虛而不與物移，厲乎其觚而不與世畸。持此以浮游天地，惡乎然乎？知歟愚歟？猶使或者得以寫其形似，何居。吁，是殆見未善者機也。《潛齋集》卷一〇。

壽星畫像贊

伎青鹿兮藻章，舞白鶴兮虹裳。神人儼兮雲上，壽千歲兮未央。《潛齋集》卷一〇。

贊汪愛蓮諭食牛

天使牛耕，民乃能穀。既食其力，忍食其肉？惡死愛生，萬生同欲。力不人競，俯首就戮。暴殄物命，恣飫口腹。太上好生，昭示禍福。人能戒欲，天爲錫祿。仁哉愛蓮，欲並生育。明聽告言，矜此穀觶。《潛齋集》卷一〇。

林同舍求初心大字并贊

復下一陽，動於重陰。及此善保，天地之心。《潛齋集》卷一〇。

富山方表叔求寫神贊

其顙隆然，其額豐然。髯之皤然，顏之酡然。其居也不爲人後，其動也不爲人先。於以養生，於以引年，是雖畸於人，而獨全乎天。《潛齋集》卷一〇。

蛟峰先生畫像贊

大原孔孟，的派朱張。忠恕弘毅，剛大直方。義存出處，道繫存亡。立言垂後，德久彌光。《潛齋集》卷一〇。又見《蛟峰外集》卷三，光緒《淳安縣志》卷一〇。

林子敬寫神求贊

爾形矍矍，爾目鑠鑠。兩足卓犖，天涯海角。袖有椎鑿，摧山撼嶽。虎匿龍逃，六丁貽謬。或者不知，問其所學，則掀髯而作曰，吾服儒服，冠儒冠，吾從吾朔。而吾進於其技，故人詫我爲青鳥、爲白鶴。《潛齋集》卷一〇。

明叟髯弟寫真贊

有髯縱縱，突成一公。歷世孔疚，弱外強中。不矜己獨，不詭衆同。有兒綦履，有孫扶筇。聊適吾分，以壽厥躬。《潛齋集》卷一〇。

毅齋畫像贊

爾形頎頎，爾貌奇奇。使位稱夫人，命偶夫時，則其仕當路，食太倉，疇謂非宜？而其受食於天，乃如彼，何居？雖然，子之齒其猶未，其方來者固未易知。《潛齋集》卷一〇。

寫神自贊

癡形陋貌，瘦骨羸肌。躋之班行而華黻之則若將浼，休之田野而被褐之則謂之宜。豈爾前世，固鼓枻而漁釣，或荷條而耘耔？不然，何其宿業之未盡，而習氣之餘遺？雖然，衣敝不寒，食糲不飢，爾其蹙額攢眉，俛俛然常若不足者何居？問之一世，一世不知，爾其獨抱此心，悠悠然而與百世以爲期。《潛齋集》卷一〇。

何子東墓誌

何氏爲江南著姓，於潛牧亭侯，其鼻祖也。自李唐徙家文昌里，迨今且千餘年矣，尚論世系，其三評事以下爲近。公，評事十二世孫之一人也。自弱冠，幹父蠱，左右唯命，不敢辭其勞。至門戶事震撼撞激，公悉力排捍以濟，先疇畎畝視昔有加焉。中年營宅一區，曰吾老焉於此矣。孺人邵氏作嬪公室，勤於家事，機紡達於夜分，與諸子讀書之聲相上下。余少從諸生肄業公隙宇下，每竊聞之，歎曰：「此非惡聲也，如此家有不昌者乎？」孺人不幸先公卒，茲二十有一年。公軀幹魁偉，晚得弱疾，非杖不支。丙子亂離顛頓，痼疾益甚。壬午二月二十有二日，益以寒疾，遂終於正寢。子孫與諸

婦若諸曾孫服衰功者凡二十人。生榮死哀，若公庶乎無憾矣。歲月維良，將以三月二十四日甲申葬。先是辛未十二月七日，以孺人附地在家東北之七里曰汪原，諸子爲公生前之所經營也。公諱震龍，字子東，生於庚午，與孺人同。三子：長雷孫，娶陳氏；次慶孫，娶方氏；三肖孫，娶鄭氏。八孫，士林、士誼俱娶王氏，士元、士榮未娶，士廉娶鄭氏。士先、士秀幼，漢老夙命與族人續後。曾孫三人，汝明、汝弼、汝諧。將窆，諸孤哀籲乞誌。某於公爲八紀弟行，同爲評事諸孫，知公事覈，不敢辭，遂爲誌。《潛齋集》卷一〇。

先叔何養正朝奉墓誌

公姓何，諱頤，字養正，將以至元癸未十月二十九日己酉與安人合葬。子夢杓泣血告於堂兄某曰：「不肖孤茲擇日以襄大事，懼沒無傳，不可以無識夫墓，兄其誌諸。」惟公昆弟四人，實出異母，公最少。子若姪凡六人，某最長，幼時猶及見吾父與諸父事吾大父母左右，色養無違，疾則更僕湯藥無敢怠。親沒，兄弟居室如一體，家事惟長公命是聽，一堂氣象穆如也。吾父早逝。公初娶魯氏，早歿，無嗣。再娶方氏，復歿，生夢杓，甫三期，皆公所鞠育，以迄於成人。長粗克幹蠱，而公疾不復起，嗚呼，命矣夫！夢杓以隻力經營葬地，得之當里之汪原，坐丁面癸，山盤水環，僉謂吉兆。公平生敦信尚義，奈數奇，不偶於時，死得葬於此，猶將食報於天，以福其孫子。公生於庚午某月某日，

卒於壬戌正月二十四日。安人以勤儉克相有家，生於庚午某月某日，卒於己亥四月某日。媳婦方氏。男孫二人，長炤之，咸淳辛未以伯父任太學博士試胄子，升上庠；次灼之，未冠。既葬，將磨碣以昭不朽。前發解進士夢材爲之書，孤哀子夢杓百拜立石。《潛齋集》卷一〇。

方深之墓誌

至元甲申十二月辛酉，河南方公將葬，其冢孫崑先大事請於某曰：「某大父平生負磊砢氣，汗漫江淮者二十年，歸老菟裘，惟指詩書爲子孫弓冶，非有贏金匱帛、輕資易施如豪家大室者。至於宗族子弟資可教者，必隨力拯之，敦詩書也。暇日呼二孫詔之曰：『吾始望而父以少壯勳名賁我華髮，自曩歲計偕，喝盧變雉，竟以怏怏不得志死，反以諸孤遺我憂。我不敢怠教，懼不及見汝曹之成立也。百歲後歲時祭奠，有能握筆書紙爲奠辭以酌我，死且無憾。』不肖孤未能脫穎，以光昭前人之潛德。葬懼朽沒，敢再拜乞誌，以永勿墮。」切惟公行事與其所以詔後者若此，諸孫又皆力學弗替先志，是公延德未既，安知他日無遠耀者？是可誌已。且弱弟某爲渭陽戚，誌安得辭？公諱淵，字深之，生於丙午十月，卒於戊午十月。娶黃氏。生子揆，娶余氏。女適何公頤，是爲某堂叔母。孫二人，崑、耜。曾孫六人。葬地曰大唐之桑木原，山發坤庚，枕丁面癸，祔先塋也。《潛齋集》卷一〇。

宋夫人何氏墓誌

故宋公夫人何氏道真既合葬於家南園，其孤應魁懼歲久湮沒，乞誌於潛齋何某，以詔子孫俾勿墜。夫人派出文昌，故淮安民曹炎起之從堂姑也，於某爲十一世祖姑，誌安得辭？夫人生於慶元丙辰三月二十日，幼聰慧，觀書史，粗通文義。年未笄，父某以別業居蔗江，徙家焉。見松峰公少負奇氣，遂妻之。夫人慈惠敦慤，其事舅姑孝，奉宗祏敬，處妯娌睦婣，待宗姻任卹，內外稱與無間言。相夫子以勤儉起家，增拓田宅，富埒里閭。中年惟以嗣續，怏怏於懷。一日，聞有誦韓昌黎「中郎有女，伯道無兒」之句者，惻然動心曰：「螟蛉果羸，其不速肖矣乎？」偶同堂有三弄璋者，夫人喜曰「猶吾子也」，告松峰公，命立焉，名曰華龍，提撕若己自出。長，延師樂育，有文聲。甲子秋易今名，得雋計闈。捷書至，夫人喜見顏色。暮年嗇孫，夫人憂曰：「宋氏世積，詎無後乎？」下及抱衾，一無妬忌。辛酉冬，松峰晚出孽子，命爲應魁後。《潛齋集》卷一〇。

祭蛟峰先生文

天生哲人，千載一期。固有負經綸天下之志，乃至鬱於數，而不得以竟其所施。當其鬱而不達，

不惟人不得以致其力，雖天亦不能違。自古大聖大賢與夫一世之豪傑，不得志以死者何限，而卒不得以救夫時。惟公聲名在天下，功業在方冊，而其蓄大發宏，瀦深流溢，識者方望其福澤之被天下，使匹夫匹婦之不餘遺。至有不得以盡如其意者，時耶命耶，吾不得而知。十數年來，每一進見，但見其憂憂戚戚，扼腕而攢眉。窮達仕止，惟義惟命，公豈爲一身區區者之私。故其語及民事，則爲之太息而歔歔。畏天命，悲人窮，固聖賢之責，而民之痒痾疾痛，公忍視之藐焉，爲手足之痿痺？然力不能扶則已，何爲自鞠自苦，以至於斯。又況世之所謂孤臣者，其慮患之深，而操心之危。麟折其足而莫楹拽杖，泰山之頽其忽而。君子此心，固非衆人之所能識，而其事亦知與不知者之所深悲。民失所怙，士失所師。九原不作，公全而歸。嗚呼！天地無窮，事會無極，愚以是悲吾道之孤奇。蓋棺事定，公之生也無愧，固未知後死者之何居。百里絮酒，一束生芻，默鑑此心，尚其來思。《潛齋集》卷一〇。又見《蛟峰外集》卷三。

祭山房先生文

士生天地間，要不偶然，蓋有數存。其盛衰關乎時運，消長係乎斯文。是非人之所能爲，而委命於天者爲之。吾固嘗歷數一代之人物，上下數十年間凋謝殆盡，而奄奄如木之遭霜，落落如星之向晨。豈果時之不齊，而斯文將至於夷泯？鄉之碩德偉望，今幾何人？如吾山房先生者，才有用而其位

不滿，學未盡試而志不克伸。謇迤遭乎吾道，而重以多故之憂殷。雞呼起，起而偶值夫龍蛇之厄辰。天之降喪，吾是以傷夫折足之麟。追惟疇昔，每握手論議，至於書問之相聞，惟長吁太息，爲之蒿目而眉顰。患難相救，骨肉弟昆，惟氣同而志合，故情至而義敦。睽茲交道，匪直旦暮，不知者謂近託乎婚姻。今遽如許，吾誰與親！天不憖遺一老，後死者何足與於斯道，而復嗟夫歲月之流駛，世故之驚奔。靜言寤辯，不可重陳。疾不及省，訃不及奔。痼於衰病，負咎奚云。緘辭絮酒，老淚盈襟。寄此情血，天地鬼神。嗚呼哀哉，尚饗！《潛齋集》卷一〇。又見《山房先生外集》卷四。

分陽麻姑橋疏

生仙誇兩鄉，在分陽。夙隔風雨；麻姑去千載，看滄海幾變桑田。長橋已墮虹霓，橫河久無烏鵲。圯上老人編書莫問，谷中道士倒影猶存。春水隕堤，縱有三石牛不能經濟；山流斷碇，却教駟馬車何自往來。擬創宏規，仍復舊貫。莫道三家市無千金子，須向五路頭結萬人緣。百八盤行路甚難，那狹世怎堪着脚；十二月興梁未就，這好事須做到頭。衆力共成，陰功無量。《潛齋集》卷一一。

麻嶺造菴疏 并序

麻姑嶺介萬山僻處，行道入久病之，茲鳩衆緣，結小菴以爲往來頓息之便，願相與樂成。

麻姑嶺上，一行跨六七里山場；木客巢邊，衆議結兩三間店屋。鳥跡盤盤穿窈谷，鰲峰轟轟接層霄。前不店，後不村，風雨何所於避？來時朝，歸時暮，水火何自而求？纔辦得茆把與蓋頭，一任你草鞋牢繫脚。人家布施三錢五孔，積少成多；胥宇告成萬古千秋，結緣方便。《潛齋集》卷一一。

童道人立菴

至元庚寅秋，參政高公提軍入長樂境，平九都亂，白蓮道人童普興得一生於萬死中。既而爲驅，又復生還。是雖參政公再生之造，亦惟佛力。故佛經有云：「我若向刀兵，刀兵自摧折。我若向鑊湯，鑊湯自枯竭。」乃今始信佛不妄語。其故菴半爲兵燬，其存者民復拆而爲薪，欲報佛恩無地。茲有善識童覺定捨廬爲菴，捨田地爲供，復以普興爲法嗣，將以續佛慧命。普施無量，是心即佛，要是佛會中人相逢不偶。其自今以往，式引勿替，自一燈傳至百燈、千萬燈。東林一會，千古儼然。至元壬辰中和節，潛齋居士書。《潛齋集》卷一一。

葉道判修天樂觀疏

碧洞仙人當年一去，訪桃源幾度春風；青溪道士道判葉法善。今日重來，見桑田倏成海水。維此地四百年香火，爲吾邑第一所道場。摩挲紹興名勝之題碑，問訊宣和盛時之錫額。鼎湖龍去，空遺前代衣冠；華表鶴歸，不記舊時城郭。風雨空堂，蟲蛇穿壁；荆榛破屋，狐兔上門。魏伯陽之爐竈無烟，轅彌明之頭顱半雪。三清殿在，巋然魯室靈光；五季鐘存，儼是漢時銅狄。意有神明外護，要令嗣續中興。愚公立志可移山，精衛有心能塞海。雖天外事也由人做，奈世間財不是鬼輸。豪門富室總大檀那，別館離宮尚多孫子。若不靠諸土信士善人樂助，豈不教一方靈壇古跡終休？不言虛注虛題，只告旋捐旋舍。大家揮金指廩，有虛空無量聖師在上鑑臨；終身換水添香，願世界一切衆生同歸仁壽。《潛齋集》卷一一。

狀元坊施茶疏

暑中三伏熱，豈堪大驛路往來；渴時一盞茶，勝似恒河沙布施。况有竟陵老僧解事，更從鳩坑道地分香。不妨運水搬柴，便好煽爐爇盞。大家門發歡喜意，便是結千人萬人緣；小比丘無遮礙心，任

他喫七椀五椀去。《潛齋集》卷一一。

修章嶺路疏

半生赤脚，行遍江南道五十四州；老去白頭，怕說章嶺路三十二折。星斗在三峰高處，雲梯從陸地上來。萬石稜稜，鳥迹參差；一逕盤盤，羊腸屈曲。蜀道難難矣，青泥猶是康衢；廬山高高哉，丹崖特其夷壑。惟此黽黽蓬藿，不堪車馬輪蹄。村翁長記兒時，尚存好路；山嫗久成鬼錄，僅有荒基。伊欲再結小廬，重開大道。雖問訊山猿，何曾繹路；奈摩挲石牛，不解糞金。須結衆因緣，共成大方便。此日工執椎，徒荷鍤，直需夸娥氏移去此山；他年車擊轂，人摩肩，免使楚野女相逢狹路。遠來近悅，里詠塗歌。《潛齋集》卷一一。

鶴鳴寺修造疏

叢林最勝，記當年飛鶴開山；梵宇將頹，向何處野狐說法。堂上夕天羅象緯，藏中雨潦化龍宮。不堪拄地撐天，只恁喝佛罵祖。待坐到蘆芽穿膝，怎得這茅把蓋頭。須得佛中人，共成天下事。讓禪師磨磚成寶鏡，小比丘自當努力向前；給孤獨布地作黃金，大檀那莫要甘心退後。一文布施，萬劫因

緣。《潛齋集》卷一一。

爲僧作聖節道場疏

伏以寶冊進東朝，天拱八千春之遐算；玉卮奉南面，世逢五百歲之真人。穹屋薦嘉，臣民贊慶。茲蓋恭遇壽和皇太后德備坤元，適遇宴侈瑤池之旦；皇帝嘉新乾會，又當瑞騰虹渚之辰。子後母先，天造地設。今古實爲希遇，氣運甚屬難逢。是雖介福王母受茲，然亦萬年天子不已。鶴駕通宵而龍樓問寢，鳳閣向晨而鷄旦入朝。春滿兩宮，天齊萬壽。生喜逢於佛日，祝願效於封人。恭率緇流，拜于金相。使君親之年，天地之久；蓋人民所係，社稷所關。天命申其用休，君子謂之善禱。德必得祿，德必得壽，舜與母以齊休；神罔時怨，神罔時恫，文偕任而同福。伏願龍天昭鑑，鴻祉來崇。《潛齋集》卷一一。

青原禪師題化修造疏

青原七祖道場，江西第一勝地。自前溪月落，東嶺雲歸，上下千年，寂寥久矣，古刹頽圯，

東支西傾。欲徹而新之，非大力量不能成就。輒持短疏，上叩檀那，冀發菩提心，欲成大勝事。思祖大師派曹溪一滴水，淨居禪寺號江左最名山。自李唐以後者千年，而沙門所傳凡幾世。屋漏則滿天羅宿，幾無茅把蓋頭；地濕則一雨成池，謾道蓮花捧足。問訊泉邊卓錫，摩挲廡下豐碑。開山祖佛一會儼然，後代兒孫千燈猶燄。若欲重新功德，除非大作規模。未能馬祖一口吸西江，待廣長舌如何說得；莫道駱駝兩脚藏北斗，硬脊梁方可承當。喫倒雪峰飯籬，怕問廬陵米價。信大事卒難了辦，這公案還作麼參。要結好因緣，須逢善知識。布黃金八十頃地，吉檀那大大發心；登寶塔五百由旬，願如來生生結會。《潛齋集》卷一一。

柵嶺修路疏

柵嶺路控安、昌、常、長四鄉之衝，一徑崎嶇，仍復頽塌，不惟商旅愁戚，樵牧咨嗟，而各鄉大家聯姻結眷，尤不便往來。白蓮王道人發心幹緣，募衆修闢，更就嶺旁結小菴，使道者居之，迎接行客。須仗大家歡喜助緣，共成勝事。

右，伏以人間世行道良難，縱野女怕逢狹路；天下事有心便做，信愚公移得高山。况一嶺盤桓十五里之間，而兩旁控扼三四鄉之要。草菅蒙蔽，當道或踏長蛇；巖石欹崎，攔路曾逢猛虎。要好闢開荒徑，更須卓立小菴。好事人自肯結緣，作福者定須布施。指廩揮金直易，開山通道何難。假數椽與

佛蓋頭，立一亭容人歇脚。山有蠱蟲惡獸，仗黃面老子一力護持；路通駟馬高車，看白蓮道人千聲讚歎。種三生福，作萬人緣。《潛齋集》卷一一。

巖下修路疏

伏以駟馬車十步九折軸，分明行路登天；大石牛一日三糞金，誰解鑿山通道？信難事從來難做，遇好人還結好緣。維茲巖下崎嶇，况值溪流澎湃。上阻千尋絕嶮，猿猱愁殺攀緣；下臨百尺深溪，魚龍有時掀舞。雖精衛有心啣枚塞海，柰愚公無力運土移山。須仗衆因緣，共成大方便。今日執鎚運斧，要看小錢塘疊疊石隄；他時接轂摩肩，免向古劍閣行行棧道。施財有限，報福無窮。《潛齋集》卷一一。

醮羣仙疏

玄牝之機至蹟，爲道難明；乾坤之德好生，受恩罔極。萬靈啓佑，一念鑄銘。伏念某處世塵中，遭時亂際。徜徉彭澤生涯，結綠柳之緣；髣髴邯鄲事業，熟黃梁之夢。莫夜曾無鬼責，良辰時引仙來。密抽玉鑰之關，妙泄金丹之秘。心源了了，湛然清水寒潭；命竅玄玄，擁出紅爐白雪。不期庸

瑣，有此遭逢。躬承列聖之親傳，實藉皇穹之密授。然念血肉之軀有漏，罪業之障未除。朝屯暮蒙，莫難調於火候；日離月坎，豈易化於金砂。故雖已得於入門，然懼未登於彼岸。肅清蝸舍，虔仗羽流。薄陳科醮之儀，尚寓致芹之意。施隆謝菲，語短情長。伏願玄極垂慈，皇明降鑑。華陰道上蚤聞真主之龍飛，緱氏山頭終待羣仙之鶴駕。盟心皦日，矯首青雲。《潛齋集》卷一一。

僧化供疏

常住三厨飯乏供，只得停堂；和尚一卷經即法，便可求食。這時節適遭劫數，小寺院不比常年。待喫倒雲門飯籬，那問得青原米價。歷耳不聞響板，索飯空洗鉢盂。不成緊縛肚皮，只得還他脚債。若有善男善女，肯將一碗飯結緣；南無大慈大悲，便有十方僧讚歎。撐腸飽足，合掌摩訶。《潛齋集》卷一一。

祝香文

這一瓣香，種子於渾沌未分前，萌芽於盤古已生後，托根於崑崙頂上，逮今八萬四千年。直榦擎天，盤根柱地，東枝覆東佛輿代，西枝覆西衢耶尼，南枝覆南閻浮提，北枝覆北鬱單越。昔有黃帝，

嘗乘蒼龍登崑崙，南望娑婆樹下，起歆羨心，命從行七聖，徵脩月斧八萬家，將環而斫之。度工不可得，僅取樛枝以歸。其大百圍，其長千層，盛之九鼎之爐，爇以玄珠之火，香聞九十萬里。當時國中甘露降，朱草生，五穀登，萬民育，以至羽毛孕伏，蟄蟲昭蘇，種種饒益，不可名狀。惟此一枝墮落赤水之北，好事者奉持以獻。對此銀花火樹，爇向寶鼎金爐，普供三界萬靈，一切真宰，暨我孚惠昭利靈順大王、前殿靈司、後宮聖眷，併及四近四遠五廣神祇，無邊聖衆。憑此一炷香，弘發五大願：一願皇王萬歲，四海龍雲；二願臣僚千秋，一堂魚水；三願風調雨順，百穀豐登；四願役簡刑清，四民安樂；五願會中上士，境內齊民，美景良辰，歲歲樓臺燈火夜；賞心樂事，家家庭院管絃聲。只今萬衆齊看，盡道一聲喝采。願心已竟，更有詩云：「燈毬十里照香車，曼衍魚龍富貴家。風軟香雲吹不斷，笙歌滿路落梅花。」《潛齋集》卷一一。

還醮疏文

天宇雖高，嘗傾心而致禱；齋宮載葢，妥拜手以酬恩。俯瀝丹衷，仰干洪覆。竊念某驅馳薄宦，偃蹇餘生。不堪姍侮於三彭，遂使憑陵於一豎。問丹砂於勾漏，敢覬長齡；訪至道於崆峒，孰傳密旨。尚期徼福，願賜更生。凡起居飲食苟旦夕之安，則覆載燾持皆乾坤之造。肅差穀旦，有事醮壇。用鳩圓滿之功，茂衍靈長之貺。伏願三清賜鑑，列聖垂慈。注生斡斗極之樞，益算錄仙官之籍。水火

木金土，復還先天太極之真；富壽德康寧，永集洪範九疇之福。次偕私室，均囿春臺。《潛齋集》卷一。

代上三元普度青詞

上帝好生，首三元而肆赦；下民有欲，望九陛以祈恩。謹闔忱辭，冒干聖聽。伏念臣等塵寰蟻聚，濁世蠅營。胎生卵生，濕生化生，人身不偶；天大地大，道大王大，聖治難逢。七情既怵惕於利害憂患之場，百體復浸淫於暑濕風寒之寇。故人不皆嚮康寧、嚮壽考，惟天所以命吉凶、命歷年。聿瞻帝闕之宏開，載肅齋壇而普度。集蚩蚩之黔首，對赫赫之皇明。仰冀鑑觀，俯垂矜憫。父今生我，母今育我，不能全大造之功；老者安之，少者懷之，尚敷錫庶民之福。《潛齋集》卷一一。

薦弟青詞

顛連無告，莫重天倫；明畏棗忱，於昭帝鑑。俯殫方寸，仰叩圓穹。竊念臣弟生也不辰，死而失所。秋風客路，雖嘗歸載於靈輜；暮雨他鄉，猶恐淪胥於鬼域。日月居諸，不知所屆；歲時祭享，曷云能來。儻同氣之不思，於遺體乎何有。若保首領以歿於地下，果何面目以見我先人。歎獨行其畏

畏，抱憂心而悄悄。載念天地好生之德，能全父兄不及之恩。比投垤蟻之忱，少見原鴿之義。有赫於下，必鑑其衷。茲盡布於夙心，願切徼於終惠。解冤釋結，永離苦趣於三塗；膺錄受圖，速殿仙班於九陛。用敷厥福，遂及我私。《潛齋集》卷一一。

謝土醮詞

乾旋坤轉，密藉洪鈞；革故鼎新，聿成燕廈。維予訪落，齋日告虔。伏念某別乘一車，數椽傳舍。昔祝融稔釁，因不戒于民居；前長史度材，遂復新於公宇。榻來爲代，竊幸蒙成。擬差穀旦，以謀遷行。托蘧廬而叨芘肅，蠲蕪薦庸贅芹忱。伏願金闕疏恩，紫宸錫羨。覆之德寓，道以仁門。奠厥攸居，闔室咸躋於壽域；施於有政，滿城同樂於春臺。《潛齋集》卷一一。

答貢院元許醮青詞

青原試士，濫司圍棘之權；皇天鑑民，嘗致瓣香之敬。吉涓醮事，庸答恩私。竊念某關決非長，曠瘵是懼。漕臺選使，獲寓目於蟻場；吉士維多，每驚心於鵠雪。方其數萬人之雜襲，莫難三四日之平安。凜懷朱門深鎖之憂，僭瀆洪造蓋高之聽。遄蒙巨芘，一戰無誼。徹曉冬初，幸返羊屠之肆；迨

今歲暮，尚幸獺報之忱。茲就精壇，用酬素願。會黃冠而星列，啓玉笈以雲翻。肅邀仙馭之臨，俯鑑塵寰之陋。伏願圓穹垂美，列聖儲休。監于萬方，尚克享於一德；歛時五福，用敷錫厥庶民。遂及我私，克昌厥後。《潛齋集》卷一一。

天慶宮建醮青詞

人情欲壽，自慙螻蟻之心；天德曰生，曷報龐鴻之造。俯殫方寸，仰叩玄穹。伏念某百念已灰，一官如粟。柰以三彭之姍侮，遂成二豎之憑陵。問勾漏而覓靈丹，誰其指示；訪崆峒而求至道，孰是心傳。比伸微福之私，切冀更生之賜。凡旦夕苟然存活，皆乾坤有以燾持。然百年之景易窮，而千載之生不偶。天地不知其委蛻，山澤安足以藏舟。如非冥冥中而有相嘉，是豈數數然而能致福。吉蠲穀旦，有事齋宮。伏願鑑此衷忱，錫之終惠。益算著仙宮之錄，回生斡斗極之樞。性命雙圓，人法天、天法道；心身俱妙，形化氣、氣化神。凡囿一家，鈞陶百順。《潛齋集》卷一一。

宴交代寶府判全器樂語

伏以東屏主、西屏賓，等是龍門之客；南山樓、北山樓，共尋螺浦之盟。交籀言新，傾蓋如故。

以千載難逢之機會，而一朝締好於雲初。爰秩初筵，爲酌佳節。恭惟某官道源孔孟，詩派毛韓。問家世於燕山，內翰尚書之的系；記姓名於虎榜，南宮進士之魁題。聲華方翳丹鳳而跨白麟，步武已驅文狸而乘赤豹。載金匱細書之筆，望重紫扉；惹玉皇侍案之香，班通碧落。方此軋羣仙而直上，乃肯分半刺以斜飛。振起魯公千載之遺風，喚醒醉翁百年之舊夢。數廳頭之記壁，幾何人斯；聽道上之行碑，惟恐公去。昔日游亭，盡成棠蔭；明朝歸棹，但載荷香。西江總是餘波，東山爲之矜色。第恐當今聖主，圖任舊人。邇方受宣室之釐，見思賈誼；行欲議明堂之事，必召申公。斜行詔不久飛來，《歸去辭》又成空賦。我府判大博，雲無心而一出，春有脚以方來。瞻泉竹於湘巖，久願識荊州而輕萬戶；釣雲烟於嚴瀨，恍如隔弱水而望三神。不圖有邂逅之逢，乃獲附交承之契。我龜既滌，式燕宏開。未論紅粧之樂指三千，且說少年之阿婆三五。黍包金、蒲切玉，好陪今夜良辰；羅疊雪、葛含風，再約明年端午。輒陳口號，上贊顏行。

五雲深處擁星屏，我有詩歌試爲聽。白鷺青原一樽酒，銀魚朱黻兩魁星。今宵南北樓頭月，明日東西水面萍。重約春風携手處，金鑾坡上有槐廳。《潛齋集》卷一一。

絲竹致語

伏以萬井燈聯，慶神仙之萃會；九成樂奏，迓世道之昇平。聿觀盛事以鋪陳，茂對芳辰而蹈厲。

欽惟孚惠昭利靈順大王生稟正氣，歿爲明神。聲名揭日，事業掀天，願橐荷而猶紫；氣燄動人，威靈悟物，瞻廟柏以長青。英風颯衆望以具孚，惠澤溥八方而均被。穆穆公侯之袞冕，振振孫子之簪纓。文昌地位，魁下三台；進士科名，雲開五色。樓臺掩映，羅幃繡幕圍香風；冠蓋逢迎，桂酒椒漿援北斗。銀燭燒而洞天未曉，金羈馳而輦路生塵。千株之火樹齊開，一部之雲門交奏。彈絲品竹，擊石縱金。闌干白玉，秦女吹簫；江上青峰，湘靈鼓瑟。影動樓心明月，慢舞雙雙；絃凝冰下寒灘，餘音裊裊。調高飛白鶴，曲妙降黃龍。笙簧合沓，棗下新聲；鞀鼓喧闐，梨園舊譜。載展詩而會舞，庶崇德以報功。皦如純如，繹如翕如，已備八音於樂府；優矣游矣，康矣常矣，同躋萬姓於熙臺。吹拍狸歌，笙鏞勝會。

天碧星河欲下來，東風吹月上樓臺。玉梅雪柳千家鬧，火樹銀花十里開。紫鳳笙繁聲曼衍，黃龍舞慢影徘徊。紗籠帖地香雲繞，莫遣銅壺漏箭催。《潛齋集》卷一一。（以上尹波校點）

全宋文卷八二九八

文天祥一

文天祥（一二三六——一二八二），初名雲孫，字天祥，以字貢於鄉，改字履善，又字宋瑞，號文山，又號浮丘道人，吉州吉水（今江西吉水）人。寶祐四年進士第一，尋丁父憂。歷寧海軍節度判官，上書乞斬董宋臣，遷刑部郎中。歷知瑞州、江西提刑、尚左郎官，權直學士院。忤賈似道，遂乞致仕。起爲湖南提刑、知贛州。德祐初元兵入侵，募兵勤王，除知平江府、臨安府。拜右丞相兼樞密使，使如元軍請和，被拘，夜亡入真州，輾轉至温州。聞益王未立，上表勸進，拜右丞相，同都督諸路軍馬，舉兵抗元，兵敗空坑。衛王立，加少保、信國公，進屯潮陽。元軍掩至，被俘。囚燕三年，從容就義，時至元十九年臘月，年四十七，後謚忠烈。著有《文山集》、《文山詩史》。見《文山先生紀年錄》（《文山全集》卷一七），《宋史》卷四一八有傳。

《文山集》在元時有道體堂刻本，分《前集》三十二卷、《後集》七卷，久佚。明景泰六年韓雍、陳价重加編次付梓，自後歷明至清，版本多達二十餘種。今以四部叢刊影印萬曆三年胡應皋刻本《文山先生全集》二十卷本（簡稱《文山全集》）爲底本，校以韓雍、陳价刻本（簡稱韓本），嘉靖三十一年鄢懋卿、寧

寵刻本（簡稱鄆本），文淵閣四庫全書本（簡稱庫本）。原集含文十卷，另輯得佚文三十二篇，統編爲二十五卷。

贈人鑑蕭才夫談命

歲單閼，人鑑蕭才夫過予，以予命推之，言頗悉。是秋迄次年，予所遭無有不與其言相符。噫，人鑑其神已！爲之辭曰：

眇陰陽之大化兮，布濩垓埏。出王游衍之度思兮，曾淺淺乎爲天。自青紫食窮經之心兮，怪詭乘之而相挺。竊掠五緯之膚兮，誑其愚以自賢。方疾其拂耳騷心兮，羌作炳於眇綿。將事實與行會兮，抑挾幽而鈎玄。予將窺前靈之逸跡兮，就有道而正焉。《文山全集》卷一〇。

吳伯海自號滄浪爲徐徑畝所喜携諸公詩來訪因有感作滄浪歌并呈

巽齋先生

世混濁而不清兮，蟬翼爲重，千鈞爲輕。彼滄浪其無據兮，何纓非足，何足非纓？嗟靈均之好脩兮，安能受物之汶汶？掘泥揚波以相從兮，羌不知漁父之用心。筦爾而歌，鼓枻而行。噫！漁父其何

如今，掉頭乎靈均。《文山全集》卷一〇。

擬進御筆

爲馬丞相、趙僉書上奏留平章。

《書》曰：「三人占，則從二人之言。」蓋占取其同。自二人之同推之，卿士庶民無往不同者。師相欲去，二府以爲不可去，是千萬人皆以爲不可去矣。朕自師相有請，寢食不爲安。朕必不能違衆心，師相亦必不忍違朕心。嗚呼！尚鑑時忱，永綏在位，師相其聽之哉！所請宜不允。《文山全集》卷三。

又擬進御筆

周公相成王，終身未嘗歸國；孟子當齊世不合，故致爲臣。蓋常情以去就爲輕，惟大臣以安危爲重。苟利諸國，皇恤其身？若時元勳，爲我師相，先帝付託，大義所存，太母留行，前言可覆，胡爲以疾，而欲告休？惟醫藥所以輔精神，惟安身所以保國家。古者之賜几杖，雖當七十而不得引年；我朝之重辯章，雖過九旬而尚使爲政。勉釐重務，勿困眇懷。所請宜不允。《文山全集》卷三。

擬冊立皇太子文

皇帝若曰：朕弗克于德，嗣先人宅丕后，三十有七年。夙興夜寐，休惕惟厲，懼無以追配于前猷，自底不類。迺季秋將有事明堂，思惟皇天全付于有家，繼繼承承，於千萬年。祖宗在天，眷相惟茲，蔽自朕志，貽厥孫謀。予一人有辭〔二〕，郊廟神祇祖考將安樂之。皇帝曰：猷，具官皇子某，爾忠孝豈弟，少如夙成。朕用疏爾王封，衍爾賦畝。欽迺服命，克懋厥德，惟爾休。昭事有嚴，俾爾圭鬯，薄海內外，罔不咸一。其冊爲皇太子，改名某。嗚呼，厥惟我前人造天丕基，創守惟艱哉！天難謀，命靡常，民罔常懷，懷于有仁。戒之哉！爾惟親正人，學于古訓，罔遊于盤，罔淫于逸，罔以非道孫志，罔以古之人無聞知。尊德崇道，由仁義行。乃若時守宗廟社稷，以爲祭主，天地神人，無疆惟休。朕不失爲知子，爾亦有令名。於戲，欽哉！

《文山全集》卷三。

〔二〕予：原作「于」，據庫本改。

己未上皇帝書

開慶元年十一月

十一月吉日，敕賜進士及第臣文天祥昧死百拜，謹奉詔獻書于皇帝陛下。臣一介疎賤，遭逢聖明，猥以庸愚，早膺親擢。世道悠悠，風塵流靡，臣於其間蓋嘗感激奮發，以爲由今之道，無變今之俗，一日有關於天下國家之故。懼以無辱使令，杜門四年，讀《禮》之外，蓋未嘗一日不思以自效也。乃夏五，陛下臨軒策士，偶垂記憶，起臣於家居，進臣於仕籍。臣伏被宸命，感激不自勝。追惟蒙恩之初，阻於朝謝，北望天路，輒奉表以聞，伏蒙聖慈許臣詣拜闕下，德至渥也。臣就道以來，不圖國事浸艱，邊烽頓迫。陛下引咎責躬，改過更始，召還舊德，斥去元姦，凡可以當天意回人心者，無所不用其至。伏惟陛下不自神聖，猶親灑宸翰，誕布詔書，庶幾中外臣庶危言極論，以有補於今日之故。陛下悔悟之意上通於天，天下於此感服陛下之勇。臣甫及趨謝闕庭，兩讀綸音，爲之哽咽下泣。君臣之義，與天地並立，況臣蒙被厚恩，非衆人比，使於此時泯泯默默，上負陛下，內負帝衷，尚何以飲食於載履間哉！是用不避斧鉞，輒奮愚衷，條其說以獻，惟陛下裁幸。一日簡文法以立事。夫貴爲天子，富有四海，垂衣拱手，以雍容於穆清之上，至尊之體也。不幸際時艱難，兵革四起，俯仰成敗，呼吸變故，此非用馬上治不濟。今國勢搶攘，固猶未至如馬上之急，然寇入腹心，事干宗社。陛下爲皇皇拯救之謀，不得不略倣馬上治之之意。今陛下焦勞於上，兩府大臣黽勉於下，君臣之

間，不可謂非日計軍實而申做之者。然尊卑闊絕，禮節繁多。陛下平日視朝，百官以次奉起居，宰相搢笏出奏，從容不踰時。軍國大事，此雖陛下日夜與宰相汲汲而圖之，猶懼不既，謀王斷國之設施，尊主庇民之蘊蓄，豈能以頃刻交際而究竟之哉？陛下退食之暇，雖時出內批，以與宰相商論，宰相又時有奏報，以出其建明。然天下事得於面論者，利害常決於一言；筆墨所書，或反覆數百言而不足。事機交投，寸陰可惜。使宰相常有此等酬酢，則一事之末，固有費其日力者矣，其於幾務豈不有所妨哉？古者天子之於大臣，或賜坐，或賜食，或奏事至日昃，或論事至夜分。凡皆以通上下之情，爲國家至計也。賜茶之典，五代時猶有之，惟國初范質、王溥頗存形迹，此事遂廢。陛下莫若稍復古初，脫去邊幅，於禁中擇一去處，聚兩府大臣，日與議軍國大事，陛下賜之款密，親是非可否於其間。衆議惟允，則三省畫時施行。上下如一，都俞噓咈之間，必將有超然度外之舉，天下何事不可爲，何難不可濟？至於除授，尤有關繫。且如近者重臣建闔之事，方帥海門，隨遷建鄴，甫鎮建鄴，又進上饒，布置變換，如弈棋然，卯詔辰行，奔命不給。大者措畫之如此，小者遷徙之更多。人無定志，事無成謀，當此艱危，豈不誤事？繼自今始，陛下宜與大臣熟議，某人備某職，某人任某事，人物權衡，當而後用，朝廷命令，奠而後發。如此，則觀聽者不至皇惑，驅馳者不至遲回。人知其令出惟行，則無輕朝廷之心；士大夫知其可以展布四體，則鞠躬盡瘁而無觀望。其於國事，厥非小補。又如用一人也，或出於陛下之拔擢，或出於宰相之啓擬，中書已費行移，後省方及書讀，或有不當，又至繳駁；比其不繳駁也，則書黃徑下，其人徑受命矣，臺諫始從而有所指陳。是致國論紛紜，而內外職

守遷移如傳舍，施之平時，雖有體統，用之今日，恐悞事機。臣愚以爲陛下宜倣唐諫官隨宰相入閣故事，令給舍臺諫從兩府大臣日入禁中聚議。其有不可，應時論難，不使退有後言。如此，則國事無聚訟之譏，宸命無反汗之失，事會無濡滯蹉跌之悔，豈不簡便易行哉？若夫中書乃王政之所由出，宰相之重又天子之所與論道經邦，而不屑其他者也。今宰相來於倉卒之中，而制千里之難，立於敗壞之後，而責一旦之功，此雖敏手不能以大有爲。須是博采四方之謀，旁盡天下之慮，而後不愆於事。側聞軍期文書填委叢積，宰相以其開誠布公之歲月，弊弊焉於調遣科降之間，侍從近臣且日不暇相接矣。諸葛亮以區區之蜀，抗衡天下十分之九，究其經濟大要，則曰「集衆思，廣忠益」。今衆思不暇集，忠益不暇廣，宰相不得已竭其一心，役其兩耳目，日與文書期會相尋於無窮，此豈其才之不逮哉！我朝三省之法繁密細碎，其勢固至此也。柳宗元有言：「失在於制，不在於政。」爲今之計，惟有重六部之權，可以清中書之務。今六部所司，絕是簡省，其間長貳常可缺員。莫若移尚書省六房隸之六部，如吏部得受丞相除授之旨，而行省劄，兵部得稟樞密調遣之命，而發符移，其他事權，一倣諸此。而又多置兩府屬官，如檢正、都承之類，使知蜀事者置一員，知淮事者置一員，知諸路事者置若干員。兩府日與其屬剴切講畫，以治此寇，而文書行移不與焉。如此，則大臣有從容之暇，可以日見百官以及四方賢俊。酬應簡則聰明全，心志壹則利害審，塞禍亂之路，開功名之門，當自此始，惟陛下思之。二曰倣方鎮以建守。今天下大患在於無兵，而無兵之患，以郡縣之制弊也。祖宗矯唐末五代方鎮之弊，立爲郡縣繁密之法，使兵財盡關於上，而守令不得以自專。昔之擅制數州挾其力以爭衡

上國者，至此各拱手趨約束，捲甲而藏之。傳世彌久，而天下無變，然國勢由此浸弱，而盜賊遂得恣睢於其間。宣靖以來，天下非無忠臣義士、強兵猛將，然各舉一州一縣之力以抗寇鋒，是以折北不支而入於賊。中興之臣，識循環救弊之法，蓋有建爲方鎮之議者矣。失此不圖，因循至今日，削弱不振，受病如前。及今而不少變，臣不知所以爲善後計矣。今陛下命重臣建宣闡，節制江東西諸州，官民兵財盡從調遣。廟謨淵深，蓋已得方鎮大意矣。然既有宣闡，又有制司，既有制置副使，又有安撫副使，事權俱重，體統未明。有如一項兵財，宣闡方欲那移，諸司又行差撥。指揮之初，各不相照，承受之下，將誰適從？今日之事，惟有略倣方鎮遺規，分地立守，爲可以紓禍。且如江西一路，九江、興國、隆興與鄂爲鄰，朝廷既傾國之力以赴之，姑所不論，惟寇之至湖南者已宿堂奧，此外八州，其措置不容苟簡。八州之中廬陵、宜春最當衝要。虜之爲兵，其法常有所避。避八桂則出清湘，避長沙則出衡陽。今宜春見謂有兵，惟廬陵猶此無備。舍堅攻瑕，棄實擊虛，虜既以此爲得策，則夫避宜春而趨廬陵，其計將必出於此。州縣之事力有限，守令之權勢素微。虜至一城則一城創殘，至一邑則一邑蕩潰。事勢至此，非人之愆。若不別立規模，何由戡定禍亂？臣愚以爲莫若立一鎮於吉，而以建昌、南安、贛隸之；立一鎮於袁，而以臨江、撫、瑞隸之。擇今世知兵而有望者，各令以四州從事。其四州官吏，許以自辟，見在任者，或留或去惟帥府所爲，去者令注別路差遣。其四州財賦，許以自用，自交事一日始，其上供諸色窠名，盡予帥府；交事以前，見未解數目，亦許截留。其四州軍兵，見屬伍符者必寡弱而不振，見行團結者必分散而不齊。許於伍符團結之外，別出措置，收民丁以

爲兵。彼一州之緊急者，得三州稍寬緩之力以爲之助；三州之寬緩者，得一州當其緊急而無後憂。不出二三月，如吉如袁，其氣勢當自不同。倣此而行之江東、廣東，無不可者。夫郡縣方鎮之法，其末皆有弊，所貴乎聖人者惟能通變而推移之。故郡縣所以矯方鎮之偏重，方鎮所以救郡縣之積輕。今郡縣之輕甚矣，則夫立爲方鎮之法，以少變其委瑣不足恃之勢，真今日之第一義也。陛下一日出其度外之見，不次拔數人之沈鷲英果者，委以數鎮，俾各爲國家當一面，則郡縣之間文移不至於太密，事權不至於太分，兵財得以自由，而不至於重遲而不易舉。旬月之間，天下雷動雲合，響應影從，驅寇出境外，雖以得志中原可也，尚何惴惴宗社之憂哉！三曰就團結以抽兵。抽兵之說，臣前已開其端，而其節目未悉也，請再陳之。夫取兵於民，周井田、唐府兵之遺法也。今使者四出，分行營陣，俾各處團結以自爲鄉井之衛。疾行之中，此亦庶幾善步者，然而無益也。近時朝廷以保伍爲意，官府下其事里胥，爲里胥者沿門而行，執筆以抄其戶口，曰官命而各爲保伍也。已而上其籍於官，又從而聖通塗之壁，取其甲分，五五而書，曰保伍。如古所謂保伍者，如此而已。臣居廬陵，往往有寇警，則鄉里又起所謂義丁者。一日隅總擊柝以告其一方曰：「寇至毋去諸，而等各以某日聚某所，習所以守望。」至其日也，椎牛釃酒以待，隨其所衣，信其所持，從而類編爲之伍。一匝乎村墟井落之間，翕然而聚，忽然而散。則義丁者，又止如此而已。今朝廷命使以團結，州縣奉旨而行移。計其規爲布置，當有加密於臣所言者。然某所若干人，某所又若干人，屬邑合狀帳申郡府，郡府合狀帳申朝廷，計其數目，當自不少。然其分也散而不一，其合也多而不精。故當其分，則鄉村無以通於鎮市，鎮市無以通

於城郭。虜突如其來，彼一方者力不敵，勢不支，老弱未及揀，教閱未及施，雖有金鼓旗幟之物，而未知坐作進退之節也，雖有城池山澤之險，而未知備禦攻守之方也。且民之聚也，使之自峙其糧，自備其飲食，則有所不能，仰於官則無以給也，有以給則又不能久也。臣故曰無益也。夫前所謂或千人，或數百人，此隅總一日能辦也。今建言者不察其聚之易而用之難，增兵之有名而拒寇之無實，乃欲視其團結之多寡，升降其官賞以爲勸，且意其一日之急，或者可驅而他之。賈誼有言，皆非事實，知治亂之體者也。陛下忱能委數州立一方鎮，莫若俾爲帥者就團結之中，凡二十家取其一人以備軍籍。一郡得二十萬家，則可以得一萬精卒。例而行之諸州，則一鎮新兵當不下二三萬。州郡見存之租賦可以備兵食，見存之財利可以備軍需。古人抽丁之法，或取之三家，或取之五家。今官收其米以就爲養，收其財以就爲用。既食其力，不當又重役其人。惟於二十家取其一，則衆輕而易舉，州縣號召之無難。數月之內，其事必集。爲帥者教習以致其精，鼓舞以出其銳。山川其便習也，人情其稔熟也，出入死生之相爲命也，鋒鏑之交，貌相識而聲相應也。如此兵者，一鎮得二三萬人，當凜凜然不下一敵國。今諸路列鎮，則精兵雖十餘萬可有也。太祖皇帝南征北伐，所至如破竹，計其兵曾不滿二十萬。使吾於諸閩之外別得十萬精兵，則何向而不可哉！或曰國家經常皆用供億，州縣財賦各有窠名，今上流之兵未解，江淮之餽如故，使移此事力以給方鎮之兵，如諸閩何？嗚呼！擇害莫若輕，擇利莫若重，臣蓋籌之審矣。夫京湖之路既梗，則雖欲漕運而舟楫不能以前；江廣之備既虛，則雖有財賦而土地不能以自保。與其束手無措以委輸於虜，孰若變通盡利以庶幾虜之可逐也？且夫江廣既全，

則吾之境内其惟正之供者尚多也。陛下撫此厄運，不得不勉自節縮，曲爲通融，多方以濟諸闔之急，支吾年時，寇必就盡。然後一正吾之郡縣，一復吾之經常，未晚也，不然，殆未知其所終。惟陛下深思亟圖之。四曰破資格以用人。本朝用人，專守資格。祖宗之深意，將以習天下之才。世雖有賢明忠智之人，英偉奇傑之士，亦必踐敷之多，涉歷之熟，積勞持久而後得至於高位，養成遠大之器，消弭僥倖之風，人才世道，胥有利賴。然其弊也，有才者常以無資格而不得遷，不肖者常以不礙資格法而至於大用。天下卒有變，不肖者當之，而有才者拱手熟視，夫是以常遺國家之憂。臣嘗見數年以來，邊陲之間偶缺一帥，陛下徬徨四顧，弄印莫屬，挨排應急，不得已，常取監司之風力者爲之。趙魏老不可以爲滕薛大夫，陛下非不知其然也。他人資格或有未及，而彼適可得之。雖其才具容有不逮，然猶意境外無事，以幸其不至於敗缺。比其敗缺，則倉皇變易，常至於失聲色而後已。嗚呼，此平世拘攣之弊也！今天下事勢潰決已甚，一有蹉跌，事關存亡。百夫不可輕擇將，一壘不可輕畀守，况其重者乎！今自朝郎以上，凡內之卿監侍從，外之監司郡守，紫朱其綬，唱喝車蓋而出者，不知幾人。使其中果有非常之才，堪任將帥，則是望實既優，資格又稱，一日舉而置之萬夫百將之上，誰曰不然？然臣意陛下之未有其人也，則夫宗社安危之機，不可輕決於庸人而有資格者之手。世之能辦事者固多矣。三辰不軌，拔士爲相，蠻夷猾夏，拔卒爲將，事固各論其時也。今何如時，尚拘拘子子於資格之末！臣觀州縣之間，凡寮底小官馳騁於繁劇之會者，蓋甚有之。薦引之法浸弊於私，而改官之格率爲勢要者所據，孤寒之中獨無可任大事者乎？三歲一貢士，碌碌成事者衆，而氣概才識望于鄉里曾不得

一名薦書。抱膝隆中，杖策軍門，固皆縫掖章甫之流也。夫今日之士，他日之官也；今日之小官，他日之爲公卿者也。天下有事，凡能擔當開拓、排難解紛，惟其才耳。固有明知其人之有才，而拘於資格之所不可，則亦姑委棄之，此豪傑之士所以痛心疾首於世變之會也。陛下如建立方鎮，收拾人才，臣願明詔有司，俾稍解繩墨，以進英豪於資格之外。重之以其任，而輕授以官，俟其有功，則漸加其官，而無易其位。漢唐法度疎闊，其一時人才常倜儻不羈。本朝以道立國，以儒立政，則亦無取乎爾。然至於今日，事變叢生，人物落落，柰何不少變之哉！至如諸州之義甲各有土豪，諸峒之壯丁各有隅長，彼其人望，爲一州長雄，其間蓋有豪武特達之才可以備總統之任，一日舉之以爲百校之長，則將帥由是其選也。其穎異通敏者，引之於帷幄樽俎之密，又從而拔其尤者，委之以人民社稷之重，則人才不可勝用也。至如山巖之氓，市井之靡〔一〕，刑餘之流，盜賊之屬，其膽勇力絕足以先登，其智辯機警足以間謀，使貪使愚，使詐使勇，則群策群力皆吾屈也。昔之方鎮食其土地，用其人民，拊循其士大夫，馳策其趺弛之士，故雖以區區之地，常足以與天下爭雄。今雖未至於此，然陛下髣髴而行之，則吾規模意氣固已一變前日之弱矣。惟陛下熟計之，幸甚！夫古之爲天下國家者，常有敵國相持之憂，然而立乎四戰之衝，雖將衄兵潰，屢起屢仆，而其國終不可動，由卓然有所立故也。今陛下奮發神斷，赫然悔悟，所以洗舊污，更宿弊，如雷霆風雨，交馳並至而不可禦。陛下亦求所以爲自立矣，而未得其方也。自立之方，臣前所獻之數條是已。雖然，臣意陛下未之能行，則有說也。何也？悔悟之意未明也。奸人當國，指天下能言之士謂之「好名譁競」。使「好名譁競」者常在朝廷，則清

議之福，陛下必及受用，事應不至今日。惟浸潤膚受，爲毒已深，而後陛下之人才盡逐。陛下今既悔悟矣，然鋒車所召，率未及前日擯棄流落之人。或謂陛下猶有畏其不靖共之意。夫今日之禍亂，靖共之報也，陛下猶有愛於貌爲靖共者邪？此悔悟未明之一也。三數年前，縉紳之能出臆論事者既爲奸人所屏，學校之士猶叩閭疊疊不自己。奸人疾其爲害己也，託名學法，重致意於禁上書之一條，而後陛下之言路盡塞。陛下今既悔悟矣，然食肉之徒未有能出一語以救陵遲之禍，惟學校不憚懇懇以爲言。彼其所陳，固有未盡切實者，陛下何不擇其善者而施行歟？此悔悟未明之一也。今有人焉，陷於酒色，湛溺而不自知，元氣日耗蝕於內，客邪日衝擊於外，四肢百骸幾至解體。一日倏大悔悟，自創其酒色之愆，而使爲朋友僕御者各得以勤攻己之短，其爲身謀幾晚矣。然知湛弱之爲病，而猶諱其所從來，則是病根固在也。人非不知愛身，彼諱病根而不肯決去者，說其小而忘其大也。陛下所以救社稷重於救身，則夫病根所在，何所顧惜而不之去歟？高宗皇帝以麥飯豆粥之苦，植立東南百四十年太平之基。陛下嗣無疆大歷服，所以撫摩愛養，培億萬年丕天之休，加用力焉。不幸比者中外怨叛，吾之赤子自延寇入室，謀危國家。蓋至今日，遠近爲之荷擔，宗社幾於綴旒。天下之人追咎其失，以爲聚斂之過。而聚斂之事，通國憤然怒罵，以爲倡於陛下左右之人。夫此一人者，竊弄威權，上累聖德，其凶燄威惡，蠹國害民者，臣不能具數，獨其攘臂聚斂，招集奸凶，爲陛下失民失土，以貽宗社不測之憂者，其罪莫甚焉。趙簡子命尹鐸爲晉陽，尹鐸曰：「繭絲乎，保障乎？」簡子曰：「保障哉！」古之爲天下計者，不屑於其小，而惟遠者是圖，不快於目前之求，而常恐其一朝之患。故雖簡子區區

之大夫，尹鐸區區之小吏，其所規爲，猶及於此。國家之大，不可以田舍翁自爲也。後之人君思以富雄天下，固有時出其聚斂之術。然猶繭絲自繭絲，保障自保障。何物刑餘，爲謀不臧，率天下以共向繭絲之的，而保障之地亦不得免焉。繭絲之毒不可忍，而後保障之禍不可爲。陛下間者屢出內帑金帛，分給諸司，期有救於難。然調度方殷，兵革又不得息。前日聚繭絲之得未什伯，今日救保障之費蓋千萬億秭而未有已也。嗚呼，誰生厲階，至今爲梗？向使此人者不以聚斂斲伐祖宗涵洪寬大之仁，蠡賊陛下神明英武之德，則必不妄籍民財以入脩內司，必不豪奪民產以實御莊，必不諧價西園以布中外貪酣之寵^三，必不交通南牙以開朝廷污濁之門。如此，則奸人必不得竊據相位，徧置私人；如此，則疆禦培克之流必不得齒於縉紳，玷於節鉞；如此，則各郡有賢守，各路有賢監司，必不侵漁以交結北司，剝割以應奉內獻，民心必無變，宗社必無危。今朝廷知江閩虐取漁舟，故吾人爲虜鄉導以至於此，曾不知是數年間，外之監司郡守，求爲交結應奉而一切不卹，以失吾民戴宋無二之心者所在有之，江閩之事偶著爾。今論者追訟江閩之罪，死有餘責，則夫使士大夫貿貿焉爲聚斂，重失人心，激天下以各懷怨叛，如臣所指之人者，一死詎足道哉！且夫奸人之入相也，使非此人者與之相爲表裏以揜陛下之聰明，密爲游揚以開陛下之信用，則賢者必不以好名中傷，言者必不以譁競逐去，學校之持公論者必不以誼橫得禍，士大夫之秉直節者必不以貪贓加罪。朝廷清一，言路光明，邪人何自而赫張，民瘼何自而壅隔，人離而陛下何以不覺，寇至而陛下何以不知？彼其依憑陛下恩寵，以爲奸人奧主，故顛倒宇宙，濁亂世界，而得以無忌憚。使陛下今日訟過於天地，負媿於祖宗，結怨於人民，受

侮於夷狄，則豈獨一奸人爲之哉？原情定罪，莫重於奧主，而奸人次之。莊周曰：「兵莫憊於志，鎡錙爲下。」言刺人而殺之，不在於手，而在於心；不在於鋒，而在於所以用其鋒者。奸人則鎡錙也，奧主則志也。方今國勢危疑，人心杌隉，陛下爲中國主則當守中國，爲百姓父母則當衛百姓。且夫三江五湖之險尚無恙也，六軍百將之雄非小弱也，陛下卧薪以厲其勤，斫案以奮其勇，天意悔禍，人心敵愾，寇逆死且在旦夕。或謂其人者舖張驚憂，以沮陛下攘寇之志；處分脆弱，將誤陛下爲去邠之行。居前日則曰我能爲君充府庫，以盜其權；居今日則獻其小心，出其小有材，使陛下意其緩急可恃，以固其寵。向非陛下參酌國論，堅凝廟謨，爲效死不去之計，則一日嘗試其說，六師一動，變生無方，臣恐京畿爲血爲肉者，今已不可勝計矣。小人誤國之心可勝誅哉！臣愚以爲今日之事急矣，不斬董宋臣以謝宗廟神靈，以解中外怨怒，以明陛下悔悟之實，則中書之政必有所撓而不得行，賢者之車必有所忌而不敢至，都人之異議何從而消，敵人之心膽何從而破？將士忠義之氣何自激昂，軍民感泣之淚何自奮發？禍難之來，未有卒平之日也。千金之家，得一僮奴稍足以稱其私，雖害于而家，未忍亟去；況其人給事之歲月已深，乞憐之懇款已熟，陛下性資仁厚，亦豈忍遽甘心焉？然宗社之事重，左右之恩輕，蠹民誤國之罪深，承顏順色之愛淺。伏惟陛下以宗廟社稷之故，割去私愛，勉從公議，下臣此章，付之有司，暴其罪惡，明正典刑，傳首三軍以徇。如此而天下不震動，人心不喜悅，將士不感泣而思奮，虜寇不駭愕而謀還，是人心天理可磨滅也，是天經地義可漸盡也，臣所不信。臣嘗讀諸葛亮《出師表》，輒捲卷哀憤^(三)，悲其用心。亮之言曰：「宮中府中，俱爲一體，陟罰臧否，不宜異

同。若有作姦犯科及爲忠善者，宜付有司，論其刑賞，以昭平明之治。」亮將獎率三軍，北定中原，攘除姦凶，興復漢室，其於宮府之政，宜若無與，而獨區區以此爲先者，良以社稷安危之權，國家存亡之故，不在於境外侵迫之寇，而內之陰邪常執其機牙，此亮之所以深權內外本末之理，而先窒其禍亂之源也。今臣上自朝廷，下至州縣，所以分畫其規模，纖悉其經緯，以上助尊夏攘夷之一畫者，已略備矣。而臣獻其狂愚於末，猶有感於亮之所言。區區劣功，何敢引亮爲證，顧所以忠君愛國之心則亮之爲也。臣非不知疎遠之人指陳無狀，干犯天誅，罪在不赦；且使幸赦之不誅，則左右之人仇疾臣言，亦將不免。然臣所以不顧危亡，寧以身犯不測之鋒者，義命之際，臣固擇之精矣。方今社稷震動，君父驚虞，此所謂危急存亡之秋。臣委質爲臣，與國同休戚，親見外患如火燎原，而內寇又復植根固流，波漫則禍難無涯，臣死亡正自無日。與怵迫於權勢之威，憂疑於一己之禍，噤口結舌以坐待國家之難而後死，孰若犯死一言，感悟天聽？如陛下以爲狂妄而誅之，臣固已自分一死。萬一陛下察臣之忠，行臣之言，以幸宗社，則臣與國家同享其休榮，等死之中又有生路。此臣所以齎咨涕洟，望闕懇悃而不能自己也。臣冒瀆天威，殞越震懼，謹席藁私室以俟威命之下。臣無任瞻天望聖激切屏營之至，不備。臣某昧死百拜上。《文山全集》卷三。又見《歷代名臣奏議》卷一〇一，《文章辨體彙選》卷八三。

〔一〕靡：《歷代名臣奏議》作「輩」。

全宋文卷八二九八 文天祥一

一九四

〔二〕貪酣之寵：右引作「貪酷之種」。

〔三〕捲：庫本、《歷代名臣奏議》作「掩」。

全宋文卷八二九九

文天祥 二

癸亥上皇帝書

景定四年七月

七月吉日，具位臣文天祥謹昧死百拜，獻書于皇帝陛下。臣賦樸忠，遭逢聖明，早塵親擢。己未之夏，陛下延策多士，記憶微臣，俾佐京兆尹幕。時臣不敢拜恩，乞行進士門謝，旨令赴闕。其冬實來行禮，適值寇難方殷，江上勝負未決，而全、永、衡且破。于時京師之勢，危如綴旒，上下皇皇，傳誦遷幸。臣得之目擊，枕恐六師以一朝而動，京社之事關係不細。采之公論，則謂寇禍起於儉壬之聚斂，而儉壬用事則主於董宋臣。至於遷幸一事，宋臣張皇處分，尤駭觀聽。事勢至此，死且無日，臣忠憤激發，叩閤上疏，乞以宋臣尸諸市曹，以謝生靈荼毒之苦。指陳觸忤，自分誅斥，出關待罪，不報，亟歸山林，側聽聖裁。臣章雖不付出施行，而竟亦不坐臣以罪；非惟免於罪而已，改命洪幕，從欲與祠，又寵綏之。臣嘗以爲區區父母之身，既委而殉國矣，陛下赦而不誅，臣之

再有此身，是陛下賜之也，感激奮發，常恨未有一日答天地之造。前冬誤辱收召，畀以館職，曾未幾時，進之以著庭，寵之以郎省。臣之取數於明時者，益以過多。共惟聖德日新，朝無闕事，臣得從事鉛槧，悉意科條，以無忘「靖共爾位」之訓，忱幸忱荷。茲者倏讀報狀，宋臣復授內省職事，臣驚歎累日，不遑寧處。繼傳御批洊兼職，且使之主管景獻太子府。臣備員講授，實維斯邸，此人者乃爲之提綱。當其覆出，臣自揆以義，且無面目以立朝，況可與之聯事乎！請命以去，臣之分也。然臣端居深念，託故而去，謂之潔身可也。陛下未嘗拒言者，言而當於可，陛下未嘗不行；臣不言而去，則於事陛下之道爲有未盡，是用不敢愛於言。伏惟陛下鑑臣之衷，而幸聽焉。臣伏讀國史，竊見孝宗皇帝所以待贊御者，終始之際，恩威甚明。臣嘗以爲自古人主，寬仁莫如孝宗，英斷亦莫如孝宗。方曾覲、龍大淵輩用事，周必大言之，龔茂良言之，劉度言之，鄭鑑、袁樞言之。言者日以盛，而孝宗假以恩寵，未嘗爲之少衰。孝宗豈拂諫者哉？聖心寬仁，未忍驟有所加也。比其招權弄勢，日益翕赫，小心謹畏之態昵昵於前者，迄不能掩其陰私傾險之迹，或以見疏死，或以坐罪廢。英斷如此，豈以寬仁而遂失之姑息哉！開國承家，小人勿用，聖子神孫，一守是法。共惟皇帝陛下以聰明操制萬幾，以神武經緯六合，四十年間，凡經幾大禍亂，幾大驚危，天綱地紘（二），重新整頓，功業逐日以新，聲名隨風而流。尚論聖德，三代以下之英主，未能或之先也。神明之下，侍御僕從罔匪正人，旦夕承弼厥辟，固其所也。惟是宋臣兇鷙慘毒，不可嚮邇。陛下曩以其小有才而假借之。小人不足大受，倚恃權勢，無所不至。戊午、己未間，天下指目，共欲甘心，臣冒死先爲陛下言之。陛下於此時猶有徘徊

顧惜之意，未即加罪也；而縉紳學校交疏其惡，伏闕投匭殆無虛日，陛下始豁然大悟，奪其太阿，屏置畿郡。中外鼓舞，歌誦盛德。臣妄謂陛下之寬仁全似孝宗，陛下之英斷亦全似孝宗。漢家自有制度，固應如是。詩云：「維其有之，是以似之。」雖然，陛下稟天地冲和之全氣，接帝王忠厚之上傳，寬仁英斷雖並行而不相悖，二者分數，寬仁較多，是以如此人者，遂得以生全於覆載之內。尋醫之旨未幾，朝請之命復下，今者又使之內居要地，日覲宸光。惟至聖爲能寬裕有容，有如此者。然臣嘗聞之，惟仁者能好人，能惡人。蓋仁則無私，無私故能好能惡，聖人豈專以博愛爲仁哉？漢唐宦官之禍，其後至於濫觴而不可救，推原其初，則起於時君一念之不忍。是故古人之防微杜漸，不敢忽也。《語》曰：「往者不可諫，來者猶可追。」宋臣前此誤國之罪，陛下既赦之而勿問矣，臣何敢追尤往事，上瀆聖聰？獨爲方來計，則縻緯之憂，不能忘情焉。夫以陛下聖明在上，孤雛腐鼠亦何敢晝舞夜號，少作喘息。其人心性殘忍，群不肖所宗，竊恐復用之後，勢燄肆張，植根既深，傳種益廣，末流之禍，莫知所屆。近者陛下親製十四規，丕哉聖謨，爲萬世計甚悉；有如此事，獨可以爲小故，無與於貽謀，而闊略之哉？宋臣之爲人，臣實疎遠，亦安能以盡知之？惟是天下之惡名萃諸其身，京國閭巷，無小無大，輒以「董閻羅」呼之。陛下之左右，使令亦衆矣，此名不歸之他人，而惟此一人是歸，則豈不召而自至也哉？陛下毋以其退然謹愿而謂其未必怙威生事也，毋以其甘言卑詞而謂人言爲已甚也。千金之家，強奴悍僕恣橫閭里，至其服役於主人之前，固亦未嘗不小廉曲謹而可信也。此事雖小，可以喻大。陛下儻察及此，則亦何愛於此一人，而闕惜英斷，以重違天下之心哉！伏望陛下稍

抑聖情，俯從公議，縱未忍論其平生之惡以寘之罪，亦宜收回成命，別選純謹者而改畀之。失一兵，得一兵，於國家事夫亦何損？于以厭人心之公，于以示來世之法，于以防天下之禍於未然，令聞令望，施于無疆，臣子之願，莫大於此。臣實何人，輒上封章以仰及於萬乘之所親信，蚍蜉撼木，自速齏粉，可謂愚甚。然臣方備位中朝，使其以厚祿糊口，坐取遷擢，豈不得計？而臣子所以事君，正義謂何？世道升降之大幾，國家利害之大故，奈何坐而視之，噤不發一語？上負天子，下負所學，貽無窮羞。此臣所以不敢強顏以留，亦不敢詭辭以去，忘其嬰鱗不測之危，以冀陛下萬一聽而信之。臣言得行，宗社之利也，臣之榮也。如臣之積忱未足以仰動天聽，坐受斧鉞，九隕無悔。謹杜門席藁，以聽威命之下。臣無任望闕瞻天激切屏營之至，不備。臣昧死百拜。《文山全集》卷三。又見《歷代名臣奏議》卷一八六。

〔二〕「天綱地」三字原脫，據《歷代名臣奏議》補。

輪對劄子

臣早以書生，遭遇先皇帝親擢，事先皇帝垂十年，恨無涓埃補報天地。陛下龍飛繼運，移忠以事聖明，永肩乃心，臨鑑在上。比者臣來自外藩，待罪戎監，陛下親御宸墨，進之經筵，臣學殖凋蕪，

循墻無路。自入侍氈厦，切見天顏粹穆，聖性謙虛。雖如草茅之愚，時賜訪問。臣感激殊遇，亦既得以悉數於前矣。猥當轉對，伏念臣職在講讀，今日聖學關天下治忽不細，輒因封事，畢吐其衷。臣聞聖人之作經也，本以該天下無窮之理，而常足以擬天下無窮之變。天地無倪，陰陽無始，人情無極，世故無涯，千萬世在後，聖人亦安能預窺逆觀，事事而計之，物物而察之？然後世興衰治亂之故，往往皆六經之所已有。凡六經垂監戒以爲不可者，小犯之則關安危，大犯之則決存亡，如赴水火之必斃，如食堇葛之必毒。是何哉？聖人知有理而已，合於理者昌，違於理者僵。所貴乎帝王之學，惟能不悖乎六經，無蹈乎其大戒而已。嗚呼，聖人所以爲萬世慮者豈不甚智，所以爲萬世戒者豈不甚仁矣哉！《書》曰：「民可近，不可下。予視天下愚夫愚婦，一能勝予。」而後世猶有以民爲黔首，以覆其宗，爲天下笑者。《書》曰：「內作色荒，外作禽荒。」《詩》曰：「亂匪降自天，生自婦人。」而後世猶有昭陽、華清、霓裳羽衣，以階漁陽之禍者。《書》曰：「謹乃儉德，惟懷永圖。」又曰：「不作無益害有益，不貴異物賤用物。」而後世猶有葡萄天馬、甲帳翠被，以致四海蕭然者。臣嘗歎夫自聖經以來，時君不聞大道之要，生人不被至治之澤。秦至五季千數百年間，犯六經之顯戒者相望史冊。聖人立爲大經大法，以幸萬世，藐然未有聞焉，豈不惜哉！惟皇上帝畀矜斯文，孔孟微言至我朝周、程、張、朱始大闡明，如濛斯發。先皇帝表章四書，尊禮儒先，爲往聖繼絕學，爲萬世開太平。穆考之廟，稱爲理宗，陛下親得精一之傳，而日就月將，緝熙于光明，斯道斯民，解后千載。先皇帝欲爲唐虞三代之治，殆留與陛下使了此事。臣觀陛下自踐祚以來，畏天尊祖，親親仁民，敬大臣，體群

臣，尊其所聞，行其所知，何往非學？今朝廷清明，官府齊一，大法小廉，罔越厥志，不可謂不治矣；然臣切怪去年寒燠失常，四方或以旱告，今年星文示變，雨雹見妖，近者積陰爲寒，皆名咎證。漢人縱閉之學，必謂一證主事，臣不能曉此，但即其影而想其形，因其流而疑其源，豈人所不知，己所獨知之也，陛下猶有當反之六經者乎？陛下日御經筵，正道正言嘗接于耳，而又內庭不廢觀書。傳曰「多識前言往行，以蓄其德」，陛下蓋有之矣。臣愚更願陛下虚心體認，切己省察。每誦一義善，可以爲法，即驗之身，曰吾嘗有是乎？無則勉之。每說一事惡，可以爲監，即揣之心，曰吾嘗有是乎？有則改之。言則慮其所終，行則稽其所敝。豈惟制治于未亂，保邦于未危，充道學之用，經綸天下之大經，範圍天地之化而不過。行而帝，行而王，以卒先帝主張道統之事業，臣何幸身親見之哉！

《書》曰：「兢兢業業，一日二日萬幾。」夫一日二日之間，亦未至即有萬事，然一事不謹，則萬事之幾，自此而兆。故撥亂本，塞禍源，無一息不當用功，兢兢業業，所謂必有事焉者也。惟陛下留神。

乞斬呂師孟疏

臣既以驅馳之概熟數於前矣，惟國勢岌岌若不能以一朝居也，而中外疏附奔奏御侮之臣曾無固志，內則先警而遁，外則望風而降，若飲鳩藉蛟，前後相繼者何也？三老董公遮說漢王曰：「順德者

昌，逆德者亡。名其爲賊，敵乃可服。」未有含糊混并，忠邪不辨，逆順不分，而可以號召豪傑，自立於不拔之地者也。襄陽之役，虎不進，煥賣降。使元奸一日慨然聽有司論其罪，天地神人憤嫉以舒，雖有兇猾，誰敢輒生報怨？而元奸意氣彫喪，不能聲罪致討，以大明天冠地履不易之分，與天下英雄共謀之，遂使疆場之臣，獻幣授誠，甘心非類，而不恥分噬肆螫，鳴吠其主，習以爲然，皆名義不立，無以服其心故也。傳曰：前車覆，後車戒。更化以來，其必有以大畏民志而後可。今也叛逆之家接迹相望，曾無一人伏其辜。而呂師孟，力而拘諸原者，不以獻俘釁鼓，徇示三軍，以作興戰士之氣，方且并包兼容，示以不殺，意在羈縻，一切覆護。誰謂與之共活宇宙，大可以爲國，小可以爲家乎？此萬萬必無之理也。臣以爲順德之臣，仗節死義，不盡見之褒異，則必無以激昂忠臣孝子之志；逆德之賊，干犯反常，不盡見之誅夷，則必無以懾服亂臣賊子之心。《春秋》作而亂臣賊子懼，孔子無王者之位，褒貶寄之空言，猶足以遏禍亂，正人心。堂堂天朝，一日赫然改紀，其政刑黜直賞罰，不爲偏私，忠節必旌，凶孽必戮，然後人極可以復立，正統可以復扶。有功不賞，有罪不誅，雖堯舜不能治天下。惟陛下與二三大臣亟圖之！臣不勝拳拳。《歷代名臣奏議》卷一八六。

論宜分天下爲四鎮奏

德祐中

臣本起書生，天性愚戇。遭逢理宗皇帝以直言取人，臣區區芹曝小忠，誤蒙親擢。間於憂虞，則

開慶透渡之禍急矣。臣推見當時致禍之人，上書闕庭，乞磔狐鼠以謝天下。理祖皇明赫赫，自咸淳至于今日，無疆惟休。自時厥後，臣之蹤跡，或百日于朝，或一月斥去，有言不信，忠憤徒深，則皆元奸專國之歲月也。不圖今日，臣以憂患之身，奉詔入衛，太皇太后陛下、皇帝陛下以神明御極，炎德當天，宵旰顧憂，不以臣爲不肖，授之以三路制撫職事，兼贊督府，就戍吳門。臣非不知國家阽危，民命如綴，朝命夕道，爲國效死，復以私門憂戚，展轉陳情，乞歸終制。章五六上，冀兩全之節，以不爲盛代名教羞。天聽高高，終不聽許。而學士大夫交口責臣，謂有國家有朝廷有州縣，然後臣得以有其身，得盡爲人子之職。臣所以感泣，誓死而不敢復言去也。今當陛辭，即日就道，慟哭流涕，何以爲陛下告！自古立國，一是以人心爲本。齊一日喪七十餘城，以人心失也；田單一日復七十餘城，以人心固也。元奸得罪於天下，天下怨憤鬱抑，十有五年，遂使諸將解體，強吾民北面而役之。彼知歸怨元奸，未嘗歸過朝廷也。乃今三百餘年，祖宗涵育之遺黎，無辜荼毒於敵人之手，謳吟思漢，日俟王師。所在義民抗敵者，大或數萬，小亦數千，此撥亂反正之大機括也。然人心易得，其失亦易。頃者朝廷弛公田，蠲常賦，寬商禁，起謫籍之淹滯，解科舉之靡文，天下誦之，以爲快活條貫，人心頓蘇，敵勢頓沮，我是以有獨松關諸屯之捷。通國上下，以爲元奸失人心之事已盡洗濯，今日收人心之具已盡舉行。而臣恤緯之忠，獨以爲未也。草間豪傑，方且量朝廷之意嚮；邊頭諸將，方且視廟堂之指授；學校之聚議遊談，閭閻之道聽塗說，方且劑執政之然否，追行事之得失。於《傳》有之：得國常於斯。今上自宮闈與嗣皇起居，下自政府與公卿百執事，必人人一心，以殄此患爲主，則諸將莫

不用命，英雄莫不歸心。以此衆戰，孰能禦之？以此攻城，何城不克？如大臣有避嫌遠疑之迹，而無推車必行之心，群公持便安自營之私，而無同舟共濟之志，宮中與府中不相聞，閩內與閩外不相應，賞罰混淆，正邪貿亂，姑息牽制之意多，奮發斷制之義少。敵人以此輕中國，奸雄以此覘朝廷，人心之憤悻者日以怠，公論之激昂者日以靡，而我之人民將有甘心於敵人之庭而不悔者矣，其禍可勝言哉！裴度有言：「承宗斂手削地，韓弘興疾討賊，豈朝廷之力能制其死命哉！由處置得宜，能服其心耳。」國家懲五季之亂，削除藩鎮，創建郡邑，一時雖足以矯尾大之弊，國勢浸弱，亦坐於此。是以敵至一州則陷一州，敵至一縣則陷一縣，中原陸沈，痛不可追。今不幸長江失險，戎馬馳於近郊。救時之危，須稍更革。《詩》云：「溁彼涇舟，烝徒楫之。」又傳云：大樹將顛，非一繩所維。臣嘗妄謂今日大勢，宜分天下爲四鎮，而都督統御於中。以廣西益湖南而闔於長沙，以廣東益江西而闔於豫章，以福建益江東而闔於番陽，以淮西益淮東而闔於維揚。責長沙以取荆鄂，責豫章以取蘄黃，責番陽以取江東六郡，責維揚以取兩淮諸城。使各闔地大力衆，足以抗敵，分所任事，約日齊奮，而都督府指授諸將，隨地接應，有進無退，日夜以圖之。敵備多而力分，疲於奔命，而吾遺民必有豪傑伺間橫擊於其中，如是則使彼隻輪不返，進而問罪，河南盡爲晉可也，而何日蹙國百里之憂？臣願睿慈下臣此章，見之施行，使內而朝廷舉措有以當天下之心，外而邊閩布置有以合天下之勢，則臣得以督幕分司，盡瘁一面，布宣威靈，勉效尺寸，不惟得以忠先帝、報陛下，而臣亦有詞以白丘墓，雖死之日，猶生之年也。《歷代名臣奏議》卷一〇一。

門謝表

臣某言：伏準省劄，五月二十八日三省同奉聖旨，文天祥添差簽書寧海軍節度判官廳公事，仍釐務。臣以賜第之初，未經門謝，未敢祇拜劄命，申乞指揮。續準省札，七月十一日三省同奉聖旨，令朝謝訖之任。臣謹遵奉旨揮，詣闕庭朝謝者。御大廷而發策，式廣旁招；奉清問以據忠，誤承親擢。尚阻紫宸之謝，遽叨黃紙之除，曠世遭逢，瞻天感激！中謝（一）。臣切以寶興下詔，同天地宗祀之彝；科舉取人，代造化爵賢之柄。豈曰利人才之進取，其間實天道之流行。肆萬乘之臨軒，受諸侯之貢士。占小善者率以錄，咸造在廷；取一人焉拔其尤，必有名世。豈應庸瑣，可在蒐羅？臣稟質既凡，聞道猶淺。才非洛陽之年少，偶玷薦書；學非廣川之大儒，遽塵舉首。自叨異數，亦既三年。回思臚唱之蒙恩，莫與鳧趨而奉表。有懷就日，無路牋天。方徬徨於丘園，乃寵綏其祿秩。輒請展爲臣之禮，幸許脩詣闕之恭。茲蓋伏遇皇帝陛下德體《乾》行，道符《恒》久（二）。世更三紀，遠追成周式化之風；歲啓後庚，近接藝祖開基之運。凡際風雲之會，咸依日月之光。遂令一介之姓名，亦被九重之記錄。臣敢不誓堅素守，勉企前修！自揆讀書，非爲平生溫飽之計（三）；願言竭節，用副上心忠孝之期。臣無任瞻天望聖、激切屏營之至，謹奉表陳謝以聞。《文山全集》卷四。又見《宋寶祐四年登科

〔一〕中謝：原無，據韓本、張本、鄢本補。以下各篇「中謝」、「中賀」、「中慰」等均同。

〔二〕恒：原作「常」，據《宋歷科狀元錄》改。按此「恒」指《周易》之《恒》卦，與上句「乾行」之《乾》相對。《恒》卦《彖辭》云「恒，久也」，是也。作「常」乃是避諱改字，今回改。

〔三〕平生：庫本、《宋寶祐四年登科錄》作「晉生」。

湖南提刑到任謝皇帝表

帝庭敷命，昭闢四門；天牧播刑，誤頒一節。申以遄驅之旨，疇茲已試之庸。周隰載馳，漢條具布。中謝。伏念臣本無他技，惟有孤忠。兩朝特達之知，洊塵清要；十載行藏之跡，祇自悔尤。雲雷之義方屯，天地之心已復。當元日達聰之始，在皇華遣使之中。聖恩靡許於祝釐，臣職敢稽於行道？瞻蓋高而下耳，冀用譽於折肱。茲蓋恭遇皇帝陛下道協重華，仁周四表。崇德廣業，合乾轉坤翕之功；折獄致刑，得震動離明之用。遂令承乏，復忝司平。臣敢不祇若咨詢，對揚欽恤。陳時臬事，尚弘康乂之圖；受王嘉師，永迪明清之訓。《文山全集》卷四。

謝皇太后表

司平楚甸，命出嚴宸；告至周原，恩歸慈極。敢敷睿訓，仰謝徽音。中謝。伏念臣一介寒微，兩朝知遇。傾葵向闕，初無補於使令；啜菽杜門，祇自深於觀省。當元日會同之始，拜公朝扞拭之仁，言遣使臣，往陳臬事。華省遄頒於趣旨，叢祠竟秘於俞音。勉臣子之驅馳，見吏民而宣布。茲蓋恭遇壽和聖福皇太后陛下，心起有極，道合無疆。長信怡愉，贊炎圖之昌運；大任肅穆，開蒼籙之隆平。宜擇攸司，俾敬爾獄。臣敢不丕承欽恤，誕布慈仁。父我黎民，尚想無刑之治；于其王母，敢忘介福之元。《文山全集》卷四。

謝皇后牋

君子審官，道隆儷極；皇華遣使，命出治朝。德意具宣，忱辭告至。中謝。伏念臣疎庸一介，遭遇兩朝。早綴班行，嘗忝金科之屬；繼乘使傳，復塵繡指之行。曲成每戴於釐明，退食難逃於吏議。不圖元會，復錫恩言，扞拭起家，往陳時臬。驅馳在道，寅奉天威；泣止攸司，欽哉乃職。茲蓋伏遇皇后殿下德侔坤地，位正家人。《關雎》之化既行用之天下，象魏之法使布正自王宮。爰取踐更，載

叨詳讞。臣敢不靈承欽恤，祇若平反。無刑以父黎民，誕敷聖化；式敬以長王國，永誦徽音。《文山全集》卷四。

皇太子生日賀皇帝表

大夏長嬴，坤二爻之紀季；千秋似續，震一索之揆初。瑞彩緣車，歡顏丹宸。中賀。恭惟皇帝陛下德流芑水，業茂蘿圖。壽富多男，積善必有餘慶；本支百世，命吉在厥初生。記甲觀之瑞分，占乙禡之祚遠。臣縻身軫墊，戴日心星。誦億子之宜君，首歌周《雅》；祝萬年之爲父，更續唐詩。《文山全集》卷四。

賀皇太后表

福于王母，際南面之昌期；天以神孫，娛東朝之永日。書堂瑞節，長樂歡聲。中賀。恭惟壽和聖福皇太后性蘊冲和，仁培靜壽。《思齊》所以聖也，以御于邦；《螽斯》宜爾孫兮，克開厥後。皇皇穆穆，繼繼承承。臣迹滯騏原，心馳鳳闕。本支百世，播《綿昫》之聲詩；怡愉萬年，衍含飴之福慶。《文山全集》卷四。

賀皇后牋

坤后廣生，式協二爻之月；震男揆度，載逢一索之期。慶衍蘿圖，喜充椒掖。中賀。恭惟皇后殿下道柔配地，德厚承天。以御于家，爲今京室之婦；則樂有子，如古《周南》之風。百世本支，萬年福祿。臣迹縻牲轡，心賀燕謀。占《斯干》之詩，已符吉夢；美《思齊》之德，益嗣徽音。《文山全集》卷四。

皇子進封左衛上將軍嘉國公賀皇帝表

乾父垂仁，茂積蘿圖之慶；震男鍾美，肇基茅土之邦。百世可知，四方來賀。中賀。洪惟昭代，爰立親親；粵有舊章，禮優貴貴。昉祥符之七載，侈慶國之初封。綺仗分班，瑑珪疏寵。庸表人倫之厚，遙觀王室之彊。式于今休，監于成憲。恭惟皇帝陛下福培周厚，和緝堯雍。寶曆無疆，方萬年而受祜；金枝有煒，期億子以宜君。錫以嘉名，渙其大號。地營東井，詔爵五之最穹；天拱北辰，炳心三之相照。克昌厥後，長發其祥。臣有蹇牡駢，阻隨虎拜。祉歌子施，遙陳《皇矣》之詩；道盡君嚴，願贊《家人》之易。《文山全集》卷四。

賀皇太后表

東朝保艾，方隆堯母之仁；西國分茅，式篤文孫之慶。兩宮喜色，萬宇歡聲。中賀。恭惟壽和聖福皇太后陛下德厚慈元，神怡長樂。尊之至也，上承視膳之勤；宜爾繩兮，下適含飴之趣。瑤池日永，玉葉春濃。臣遠被繡衣，踰瞻綵仗。于其王母，知介壽之來崇；佑我後人，願丕圖之有衍。《文

山全集》卷四。

賀皇后牋

坤稱乎母，儼家服於椒塗；震索而男，赫龍光於茅土。長秋喜色，方夏歡聲。中賀。恭惟皇后殿下含弘承天，博厚配地。祥鍾《長發》，熾商後於有娥；音繼《思齊》，培文昭於大妣。圭瑒焜煌於綺仗，芾朱輝映於禕衣。臣遠驟華原，踰瞻藥殿。想宜君之穆穆，茂對王休；侈多子之繩繩，載歸后美。《文山全集》卷四。

皇女進封同壽公主賀皇帝表

乾見大人，道夙隆於乾體；巽爲長女，命爰寵於巽申。喜溢宮庭，歡騰海宇。中賀。竊惟興君之際，必有積善之餘。播在正風，則曰王姬之美；陳于《小雅》，是爲女子之祥。無非歌福祿之同，于以表國家之盛。恭惟皇帝陛下和順而理，溫柔以容，苞體深仁，既茂綿瓜之颺〔一〕；岡陵厚積，復培穠李之華。始封爰遴於嘉名，遐祉永齊於聖壽。臣跡縻使事，身隔賀班。親愛如家，遙贊人倫之厚；肅雍迪教，適觀王道之成。《文山全集》卷四。

〔一〕茂：原作「歲」，據庫本改。

賀皇太后表

周家福祿，積由任姒之仁；堯母聖神，親覩娥英之慶。宮闈盛典，海宇歡聲。中賀。恭惟壽和聖福皇太后陛下南極景光，東朝綦貴。有功寶祚，既開聖子之傳；流澤銀潢，爰毓天孫之瑞。贊初封於沁水，同上壽於瑤池。臣遠玷皇華，踰瞻長樂。怡愉太后，諒承婉婉之娛；雍肅王姬，益表儉慈之

教。《文山全集》卷四。

賀皇后牋

坤萬物之資生，實蕃慶積；巽一索之謂長，昉對命申。喜氣宮闈，歡聲海宇。中賀。恭惟皇后殿下，《關雎》孝敬，《芣苢》和平。灼灼宜家，夙範華桃之懿；雍雍成德，茂鍾穠李之英。賁然錫沁水之封，展也同長秋之壽。臣遠縻苞杞，遙睇塗椒。風以《周南》，仰化原之洵美；觀于堯女，願母道之浚明。《文山全集》卷四。

全宋文卷八三〇〇

文天祥 三

知贛州到任謝皇帝表

九重選牧，錫類天寬；千里承流，奉親地近。昉共侯度，丕戴王休。中謝。伏念臣某才本空疎，分安孤苦。身逢盛代，夙自厲於丹心；家有重親，晚相依於白髮。頃叨漢傳，往即楚封。何敬非刑，粗殫審克；不遑將母，私切懷歸。嘗懇懇以陳情，冀高高之欲從。適蒙異渥，特畀近麾。繼盼旨以趣征，已鞠躬而祇上。祿及一門之微賤，恩同大造之生成。茲蓋伏遇皇帝陛下以堯舜之資，行曾閔之道。嗣寧王之大曆，愆我成功；奉太后之萬年，與天齊壽。遂使忝求芻之寄，亦獲共啜菽之歡。臣敢不老老及人，親親爲政。由家達國，期興遂以興仁；以子移臣，寓爲忠於爲孝。《文山全集》卷四。

謝皇太后表

東朝鴻慶，介壽無疆；南國虎符，便親有命。荷中宸之渙寵，望慈極以皈忱。中謝。伏念臣一介迂疎，兩朝遭遇。昔備殫於敷歷，無以逾人；頃間任於驅馳，不遑將母。惟內懷於烏哺，遂上徹於蟻忱。果分二水之麾，爰易三湘之節。惟壤地接，故可以供菽水之職；惟土風習，故可以盡芻牧之心。自省叨踰，若爲報稱。茲蓋恭遇壽和聖福皇太后陛下德光堯母，功配周姜。壽錫萬年，享怡愉之福；化流四海，推慈孝之仁。遂令下吏之僥榮，獲以邇封而就養。臣敢不祇承德意，誕布恩言。服膺錫類之詩，益崇美化；拜手牧民之訓，踰贊徽音。《文山全集》卷四。

謝皇后牋

慈極承天，恩深錫類；廉車易地，職重分符。布聖德之中和，便親闈之溫清。中謝。伏念臣起繇孤遠，積有迂疎。骯髒半生，於事君而何補；驅馳近歲，以將母而未能。屬爲養以陳情，荷畀矜而從欲。三湘納節，二水授麾。回刺史之車，庶乎爲子；捧郡守之檄，專以爲親。僥冒實多，糜捐曷稱！茲蓋恭遇皇后殿下道隆坤厚，德配乾仁。《大雅·思齊》，媚周姜而穆穆；長秋備禮，奉漢母以愉愉。

遂令疎遠之微臣，亦效旨甘於便壘。臣敢不恪恭侯度，茂對王休。崇《關雎》、《卷耳》之風，迪惟懿則；篤《南陔》、《白華》之行，施及遐萌。《文山全集》卷四。

壽崇節本州賀皇帝表

天子有親，備四海九州之奉；封人祝聖，同萬年億載之期。凡屬照臨，舉同呼舞。中賀。恭惟皇帝陛下剛建中正，緝熙光明。燭六合而耀八紘，功參天地；躋三皇而軼五帝，道御家邦。紹巍巍蕩蕩之勳，盡尊尊親親之養。怡愉誕節，光大前聞。臣獲布寬條，幸逢盛際。鴈鸞阻綴，莫旅賀於東朝；螻蟻傾忱，惟仰瞻於南極。《文山全集》卷四。

賀皇太后表

於萬斯年，慈宸有慶；誕彌厥月，祖佛同生。旒冕敬共，縉紳舞蹈。中賀。恭惟壽和聖福皇太后陛下道超太始，德厚重坤。《關雎》周南之風，夙陶美化；《思齊》文王之母，懋著徽音。衫衣初奏於薰弦，宮珮畢朝於慈宸。親下袞龍之拜，載揚韶鳳之音。呼萬歲者三，歡騰朝野；等百世而上，福衍子孫。臣叨守魚符，莫陪鴛序。我百而爾九十，諒喜溢於舉觴；心一而臣三千，第神馳於拱極。

《文山全集》卷四。

賀皇后牋

太妣之嗣太任，星重慈極；長秋之朝長樂，天介壽祺。流慶九霄，比隆千古。中賀。恭惟皇后殿下明章德範，陶冶化風。大練厚繒，訓四方之節儉；宵衣旰食，侑五位之勤勞。肖似徽音，婉愉誕序；厚符坤地，吉萃家人。臣逖守遐邦，忻逢華旦。仰瞻帝闕，莫陪《振鷺》之班；下與邦民，同被《關雎》之化。《文山全集》卷四。

壽崇節兵馬鈐轄司賀皇帝表

天子盡敬事親，丕昭瑞節；臣下歸美報上，同祝修齡。覆載兩朝，頌歌四洽。中賀。恭惟皇帝陛下克勤克儉，無怠無荒。堯以是傳，道莫高於虞舜；文所以聖，德益顯於大任。有開麗水之祥，適際瑤池之會。臣屬縻戎鍵，阻綴班聯。北面而朝，恍天威之尺五；南山之壽，效臣子之呼三。《文山全集》卷四。

賀皇太后表

金闕日長，尊處宸闈之極；玉卮春滿，誕膺法駕之朝。凡在式園，率均擊壤。中賀。恭惟壽和聖福皇太后陛下，心遊恬淡，德著慈仁。隆周、召之風，人倫既正；養黃、老之性，母道獨尊。皇穹申方至之休，壽命衍無疆之筭。臣猥分郡組，共貳戎韜。迹遠觚稜，帷幄踰瞻於長樂；忱同葵藿，笙璫第想於承華。《文山全集》卷四。

賀皇后牋

坐於少廣，慶慈極之誕彌；朝于寢門，助聖人之教愛。宮庭溢喜，宇宙同和。中賀。恭惟皇后殿下，瑞應倪天，光昭遡日。正始基化，歌二《南》芣苢之詩；視膳問安，備六寢禕褕之禮。協朱明之律呂，鏘綵仗之珮環。驩奉玉卮，禮同黼宸。臣濫紆州紱，通領兵符。聆舜樂之九成，遙瞻南面；效堯階之三祝，竊比華封。《文山全集》卷四。

乾會節本州賀皇帝表

一人天拱，適符龍御之亨；萬國雲從，共慶虹流之瑞。系隆宗社，福被寰瀛。中賀。恭惟皇帝陛下曰睿曰聰，乃文乃武。金甌有永，紹寧人大寶之休；翠蹕早朝，娛太后萬年之壽。當嵩呼之華旦，繼夢月之佳辰。兩宮同時，千載盛事。臣猥叨分竹，彌切傾葵。奉玉卮之恭，阻綴班於北闕；通銀臺之奏，但申頌於西崑。《文山全集》卷四。

賀皇太后表

六龍御極，增光《長發》之詩；萬國同心，推本《思齊》之聖。驩騰宮壺，和塞堪輿。中賀。恭惟壽和聖福皇太后陛下曰希曰夷，爰清爰靜。以天下養，備百祿之熾昌；與元氣游，葆六根之純粹。海內樂唐虞之化，宮中頌任姒之音。臣叨預承流，遙伸歸美。冬溫夏清，禮嚴東面之朝；日升月常，福等南山之祝。《文山全集》卷四。

賀皇后牋

黼宸端臨，交上華封之祝；椒塗內助，仰承京室之規。喜溢六宮，和薰八表。中賀。恭惟皇后殿下靜專成性，徽懿秉姿。珥簪進庭燎之箴，雞鳴有度；弓韉奉高禩之祀，燕翼發祥。際上帝生商之辰，懋塗山興夏之德。仰占七政，日月並明；俯鑑四方，岡陵齊壽。臣分符江右，化被周南。首贊乾亨，體天行之不息；更祈坤載，協地道之無疆。《文山全集》卷四。

乾會節鈐司賀皇帝表

龍首席物，覩天德之照臨；虎拜萬年，對王休而蹈厲。堪輿協氣，海宇頌聲。中賀。恭惟皇帝陛下神聖整齊，武文經緯。諸福畢至，一登再登三登；我武維揚，五伐六伐七伐。虹渚載臨於盛旦，鳳音遙想於明庭。臣通領鈐符，恪共官次。葵傾觀闕，阻陪就日之班；花覆簪紳，隄謝需雲之宴。《文

賀皇太后表

天下傳歸於子，降寶冊之鴻名；聖人教愛以親，上玉卮之曼壽。非常之慶，嘉頌攸同。中賀。恭惟壽和聖福皇太后陛下冲澹頤神，儉慈孚化。輔佐先帝，夙殫《卷耳》之勤；愉佚東朝，允著《思齊》之聖。昉前殿紀誕彌之旦，正羣方傾就望之忱。肆膺鳳輦之朝，親下龍綃之拜。臣屬縻戎鍵，阻綴班行。現五色之雲，知獻占於太史；舞兩階之羽，諒增喜於慈顏。《文山全集》卷四。

賀皇后牋

上萬歲之壽，咸頌聖人；形四方之風，實基王化。凡居持載，罔不驩呼。中賀。恭惟皇后殿下生稟靜柔，安行雍肅。躬河洲采苻之潔，列聖顧歆；翼寢門視膳之恭，慈顏和懌。合坤其順，遡日而明。欣聆嵩嶽之呼，並受華封之祝。臣俯共武服，仰贊壽觴。星之遠，天之高，陛莫瞻於九級；漢之廣，江之永，詩但誦於二《南》。《文山全集》卷四。

皇子賜名本州賀皇帝表

家有嚴君，托中興之昌曆；天以聖子，作大國之宗藩。喜溢宮闈，慶關宗社。中賀。恭惟皇帝陛下懋昭聖德，厚正人倫。保天命以宜君，四方無侮；貽孫謀而翼子，百世可知。爰錫嘉名，載敷大號。敬哉有土，肇基二水之邦；格于皇天，式應三星之曜。俾耆而艾，長發其祥。臣縻跡侯方，傾心魏闕。監王成憲，願垂謨烈之休；啓我後人，益壯本支之盛。《文山全集》卷四。

賀皇太后表

東朝介福，式彰母道之尊；南國分封，庸迪孫謀之吉。兩宮交慶，百世彌昌。中賀。恭惟壽和聖福皇太后陛下長樂怡愉，大庭游衍。養以天下，日永瑤池；正于家人，春生玉葉。贊苴茅於浯水，壯綿瓞於宗藩。臣逃在侯方，阻瞻宸仗。《思齊》所以聖，遙頌徽音；《皇矣》莫若周，益隆世德。《文

賀皇后牋

母資坤德之生，椒塗襲慶；男正《家人》之吉，茅土分封。宗社延洪，宮闈闡懌。中賀。恭惟皇后殿下承天光大，法地靜專。成美化於《周南》，言能逮下；嗣徽音於京室，于以御家。屬聖子之勝衣，贊嚴君之錫爵。臣遠縻外服，阻造內班。正風俗以厚倫，永歌后德；輔皇王之維辟，丕俟孫謀。

《文山全集》卷四。

皇子賜名鈐司賀皇帝表

天佑我家，篤生聖嗣；國有鉅典，肇建宗藩。社稷靈長，神人孚洽。中賀。恭惟皇帝陛下禮行貴，愛立親親。撫寶曆之昌期，萬年福祿；演銀潢之慶澤，百世本支。爰重燕謀，載頒鴻號。于疆于理，地營涪水之邦；有翼有馮，星拱周廬之衛。克開厥後，俾熾而昌。臣遠繫戎韜，愉瞻文石。施于帝祉，德已動於監觀；保我後生，命更歌於壽考。《文山全集》卷四。

賀皇太后表

堯母怡愉，介于景福；湯孫岐嶷，錫以嘉名。慶衍宗枋，歡隆慈極。中賀。恭惟壽和聖福皇太后陛下爰清爰靜，曰希曰夷。佐先帝之中興，雞鳴有度；膺嗣王之孝養，燕翼成謀。爰鍾受於綠車，乃分符於赤社。臣恪恭武服，阻造王庭。以御于家，喻贊《思齊》之德；克開厥後，佇成皇武之功。

《文山全集》卷四。

賀皇后牋

坤稱乎母，作德配天；震索而男，建邦有土。慶成宗社，喜溢宮庭。中賀。恭惟皇后殿下《芣苢》和平，《關雎》孝敬。嗣母徽於京室，在廟在宮；明子道於家人，正內正外。歡動勝衣之拜，光昭燾社之封。臣共武有嚴，稱班云逖。風以《周南》之化，喻贊螽斯；烝哉豐水之謀，適觀燕翼。

《文山全集》卷四。

皇帝登寶位本州賀皇帝表

天作之君，表冠倫之大聖；父傳於子，昭立嫡之至公。曆數維新，神人胥慶。中賀。恭惟皇帝陛下以周元子，爲舜重華。大德生知，聰明以臨，齊莊以敬；一人有慶，進退可度，容止可觀。積累厚而孫謀深，謳歌同而神器定。無爲而治，有道之長。臣叨領虎符，隄瞻龍御。建皇極而王天下，幸際昌期；開明堂而朝群臣，聳觀初政。《文山全集》卷四。

賀太皇太后表

肇聖德之龍飛，運開昌曆；垂孫謀之燕翼，功出慈宸。九廟尊安，八紘抃蹈。中賀。恭惟壽和聖福太皇太后陛下道光任姒，行邁塗莘。範肅東朝，性適含飴之樂；規重南面，養親視膳之榮。光昭嫡統之傳，丕衍皇家之慶。臣叨紆守紱，阻筵賀班。頌皇帝之萬年，永言齊壽；佑寧人之大歷，尚克圖功。《文山全集》卷四。

賀皇太后表

震出麗天，重明繼序；坤稱正位，一統蒙休。基祚斯皇，幅員胥慶。中賀。恭惟皇太后陛下輔佐先帝，憂勤王家。思媚周姜，履肅雍於京室；訓貽禹子，服勤勞於塗山。瑞昭南面之符，光疊東朝之矩。臣屬縻侯服，踰企慈帷。嫡統無疆，已慶大橫之兆；嗣徽有秩，尚稽《小毖》之謀。《文山全集》卷四。

皇帝登寶位鈐司賀皇帝表

乘時御極，宣日月之重光；居嫡宅尊，大《春秋》之一統。幅員愛戴，宗社安強。中賀。恭惟皇帝陛下仁孝生知，聰明時乂。踐寧王之丕祚，大歷維新；奉文母之徽音，皇天有慶。宜首正飛龍之御，以上承翼燕之貽。無疆維休，有相之道。臣濫巾戎轄，阻筵朝班。五百歲而生，幸親見聖；萬億年其永，不替惟王。《文山全集》卷四。

賀太皇太后表

兆協大橫，運在當命之聖；謀貽《小毖》，功歸太上之慈。嫡統延洪，皇圖鞏固。中賀。恭惟壽和聖福太皇太后陛下躬基美化，教闡徽音。彤管光華，配豐功於祖烈；練衣朴素，示懿訓於孫謀。聿新歷服之傳，式副簾帷之託。臣司戎共貳，望闕呼三。庶民近天子光，忻逢昌曆；太極爲元氣母，永迪初基。《文山全集》卷四。

賀皇太后表

震主宅尊，光紹寧王之命；坤元居正，適彰太妣之音。一統親傳，萬邦胥慶。中賀。恭惟皇太后陛下功侔持載，德備含弘。風化二《南》，衍傳家之忠厚；本支百世，肇繼序之聖明。大《春秋》正嫡之書，應日月重光之運。臣屬兼鈐紱，阻造軒帷。在天利見大人，已孚文命；介福于其王母，長詠《思齊》。《文山全集》卷四。

謝皇帝登極赦文表

日月重離，開國家之休運；雷雨作解，溥天地之至仁。萬邦咸休，一人有慶。中賀。恭惟皇帝陛下堯文光宅，舜德出寧。神聖爲君，丕受皇天之命；《春秋》立嫡，聿昭正統之宗。爰肆旨於端門，示湛恩於熙代。臣猥分銅虎，隄企金雞。大人繼照四方，聳觀初政；皇極敷錫五福，第奉寬書。《文

山全集》卷四。

太皇太后加尊號本州賀皇帝表

御丕圖於南面，順應天人；崇徽冊於東朝，重增宗社。億年縟典，萬國懽心。中賀。恭惟皇帝陛下皇極之宗，人倫之至。性同符於堯舜，達孝升聞；訓一本於姜任，徽音有秩。紹寧王之明命，彰祖后之尊稱。臣分牧有嚴，承休胥抃。介福于王母，難名太上之功；肖德以神孫，願共無疆之號。《文

山全集》卷四。

賀太皇太后表

鴻名揚厲，用彰重慶之尊；龍宸繼承，懋舉盡倫之制。明廷孚號，寰宇傾心。中賀。恭惟壽和聖福太皇太后陛下德備儉慈，教脩愛敬。佐我烈祖，成《天保》之憂勤；訓于神孫，示《思齊》之雍肅。粹美翟禕之服，增華琬琰之章。臣屬守銅符，欣傳寶冊。同御延和之殿，誕頌前猷；尊居慈福之宮，永言至養。《文山全集》卷四。

賀皇太后表

統繼堯天，重華協德；位隆文母，太姒嗣音。寰宇休明，內庭肅穆。中賀。恭惟皇太后陛下行高配地，功大補天。輔先帝以重光，憂勤夙至；肇嗣王之丕緒，福祿方來。奉寶冊於重闈，壽皇圖於覆載。臣屬縻郡紱，阻簞廷紳。咸曰太皇，已慶元和之壽；願言帝母，永肩長樂之名。《文山全集》卷四。

太皇太后加尊號鈐司賀皇帝表

皇圖嗣慶，著母道於重坤；鉅冊稱尊，告王庭而大渙。宮闈增重，宗社蒙休。中賀。恭惟皇帝陛下德爲聖人，孝治天下。侍宣仁之聽斷，元祐同符；稟慈福之起居，紹熙儷美。播無爲之懿號，隆太上之徽音。臣猥介戎鈐，聳觀國典。思齊文母，既彰有德之雍雍；於赫湯孫，願共厥聲之穆穆。《文

山全集》卷四。

賀太皇太后表

離日方升，光傳國寶；坤元重慶，肇建鴻名。福萃三宮，歡騰八表。中賀。恭惟壽和聖福太皇太后陛下佐佑皇祖，怡愉東朝。德配姜、任，植丕基於蒼籙；功高馬、鄧，扶洪業於炎圖。宜效美於《思齊》，大歸尊於長樂。臣偶叨戎轄，阻綴朝班。丕哉烈，丕哉謨，共僉嗣王之政；得其名，得其壽，載揚太上之休。《文山全集》卷四。

賀皇太后表

晉大號於慈闈，位隆長樂；紹丕基於萬世，慶本慈元。命肅治朝，禮行廣內。中賀。恭惟皇太后陛下，頤神冲澹，履行靜專。美紹《思齊》，宜毓文王之聖；訓垂訪落，實開成后之謀。贊重慶於御簾，推有尊於臨制。臣猥分戎轄，隃聽恩綸。望少廣之宸居，莫班獸舞；頌長秋之壽曆，同播鴻名。《文

山全集》卷四。

皇太后加尊號本州賀皇帝表

嗣王受此丕基，光膺明命；文母介以繁祉，祇奉嘉名。典冊流輝，幅員有慶。中賀。恭惟皇帝陛下，一人出震，五位乘乾。玉質金相，嗣延洪之大曆；寶禕羽翟，奉雍肅之徽音。光進瑤編，重增鼎祚。臣叨分虎壘，隃望龍墀。保佑恩深，已際大明之運；怡愉樂永，更揚齊壽之休。《文山全集》卷四。

賀太皇太后表

毓正神孫，方布應門之詔；位尊祖后，復隆京室之稱。重慶萬年，丕休四海。中賀。恭惟壽和聖福太皇太后陛下性超太上，德應黃中。元祐太功，法宣仁之鞠育；紹熙新政，燕慈福之起居。宜旌坤極之嘉名，式趾太宸之芳躅。臣屬分侯服，欽誦王綸。天子必有所尊，已光載籍；聖德無加於孝，長戴兩宮。《文山全集》卷四。

賀皇太后表

坤稱正位，訓迪嗣王；渙號揚庭，尊歸文母。簾帷介福，社稷垂榮。中賀。恭惟皇太后陛下德著憂勤，躬行慈儉。虞嬪觀于瀉汭，密贊聖謨；后稷生於姜嫄，美鍾神胄。晉長信尊尊之號，嗣《思齊》秩秩之音。臣忝守藩維，阻趨軒陛。得其名，得其壽，幸同萬國之歡；宜爾子，宜爾孫，永頌兩宮之慶。《文山全集》卷四。

皇太后加尊號鈐司賀皇帝表

重明以繼大人，瑤圖垂慶；介福而于王母，玉冊有光。瑞溢簾帷，重關宗祏。中賀。恭惟皇帝陛下敬仁成性，曆數在躬。惟后綏猷，蹈堯舜之孝弟；因親教愛，奉任姒之肅雍。宜申慈極之尊，式表聖倫之至。臣叨兼兵轄，踰企陛簾。贊長信之徽稱，已光漢制；頌塗山之丕訓，益大禹功。《文山全集》卷四。

賀太皇太后表

嗣皇奉冊，尊居長信之名；祖后宣猷，夙迪《思齊》之訓。萬年集慶，八表蒙休。中賀。恭惟壽和聖福太皇太后陛下德邁維莘，道高于汭。金車玉路，備三世之典章；寶翟珍褱，示六宮之法度。美慈宸之疊矩，揚大號以同符。臣兼領戎鈐，竦聆郵紘。德壽早朝之典，已慶淳熙；延和同御之功，益歌元祐。《文山全集》卷四。

賀皇太后表

文母克昌厥後，光紹皇圖；大德必得其名，慶隆寶冊。四方來賀，百志惟熙。中賀。恭惟皇太后陛下陰教齊家，慈元正位。推爲美化，邁周、召之二《南》；著在徽音，紹姜、任之《大雅》。宜膺渙號，增重坤稱。臣適貳韜鈴，聳聆綸綍。踐其位，行其禮，莫重尊親；求厥寧，觀厥成，適追來孝。

《文山全集》卷四。

大行皇帝升遐本州慰皇帝表

堯父宅尊，春秋鼎盛；祀天告墜，遠邇震驚。降割非常，銜哀罔極！恭以大行皇帝神聖文武，濬哲溫恭。萬千歲怡愉，恪盡東朝之養；十一年寅畏，適祇上帝之威。期壽考之惟休，俄憂勤而積疚。詎圖大漸，驟至遐征。望欲斷於遺弓，命忍傳於憑几！中慰。恭惟皇帝陛下有仁有孝，盡制盡倫。克念先猷，根聖人之至性；誕承慈訓，服天下之通喪。願少抑於孝思，以永綏於神器。臣屬縻守紱，哀捧告書，莫伸奔問之恭，徒切攀號之痛。《文山全集》卷四。

慰太皇太后表

鷄鳴問寢，方慈極之深居；龍去遺弓，忽皇輿之新陟。宮闈震悼，海宇摧傷。中慰。恭惟壽和聖福太皇太后陛下德備周姜，道光堯母。東朝垂訓，曾不改於儉慈；南面積憂，遽忍違於溫清。驟罹國疾，諒切聖懷。少寬憑几之思，式副御簾之託。云云〔一〕。《文山全集》卷四。

〔一〕云云：原無，據韓本、張本、鄆本補。

慰皇太后表

皇靈新陟，變撫遺弓；儷極永懷，悲興捐袂。六宮哀痛，九宇摧傷！中慰。恭惟皇太后陛下坤道宅中，家人位正。脫簪而諫，期共濟於中興；綴衣于庭，忍遽聞于末命！雖委裘之悲至切，而定鼎之託方新。願制盡傷，永綏敷遺。云云。《文山全集》卷四。

大行皇帝升遐鈐司慰皇帝表

王宜日中，方慶垂衣之治；父有天下，遽傳憑几之言。宗社憫凶，幅員哀痛！共以大行皇帝王道正直，帝德簡寬。奉長樂之清溫，丕昭仁孝；聽邇英之勸誦，適紹文明。方嗣服於萬年，胡委裘於一旦。烏號罔極，龍御何追。中慰。共惟皇帝陛下聖德升聞，孝思永慕。重華協帝，方遏密於八音；冢宰總官，將諒陰於三祀。願少紓於聖抱，以弘濟於皇圖。臣逖領戎昭，哀傳國疚，阻伸奔問，惟重摧傷。云云。《文山全集》卷四。

慰太皇太后表

嚴宸居正，痛晏駕之奄聞；慈極宅尊，悵早朝之遽隔。哀傳海宇，悲結簾帷。中慰。共惟壽和聖福太皇太后陛下德厚承天，恩深與子。夙行恭儉，聖方頌於《思齊》；晚享怡愉，變忍聞於顧命。諒聖情之結戀，鑑輿志之攀號。願抑慈懷，永謀孫翼。云云〔一〕。《文山全集》卷四。

〔一〕云云：原無，據韓本、張本、鄔本補。

慰皇太后表

變興梧野，九土烏號；悲結椒塗，六宮縞哭。宅憂罔極，降割何深。中慰。臣共惟皇太后陛下志紹徽音，躬行美化。冬溫夏清，佐孝養於東朝；海潤星暉，演慶源於中壺。驟撫鼎湖之戚，奚堪輿極之哀。願抑慈懷，聿扶新政。云云。《文山全集》卷四。

百日慰皇帝表

烏號浸遠，九土同悲；駒隙易流，十旬如隔。撫時哀疚，易月徬徨。中慰。恭惟皇帝陛下曆數有歸，羹墻如對。雖擗踊哭泣，曷勝父子之情；而朝覲謳歌，當慰臣民之望。願節宅憂之制，益成繼志之圖。臣承乏偏城，阻趨嚴陞。云云。《文山全集》卷四。

慰太皇太后表

烏號銜恤，悵再隔於月遊；龍寢闕朝，恍十周於日浹。流光何速，哀思欲摧。中慰。恭惟壽和聖

福太皇太后陛下宮壺宅尊，簾帷託重。雖道揚王命，不勝慈極之懷；然燕翼孫謀，當念皇圖之本。願體臣民之戴，少寬朝夕之思。云云。《文山全集》卷四。

慰皇太后表

雲升梧野，頓隔千秋；日短蓂階，駕言十浹。委裘禍迫，捐袂哀深。中慰。恭惟皇太后陛下教盡人倫，慶隆母道。雖易月以日，難窮伉儷之悲；然薦子於天，正重携持之託。願俯從於中制，用式副於羣情。云云。《文山全集》卷四。

期年慰皇帝表

追玉几之遺言，制嚴易月；服練冠於初祭，哀重感時。霜露深悲，乾坤罔極。中慰。恭惟皇帝陛下孝治天下，統承先王。雖見堯於墻，克篤終身之慕；然纘禹之服，所期大器之安。願從禮制之宜，少副輿情之望。臣屬縻藩屏，阻造闕庭。云云。《文山全集》卷四。

慰太皇太后表

訓予命汝，易月有嚴；練而慨然，周星何短。哀承遺制，痛結慈衷。中慰。恭惟壽和聖福太皇太后陛下德紹宣仁，功侔明肅。天經地義，扶嫡統於方新；日邁月征，悵宸旒之愈遠。願勉從於衆志，姑少抑於至情。云云。《文山全集》卷四。

慰皇太后表

悲捐玉玦，痛極呼天；祭服練冠，制嚴易月。乘雲浸遠，濡露何堪。中慰。恭惟皇太后陛下德佐先猷，慶鍾神胄。雖徬徨虞汭，望欲斷於蒼梧；然婉變周姜，任方隆於京室。願少寬於哀抱，用丕贊於鴻圖。云云。《文山全集》卷四。

再期慰皇帝表

龍湖未遠，可傷易月之喪；駒隙幾何，已舉再期之制。羹墻如在，霜露孔哀。中慰。恭惟皇帝陛

下道盡人倫，位隆世嫡。雖終身慕父，難窮至性之悲；然億載怡親，方疊慈顏之養。願重承休之託，少寬追遠之懷。臣隲綴蕃宣，阻班軒陛。云云。《文山全集》卷四。

慰太皇太后表

終天巨釁，降割一朝；易月通喪，寓言再歲。仙遊未遠，慈抱難居。中慰。恭惟壽和聖福太皇太后陛下功在先朝，志勤內治。雖變生憑几，悵闕問於雞鳴；然寄重垂簾，方稽謀於燕翼。願抑無疆之恤，益昌有大之休。云云〔一〕。《文山全集》卷四。

〔一〕云云：原無，據韓本、張本、鄔本補。

慰皇太后表

望斷乘雲，悵龍驂之浸邈；制嚴易月，恍鳳曆之再周。凡屬幃封，式同追慕。中慰。恭惟皇太后陛下承天功大，與子仁深。雖悼舜陟方，不替蒼梧之望；然開周嗣歷，方隆豐芑之休。願少抑於衰悰，用永綏於神器。云云〔一〕。《文山全集》卷四。

〔一〕云云：原無，據韓本、張本、鄔本補。

全宋文卷八三〇一

文天祥 四

禫祭慰皇帝表

龍御何之，方切綴衣之痛；駒陰未遠，已驚釋禫之期。易月從宜，感時增疚。中慰。恭惟皇帝陛下恭默思道，愛敬事親。天作之君，當周艱而即命；日致其孝，將舜慕以終身。願寬追遠之至情，丕慰蒼生之顛望。臣濫承郡紱，阻綴朝班。云云。《文山全集》卷四。

慰太皇太后表

袞衣萬歲，痛隔終天；禫服一朝，權從易月。感時憂戀，率土盡傷。中慰。恭惟壽和聖福太皇太后陛下德著寶禕，功藏金匱。撫鼎湖之龍去，子保何追；懷豐水之燕貽，孫將有衍。願副普天之望，

式紓慈極之悲。云云。《文山全集》卷四。

慰皇太后表

宮車輟駕，浸遠翠華；國典行權，恍終素蹕。託言釋禫，胡忍免喪！中慰。恭惟皇太后陛下夙著脫簪，驟罹捐袂。雖梧雲不返，永爲禕翟之傷；然芑水方來，共徯簾帷之助。願釋居諸之感，俯從遐邇之情。云云。《文山全集》卷四。

賀皇帝聽政表

思皇烈考，誕受寶龜；於穆嗣王，甫旣治象。慈簾保佑，熙政闡明。中賀。恭惟皇帝陛下德實天生，動爲世則。入于翼室，稱元子以宅宗；出自應門，會諸侯而作誥。欽奉怡愉之訓，爰親兢業之幾。既兩宮垂拱以無爲，宜四海謳歌而來覲。臣屬縻郡國，踰戀闕庭。御延和殿之正朝，願光祖烈；奉紫雲樓之盟誓，第守藩條。《文山全集》卷四。

賀太皇太后同聽政表

綏壽而右文母，高拱慈宸；肖德而有神孫，共臨幾政。徽音洋溢，光訓昭宣。中賀。恭惟壽和聖福太皇太后陛下功邁塗山，德高媯汭。施于帝祉，已深慶錫之源；保我後生，益衍壽寧之福。章憲垂簾於天聖，宣仁稱制於延和，紹昔大猷，爲今懿範。臣屬縻守紱，欣聽俞綸。太易太始太初，莫測無爲之化；四門四聰四目，共觀有道之朝。《文山全集》卷四。

天瑞節本州賀皇帝表

龍德御天，重華于帝；虹書流渚，長發其祥。萬姓驩呼，三辰擁佑。中賀。恭惟皇帝陛下聖德克肖，天性自成。光北斗之樞，篤生黃帝；美南山之壽，誕命文王。節屆千秋，時維九月。臣縻身侯度，拜手王休。三千臣同心，永言華壽；五百年生聖，敬贊河清。《文山全集》卷四。

賀太皇太后表

聖王垂拱，萬年方開燕翼；太皇怡愉，億載親見虹流。海宇春輝，宮闈日永。中賀。恭惟壽和聖福太皇太后陛下身基美化，德著慈元。正位而定家人，功高配祖；介福而來王母，慶積貽孫。律協素商，節書金籙。臣濫膺藩屏，阻賀簾帷。假樂命之，慶春秋之鼎盛；思齊聖也，同日月之離明。《文

山全集》卷四。

賀皇太后表

龍德方昇，祥書載震；燕謀有慶，福萃重坤。旗翼光華，幅員熙洽。中賀。恭惟皇太后陛下道侔博厚，德備仁明。虞汭來嬪，女于舜帝；周京作配，生此武王。方觀日上於扶桑，隨紀虹流於華渚。臣濫叨一障，踰企千班。大域中王，既祝華封之壽；爲天下母，願齊西極之年。《文山全集》卷四。

天瑞節鈐司賀皇帝表

謳歌與子，方開捧日之祥；福祿宜王，初紀流虹之慶。光生宗社，歡溢堪輿。中賀。恭惟皇帝陛下天德生知，乾元首出。載震載夙，膺天地之珍符；繼聖繼明，正春秋之嫡統。當瑤光之瑞節，際金顥之昌辰。臣分虎有嚴，抃鰲欲舞。呼玉卮之萬歲，隄贊王休；進金鑑之千秋，嗣殫臣職。《文山全集》卷四。

賀太皇太后表

萬壽齊天，思齊以聖；千秋紀日，長發其祥。廣宇休揚，重闡慶洽。中賀。恭惟壽和聖福太皇太后陛下以女堯舜，爲今姒任。有典有則之貽，輔于皇祖；立政立事之準，訓乃文孫。當月屆於素商，喜節書於華渚。臣猥塵戎轄，阻賀宸闈。請祝聖人，既效堯封之職；亦右文母，載賡《周頌》之章。

《文山全集》卷四。

賀皇太后表

辛歲重光，昔符夢日；乾元首出，今紀流虹。歡溢華封，慶歸長信。中賀。恭惟皇太后陛下徽音《大雅》，美化二《南》。德配重華，觀嬪于汭；祥開長發，立子生商。撫暘谷之初升，紀高禴之載誕。臣領鈐偏郡，銜表明廷。五百歲河清，既睹聖人之出；三千年桃實，願同王母之尊。《文山全集》卷四。

大行皇帝謚號本州慰皇帝表

祀以配天，致聖人之達孝；廟可觀德，彰烈考之隆名。典冊十年，宗祧九鼎。恭以端文明武景孝皇帝光宅天下，簡在帝心。敬直義方，煥經天而緯地；事名物應，昭修政以攘夷。大德大功，立親立愛。自生民而未有，熙鴻號於無窮。中慰。恭惟皇帝陛下離象重光，乾龍首出。聖盡倫，王盡制，始于家邦；宗有德，祖有功，行其典禮。式崇徽譽，昭對皇靈。臣叨領虎符，欽傳駿命。告神明，頌盛德，已觀國典之光；薦郊廟，揚洪休，尚述侯邦之職。《文山全集》卷四。

慰太皇太后表

居長樂之宮，興懷鶴駕；瞻顧成之廟，肇錫鴻名。大冊垂榮，慈衷悼往。中慰。恭惟壽和聖福太皇太后陛下以天下養，與元氣游。明肅臨朝，親立仁皇之策；宣仁在御，永懷神考之思。丕對皇靈，昭升熙號。臣屬縻侯紱，阻慰宸簾〔一〕。云云。《文山全集》卷四。

〔一〕宸：原作「震」，據韓本、張本改。

慰皇太后表

九疑陟遠，莫返皇靈；七廟升宗，聿彰世德。洪名有赫，哀抱彌深。中慰。恭惟皇太后陛下位正家人，道隆坤母。躬《葛覃》之節儉，厥配有光；秉《清廟》之肅雍，于嬪增感。於惟大冊，肆對皇穹。臣跡繫分符，神馳望闕。云云。《文山全集》卷四。

大行皇帝謚號鈐司慰皇帝表

翼室宅宗，考先王之制禮；觚壇告帝，爲烈考以易名。大冊遙彰，皇靈昭假。共以端文明武景孝皇帝體元居正，持盈守成。端獨化之原，文經天地；明萬幾之理，武定邦家。景行有容，孝思無極。上可以配祖宗之德，下可以垂子孫之休。中慰。恭惟皇帝陛下弼我不基，鑑于成憲。寧王克綏受命，篤業忱辭；嚴父莫大配天，答揚光訓。奉徽稱於宗祀，昭緝典於明時。臣通領戎昭，竦承帝號。堯萬世如見，莫名巍蕩之功；周諸侯來朝，第贊肅雍之相。《文山全集》卷四。

慰太皇太后表

盛德之祀百世，肇建嘉名；太皇之壽萬年，興懷縟典。慈宸惻楚，穹覆鑑觀。中慰。恭惟壽和聖福太皇太后陛下懿範兩朝，仁恩四海。爲元氣母，克篤貽孫；育天下君，忍聞祔禰！哀時大號，對越皇靈。臣身貳戎鈐，心懷國典。云云。《文山全集》卷四。

慰皇太后表

大德得名，尊歸昭考；嗣王謀廟，上奉徽音。宗禰休揚，宮闈愴極。中慰。恭惟皇太后陛下儉昭練服，中協黃裳。嗣任德之肅雍，思齊以聖；名堯功之巍蕩，煥有其章。聿深羽翟之懷，於赫觚壇之告。臣猥兼戎轄，隄贊邦彝。云云。《文山全集》卷四。

冬至節本州慰皇帝表

一陽來復，感駒隙之易流；三祀諒陰，悵烏號之浸邈。愴深履屨，悲著羹墻。中慰。恭惟皇帝陛下清明在躬，恭默思道。水有源，木有本，方嚴祭祖之時；霜既降，露既濡，不替思親之念。少抑居諸之慟，所膺付託之隆。臣逖守遐邦，阻班嚴陛。誦先王省方之戒，願謹起居；秉諸侯謀廟之忠，聿懷奔走。《文山全集》卷四。

慰太皇太后表

暖律吹噓，感一陽之初復；慈簾擁佑，訓三祀之通喪。痛在宮闈，情均海宇。中慰。恭惟壽和聖福太皇太后陛下徽音慈福，懿範宣仁。履韉迎長，天休方至；冕旒問寢，子保奚追。願少抑於慈懷，以永綏於孫翼。臣屬縻侯服，隄企御闈。云云。《文山全集》卷四。

慰皇太后表

復陽在地，氣應黃鐘；坤德承天，悲深素蹕。六宮增疚，萬宇永懷。中慰。恭惟皇太后陛下長信宅尊，思齊繼美。手扶宮日，坐占千歲之長；日斷臺雲，尚想九疑之遠。願紓哀於儷極，以永翼於皇圖。臣逃守江城，隄瞻禁闕。云云。《文山全集》卷四。

啓殯慰皇帝表

三年諒陰不言，悲深翼室；七月同軌畢至，告啓敢塗。遠日戒嚴，終天增慕。中慰。恭惟皇帝陛

下外勤謀廟，內奉臨朝。制爰舉於因山，龍輜將駕；情永懷於陟謁，鳳紼奚追。願寬劍舄之思，益重基圖之託。臣屬縻斗壘，阻慰宸庭。云云。《文山全集》卷四。

慰太皇太后表

居長樂之漢宮，永懷鶴駕；卜會稽之禹穴，垂戒龍輜。悲結慈闈，痛均薄海。中慰。恭惟壽和聖福太皇太后陛下憂勤德備，擁佑功高。百世可知，首正貽孫之則；七月而葬，豈勝思子之懷。願東望以節哀，重外朝之同御。臣身縻乘障，跡阻趨班。云云。《文山全集》卷四。

慰皇太后表

龍湖言遠，椒掖永懷；鳳翼戒嚴，葢塗載闕。六宮雨泣，萬宇雷哀。中慰。恭惟皇太后陛下儷極勳高，正家化洽。撫軒皇之劍舄，祔賁橋山；奉舜帝之衣裳，思藏梧野。尚軫乾坤之記，願紓朝夕之思。臣身繫分符，神馳攀紼。云云。《文山全集》卷四。

發引慰皇帝表

鸞車既駕，陟岵哀深；龍匣畢塗，崇丘制舉。新宮永闕，翼室增傷。中慰。恭惟皇帝陛下思道諒闇，送終哀戚。居喪讀葬禮，不愆復土之期；因山不起墳，尤切望陵之感。冀少寬於孺慕，以丕重於宗祧。臣縻跡侯藩，傾心宸陛。云云。《文山全集》卷四。

慰太皇太后表

日淪西極，悵鶴駕之長遊；天拱東朝，痛龍湖之永闕。重闈悲繫，九土慕思。中慰。恭惟太皇太后陛下福備怡愉，功高擁佑。撫綴衣於翼室，億世貽孫；念加斧於畢塗，千秋望子。願抑《思齊》之感，益昌《小毖》之謀。臣叨領偏城，阻趨慈陛。云云。《文山全集》卷四。

慰皇太后表

國謹重喪，龍棺就殯；禮襄大事，鸞掖興懷。海宇同哀，山陵告備。中慰。恭惟皇太后陛下憂勤

孔夙，哀感謹終。媯汭居諸，悵虞琴之已遠；會稽咫尺，望禹穴以奚追。願紆既葬之悲，式相維新之治。臣承流有守，伸慰無從。云云。《文山全集》卷四。

祔廟慰皇帝表

先帝之葬衣冠，載虞神祐；嗣王之奉宗廟，丕祔皇靈。昭穆用休，典章備舉。中慰。恭惟皇帝陛下以舜大孝，居商諒陰。如慕如疑，既畢因山之禮；以享以祀，聿嚴升禩之恭。勉承翼翼之容，深抑煢煢之感。臣屬縻牧訓，阻奉駿奔。云云。《文山全集》卷四。

慰太皇太后表

嗣王宅恤，奉先祐以升宗；聖母思齊，感皇靈而悼往。禮容有赫，祀事孔明。中慰。恭惟壽和聖福太皇太后陛下壽考維祺，儉慈爲寶。佑我烈祖，有典則以貽子孫；保予冲人，脩宗廟以序昭穆。祔既行於永紹，哀少釋於慈元。臣叨綴蕃宣，阻班奔走。云云。《文山全集》卷四。

慰皇太后表

地隔丹洲，畢舉九虞之祭；天臨清廟，昭升七世之宗。槩主思皇，椒闈若惕。中慰。恭惟皇太后陛下性鍾慈儉，德備憂勤。嬪虞帝以日欽，陟方浸邈；對文王之於穆，率祀惟恭，願紓坤極之思，益衍乾符之慶。臣屬縻民牧，莫效侯朝。云云。《文山全集》卷四。

正旦慰皇帝表

王正書月，景命維新；靈德在天，孝思罔極。運開曆數，哀動几筵。中慰。恭惟皇帝陛下思道奉先，與時更始。王受同瑁，祭不替於元辰；帝見羹墻，禮益嚴於上日。願抑居諸之感，丕承擁佑之恩。臣屬守偏城，阻趨嚴陛。云云。《文山全集》卷四。

慰太皇太后表

正月始和，律更太簇；昊天不弔，痛在《思齊》。曆數維新，宮闈孔惻。中慰。恭惟壽和聖福太

皇太后陛下爲元氣母，與太極游。孟春而戒道人，撫時其邁；上日而受文祖，擁治方新。願寬丕子之思，益重神孫之託。臣屬縻宣化，阻慰履端。云云。《文山全集》卷四。

慰皇太后表

羲日更新，治開泰象；虞雲浸遠，悲在乾元。駒隙易流，烏號何及。中慰。恭惟皇太后陛下光輔先帝，敬授人時。元會衣冠，尚想熙明之政；月游劍舄，忍聞永紹之名。願寬悼往之哀悰，益撫履端之昌運。臣屬縻一障，阻慰三朝。云云。《文山全集》卷四。

改元賀皇帝表

春王會於三朝，慶開景運；皇天佑于一德，治紀初元。正朔肇新，乾坤有造。中賀。恭惟皇帝陛下春秋正始，曆數在躬。仰則定陵，開三傳之丕祚；近稽哲祖，基七葉之昌期。攸鳳曆以改絃，衍馮圖而卜鼎。臣親逢更化，適綴承流。揚偉蹟，鋪闕休，恪共侯度；撫太平，應昌歷，謹授人時。《文

山全集》卷四。

賀太皇太后表

天王一統爲元，載攸正朔；太皇萬年齊壽，同御邦家。日月重明，乾坤更始。中賀。恭惟壽和聖福太皇太后陛下道符烈祖，功擁神孫。乾德太平，訓實承於昭憲；元祐盛際，政共聽於宣仁。洵開更瑟之休，實繫垂簾之盛。臣叨承侯服，丕奉慈宸。基正始之風，已新美化；播《思齊》之頌，永載徽音。《文山全集》卷四。

賀皇太后表

《春秋》以一爲元，曆開昌運；《關雎》之化正始，本在慈宸。正朔更新，國家胥慶。中賀。恭惟皇太后陛下有娥長發，太姒思齊。齊壽以奉太皇，德惟子肖；受福而于王母，祐自天申。宜渙號以繫年，示同文而更始。臣猥乘一障，丕戴三宮。當昌歷，應休期，已供侯服；綏眉壽，介繁祉，益贊母徽。《文山全集》卷四。

曆日謝皇帝表

乘龍御以紀年，一元正始；詔虎城而頒朔，千里承休。敬授人時，對揚王命。中謝。恭惟皇帝陛下明哲作則，曆數在躬。欽若昊天，熙春夏秋冬之績；建用皇極，協雨暘寒燠之疇。乃誕布於成書，以昭垂於新治。臣蕃宣有恪，播告惟恭。錫厥庶民，順中星而平秩；佑于一德，歌化日之舒長。《文山全集》卷四。

謝太皇太后表

歲正孟陬，一元改紀；朝臨長樂，萬國頒正。春朔會同，神人和洽。中謝。恭惟壽和聖福太皇太后陛下怡愉萬歲，擁佑一人。肖德而有神孫，光膺昌歷；受福而于王母，丕輯蕃禧。載頒協律之書，式重垂簾之政。臣欽承鳳紀，誕布侯藩。聽嶰竹之歛，誕敷和氣；獻蟠桃之頌，益贊壽眉。《文山全集》卷四。

謝皇太后表

鳳曆頒春，東朝介福；虎城告朔，北面承休。歲定四時，天佑一德。中謝。恭惟皇太后陛下《思齊》肅穆，少廣怡愉。訓示塗山，曆開禹子；教行渭涘，紀協周王。春朔攸同，乾坤交泰。臣承流下障，奉令孟陬。協和萬邦，第贊定時之績；嚮用五福，益陳日壽之休。《文山全集》卷四。

宣州勸農文

太守到郡踰月，被命造朝，辭允不免，且旦夕去矣。猶以職事得出郊，與爾農父老告語一次。因記李參政莊簡公名光曾守此土，後有一帖云：「僕頃守宣州，今已二十八年。東望雙溪疊嶂之勝，感嘆而已。因見諸父老，爲祝率勵子弟，爲士爲農，仰事俯育，爲忠爲孝，戮力以事田疇，先時而畢租稅，立身揚名，以顯父母，是所望也。」李參政去郡已久，尚拳拳於宣人如此。今太守與爾父老方此相處，遽然去之，其拳拳又可知。因取李參政之意，衍爲勸農五詩，又別爲五詩以寓戒，酌酒與爾父老誦之。爾父老其以轉語鄉曲子弟，能從吾戒而不爲惡，即能從吾勸而爲善矣。他日太守在他所，遇宣人來，必問曰爾父老安否，爾農曾從吾勸戒否？爾等尚勉旃，以副太守去後之思。

第一勸爾勤耕作，布種及時休落魄。惟有鋤頭不誤人，飽食暖衣良快樂。
第二勸爾行孝弟，敬重爺娘比天地。前人做樣後人看，滴滴相承簷溜水。
第三勸爾勤教子，有子讀書家道起。若還飽暖不知書，十萬莊田不禁使。
第四勸爾常修善，糶米救荒極方便。但從心上做陰功，管取兒孫多貴顯。
第五勸爾了王租，莫教人喚作頑都。年年早納早收鈔，那有公人來叫呼。
第一戒爾莫妄狀，須知官府難欺誑。從來反坐有專條，重者徒流輕者杖。
第二戒爾莫避役，既有田園那避得。今朝經濟明朝倉，到底費錢又何益。
第三戒爾莫拒追，擔刀使捧欲何爲。有事到官猶可說，殺人償命悔時遲。
第四戒爾莫尤賴，故殺子孫罪名大。縱逃人禍有天刑，害人不得番自害。
第五戒爾莫奪路，做賊不休終敗露。斬斫徒配此中來，能得幾錢受此苦。
《文山全集》卷一二。

湖南憲司咸淳九年隆冬疏決批牌判

本司照朝省指揮，見以隆冬，委官諸州縣疏決。凡情輕當於釋者，從所委官逐名點對，取判施行。其有情理重惡，累經疏決，及恩赦不原，而手足未經槌折，膂力正自精强者，與其幽囚於牢柵之中，駸尋而死，不若驅於極邊被堅執銳，庶幾死中求生。此一種人，請所委官令項分別，作一狀指實

申來，以憑喚上赴司審視，發往荆、蜀、淮、海。古之強兵猛將，得之於盜賊髡囚者，正自不少。此亦推明國家忠厚之一事也。取各官遵稟申。《文山全集》卷一二。

斷配典吏侯必隆判

近世以來，天下以吏奸爲病。士大夫臨事，惴惴然惟恐吏之欺己，馭之以束縛〔一〕，事無大小，一切以法繩之。當職以爲不必立的，無罪不必尋，有罪不必恕，爲得之矣。本司諸吏頗似謹畏，從前固有違慢者，當職諒其不及，每每止於薄懲。爾輩非但不敢欺，直不忍欺可也。侯必隆何爲者，輒敢於呈押之時脫套花字，於行移之後揆掇公文，顯然面謾，行其胸臆，此非先有無忌憚之心而後動於惡乎？送之有司，自稱爲無他情弊，殊不思情莫惡於脫套，弊莫大於揆掇，豈必計囑取受，而後謂之情弊哉？看來此吏於諸吏中頗機警，而膽最大。以小人之小有才，不施之於奉公，而施之於罔上，若以姑息行之，留此人在案中，將來必爲司存無窮之蠹。矧所犯關係臺綱，雖欲恕之，不可得也。侯必隆決脊杖十五，刺配千里州軍。本當更搥碎右指，以爲箝紙尾作弊者之戒，姑以贓狀未明，特免斷訖。長枷臺前，五日押發。仍榜。《文山全集》卷一二。

〔一〕束縛：韓本、鄔本作「束濕」。

委僉幕審問楊小二死事批牌判

使職一日斷一辟事。今日看楊小二身死一款，看頗不入，不能無疑。一則當來無大緊要，驟有謀殺，似不近人情。二則殺人無證，只據三人自說取，安知不是捏合？三則捉發之初，乃因楊小二揣摩而訴三名。何爲三名，恰皆是凶身，似不入官信。今文字已圓，只爭一行字，則死者配者，一成而不可變矣。今仰僉廳一看此款，盡夜入獄，喚三名一問。若問得果無翻異，明日便斷。如囚口有不然，只得又就此上平反。文字是密封來，忽然而往，人所不覺，則囚口得矣。《文山全集》卷一二。

平反楊小二死事判

律：諸謀殺人，已殺者斬，從而加功者絞。又律：故殺人者斬。又律：諸同謀共毆傷人者，各以下手重者爲重罪，元謀減一等，從者又減一等，至死者隨所因爲重罪。今楊小二之死也，施念一捽其胸，塞其口，顏小三斧其脇，羅小六擊其吭〔二〕，其慘甚矣。再三差官審究，則三人者於楊小二元無深忿，特其積怨之深，欲伺其間而共捶打之。則謂之同謀共毆至死，宜不在謀殺之例。顏小三者施斧於脇肋之間，爲致命，是下手重者也；然其不用斧之鋒，而止以斧腦行打，是殆非甚有殺心者。羅小

六雖不加以縊，楊小三亦必以肋斷致死。然始也謀毆之，終也遂縊之，是其心處以必死，非獨下手重而已。是故以下手論之，顏小三之先傷要害，當得重罪；以誅心論之，羅小六獨坐故殺，不止加功，準法皆當處死。以該咸淳八年明禋霈恩，特引貸命。顏小三、羅小六各決脊杖二十，刺配廣南遠惡州軍。施念一於同謀爲元謀，於下手爲從，合減一等，決脊杖七十三，刺配千里州軍。牒州照斷訖申。《文山全集》卷一二。

〔一〕其：原作「共」，據韓本、鄔本改。

〔二〕七十：庫本作「十七」。

門示茶陵周上舍爲訴劉權縣事判

孟子曰：「有人於此，其待我以橫逆，則君子必自反也，我必不仁也，必無禮也，此物奚宜至哉？」此君子處己法度也。子曰：「居是邦也，事其大夫之賢者。」子貢曰：「禮，居是邦，不非其大夫。」此君子居鄉法度也。今茶陵劉權縣申，周監稅父子爲豪強把持，且謂不法不可枚舉，必非無故而爲之辭者。使周監稅父子果善人也，則曰我無是事，何恤人言，閉門遠嫌，人誰得以矚我。如此則處己居鄉，皆得之矣。今因權縣所申，周上舍不勝其忿，訐其短以相攻擊，一則曰劉某，二則曰劉

某。自反之君子，肯然乎？不非其大夫，當如是乎？抑《大學》曰：「有諸己而後求諸人，無諸己而後非諸人。」併備詞帖劉權縣，果如所訴，則宜盡與改更，布過失於境內，洗手以勤公，砥行以爲。如此而盜賊不畏威，豪強不屏迹，吾不信也。仍門示周上舍，宜知自愛。《文山全集》卷一二。

全宋文卷八三〇二

文天祥 五

辭免新除秘書省正字狀

具位文天祥照會：十月二十六日伏準省劄：十月三日三省同奉聖旨，文天祥除秘書省正字者。某猥以疎賤，叨被聖恩，望闕瞻天，莫知所措。伏念某自叨親擢，未歷外庸。以讀書學從政之方，以奉祠爲書考之日。方竊山林之暇，敢圖臺省之登？負乘非宜，循墻無任！伏望公朝特賜敷奏，令某滿足官觀兩考日，祇被新命。其於出處得宜，庶幾無負聖明拔擢之意。所有省劄，未敢祇受，除寄本州軍資庫外，須至申聞者。《文山全集》卷四。

再狀

具位文某照會：於去年十月二十六日伏準省劄：十月二日三省同奉聖旨，文某除秘書省正字者。某伏念一介庸賤，叨竊非宜；加以從仕以來，未有庸歷。輒具狀申控，乞候宮觀兩考滿日，祇被新命。十二月二十九日伏準省劄：十二月九日三省同奉聖旨不允。某除已望闕謝恩，擇日前來供職外，須至申聞者。《文山全集》卷四。

辭免知寧國府狀

具位文某照會：伏準尚書省劄子：四月十七日三省同奉聖旨，文某差知寧國府，替朱應元缺者。起家超躡，望闕徘徊。伏念某實無他腸，粗有遠志。昔年憂國，冒當事任之難；數歲杜門，寧悔身謀之拙。屬明良之胥慶，念岳牧之疇庸。曾謂栖遲，遽叨選用。惟是某省愆已至，貶秩猶新。雖公論至久而愈明，而丹書未謂之無過。儻不量於出處，是自速於顛隳。欲望公朝特賜敷奏，收回成命，改畀叢祠，使某得以讀書養親，安身寡過。他有驅馳之日，無非報效之年。所有省劄，已寄留吉州軍資庫，未敢祇受，須至申聞者。《文山全集》卷四。

與湖南大帥江丞相論秦寇事宜劄子

某干犯師嚴，輒有申請。秦寇之在廣西，擾動二十五郡，爲梗累年。去年破賀之富川，官民荼毒不細，經司不問。今破我永明，殺死知縣，殺傷縣尉、主學，捲去縣印，屠居民，擄婦女，掠去財物。繼而又破永明之下澤，又寇我江華，移其所以毒廣西者施之湖南。此而不討，失刑莫大。廣西以前獨力不能捕滅，今何幸湖南肯與會合，宿兵以待師期。朝廷之主張方新，言路之指陳甚力，此掃清巢穴之一機，爲兩路官民舒洩冤憤，不可失之時也。前經帥不足望，滿望新經帥之來，不料意見參差，施行矛盾。茲得經司牒報，捕賊以官，授賊以職，犒賊以酒，賞賊以錢，凡懷忠憤，無不彈指。自昔化賊爲民，固有稱爲盛德事者，蓋賊有出於田里之饑荒，激於官吏之貪黷，弄兵之情，出不獲已。故仁人處之，念其爲赤子，姑惟安之，勿庸勝之。今秦寇招募無徒，建置將校，橫行兩路，嘯聚千群，戕天子之命吏，劫公府之鑄印，殺人盈野，罪如丘山。既非脅從，又非烏合，渠魁縱有求降之說，官司亦在不受之科。而况初無出首之真情，僅取改過之文狀，謾曰回鄉而安業，何曾束身以歸官。得之廣人所云，一面受招，一面劫殺。刑政無章，宜其至此。天下之大勢相維，所仗者義而已。若名義不著，大之不可以立國，小之不可以立家。今觀廣西，成何宇宙。先生不忍斯人之塗炭，一再調兵，必欲罪人斯得然後已，此真扶持人極，綱維世變，盛心之所推也。但今來廣西既作此可笑舉

措，未必不以龔遂渤海之事自詭，上惑聖聽。本路冒然進兵，非惟蹊徑不熟，乏隅總鄉導之助，有悔吝之慮；亦恐鄰閩反以本路爲張皇，壞其兒戲之前功，或者陰設陷穽。今直須申審朝省，看指揮如何。朝旨主招諭，本路只得撤兵，後有衝突，廣西當任其咎。朝旨如以招諭爲不然，自是督兩路會合。至時湖南不求廣西，而廣西自當約湖南共事，此利害自是坦然。謹具公申，欲望備申朝省，仍乞鈞翰與當揆商訂，必須計一例斷行下，曰招則招，曰捕則捕，使人無中立之疑，則亦無事後之悔。所有永明縣見駐劄，有使閩之兵，有本州之兵，有謝隅官之義丁，約近千人，日費春陵供億〔一〕。比來徐守已費支吾，郡力凋薄，亦爲可念。今高節所部兵若到山前，不過又是坐食。愚意謂不若候朝旨行下，確許討捕，然後調往。今乞且喚回高節一行軍兵歸營，聽候朝命。某非敢違使閩約束，本司去山前頗近，的見利害如此。恃師門相與之真，故敢傾臆以請。拱聽處分，以憑遵守。《文山全集》卷一一。又見雍正《廣西通志》卷一一二。

〔一〕「春」原作「春」，「億」原作「億」，並據韓本、鄆本改。

提刑節制司與安撫司平寇循環曆

某猥以迂疎，承乏湘臬，適值寇發，昭、賀兩路弗寧。茲承大使丞相與廣西經略都承選將調

兵，各以重僚爲之督，是行賊不足平矣。某偶以職事獲忝與聞，奉令承教於兩閩間，自是無虛日。公移失幾密，私櫝近文貌，求其脉絡貫穿，報應迅速，莫若循環曆爲便。司存以紫袋，從郵置往來，去潭日有半，去桂可三日。從其中而稟命焉，庶幾昔人道二國之言，無私之義云耳。某謹書於曆首爲序。

十月十三日

某荐準牒報，大閩調兵一千人，以宇文帥參、王環衛任其事，甚盛舉也。自秦寇之作，廣西前此調兵，不過五百人以下。去年呂帥方調一千人，而皆委之小小將校，氣勢單泊，不能爲功。今南窗調三千人，以唐貳軍督之，以趙總制統之，而使閩與之掎角，大作規模，賊授首行有日矣。事關西戶，國家之所嘉賴，豈直兩路之所蒙福而已。然聞之，兵家利鈍，不能逆覩，蜂蠆有毒，困獸猶鬪。《語》曰：「臨事而懼，好謀而成。」某數月以來，職思其憂，亦頗采取衆議，薄有管見。及今山前之所當行者，因悉數之於前，乞賜鈞照。

一、秦孟四者，累據山前探報，其狡兔之窟，稱在賀州管下地名下界，然實無一定可攻之巢穴，亦無一定可擊之隊伍。前此經司非不起兵臨之，然兵來則賊散，兵去則賊聚，見吾強則避之，知吾弱則乘之。方官軍之始至也，整齷精明，部分齊一，問寇則失之矣，無可蹤跡者。而秦之黨或爲平民買賣於軍市之間，甚者秦孟四亦在焉。及淹旬越月之後，我軍氣竭意衰，闌珊零落，寇則忽

以百十輩突出草舍，以掩我軍。從前往往僨軍蹶將〔二〕，大率坐此。今兩閩會兵，鼓行而前，寇出故智，必且散去，及其久也，則有乘虛襲我之憂。此一不可不知也。

一、秦孟四所出沒巢穴處，其山重岡復嶠，連跨數州，林翳深密，蒼蔚延袤，山獠木客，聚族其間。將四面而裹之，則山脚綿亘，無合圍之理；將赭山而蹙之，則林木疏曠，無延燎之勢。我軍望之遙遙，空駐山下，而彼之軼出他境，猖獗自如。且如近年嘗遣二將，曰吳曰孫，屯駐屏山者年餘，僅能免靜江境內之擾，而不能禁昭、賀諸州之剽掠是也。我軍若入其巢，搜原剔藪，豈不甚快。然彼又竄入大山，愈去愈遠，迄不可誰何。如近年蕭路分日張者，提兵徑擣其巢，而不獲一人是也。今兩閩兵力甚重，非前此千百人單弱之比。雖山勢連延，不可合圍，只是一步趨一步，可直造其所謂下界者。然吾極其辛苦，得至其間，彼則又已遁散。且兵在山前，又無救於彼之橫出。此二不可不知也。

一、所在平寇，專藉土人，惟今廣西則不然。方秦寇之起也，某村被害，訴於閩，閩爲之調兵。已而賊不可追，撤軍而去。未幾則寇已復至，尋讎於所訴之家曰：「汝敢訴我！」從而盡殺滅之。官不能爲之主，而適重其荼毒。自此應有被劫者，皆不復告官。此一類是主人畏賊，而不敢與爲敵者也。又秦寇所至，攫剽財物之外，出其餘以散之貧者。善良被害，惡小蒙利，是以鄉井間略無被髮纓冠之義，常有幸災樂禍之心。此一類是土人喜賊，而不復與爲讎者也。今兩閩會兵而前，若無土人嚮導，是猶盲者索途，何往而可。然由前言之，則或平民畏寇後禍，而不欲爲我軍

之用，或惡少以寇爲恩，而不樂爲我軍之役。縱強而驅之，未必不首鼠二三，陽順官而陰附賊，此處最是誤事。此三不可不知也。

一、今日之事，全在兩路督捕，察前三者之弊，各作一策處之，必使有以避三者之病，然後一舉而得志。不然，必墮賊計中。南方用兵，如今日大舉者自有數。此行必須如狄武襄之於儂蠻，了事而後可已。君子作事謀始，則籌之也可不熟，而講之也可不精乎？

一、聞有張虎者，石壁嘗遣之將兵，幾擒秦孟四，常有「張大蟲來我便怕」之語。若取賊之所怕者表而用之，亦破賊膽之一也。張虎者近爲郭察所劾，押下邕筦效用。今以鈞闔求之，以屬王環衛，使之以功補過。其人勇悍有餘，必能自効，此上計也。

一、今自湖南入昭、賀有兩塗，一曰全州灌陽。自灌陽入昭、賀，皆經縣鎮，即近日被擄去處，而去秦孟四下界巢頗遠。一曰道州永明。自永明入昭州界曰平源，便是賊巢。自平源至下界，賊寨連珠相望，其去秦孟四巢甚近。今兩督捕先合商量打併，附和諸賊此却宜以告諭爲先，告諭之說，以爲兩路之所誅者惟秦孟四，汝曹脅從，在不殺之科，若得一寨下，我軍直是不殺。則所謂連珠賊寨，必從風而靡，非惟可以離賊之黨，因而用之，則擒秦孟四或在此徒，未可知也。但一賊寨來降，其中有老幼，有財物，軍人不免殺戮攫拏。此須督捕總統先明秋毫無犯、不殺一人之令，使降者以我爲信則可。此收捕之第一機也。

一、昨來使闔所調，不過戍寨一百人，又令本司擇將。當時頭勢稍輕，所以且差桂文政總統。桂雖

淮將，體統不爲嚴重，故鈐束倍覺費力。向嘗以紊鈞聽，乞賜改差，未蒙垂許。今幸王環衛此來，即當抽回桂文政，盡以其兵付王環衛。伏乞鈞照。

一、高節二百人，今在全州灌陽駐劄，合係王環衛總統。伏乞鈞照。

一、聞諸軍取十六日戒嚴以行，二十後可到衡陽。應平寇之說，筆舌所不盡者，候宇文帥參、王環衛相會，又得對面較量。伏乞鈞照〔三〕。

十月二十二日

一、二十一日，字文帥參、王環衛至衡。是日，留議軍事，至三鼓而別。二十二日早，軍已行。

一、前此奉大闖之命，調戍寨兵四項，共二百人，令本司擇將。本司遂差杜通判督捕，桂路分總統，此一時也。今則大闖調兵千人，輟元僚貴將以行，與廣兵大爲犄角，此又一時也。以事體論之，所合撤回桂路分，盡以其兵屬王環衛。又須令杜通判解督捕職事，盡以軍務屬之宇文帥參。庶幾事權盡屬大闖，司存不過奉行旨揮，每事無所專輒，此則尊大闖之體也。而宇文丈之來，傳諭鈞意，與其所以自處，一切欲使某與聞。某以職事而言，則盜賊正屬司存，固自無以諉其責，但當如廣西章憲之所以自處者。章憲但爲其憲司之所能爲，若軍事皆是經闖任之，章不與知也。今某自有章憲樣子，豈敢事事干與，犯僭越之誅？而宇文丈堅謂長沙去山前迢遞，報應不免遲緩，恐誤事機，必欲凡事從本司予決行，又謂鈞意所望正如此。某舊出門牆，先生待某如子弟，

某事先生如父師。今不自意以一節趨走闔部之內，適門戶間有酬應，以子弟自命，則所當爲父師代勞，豈所敢辭者。然事固有輕重大小，難於槩言。今已與宇文文斷，應山前文字申到本司，在某可以予決不犯專輒者，某徑自區處報山前，却申大闔照會；其有非司存所得擅處者，則取鈞筆旨揮。如此不失門牆奔走之誼，又不失大闔崇重之體。所有面與宇文文講論數項，今一一乞鈞旨速作施行。

一、桂路分已牒報從王環衛調用，乞作批牌鈞判，更劄付桂路分照應，庶一切出於闔命，而後事體歸一。桂文政只是衡州路分，名位尚小，鈞判中或加一權攝名色，在路分向上者以寵之。蓋既減其實，姑華其名，鼓舞之術也。

一、宇文文自謂以客軍深入，實不知地分賊情，苦不容本司解杜通判督捕職事，以爲杜文任事數月，講切諳熟，今日正要資其用，欲以同督捕處之。又道州錢糧，倍費支吾，山前若有不繼，立見利害，須得一人通融於其間，則杜通判其人也。此說亦甚有理，欲乞徑作批牌鈞判，令杜通判充同督捕職事、兼督發錢糧官。却望鈞筆褒拂數句，庶其樂於趨事赴功，此一大節奏也。

一、近日道州只供億戍寨二百人錢糧，已自斷續可憂。今驟添千餘人券食支遣，小郡氣力何以堪之？若不念其痛癢，先與區處，將來必坐困乏，關係不細。昨得倉漕書，亦閔然及此。不知還可申明朝廷，於苗糴內作一道理否？先生寫與都堂，必無不從，乞鈞照。

一、山前事體重大，臨機喝犒，爲費不貲。恨司存寡薄，不能出氣力。問之宇文文，所携似少。宇

文丈子細，應非妄費者。望更那融，發下若干，就山前準備。若無所於用，仍是庫中之物。宇文丈於此，甚以爲憂，而不敢請。軍無財，士不來，軍無賞，士不往，勝負之微權所係，某不敢不備言之。取鈞旨。

一、應山前事宜，凡可以助臨事好謀之槩，悉從大帥參、環衛疊疊道之，不必以瀆鈞聽者，皆不布於此。乞鈞照。

十一月初五日

一、當來廣西止有秦孟四一火賊，只因稽於剿捕，致上下相挺，於是遍昭、賀境皆寇。今據山前連日所申，則秦孟四已遁，杳不知其蹤跡。如近日廣西所報禽毛丫頭，唐督捕所約夾攻倪崇七，桂路分所申打扶靈源寨，皆枝葉去處，而渠魁則失之矣。某前嘗畫稟，以此寇必祖故智逃散，今乃果然。重兵爲錢糧所牽，無持久之理。班師則禍本仍存，頓兵則吾力不繼。此事大欠結束。今宇文帥參、王環衛兵，此時方至山前，且看申來如何。

一、秦寇實未易驅除，若下得細密工夫，千百人亦可取。若只持堂堂之陣，則高飛遠舉，無如之何。今廣西既失了秦賊，看來諸軍逢一賊村便打，遇一賊寨便攻。此等相挺脅從，却使得招諭。前日之所謂招諭，乃是姑息之政，若兵臨其境，告以禍福使降，宜有必下之理。此時若憤招安之非策，只一槩殺去，却又欠斟酌。主其事在廣西，本路又不得而專，大闔以爲如何？

一、本路所仇者，秦寇耳。今兵入廣之後，秦不可蹤跡，於是亦不免到一處攻一處，恐壞生靈過多，而失吾尋仇於秦賊之意。草間狐兔，無盡滅之理，大要只當去其渠。既失其渠所在，而專泛及於其他，心甚念之。大闢何以處此？

一、廣西備白劄子所陳，牒報本路全州有鹽田峒秦小九窟穴在其中。此事誠有之。陳巡檢者與賊通，此則未必可信。訪聞此峒形如葫蘆，前尖後闊，所以秦小九入而據之，蓋以其地形險巧，故寄迹於其間，而前後則不擾全州之境。賊不欲召兵，意將以自存也。今亦安知秦孟四不竄其間？但其地既有一夫當關萬夫莫前之勢，未容輕於進攻，須以術而後可破之。前日見王環衛申，將來乘破竹之勢，一掃空之，詞氣若容易。然凡言語輕率，便有取敗之道。當一面報山前，子細調用，仍與全州土人密議措置。若不甚煩兵力，尤爲上上策也。伏乞鈞照。

十一月十八日

一、秦寇竟無蹤跡分曉，公文中或曰在大明村、小明村，或曰在大花山，或曰在螺溪源南上坪，或曰在南團平山、白石山脚，其說不一，已難信憑。今得王總統報，直謂二十餘日，秦孟四全無風路。則兩路用兵以來，此賊之出沒可謂神矣。大槩平賊，全要地脚土兵之謂也。今本路以客軍望望而前，固已失之。廣西爲地主，而全無地人問探，雖東兵甚多，要亦徒孟浪耳。某前嘗采之南士，皆謂秦賊狡猾詭秘之甚，見吾強則避之，知吾弱則乘之，固嘗畫一，塵徹鈞聽矣。今果出避

他所，則日下工夫，止當探實秦孟四所在，然後可言進討。不然，泛泛而往，果何所爲？廣西牒報，謂湖南兵不當越界深入，止宜在兩界上伺候會合，殆有所激而云。今已報山前，且回兵駐泊湖南界上，一面遣人關會唐督捕，探問秦孟四所閃着實。若秦賊有的所，唐倅有密約，方可鼓行而前。緣兵在昭、賀境內，則糧運在路，亦不無憂虞。偶或爲賊所梗，立見狼狽。是以回師界上，乃十分持重之舉。亦已語之僉舍，載之公文，當必先徹鈞覽，不免專輒，仰乞鈞察。

一、廣西昨報，本路義丁生事可畏，遇人則殺，遇屋則燒，遇財則搶。此輩素不知紀律，所至殘賊可惡。已行下杜督捕、桂路分，嚴與禁戢。今續得廣牒，以義丁越界深入，肆行劫殺，大不可令衆庶見，只得抽回。緣昨來桂路分初遣之時，止有二百兵，故須義丁爲助。今使闖調兵既多，則亦不須此輩，吾運掉自有餘，故抽回義丁者，所以隨時取中也。伏乞鈞照。

一、扶靈源打寨之舉，頓覺泛泛。當來本路止於問罪秦賊，朝廷旨揮所討亦秦賊耳。諸軍在扶靈源，枉費辛苦一番，可謂失本旨。是役也，王總統申來是一說，桂路分申來是一說。見之宇文帥參點對，二將覺已微不和。又義丁乃桂路分所彈壓，而廣西累有云云。今既抽回義丁，則桂路分亦不當更任事。已別作稟議名色，喚桂路分赴司，而其本兵則令戍將高成統之。一則二將若果不和，末流必費處置，不若解於其微；一則以其不能鈐轄義丁，即奪其職，亦御諸將之微權也。伏乞鈞照。

一、道州供億，委有可憂。緣自七月以來，郡中已極其剗刷。至近日，覺運幹之術漸窮，雖曰於有

管錢米內通融支遣，然苗糴亦自無多，此豈可動？不得已盡指準爲券米，亦無可繼之策。若券錢一項，一日須三百千，則十日三千緡，其何所措畫而可？徐守不幸末路當自重擔，秋冬間無日不病，此月十二日忽至大故。雖有數行焉，而其困於憂勞，亦云至矣，甚可痛念。今幸而王守已來，數數過從，欲脫而去之。前日得其肯往，約二十四日可交事。忽得徐守訃，山前生券間斷。中間新守未到已前，有數日無官主張。於是亟差教授護印，而以十日軍券責都副吏以私財應副，違從軍制。此從權，甚不得已之行移也。今既抽回義丁約千人，既可爲道州解小半支吾。然尚有千四五百兵留竟上，軍券不可謂少，頃刻不容稽違，方來者亦不知所措。使闔雖申朝廷，從運司應辦，然旨揮遲速未可必。今合有救急之策，不全仰於道州。若因循處之，則道州必有一日乏絕誤事。此時噬臍，何濟於難。此最關係，幸先生深入思慮，亟謀所以救此。某不勝拳拳。

一、全州鹽田峒爲秦小九所據，其峒地形險絕，未易以兵力取。昨王總統申來，云俟回軍掃清，言之甚易，某殊未以爲然。今得宇文帥參公文，果亦訝其輕發。山前得宇文丈以審重持之，亦大濟事。此峒中百姓，皆耕他人之田，田主皆在峒外。秦小九不過寄巢其間，峒民元不隨從之爲寇，儘可從土人上作工夫。某近已得一全州土豪，與之計事，已畫爲三說，或誘或逐或擒，於中忽濟焉，則禍本拔矣。柯倅赴全州，迂道來訪，已悉計授之。若不動聲色而集事，又羅飛之於晏九五也。伏乞鈞照。

十一月二十六日

一、數日前諸處報來事體襞積，一則道州以糧道爲苦，山前謂昭、賀路梗，宜寄糧於扶靈源口，殊覺未便。一則我軍連日或打扶靈源，或打申家峒。於秦賊不相干，而陣亡傷損者多_(三)。恐攻擊不已，或落賊姦，非細故也。一則義丁不依紀律，人衆難於加刑。廣西報得既可畏，而宇文督軍中來亦云然，恐末流猖獗難制。一則道州以供億爲病，覺已窘束不可當。如人數可減，亦是爲道州略省人數之一端。一則王總統與路分所申扶靈源事，言語參差，見之宇文丈點對，覺已有覺。昨與帥參議以高成易之，宜及此時舉行。元說所以本司一番區處事宜，欲諸軍駐界上，欲義丁且抽回，欲桂路分來稟議，此一時也。累日不見山前報來，繼得曆中鈞批，則未以所行爲照。某退伏自念，殊坐專輒，方議所以稟承鈞命，今得宇文帥參申到，則已提兵越昭、賀，入靜江之南團，與督捕聲迹相聞矣。據備述陳忠所報，云南團十八村村老陳狀乞免洗蕩，自認捉出秦孟四。則是秦孟四已見端的所在，村老既認捉出，此即鈞諭所謂地脚者，却有可望捕獲之期。自今我軍如唐督捕之說，與廣軍同在南團，四路匝住，不容透漏，以待村老捉其渠魁。是機鋒相湊漸有着落，此又一時也。即已飛報山前，既是唐督捕有明報，秦賊有實跡，一面乘機進取矣。

一、義丁昨者抽回，爲在昭、賀境生事，且前無秦賊可攻，故隨時施宜如此。今既同大軍深入靜江，見匝住南團賊路，則此時亦無緣可以抽回矣。已飛報山前，盡從便宜調用。如仍前生事作

過，則照元行放散。仍十分丁寧頭目，極意鈴束，以自贖矣。

一、昨以秦賊無蹤跡，檄桂路分赴司稟議，面授方略。今高成暫總本軍，不曾明其有過。今覺鈞意，亦不欲抽回。亦已報桂路分，既是山前已見秦賊蹤跡，不妨乘機集事。如未離軍，不須稟議復往。

一、以前言之，秦孟四杳無風路，我軍深入，真有未便。以今日言之，村老既認捉出秦孟四，我軍又已得廣回報，向前會合，獲賊有期，班師有漸。累月爲此憂窘，今纔得伸眉耳。

一、杜通判聞徐守之訃，篤同官之誼，歸理其後事。申來云，一見新太守，即復往山前。此時想已離舂陵矣。

一、準牒報，已借道州二萬芝楮，二千石米。中流一壺，爲濟不小。昨見道州申來，謂山前一日支錢二百貫，米百石。以此數準之，使闔所借之錢可支七八日，所借之米可支二十日。今覺歲前，此事須可結束。姑以歲前約之，尚有三十餘日。道州儘有米，特錢未有從出。使闔所申朝廷，從運司應辦，若早晚使得回降，道州尚庶幾焉。

一、鹽田峒之事，昨已面與柯權郡議，以土豪誘之，或誘或逐或擒，只消得如此措置。却未見柯權郡申來，容更密叩之。

一、伏準使闔行下，議置寨留屯。此乃是湖南防制廣寇之第一策。聞全、道州邊廣去處，無歲不避寇。大抵兵來則去，兵去則來，極以爲苦〔四〕。若建寨更戍，有數百人常在界上，則廣寇無敢復

犯湖南，此一勞永定之規模，非但禦今日秦寇而已。是議也，王判官垚當與董倉漕言之。倉漕已見報，會王判官到司，已與面議，見歸道州，與王守條畫申來。今不待道州有請，而使闔計慮已及之。此事甚計緊切，不論秦寇已獲未獲，此一舉乃是爲湖南永久保障之計。公文申析甚詳，更在鈞意裁處。《文山全集》卷一二。又見雍正《廣西通志》卷一一二。

〔二〕憤：原作「憤」，據庫本、《廣西通志》改。

〔三〕原文每則之後均有湖南安撫大使江萬里之回文，本書已別收入第一七一冊江萬里文中，此處刪。

〔三〕傷：原作「石」，據《廣西通志》改。

〔四〕極：原缺，據韓本、鄆本補。

乞將所部義兵赴闕申狀

德祐元年正月

準省劄，令江西副使黃萬石星馳入衛，文天祥將所部勤王義兵留隆興府事。天祥以身許國，義不辭難，上下東西，惟命奔走。伏念天祥猥起書生，豈諳兵事？昨者恭承太皇太后詔書，召天下勤王，天祥待罪一州，忠憤激發，不能坐視，移檄諸路，冀有盟主，願率兵以從。人心未易作興，世事率多沮撓，北兵日迫，血淚橫流。伏蒙公朝除天祥右文殿修撰、樞密都承旨、江西安撫使，續準除江西提刑。天祥極知該恩過當，所當辭免，痛心時危，無暇爲平時揖遜，亟憑使名，召號所部。惟是帥司無

兵無將，無官無吏，無錢無米，徒手自奮，立爲司存。今已結約贛州諸豪，凡溪峒剽悍輕生之徒，悉已糾集。取四月初一日提兵下吉州，會合諸郡民丁，結爲大屯，來赴闕下。忽得留屯隆興指揮，觀聽之間，便生疑惑。緣天祥所統，純是百姓，率之勤王，正以忠義感激使行，又有官資在前，爲之勸勵。此曹銳氣方新，戰鬪可望勝捷，若閉之城郭，責以守禦，日月淹久，烏合之衆，不堪安坐，必至潰逃。此勤王與留屯，較然利害之不同也。謹瀝忠忱告鈞慈，特與收回留屯隆興之命，容天祥照累降指揮，將所部義兵來赴闕下。《文山先生全集》卷一七《紀年錄》注引。又見《續宋宰輔編年錄》卷二三。

全宋文卷八三〇三

文天祥 六

回胡僉判請交割書

除寧海軍節度判官廳公事日

某仰德襟期，比布之竿牘，顛飭謝言，茲不贅吐。首祈崇炯，某幸甚。區區此來，得忝交代，意者天將開攀拊之緣，使之拉湊，一至於此。惟是天賦偏於愚戇，親見聖主懇焉求言，意應詔者必有中今日之故。側聽逾久，無能爲國家陳大計者。私念上悔悟勇決如此，而某蒙恩至厚，他人既不言，則雖疎遠，豈容避其責，是以積忱累日，冒死投匭，以冀一感悟天聽。出關席藁以來，首領且不自保，況苟官職乎！高誼不薄，猶以同寮爲情，連屈軒車，復畀翰墨，一吏至，又持公文以來。周旋曲折，無非眷愛，某感激不自勝。惟如前之義，則有不可孤長者之意，不敏謂何？某尚留此待旨，若數日後威命不下，則是上憐其愚而寬宥之，某當歸且念咎矣，而非所敢望也。所有添差僉判廳公用，某一切不曾祇受。或郡府不以某爲不肖，他有情文，則恐吏輩爲欺而亦某所不與知也。本須具狀申府，惟身

爲罪人，不敢自擬於屬吏之列。得於畫諾之次，叙其衷情，則某之受賜甚厚也。臨風拳拳。《文山全集》卷五。

賀吳提舉西林書 己未

某自九月赴京師，時請叩門墻，蒙警策備至，妙語天然，式相行色，篋笥間至今耿耿有光氣。第某解舟至豐城，及聞新局肇更，鄰靡茂畀，細讀「仕隱不同轍」之句，則雲駛月運，舟行岸移，轉瞬之間，已成兩樣。雖然，此非爲明公榮也，纓冠褰裳，世道有賴焉。某來，上下以防鄂故^(一)，爲之瀕洞。聞諸闔雲集，而敵正不多^(二)，以此爲不足慮。獨賜教時，則衡陽之事，明公蓋已及之，而中外未之信。某以十月晦至脩門，則聞聚毒已并，流波漫漫。秣陵荷擔之事，蓋凜凜已兩月；中間新相至，則又得月十日定帖耳。然我之緩急，往往視敵之起息爲之，則定帖者未可保也。譬如一間屋前，人放火已燒及旁舍，僅僅得全宅未動，卒急得一曉事人率衆拯救，雖千百擔水，未足以頃刻沃滅。明公蓋防防一大頭項也^(三)。今事莫如袁、吉之急，袁以改畀明公，而鄉里又得平林爲重。時有明公諸人，必能一心同力，以障潰堤之衝，藉此無恐。惟內間則病根未去，履翁掣肘尚多。雖言路大開，而奸諛熏注之深，搢紳多不能自拔，徒聞應詔投匭，則學校與布衣而已。世變至此，可爲慨嘆！某不量其愚，輒上書論其事。區區以爲宗社有故，死亡亦在旦夕，不若犯危一言，有及於今日之難，其得禍

與否不計也。今出關待罪已三日，而上猶未見施行，未知後命如何。藉天之靈，祖宗之休，明公之庇，得全首領，而以周旋於義旅之後，不勝願也，而不敢望也。封事彙止於一本，付璧弟全錄以呈似，其疎狂，知執事不笑且憐之否。共惟節鉞交錫，旌旗一新，誼當專狀爲慶。顧世變至此，明公方任大責重，以與上下同憂患，某不敢作平世語也，惟明公亮之。引筆嚮風拳拳，不備。《文山全集》卷五。

〔一〕防鄂：原作「鄂鄂」，據一九三六年世界書局排印本改。

〔二〕敵：原缺，據右引補。

〔三〕防防：庫本作「防火」。

回聶吉甫書

號心遠

某比道從鳴珂，幸甚獲下膺龍之拜，蒙眷愛稠渥，侍樽俎間者連夕，感激不自勝！別後凡百餘日，數千里行役，貿貿於一來一往之間，大可取笑。伏承寶墨，鏤教備至。今天下大勢所以削弱不支，實坐於文物制度之密。區區直欲割去繚繞，使內外手輕脚便，如此而後可以立國。中書言規模大概，所以纖悉上下其說則未也。朝廷若不鄙而行之，則台諭欲列置一帥，如古方伯連率者，又當再商量也。區區之心，既不足以行於國，退而欲爲一鄉一宗之謀。正將擇險以爲依，集衆以爲安，但事勢

浩大，不量其綿力，而欲舉之。善後與否，視無所及，何如！某乍歸冗劇，使命日亟返，姑此治報。何當一日會晤，以請所未聞。《文山全集》卷五。

賀何尉書

名時，字了翁。

某頃揭揭入國時，江皋祖帳，爲意腆甚，感激之私不自勝。別後不圖世變沍沍，天下大事幾去，某始而駭，中而疑，繼而憂憤，又繼而大聲疾呼，以至於流涕出血。相去近百日，而展轉變化以至若此，事變可畏矣哉！某學無涵養，不能謹其所發，倉卒來歸，求爲杜門循省之計。藉慶雲在上，以此月七日善達鄉國。甫入境，側聞一同桑梓，若君實庇蔭膏澤之，以廉革貪，以明易暗，以神奇變異懦，大冠縫掖，交以程、吳歸焉。方謀奉狀至屏下，而紫氣煌煌，已移照鄰次，交臂相失，懷此悵快。當今事會方殷，人才不競，一杞二杞，國家常病之。今州縣之於執事，亦此類也。凋瘵瀕洞之餘，雖近於不可爲，而開繁被劇，如長才得以自見，可賀也。吉水之爲邑，得之朋友，見謂官錢無定額，賦無正籍，是以若此其竭澤也。平林以鄉人爲郡，念此至熟也。執事軍期之暇，爲之定制立數，求爲一定之經，惠幸茲邑，其庶幾乎！《文山全集》卷五。

上丞相書

除秘書省正字，辭免不允。

正月吉日，具位文某謹再拜奉書于某官：某昨蒙朝廷不以不肖，授秘書省正字職事。某自念非才，未有庸歷，輒具狀辭控。既而省劄降不允之旨，鈞翰重促行之命。伏惟聖天子之所拔擢，大丞相之所提擢，德至渥也。某一介晚末，跼伏深密，所知不出田里。大丞相勒名鼎彝，紀功太常，坐于廟朝，進退百官，而佐天子出令，下土之人求望其位貌，聽其警效，不可得也。惟聞弓旌紛於阿澗，束帛徧於巖野，元德碩望，麟游鳳集於省臺之上，想望風采，以爲不圖此生獲見昇平如此。詎意今者宸命收錄於草茅，鈞畫照耀於山谷，恩光所被，震悸不自持。僕惟此舉不見於今世久矣。夫大君宗子，居天位者也；宗子之家，相理天職者也。自一命以上，所以輔贊大君，彌縫家相者，皆將以分奉天之責者也。《書》曰「天工人其代之」，又曰「欽哉，惟時亮天功」，又曰「天命有德，天討有罪，天叙有典，天秩有禮」。韓愈曰：「天付人以賢知才能，豈使自有餘而已？忱畏天命而悲人窮也。」天命人事常判然不相侔，而前言往傳動必以天爲訓者，人雖藐然，萬物備於我，苟爲凡民則已，大之爲聖賢，秀之爲士，天地民物，孰非一己之責？任重致遠，皆性命之當然也。由此觀之，用人者非私於其人，爲人用者非私於其用。近臣之得所爲主，皆所以事天也。此意不明，上之人操其公器大柄以自私，曰「吾能以富貴人」；下之人失其靈龜，貿貿於勢利之途而不知返。是以上不知以代天理物爲職，

而無復有以貴下賤之風；下不知以畏天悲人自任，而無復有比之自內之義。天地失位，人極不立，人物悖其性，往往由此者多矣。伏惟大丞相勳在王家，意在人物，方且以不滿假處功，以不驕吝處才，開忱布公，集思廣益，嘉與天下賢士大夫以爲共理，如僕庸愚，亦得自列於兼收並蓄之下。顧僕不足以稱所舉爲大負，而由先生此心，天命之所流行，國家之幸，斯世之福也。《謙》之九三：「勞謙，君子有終吉。」先生之用心以之。《泰》之九二：「包荒，用馮河，不遐遺。」先生之用人以之。孟子曰：「古之人所以大過人者，無他，善推其所爲而已矣。」由是而言，自可比功於隆時，垂號於無窮矣。僕雖嵬瑣無足齒，其於明時不敢自棄，求所以無負上帝之衷，仰承君相之惠，將盡心焉。某已於元日祇被新命，謹別狀遵稟，惟是屬有私役，造闕之月日，尚此遲之。伏惟大丞相矜憫其情，而原其後至之罪。公爾忘私，國爾忘家，某之補報知遇將有日也。下情不勝懇惻激切之至，謹奉書，不備。

《文山全集》卷五。

通廟堂書

溥論承心制事。

某仰恃鈞慈，直布心腹。某昨歲四月，遇先人本生母之喪，以服制未定，請之朝廷，遂作假俟伺旨揮。後來此申未及下，而某得劾。某以義起禮，謂先人若存，則於所生母當申心喪；先人既已矣，則某照承重例，遂承心制。自謂仁之至義之盡，莫如此矣。未幾，《龍溪友議》板行天下，謂某當有

重服，匿而不行，一時聞者，爲之疑惑。後巽齋歐陽秘書守道爲《或問》，衢州曾添教鳳爲《詳目》，二先生發此精義，禮意昭然大明。某竊聞《龍溪友議》印本以萬本，閩、廣遐陬莫不有之。既不能家至戶曉，須得朝廷討論墳典禮意，播之邸報，著以爲令，使天下知孝子慈孫之用心，而不至爲謗者所惑。是以拳拳致請，乞下太常討究一番。三月末旬，伏領鈞翰，特蒙先生照見曲折，謂其所遇在禮之變，所循爲禮之正。且如昨者，臬申已下禮寺，某以爲定禮典，正流俗，在此舉矣。四月三日，忽得承受人報備至寺狀所申，乃引紹興休寧縣尉蔣永吉與寶元集賢校理薛紳爲證，直指爲某合持齊衰三年。嘻，其誤矣！聖人制禮，自有隆殺，其隆殺本之人情。切詳蔣永吉之祖妾直下只有蔣永吉，使蔣永吉而不服，則其祖妾爲若敖氏之鬼矣，所以爲孫者須持齊衰。今先人之本生母自改適劉氏之家，有劉氏子孫持重服，則主祀固是他姓矣。是以某體先人之心，則只當承心制也。況蔣永吉無祖母，今則某有正祖母在堂，何緣可爲劉母持齊衰乎？劉母之子既持齊衰，某又自姓文，何緣兩姓俱有齊衰之服乎？又詳薛紳之母，既稱爲「祖母萬壽縣太君王氏」，則是嫡祖母也。當時朝廷止給假三日，只從孫之本服。所以薛紳再申指爲先人所生母，謂服不可絕也，故有三年之制。此正是承重孫，又自與蔣永吉者不同也。禮官不讀書，不講義，不明先王隆殺之意，往往只據吏人檢至故事，見有一「父所生母」四字，便謂事體一般，鹵莽申上，更不曾子細致辨於同異之間。今且未須論某所得服如何，且只論先人之服。先人之母改適劉氏，既有劉氏子爲服，且先人係出繼別位，又非本位之比，先人只當有心制，不當有齊衰明矣。若先人有齊衰，則某當以齊衰；先人有心制，則某只合承心制。豈有先人本

等止有心制，而某乃有齊衰之服乎！朝廷所行，便作萬世不刊之典，毫釐之間，所當致辨。矧禮意粲然，非有嫌疑，又何難辨之有！某承心制已一年矣，今非畏有齊衰不願承服，但可惜禮官如此討論，萬一誤朝廷，備據行下，恐《國朝會要》上又錯添一典，故不免貽將來朝廷無人之誚耳。今看來禮官未必解事。先生揆之本心，若以爲某見行之禮既安，徑乞從都省點對行；萬一已照寺狀施行，亦乞改命，庶不悖於人心天理之正，而古聖人制禮之意得行於今，其於綱常，豈曰小補之哉！《文山全集》卷五。

〔二〕禮官：原作「禮者」，據庫本改。

通江參政古心書

某即時甘雨，共惟宮使大參相公先生芝山清逸，珍館宴超，天相有道，鈞候動止多福。某昨歲獲走一介詣舍人門下，伏蒙鈞念，勞苦有加，祇服訓辭，至今亶亶。俯仰山林，感慨年歲，又若是其闊疏矣。某官百年幾見，一代共宗。司馬居洛而相天子，活百姓，都人西其首而望；張紫巖杜門白首，而嗣皇嗟嘆用晚，倚之以向中原。先生今其人也。上方舉元祐故事，勤於夢卜，旦夕爰立，言人人同。先生不以此覲於當世，而當世以此祈於先生。惟先生重愛眠食，以幸世道。某屏伏田野，蒙賴鈞

天之庇，守先人墳墓，幸無闕狀。追惟兩年間，口語橫出，先生進而廟堂，退而江湖，德於其人，如出一日，傳所謂生死肉骨之情也。報答已知，言語抑末，傾竭犬馬，尚庶幾於門墻。專人上狀，百拜起居。袞烏皇皇，未遑納拜，心之泐泐，如此江水。仰乞鈞照。《文山全集》卷五。

通潭州安撫大使江丞相書

某在門墻諸孫輩行中，而所以蒙鈞天造就，知愛綢繆，獨出乎諸生之右。然號爲登門垂二十年，而至今庭下無愈之迹。古人負笈從師，不問道路之遠，某乃不能自拔如此，殆不可對人言也。茲者誠不自意先生手提王鉞，作鎮於重湖以南，而某適以臬事一節，奔走於賜履之內。昔者詹企台階，坐霄壤隔；今乃得以詣大府，受約束，有一日斂板之便，豈天殆爲小子計乎！某始以親老丐祠，即趣旨下，再請則瀆，於是姑以單車出門，蓋馳驅數旬，又須乞便郡歸養耳。某四月八日辭膝下，留廬陵城中，始聞先生拜乾會節於清江，亟亟追逐，牙纛度宜春、醴陵間，所蹉跌片雲間耳。茲專布狀，重謝不敏，且致恭先之悃。參謁邇只，溯風距踊。《文山全集》卷五。

與李復卿書

長弟初赴臨安府司戶日。

某比者吉蠲子墨，祇詞涓房，留連踰浹。甫拜答灑，蒙不彼外，感荷感荷！茲專布區區之心。璧弟不穎，竊第奉常，受官京兆。初欲鞭策向上工夫，故多求山林歲月，以自爲地，事不可料，欲緩得速，東行且有日矣。此弟雅欲致一朋友，相此遠役。大冠峨如，大裙襜如，服斯服者不少也，而流俗薰蒸，靈龜磨蝕，區區所爲，例指以爲迂，而他求所謂不迂者，抱膝長嘯，寡和奈何！執事氣貌餘子，言根古人，疇昔之日，幸接光塵，論議之末，共爲慨然，其誠有得於同然者。憑恃襟雅，僭欲屈致崇峻，以副前所期。此弟天資每與義理合，喪本心以求外物，則自保其決無也。惟是閎深博邃之學，汪洋演迤之文，日力方來，正將從事。執事與之處，公餘得商略上下，交闡互發，他日此弟其殆非吳下蒙乎，某敢不知自。交際之道，莫重乎其初，輒拜此紙，以將盟言。聘資不腆，別牋并致不敏，萬萬控謝不遠。《文山全集》卷五。

與孫子載書

季弟與從弟從學。

某聞古者家有塾，黨有庠，士生其時，而爲師者非其家之父兄，則其鄉之所與也。是以不獨屑屑

於言語文字之末，而聖賢誠正脩齊之學蓋皆在所法焉。小弟肩項相齊，學無以大相過，獨其性質之陋，而未有以開通，氣習之浮，而未有以檢束。故脩業一事也，進德又一事也，某於古者父兄之教，既不克從事，則鄉評之峻卓，師範之尊嚴，是於執事乎歸焉。區區所以屈致之私，間嘗致稟，千金之諾，敬聞命矣。交游之道，莫重乎其初。禮有聘，謹肅將以前，并令二學生俯伏再拜以立庭下，俾之有敬也。《文山全集》卷五。

與胡觀洲季從書

某童而習之，授業解惑，有所自來。惟今父族母族，衿佩而立，受道者七人焉，將同堂合席以私淑之。輒恃鉗鎚之舊，爲此數子以北面請〔一〕。歲以緡錢百上之隸人。禮有聘，奉芝楮二十千，明有初也。吾未嘗無誨焉，惠徼福于夫子。謹謹奉狀，伏乞台照。《文山全集》卷五。

〔一〕子：原作「字」，據韓本、鄢本改。

與楊學錄懋卿書

字景堯，太學前廊。

某比僕僕來京師，幸甚得下膺龍之拜，辱賜之不鄙，軫顧稠厚。關外之別，江皋之餽，所以致縑綆者尤甚，感激不自勝。第恨匆匆聚會，不及爲頃刻之情，以慰滿連年契闊之雅，回首天上，瞻企拳拳。茲有稟事：朋友蕭文名來新〔一〕，新參之客也。此丈可人，且身事端正，無復頂冒異同之弊。揭揭而來，欲赴春參。鄉同舍往往望白雲而歸，其巋然爲游學瞻仰，惟執事耳。其所參務本，適在德星躔次之側，特來展先達之敬。不揆道瀆，道其至前，得蒙與進，稍與之溫存，使不致落莫，區區之望也。《文山全集》卷五。

〔一〕文：疑當作「丈」。

回秘書巽齋歐陽先生書

某因朱月窗來，伏拜誨帖，辱問璧弟，意極拳拳。近僥倖受縣，一出師門玉成之造。後生從政，未知嚮風，惟先生終教之耳。金盃在質庫，某處約之，甚恨未能自取之，乃勞先生厚費如此。山林中

亦無用此物，先生儻乏支遣，不妨更質錢用，第常使可贖足矣。吉甫一去連旬，頗孤龍頭之約。時且向熱矣，奈何！因便介到城，伸紙行筆，嚮風馳情。《文山全集》卷五。

與秘書巽齋歐陽先生書 一

某尋常於術者少所許可，而江湖之人登門者日不絕。彼誠求飽暖於吾徒之一言，吾徒誠閱其衣食之皇皇，則來者必譽，是故不暇問其術之真何似也。先生之於應酬也亦然。今是書之作，爲一星士，姓朱名元炳，字斗南，號月窗，則非前者之謂，是誠有取於其術矣。斗南，吉水文昌鄉人，去吾里三十。起田間，談命高妙精絕，盡奄同袍，試以百十命，應對如流，而人品之大槩皆不差，異哉術也！問其所得何書，則嘗汗漫於十數家，而其末也會歸於李吉甫、林開之說。吉甫之書，人多有之，以其深而不能詰。若林開則人未有得其本者也。斗南會二爲一，而又以所得於數十家者間出而證之，斯其所以獨步也。某既與之訂正二書，又詩之以見意。其別也（二），欲詣門下求品題，某告之曰：「先生品題甚易，至之日爲先生請十數命，某也如此，某也如彼，爲先生鋪陳之。即先生疊疊，豈惟品題，先生心肯，轉相汲引，即子命通矣。」斗南曰：「諾。」探其中，欣欣然殊無憚色。他人泛泛，得先生增重多矣，未有如斗南肯以術而取先生之知者也。是書也，某何爲而不作？事出專白，故不他及。

《文山全集》卷五。

〔二〕別：原作「剔」，據庫本改。

與秘書巽齋歐陽先生書 二

某前月二十八日，因朱月窗來遠迓，草草一帖致起居，不知是日正先生到家日也。後聞稍避訪客，住某寺久之，然恐訪者即所在相尋，亦未必能盡避也。某九月十三日方及門，值鄉榜未揭，此一月中相過者有數。近數日漸漸增多，來者必數百里或百里，不容不少款。閑居寒薄，殊不能支，而妄有干請者紛然，多不相亮，甚以爲苦。先生昔者於應酬亦苦之，今猶苦此否？嘗蒙見示，每許人作文，如置一針胸次。今某畏爲文詞，亦類此矣。習懶亦是病，先生以爲如何？念久闊尊候，亟起援筆，請所以誨。朋友以某遠歸，間有以羊麵問勞之者，某不敢私，輒以一控一石，獻之庭下。某昨在宣州，不敢携木瓜，宣州人不相忘，近却有以此爲意者。知先生嘗須此爲藥物，謹并奉四枚。一笑留頓，幸甚！《文山全集》卷五。

回劉架閣會孟書

某伏蒙專劄，重示先夫人誌銘，伏讀驚愴靡已。古心先生藻發清言，垂光罔極，慈靈有知，含笑

地下，若此可以無媿人子矣。遠日倏至，柳絮載途，追送傾城，素車銜尾。某於夫人契家子弟，以故不能攀望引紼，負負幽明，不勝愧恨。謹成些章一，少紀哀愴，以授挽者。伏想隨車號痛，涕如縷縻。孝在顯揚，願寬毀瘠。臨紙下情淒切之至。《文山全集》卷五。

回衢教曾鳳先生書

字朝陽〔一〕，號秀峰。

某數月於師門極間闊，顧山水荒唐，不自知年歲之運運，闕禮多矣，尚庶幾先生索之於形骸之外。別後得二子，丙寅戊戌，庚戌丙子，丁卯壬寅，甲午丙寅，命不知孰勝？乍嚮風水，即得三地。此須巨眼以爲然則然。向牛肉坑所結砌者，今知其大謬，爲棄屣矣。深之昨所問館，成否何所固必。新正詣清湖行禮，亦不見訪，往往泥哭，則不歌之意，非有他也。屋見說漸就緒，先生鼓舞倦矣，宜作意。身事悠悠，何爲行日，可得聞否？春和景明，其間一造盤谷，亦可遍觀先生所謂寶者。更願撥剔而後來，一來須十日，乃可歸爾。悉俟面賦，此不能盡。《文山全集》卷五。

〔一〕朝陽：原作「翰陽」，據庫本及鄧光薦《文丞相督府忠義傳》改。

回李宮教應革書

號肯堂

某頃以附伯昂令姪書，後未悉起居。深之令弟來，聞病日少寬，爲之喜幸。日欲專价詳問飲食坐卧之節，塵坳因循，心甚愧之。昔人云「身在則有餘」，舉天下紛紛藉藉不如意事屏置度外，專精神，事醫藥，靡有不濟。恐吾目所受病方將驅除，而又重以吾心之不寧，是滋予疾也。用敢於岐黃忠愛之外，輒奉清心一方爲獻，願於《大學》第七章加三思焉。偶璧弟有介歸就，有京書達左右，輒并遣前薄物將忱。徒覺塵瀆，臨風馳泝。《文山全集》卷五。

與朱太博埴書

一 號古平

某山中相望，數舍而遠，乃心精微，無往不通。僕十年受用順境過當，天道反覆，咻者旁午。七八月以來，此血肉軀如立於砧几之上，螻粉毒手直立而俟之耳。僕何所得罪於人？乃知剛介正潔，固取危之道。而僕不能變者，天也。僕誠不自意，乃於寒舍千步外得一陂陀，溪山泉石，四妙畢具，委曲周遭可十餘里。蓋其景趣兼盤谷、環滁而有之，而其曠遠縹緲，或謂南樓劣焉。騎馬囊飯，朝往夕還，率以爲常，而山外事一毫不接耳目矣。僕嘗羨君家山水之勝，幾欲作意植杖其間，而未能也，然

自以爲旦夕必償所願，不知吾壺天可以屈公一來乎？烟霞泉石，此不足與俗子說處，知音者自不同，正恐不問主人，徑造竹所。余月心來，拱被寶墨，惡乎而不用吾情？適凝祥觀蕭道士來訪，其別也，曰：「吾將造古平。」爲之書以復命，且道予懷，而假道士爲郵焉。《文山全集》卷五。

與朱太博埴書 二

某比及門即拜狀，聞車騎在郊外，正欲嗣訊，韓星忽來，偉然朵雲之贈故人。渠渠勞苦行役，諸兒那識此意？曉起入山，新流沒岸，棋聲未盡，石骨依然。人生往往如此，盈虛消息，道體流行，仁者謂仁，知者謂知，可超然一笑。承有訪剡之約，上巳前後，擬山行數日，須主人在竹所，方可乘興。分沙一席，已戒白鷗退避矣。呼燈走筆，馳意沈寥。《文山全集》卷五。

與朱太博埴書 三

極有磊隗，欲從執事傾倒一日，雲山浩渺，渺焉余懷。忽拜義獻帖，宛然玉立之參前倚衡也。垂諭前城李氏事，讀之甚駭。近有假爲黃節幹者，騙寫其家田莊，鄉解既見之發覺，昭其迹於墻壁間矣，曾鑑何人，又肆無狀，欺愚嚇聾，一至此耶！某平生所立謂何，豈有退居林麓，省咎敬威。我自

爲我，而青蠅紛紛，每使惡聲至耳。莫爲而爲，莫致而致，非命也耶？勢不得不榜，謹納一紙，幸轉之李氏，以破姦猾者之爲。使人日爲此等救過之事，不勝浩歎！某向者因及執事出處，常誦《伐木》之詩，今書所云，猶若未悟，稟答之次，臨紙惘惘。《文山全集》卷五。

回鄧縣尉中甫書

某入山愈深，於所尊敬，嘻其闊矣。前年足下以書議禮，得一往復，最後賜誨，迄今不能報。論其形跡，何前之恭而後之倨歟？坡云：「人情重往復，不報生禍根。」後山云：「一詩已經年，知子不我怨。」人之度量，固有相遠，執事知我，宜可無前日之事。今通國識其用心，由其未定，而言辭之不可以已也如是。自其定者而觀之，輕重銖兩，固皆當然，言語文字，幾乎閤矣。昨書皆精義所發，卷爲一通，謹而藏諸。後有作者，將爲此興起。客從巽齋來，能言執事日從翁樂甚。因款客坐，亟亟援筆，寫此悃結，授客以轉之左右。學之不加，感慨年歲。山澤雖遠，尚惠一言。臨風拳拳。

與顏縣尉復古書 一

某自春末得一夕承顏色、接話言外，此皆瞻仰之日。追憶是數年來，書筒無虛月，分袂亦不太久，未有如今之疏者也。然私竊自解則曰：此其迹爲然，不足深計。知足下得我同然與否？茲者恭承少迂蓬山之步，暫爲梅屋之游，脂車有嚴，滌篆伊邇，豈勝贊慶！執事自此開張清途，摩拂碧落，固其分也。顧徼富貴利達，以自致其身貴且重者，崇論宏議所鄙者也，不當薦是爲賀。惟邑於民社爲最親，惟少府於邑爲最要，平生學問藉是得以展布。潘輿康寧，千里迎奉，調熊嗜苦，式慰茲願。是二事深足爲年丈賀也。某雅聞說者以某日戒途，懷是惓惓，將祖帳道周，栢酒爲壽，屬有牽制，不能來，謹上狀，并致泊禮，以昭區區，惟容頓是幸。川平陸夷，行者有相，惟秋深殘暑未央，更乞頤輔崇重，以前三接九遷之寵。隨軒德輯，伏想喜氣方來，錫羨山則。別後或有鄉邦驅策，敢不下拜！

《文山全集》卷五。

與顏縣尉復古書 二

某歲杪得承便駛，遺以瓌灑，故人千里之情，藹然可掬，感鏤其如之何！茲得嗣書於令弟來歸之

便，尤見崇篤。喜審議論於帷幄之親，出入於錢穀之會，滿腔磊隗，庶其有以自試矣。來教自咎，以爲浸淪，汨於俗吏之歸，此意固超人一等。孟子論仁賢，而必望其有政事財用之效，蓋績用聲猷，不可相戾，本末一致，焉得就此以遺彼？自賢者徒以清浮爲高，而無益於實，然後小人得以事功自詭。今日挽回君心，轉移世道，吾輩正不得不自力，尚可以俗爲尤乎？伏惟尊同年其懋勉之。頃承刊委，比於敬巖之前亦屢說項。非某私於所親，名德如許，區區欲自默，本心亶亶，自有所不肯。此老亦既有所許矣，坐席未溫，遽爲林麓之歸，一場說話，又付畫餅。雖然，長松在林，利錐處囊，翹翹傑傑，旦夕諸公爭羅致不暇，瑣瑣愛助，何足爲說。某奉祠侍親，頗於讀書有一日之樂。朝市紛紜，怨謗之府，某雅欲退藏，以遠罪咎。賜教極得同然之真，或政事有足爲，庸陋矜式，毋惜刊曉一二。因以具報，情悃非筆可既，專規嗣布。《文山全集》卷五。

與聶吉甫書 一

某於斯文契闊，數年於此。載酒問奇，豈非夙心，而相望百里，離群索居，甚負此愧。以其傾嚮，輒私布之。先人季子生二十年矣，號曰學文，實未知方，有從第一人同堂而習，年相若而學相似也。閣下沛然古作，籍甚時名，所欲北面而從事者衆，區區欲使二子者私造化焉。間者疑其不可諗之，朋友固以爲請，不圖閣下不鄙夷而許之。敢專書以聞。閣下屑與之盟，豈惟二子得以受教，僕也

不敏，實嘉君子之賜。援筆荒蕪，臨風切切。《文山全集》卷五。

與聶吉甫書 二

某作別近一月，是一月中稍從事魏晉間歌行，若不能彷彿。魏晉間人不可作，那復問向上？非獨自歎，世代亦可感念。安得英妙沉著如心遠，即日執手共論此事，某平生斯文幸甚！此數月心迹相親近，方自歎解后之晚，而執事即欲舍而去之，奈何！僕恐於主賓之禮實有未盡，輒托絜矩謝過，并爲弭節從容之請。憐其至情，不曰麾之門牆，豈非三生之至願？俟命切切。景泰本《文山先生文集》卷五。

全宋文卷八三〇四

文天祥 七

回王國智書

某歲前作稟字，輒致松栽之請。專夫十餘，虬孫載道，一日塞破吾屋，即乘天時遍布滿山矣。異時車馬相過，山神欣然迎拜，必曰「此吾東道主」云。擾甚，布答膚率，別作謝狀。《文山全集》卷五。

與劉司戶三異書 號古桂

某自別，不獲奉起居，忽聞小爽調攝。昨見當風輒睡，不禁生冷，常憂其必爾，看來衛生之書誠不可忽也。心遠云，來時及拜問，已幸勿藥，極以爲善。暑天將理正未易，某欲助數藥，而不知當用何品，謾遣芝楮百千爲意。且宜深自愛護，候其可出，見訪未爲晚也。《南史》正本遂可得否？便中

謾得，介意爲荷！詞候草草，他規嗣布。《文山全集》卷五。

與胡端逸書

自別後，日在山間搜奇剔怪，得二所，曰「閔微」，曰「上下四方之宇」。幽閑曠逸，超偉軒張，其奇又在中磯兩峰之間之上。君再來，足以抵掌大笑。「翠晚」又改曰「浮嵐暖翠」，「釣雪」改曰「六月雪」，「特立」改曰「至大至剛以直」。我非好怪，地適足以當之，君謂如何？新昌弟一介至門，館穀之議諧矣。專人導其來庭下，請君泣盟。江南春小，天和景明，山靈川后，畢獻萬狀，欣然有應接佳客之意。不遠二百里，杖屨容與乎其間，不亦可乎？凌遽信筆，未究欲言。《文山全集》卷五。

與黃主簿景登書

名瀛

某輒有所請：鄉州有俊傑士曰胡君，名天牖，端逸其字也。十年前學校定交，意其旦夕獵獵乘青雲而上，尚遲決科蓋其命，然心甚敬且念之。來山中聚首半月，且留度重陽。問其館穀，則未有所嚮也。此君有能賦聲，於應用更高，好自脩飭，不爲流俗。足下若與處，日從三益，豈曰小補之哉！其家事自好，而嚴君主之，端逸歲得百千上下，則從人泰然矣。萬一賓廡無虛席，則明年君創員以料理

之，多費以取友，美德也。端逸留山中，若蒙雅報見及，相其受幣而歸，是所至願。《文山全集》卷五。

與劉正伯書

一 知瑞州日

某江滸分携，流光如駛，每荒城雲合，笛韻沉沉，吾故人之思未嘗不往來于懷也。秃筆鉗書，曾無暇晷，東風順翼，乃有飛牋，如之何不喜！執事垂光虹蜺，濯髮雲漢，少須暇之，駕秋濤而湘春錦矣。燒尾光芒，薦靈角尺，山中猿鶴，先侈光榮。某癡事未了，誤渥徵行，三辭弗俞旨，且俟代。持其觚落不敏者，如之何而任劇哉！託愛宿昔，不同他人，何以教之？因風馳泝。《文山全集》卷五。

與劉正伯書 二

某久不交訊，坐積尊仰。忽蒙專价惠報寇事，桑梓驚動，南望惻然。正具復間，得鄉里信來，乃聞十六日破玉山，次日破新安，吾鄉必不免矣。財物所未論，屋廬所未論，不知一鄉人命，是時得脫與否。未有嗣音，爲之哽咽。已作書控倉使乞兵剿滅。某即日交臬事，當以滅寇爲第一事，毋慮。尊公朝議，近况想安適，謹附拜一忱。郎君新功日富，次者且聯翩而上矣，可慶可慶！草草修染，愧甚膚帥。《文山全集》卷五。

回鍾叔玉三帖

某杜門避影久矣，出山一事不到夢寐間。聞命誤節，湘羅笑人。方循墻丐祠，以安半菽，倘拜俞音，春晝花陰，猿鶴飽卧，亦五雲之密蔭也。衮褒渠渠，餼禮郁郁，固不敢當，亦不得不拜。草此稟酬，尚規裔謝。

某昨承令嗣子京相過，眉目森秀，真可喜也。承以至德觀牌爲諭，便筆偶已染就，今謹封納，切希視至。

伏拜寶翰，寵有臺餽。塗抹無羊之詩，珍重來牟之意，我之懷矣，我之懷矣！親戚往來，本無所不可受，獨其名曰前日嘗爲某事也，若然，敢不重拜以辭。吾黨相與，誼如一家，緩急相赴，情之所，而足言謝哉！非曰不恭，其所操挾如此。薄言稟報，未既由衷，仰幾台亮。《文山全集》卷五。

與隆興黎節判立武書

探花

某自大名震盪以來，吾江西一佛出世，引領願拜，實不知前此固嘗坐下風而揖餘光也。去年汗漫一出，道過清疊，邂逅捧檄，歸省江皋，草草相見道舊，恍然驚喜，過望至洪。甚恨匆匆，郵亭晤語外，無從嗣集。蹤跡展轉，重見黃花，所思天一方，令人回首。某恃氣類之同，輒以士薦。漕闈新貢元劉君子俊，吾鄉清淑之英也，所居門巷相接，文學卓然，可稱遠器。今年以登仕得舉，士者以爲晚，旦夕詣星臺下。謂一世龍門，以未執鞭爲耻，敢告賓榮，許其漫刺。見所未見，劉君歸，可以語人矣。西雨南雲，臨筆馳泝。《文山全集》卷五。

與劉民章書

子俊

某自湘花別後，其人如玉，夜夢見之。名網猶免罟然，不足以得橫天之翼，每爲咄咄三嘆。空同上得書，乃知猶爲脩門客，何留滯周南之甚耶？詩云：「京洛多風塵，素衣化爲緇。」又云：「棲鳥戀舊林，池魚思故淵。」青山屋上，流水屋下，歸來自有樂地，乃欲以外物之盈虛爲面顏之有無，爲執事者左計也。乘興而返，萬里足下，可以遠道爲諉乎？某昨報舍弟，令贊千騎之歸，爲奉薄贐，想

已稟達。歸哉歸哉！臨紙引領。《文山全集》卷五。

與梅制幹書

自去年滄浪使者歸米氏真帖又三四，往往多從景明便鴈來也。洞門窈深，雲山千里，騎黃鵠，跨白鶴，恨不得一日共君其間。風雅比興，韶鈞交作，長軸大冊，一再寄意而不倦。鬼神闕吾山數千百年，今而後衣被雲錦，草木澤澤，光價益倍。章之三十二詩，四時朝暮之變皆有其象，獨以一詩當一境，則有不相似者。混萬顆珠璣，作一片圖畫，而江山無異辭矣，謹頓首謝，頓首謝。子秀別三年，漸成六考，通籍金閨，止爭浮圖一穎。近書謂赴吏部銓，將取一闕。人豪如此，猶落骰子選，豈非朋友之責哉！歲月易老，功業宜壯，早改官去，即仗麾建節無滯礙，男兒事庶幾哉！某當年間亦大參差，江西代者激爲波濤，使人彈指剝剝。賴君之庇，天日皦然，今可以適吾山水之陶陶矣。比詩云：「日日騎馬來山中，歸時明月長在地。但願山人一百年，一年三百餘番醉。」君念我悉，度欲知我近况，不敢不白。某惓惓故人之意，豈一飯而忘，顧數百日内，不能專一价附書，殷郵又不敢信，以是契闊詹仰，充塞懷抱，而未有以發也。李彪請假歸道，出琵琶亭下，率然伸紙，意之所至，不擇言語，臨書神爽飛動。《文山全集》卷五。

與杜教授抑之書

字伯揚，號帶溪，崇仁人，李梅亭高弟。

辱早春第一帖，遠佩意甚真。每一念吾弟，輒思老成。吾弟一出，幸無他，微執事教訓，何以臻此？不知菖蒲前後書琴，得至山中否？近來心思稍清，頗得專意研討，亦時不廢吟。向嘗令吾弟訪問《南史》正本與晚唐百家詩，想亦可得；如未也，執事試致意焉。古桂留館中，日得誦習《毛詩》，因知求《選》於《選》，止可爲《選》之子孫；求《選》於三百五篇，則《選》之兄弟可進也。相見當爲執事傾倒之。偶遣一介，信筆布露，馳泝雲表。《文山全集》卷五。

回謝教授愛山四帖

雖塊坐深山，於時高人韻士，鼎鑪獨無耳乎？載酒問奇，道之云遠，徒有是心，而未之能也。不圖五鹽道院，屈居仙客，階蘭砌玉，與亭芝相照映。每思吾仲取友必端，未嘗不自歎獨學之陋。手書寵貽，清揚流動，雖未見猶既見矣。何時簪盍，慰此忡懣。臨風馳報，書不盡言。

寒簷積雨，抖擻無悰。得書而讀之，昏眼爲拭。某落落白雲間，一疇春綠，自飯吾犢，浮世榮辱

事，付之山外。褒惜所蒙，君言過矣。然醴露醲郁，波及溝斷，企瑞芝而遐眺，佩金蘭之永好也。美人一方，書琴自適，爲誦《停雲》三過。

日於仲氏便价得書，振衣快讀，恍焉眉宇之迫吾睫。可人不來，蒼苔滿徑，得無忘把酒看山時約耶？西風逼人，桂香浮動，天池鯤化，搏扶搖而上之，捨愛山其誰屬魁？卷紙一幅，納之文房，衣被琳琅，騰翥光景，褚生輩亦將侈其逢矣！薄言占復，掛一漏萬。

山中度日如年，落葉蕭蕭，涼月墮砌，起視寥泬，安得知己握手長吟，寫胸中之耿耿，以相慰藉耶？杪秋餘熱猶壯，二豎者雖相戲而不吾虐，予亦從其所爲，倉扁輩未嘗屑屑然也，久之不覺脫然去體，是又不治之治，有勝於劑餌者。寵貽手札，問勞渠渠，故道其所以然，而以復于執事。《文山全集》卷五。

與廬陵劉知縣庭薦書

采山釣水，飲食於大夫之境，三年于茲，門無公事，得至於百里之室，幾於魚游江湖而忘江湖矣。伏諗解印西歸，揚舟東下。昔者河陽之李，今茲南國之棠，諸父兄子弟服習長者教訓，恨不留鎮

此土。雖然，此一縣之望也。縣私土子人，無所不治，是中都索包，總有相道焉。行矣，僕將大其所觀。某山深閉門，杳無城郭信，風傳令尹新舊之交，未及馳慶。乃承上書顛走告別，江頭折柳，柰何！不敏爲之慚對將命〔一〕，四壁空寒〔二〕，一無可爲載月助者。知心天遠，解后何年，詹泝風帆，江空渺渺。《文山全集》卷五。

〔一〕慚：原作「漸」，據韓本、鄔本改。

〔二〕壁：原作「璧」，據右引改。

與廬陵李知縣訖孫書

某邑人也。聞令尹之來，不能隨父兄子弟逐千騎於郊外，敢自訟以書，惟高明察之。某茲審承命九天，涖封百里，初條甫下，闔境爭驩，諒爲慶愜。某官氣宇鴻明，風猷駿厲。脩程步武，空萬馬以無前；清水鋒芒，解千牛而不頓。吾廬陵號壯哉縣，詞訟雖繁，而詩書之家衆；版籍雖廣，而期會之事省。約之以清淨，撻之以平易，以公之才，恢乎有餘地矣，會成美錦，造趣溫綸。某骯髒一世之沈浮人也，所占籍處，在治所之南三舍而遠，雞豚可千戶，民淳俗厚。僕也相忘於漁樵，而今而後其得一塵之託矣。僕實何者，首辱牋函，以此事當路之尊貴則有矣，區區何足以當之？輒裁牋賀上，并鍾

鼎大名，歸璧涓吏〔一〕。伏楮卷卷。《文山全集》卷五。

〔一〕璧：原作「壁」，據韓本、鄆本改。

與廬陵陳知縣堯舉書

昨歲京華，天作解后。每念晏公在陳，歐公在穎，一宋二蘇，千里往訪，竟日從容。以某不才，受知場屋且二十年，良覲乃僅如此，視子瞻、子京諸公，不知何地著愧。匆匆汰去，過荷遠將。一日江空，暮雲如水，涓濱之首寧爲他人回哉！茲者伏審肅持鳳檢，出宰螺山，車馬實來，旄倪胥舞，伏惟驩慶。先生聞多而學廣，事熟而心精。筆力千鈞，捕龍蛇而獲虎豹；雲衢萬仞，騎麒麟而翳鳳凰。未秣馬於天津，乃著鞭於雷邑。竹松林裏，不妨簡編之尋；桃李蹊邊，細數枝柯之長。小紆盤錯，便起扶搖。某閉門山中，傳來邸報，忽覩先生爲吾邦一來。古人重師友，至有塗竄片言隻字，以冀萬分益者。鳴絃千室中，有老門生在焉，知公不能用其愬然矣。惟素性疎嬾，無城市蹤跡，謹避聲利，不沾借於公私。自今以往，陰陽和，風雨時，曉猿夜鶴，左花右竹，吾君吾相之恩，亦吾座主之惠也。剽聞前茅在郊，謹具劄子候迎，臨風馳往。《文山全集》卷五。

回樂安唐知縣元齡書

深山中俯仰漁釣，久闊時牋，使者忽來。計一往一返，殆幾千里，君之厚我，感無有極。他人作縣，驚惴若不可以一日；先生爲之優游，政聲洋洋乎盈耳。難易殊絕，蓋必有爲之本者。旦夕細滿，綸綍在道。璧弟以斯文受知，僥倖通政，書來謂注邑當在春季。繼此望洋方新，尚賴教誨，庶幾自淑。刊曉寺記，微獎予不及此。惟平生於浮屠無所見，非敢有所攘闢，於其家數全不曾從事耳。恃愛直布，尚寬方命之誅。嘉貺頓拜，薄物非所以爲報。臨風悚仄。《文山全集》卷五。

回劉運使應龍書

一 號實齋

比承一介使人陟我山麓，問外自梅外來，執事惠綏一日之好，其與人也重以周，則既感激所蒙，致其多謝之私矣。未數日，從驛吏取近報，伏審升班西閣，移節南昌，提封不隔於故家，父老相誇於盛事，仰惟慶愜。某官揚休山立，玉潤金相。方其爲御史也，風采所撼，聞者凜栗；及其將指於楚越也，滿腔惻隱，人所不滿之處，入粗入細之規模，可以概見。歸來麟閣，還本等地位，已竊遲之。江西涸魴，延首福星，誰爲朕行？弄印未決，公未至闕下，就道相屬，亦曰此公鄉里，煩公歲月，又將

出少府節召公歸矣。某嚮者得節，亦曰鄉部，後來召罵，數月而不休。嘗試思之，近年如宏翁、矩翁，未嘗不漕本路，而二老之所以鎮壓群動者，年德位望自是過人，而持斧之役，旁午豪譁，又非計使比比也。今執事繼二老芳躅，仁聲賢聞之著於人久矣，萬無不及，惟有過之，此所以宜賀。而僕之所以亟拜此書也，前茅出嶺，聞已多日，勢必馳上巽書，歸釣山以俟命。上方屬意賢英，亟疾其驅，惠我江國。臨書不勝瞻依之至〔二〕。《文山全集》卷五。

〔二〕原注：「宏翁，包宏齋，名恢。矩翁，曾矩堂，名穎茂。」

回劉運使應龍書 二

耕釣山澤，飯疏飲水，不自知歲年之運運也。使者維何，云自南浦，飛雲五朵，居然下之。寒谷陰崖，冰霜積沍，春風不擇地而至，有如此者。某官天和粹穆，地望高清。夜占天文，福星直斗牛之分。薄蓬萊，厭承明，爲桑梓此來。釣山之下，雲露噴薄，油霖甘露流注乎大江之西，部人歡呼，吾父吾母。帝曰勞止，歸遂相予。僕何幸身親見之。某山人也，其於當路，厥有等威，不敢屑屑竿牘，致歲時之敬。謙尊而光，禮出倒置，德盛仁熟，悚然稽首。落霞孤鶩，水天茫茫，既不克偃僂請拜榮戟之下，心之精微，寄此函尺。永言歸嚮，江流知之。《文山全集》卷五。

與袁守雷侍郎宜中書

號省身

某前年赴宣州，道滕王閣下，望山川英氣，稽首人物，欲擁篲造門，而舟車異趣，僅能拜書問花竹平安而已。亡何蹤跡展轉，不遑嗣音；歸卧蒼苔，益以疎闊。其戀戀門墻之心，固如水之必東也。某比者伏閱邸報，竊審小紆紫橐，近擁銀符，吏竦旌旗，人傳襦袴，共惟驩慶。欽以某官抱經濟之秘，稱磊落之豪。青天白日鳳凰，百年美瑞；高山深林龍虎，一代傑魁。上方寤寐側席，圖致太平，甘泉舊臣，不當越在遠服。名藩歇馬，姑日起家，徑執事樞，旦夕有詔。某庚午一出，殊與戊辰相似，去住匆匆，取笑當世。杜門深念，益求寡過，未知所以稱塞於知己之道。君子不棄，尚惠教之。某久聞紫馬赴鎮，空山不能專介申賀，適逢過客，輒寫其私以自附於大厦燕雀之後。相望一方，馳泝切切。《文山全集》卷五。

與中書祭酒知贛州翁丹山書

一名合

晨起冠帶，輸寫積誠。世俗竿牘，曾是足爲有道者言？惟高明索之形骸之外。某青原白鷺書生耳〔一〕，童子何知，乍習句讀。凡先生之精神意氣，粲然於言語文字，公之天下，以淑後學，某皆嘗

得以朝斯夕斯焉，衣被遺餘，曾不自意早以名知於人。有我師焉，生同吾世，驅馳四方，乃不得解后。某日夜興起，謂當何時而後得免於常人也。流年堂堂，實勞我心。共惟某官孕光岳之精，參天地之運。大忠大雅，萊公、文正之心；不倚不偏，伊洛、考亭之學。斯文落落，上帝惠顧，天門夜下龍虎章，授公以柄，轆轤璇璣，經緯星辰。公從兩制，稍發蓄積，然後坐之廟堂，爲天子興建禮樂，洗千載房、杜之陋，太平之期，適當今日。某退歸以來，有泉石十里，足以爲適。浮空變態，日過其前，飯疏飲水，自求吾志。竊伏思念空同鬱孤，如在屋角，平生悃結，云如之何？輒因此時，以姓名通之門下，一言終身，尚庶幾焉。園丘慶成，上方親事，少府出節，必以公歸。迎拜東帆螺江之澚，以其時可矣。山斗高明，臨風切切。《文山全集》卷五。

〔一〕青：原作「責」，據庫本改。

與中書祭酒知贛州翁丹山書 二

某伏自空同玉節順江而東，獲從中流迎候鷁首。雄文鉅冊間想象變化，如高山深林，龍虎不測。不圖解后，遂拜堂堂。風流雲散，一別如雨，金聲玉色，夢寐以之。自先生振衣登朝，手提文印，以正照四海，國家誥令典冊，燁然先秦西漢之上。學校之士，莫不從風興起，彬彬郁郁，爭自磨濯。以正

法眼，作大宗師，世無歐陽，不當在弟子之列，某知稽首矣。主上尊德樂道，師用賢哲，論思獻納，日聞正言。孔、孟不得用於周，光、禹竟無益於漢。才與誠合，學與位偶，儒者之遇，未有榮於此時者也。《大學》之功用，至治之福澤，何幸身親見之！某疏脫之蹤，分安山澤，起家誤渥，忽畀龍藩，聞命彷徨，莫知所自。如聞天上聲光假借非一意，若可與從事斯文者。自古聖賢之佐、英豪之輔，莫不垂意人物，薦進拔擢，燮天功，經人極，罔不在此。共惟盛心卓犖，度越流俗，而某則非其人也，夜瞻紫微，徒有頓首。脩門懸隔，久曠音題，屬請事祠官，冒馳一介，輒鳴忡懅。未即趨樞，願言玉持金護，爲世道自力。臨風切切。《文山全集》卷五。

賀翁丹山兼憲書

某熟視一世，靡然風塵，刀筆何從縱橫旁午，架漏於士民之上，而世之言人材者，率如是而已。「安得結輩落落參錯，布滿天下，使萬物吐氣」，僕嘗擊節於斯言，悠悠空山，誰與語此！茲者喜審肅將繡節，通泣銀符，山川不改於空同，風采一新於江右。共惟某官淵源接乎諸老，氣槩聞於當時。人物眇然，真中流之巨屏；文章偉甚，稱南渡之當家。輩行諸公，鈞樞十九，夜半一劄，趣歸蓬萊，以其時則晚矣。上方式敬由獄，乃眷西顧，非有志念不足以洗冤澤物，非有力量不足以懲暴詰姦。故予環之寧遲，而乘傳之若屑。太平之責，正在方來，以公歸兮，政枋焉往？某碌碌不如人，獨有愚戇不

能改其素。追記前年冒乘君子之器，他不足道，惟姦宄豪橫，稍稍鋤擊。淺之爲日月，雖未得盡行吾志，庶幾無失職之恨。人情卑淺，憚繩檢而樂姑息，矧猶未免鄉人譁訛，朋興以要，其得罪於小人也果矣。伏惟先生昨者不賜鄙夷，心聲往來，藹然氣類之意，某誠不知何日得以執鞭下風。忽覩除綸〔二〕，心目開朗，我輩從事，俗吏奪氣。豈惟爲一道賀，實足自壯。謹專人上狀，頓稽庭下，少伸門墻燕雀之悃。蘋藻薄羞，別紙惴悚。《文山全集》卷五。

〔二〕忽：原作「勿」，據文意改。

賀江東憲方逢辰書

號蛟峰

某當公在螭坳時，嘗奉一紙書至于閣下。書上未幾，而公歸蛟峰矣。譬諸草木，臭味實同，詹望雲山，臨風切切。某茲者恭審升撰秘丘，宣威直指。西臺與政，蓋嘗識潁濱之文；東路洗冤，亦以行濂溪之志。六絲初駕，一佛歡傳。共惟某官色正而芒寒，揚休而山立。言語妙天下，材稱一代之奇；出處重本朝，望在諸公之右。自夾侍玉皇香案，等而上之，胡不均弘，俾執事樞。國家重更迭之制，江湖一節，煩公驅馳，式敬由獄，以長我王國，公所學在此。歸哉歸哉，中詔在道。某山林之下，靜觀世故，其於君子進退，安得不致其卷卷？芝山父老，擁星輶，以時考之可矣。輒馳一介，自附於

門下燕雀。江水東西，心期天遠，臨紙欲飛。《文山全集》卷五。

賀前人除江西漕書

某束書歸隱，有釣遊之所曰盤中，兩山對峙，間以小溪。日步溪上，極目滔滔〔一〕，輒自以爲晝夜不舍，此溪水會有達鍾陵時。而某塊守漁樵，則曾此水不若耳。昨孟君陞從番陽遣介來，嘗爲書附申起居，相望千里，亦不知上徹果何如時也。某茲者伏審班仍寶殿，節峻冰臺。貫索沉沉，方轉芝山之曉；使星冉冉，又回南浦之春。一水東西，二天今昔，伏惟歡慶。欽以某官寒芒五緯，絕岸孤峰。生漢子陵之鄉，雲山一日；派唐處士之譜，風雅百年。雖已跨海而望蓬萊，猶肯濡絲而陬原隰。濂溪道脉，雙井詩香。流馬木牛，既無媿於千古；落霞孤鶩，應可對於二公。所謂旂常，特吾懷袖。某磬兀抱虛，真無所用於世。曩六轡使江之左，每依餘光，以自映帶；今也一畝之宮，環堵之室，囿德宇而處。自茲以往，夜月如水，猿鶴不驚，田夫芸子，各適所適，則何啻如天之福！郵傳所至，不勝燕雀私情，即日謹奉書爲賀。臨風馳泝。《文山全集》卷五。

〔一〕汨：原作「汨」，據庫本改。

回許秘丞自書

號果齋

某火龍之歲，從集英門綴行而出，風流雲散，回首參差。不自意去年待罪闕下，獲接英游，心事流行，日星垂而河漢流也。湖陰送客，風露滿衣，移語崇朝，英槩疊疊。歸去來山中，至今夜夢見之。新昌小弟，夙被獎知，嘗察之情，始終一日。忝來遞示五雲，光怪照室，此豈四海九州無情人耶？鄉風九頓首。尊年文山立時行，日光玉潔，長樂鼓鍾，西清帷幄，終當著身。風日不到處，轆轤雲漢，經緯星辰，爲天下開文明太平之運。某被服光潤，實與有焉。某既還里閭，入山讀書，杳不知山外事。天上故人，重相顧念。適逢便武，輒謝所蒙。餘祈爲斯文珍重，慰此引領。《文山全集》卷五。

賀倪提舉普書

號警齋

某寄跡提封某水某丘，童子所釣遊，君侯實照臨之。報政將一年矣，某猶未能以民禮見。自盤谷西南而望，城郭在焉，相對五雲，輒移時不能去。某茲審宸綍鼎來，庾臺肇建。讀皇甫記，已蘇今日之疲民；傳紫陽心，又舉向來之荒政。風行新令，雷動歡聲。欽以某官神驅五兵，才入八面。作真御史，以直道而事君；稱明監司，行本心而澤物。公來青原，父母其人。屬時常平，弄印六服，牧伯無

以踰公者。西江涸轍，久煩公拯活。歲月少府出節，中詔又冉冉出建章矣。某自聽除綸，即欲自附於門下燕雀，側聞雅志引却甚真。上方倚賢者以其理，烏乎能從？臺治一新，境內爲動。某甫及拂紙行墨，以贊東注之盛，嘻其晏矣！世俗所以事尊，責以鱗番從事，公有道人也，某不敢出此。臨風飛動。《文山全集》卷五。

與新知太平州趙月山書

一名日起，集英殿修撰，川人。

某去年待罪闕下，幸甚得一再交書，幅巾獨樂。近在吳門，入秋正擬專介候猿鶴起居，會去國，不果。黃強立自竹所來，相見於六和塔下，遠蒙寄聲，多謝故人厚意。自是而入山愈深，杜門掃軌，無復南來鴈足矣。璧弟學製新昌，新年見告，二月遣人詣門墻通問，輒寄所思，寫之竹筒。既行，伏覩除目，欣審仍班內撰，領榷東藩。一札起家，千乘載道，共惟驩慶。執事青天白日之質，望之知爲正人；千兵萬馬之胸，識者推爲豪傑。六合悠悠，風埃滿目。所謂江左管夷吾，公其人也。偃薄起伏，如神龍天馬不可羈。牛渚天門，一瞬萬里，亦足以發其中之所存矣。天下事方有賴於公，時來爲之，孰之能禦。某夙昔荷相知，出人一等，以此不敢自菲薄。一別十年，浮雲進退，何足爲達者道，而學不加長，每每自憐，久不見叔度，鄙吝固宜。自今得聞一言，三日後刮目，未知於吳下蒙何如也？偶遇新昌便，意其介尚或未行，輒附賀狀，并寫戀嫪萬分之一。相望沈寥，臨紙馳泝。《文山全

與新知太平州趙月山書 二

某風雪殘年中，使者以餽歲至，嘗草草拜狀，竟未知果達籤房與否。過年百二十日，是間何限傾倒。毛穎輩不任事，姑寄一歎。比審放纜長江，休鞍盤谷。執事自宦遊以來，敷歷中外，垂三十年，曾無一日得從五畝花竹之樂。金山鷗鷺，甫此尋盟，如負者之息其肩，行者之休于樹，一時瀟灑，比軒冕束縛，瞠乎遠矣。浮雲滿山，任其往來，太虛真體，皦然萬古。某歸來兩年，處積毀震撼之餘，差幸天者之小定。自有溪山足以遊釣，漫不問其他。有詩云：「日日騎馬來山中，歸時明月長在地。但願山人一百年，一年三百餘番醉。」欲知近況，此其凡矣。念人間清福，莫如一閑。幸而吾二人皆可以自適，獨相去遼絕，無從合并。江東暮雲，長長在眼，輒專人奉問潭府居處之概。即辰夏氣方深，共惟靜養淳和，坐消熱惱，神明護持，式衍方來川至之福。臨紙耿耿。《文山全集》卷五。

全宋文卷八三〇五

文天祥 八

與知吉州江提舉萬頃書 一 號古崖

某兩年乎山中，春猿秋鶴，木食澗飲，蓋頽然世味之外者。五雲繽紛，麾節夾招搖，歷勾陳而下，青原白鷺，浩有生意。某甫與溪倪谷耄額手蒙幸，乃大化驅之出，束書就道，脩民禮公堂下。俎豆春風，簫韶夜月，藉之以詩書禮樂之光多矣。明公以洞庭五老之胸，時雨一路，曾未數月，春旗霜艘，風采軒豁，所謂動搖山岳細事耳。少須暇之，棣萼棠陰，先後醴郁，夢寐五采，衣被八紘，持國弟兄，盛事再見，大江以西之父老子弟豈得以私我公哉！某自解維江滸，風濤回薄，抵昭亭下，是爲子月丙寅。大壞積枵，觸手病敗。雖日夜爬梳會肯綮，然盲豎浸淫^(一)，非匕劑可藥^(二)。肘後寵靈，公不我靳，則宣殆庶幾乎。惟故山松菊，沐浴瑞露，而隴蜀之望復切切，微疇昔不至此。某日墮倥偬，神馳棨戟。甫奉陟釐，則已魯皋籍，獨不愧于心乎？歲將新矣，願言滿頌盤椒，對揚緜綠。此豈

無委，嚴立下風。《文山全集》卷五。

〔一〕育：原作「育」，據庫本改。

〔二〕匕：原作「非」，據庫本改。

與知吉州江提舉萬頃書 二

某伏蒙公劄下問勸分，仰見豈弟父母，救民水火之盛心。某實共邦人額手大賜。某所居里，凡千餘家，常年家中散米，一日不收錢，諸大家以次接續賑糶，可及三十日，隔一日糶，可當兩月，此方儘可無飢。他時不待勸率，自是舉行。明年係緊要年分，或須使榜一申嚴之，至期却當取稟。但四境委有可憂。蓋吾州從來以早稻充民食，以晚稻充官租。今年晚稻半虧，顆粒並是入官之數；早稻不過二三分，則是民食十減七八，此其所以皇皇也。近見多有趨龍泉、永新運糶者，覺彼二處米亦有限。縣大夫各私其土，不肯透泄，亦其不得已者。此須使司示以意嚮，使之斟酌放行，庶彼此可以均濟。最急莫如通贛州之米。近同年李守惠書，自謂年穀中熟，米價日低。某嘗答書云：「廬陵一歉，異於常年，田里憔悴，不堪舉目。惟章貢素無糶事，而得歲又偏，鄉人顛頓者往往相率而趨。治國民食關係，苟可通融，兼愛秦晉，公之惠也。」蓋贛浮橋泄米之令素嚴，田吉號產米，而贛多山少田，故爲

贛計，不容旁及鄰邦。今歲事既相反，又當通變。此須古崖一書，與李守通情，俟得其要領，然後大榜境內，許人赴贛收糴。此亦權宜之一策也。區區管見，姑復仁明，後有利便，又須陸續申控。《文山全集》卷五。

與知吉州江提舉萬頃書 三

某自聞琴鶴言歸，即戒筭車，擬送別於吉水、新淦間。初十日始得初八日申時寶翰，則知去期甚速，始意不可得遂，即抖擻作詩，馳詣使館，意必可相及。僕自城還，則知解維已三日，臨風悵惋如失。廬陵四竟皇皇，流離入贛，過吾鄉者無虛日。豈弟父母又拂衣去之，細民嗷嗷，皆謂「曷不留我公，撫我妻兒婦女」，一無異辭。此即公論在人心，不可磨滅處。吾輩仕宦，得如此，即無愧漢《循吏傳》，浮雲得喪何足較也？某念受塵兩年，當使君之行，不得往送，詩又不達，歉負爲何如！亟函元詩〔一〕，并拜此紙，從新昌璧弟處借一兵，走詣潭府，不知紫燕在芝山或在廬山邪？引筆馳泝之至。大丞相古心老師，某不敢容易上問鈞履，丐爲轉道。詹依卷卷。《文山全集》卷五。

〔一〕函：原作「亟」，據庫本改。

賀知吉州黃提舉器之書 名鏞

某密依使天，冰雪深山，與猿鶴卧，送流年、緡故牘於左泉右石間，非賜邪？每飯牛頃，必矯首畫戟下。茲審郡揚帝璽，節畀天囿，千里光華，一道鼓舞，伏惟驩忭。欽惟某官眼空四海〔一〕，胸著千年。振代直聲，鼓雷霆而潤風雨；鎮浮定力，載華岳而繫星辰。衣冠紫橐之神仙，氣類青原之忠節。旌麾一頓，草木交輝。地私二千石之陽和，天溥十一州之福澤。璀璨六絲之遣，礪礪五袴之歌。即賜召環，遂高聽履。某受廩幸矣，公朝念其久廢，誤節湘行，顛倒繡衣，不堪重著。陳情丐祠，以反菽水之奉。尚微均弘，俞音旦夕下，俾得醉泉飽蕨，水之北，山之南，地主之賜也。於馳賀之次，仰布其私。干瀆峻清，臨楮悚悚。《文山全集》卷五。

〔一〕欽：原作「斂」，據庫本改。

與知吉州黃提舉器之書

某日者釋耒山中，僕僕湘役，走公堂，脩民禮，具申假道之敬。蒙主進吏位之堂上再三，祖帳殷

勤，臺餽絡繹，視塵氓且絕等。至於開心見誠，憂愛疊疊，一洗世俗崖岸。某鄙吝久矣，微大雅無以發此意，殆未許諸兒覺也。小隊出郊追送，作遠自違，森戟雲樹，渺然連日。欲作書道歸戀之概，征塵在衣，筆硯爲廢。偶宿分宜七里，殘日入戶，輒寫綢繆。風濤滔滔，嫠緯忘食，金護玉持，世道將有嘉賴。歸鴈草草，尚謀裔襞。《文山全集》卷五。

賀楊提刑允恭書

號高峰

某昔者望七十二峰於洞庭之南，以爲嵩、恒、岱、華類不可易見，五峰三市之近，皇華臨之，遂得以相望下風，未見猶既見矣。迺今使帆凌空，泝贛石而上，僕家去大江濱可四十里，天其予之以一日迎見之便，慰此平生，云胡不喜！某茲者伏審庾政告功，刑臺建節，褰帷而問風俗，猶昔四封持斧而行東南。于今三命，旌旗初動，約束一新。仰惟某官識透萬微，才當八面。陽道州撫字之政，所謂吏師；元刺史參錯之奇，可布天下。天子以公篤於倫紀，使得以便綵衣堂上之奉，乃眷西顧，如此江水。一節常平，二節繡斧，式敬由獄，以長我王國。平反一笑，庶其在此。公歸廟朝，即典風化，一家仁，一國興仁，尚觀《大學》之顯效。某杜門掃軌，知事常後，忽里巷父老驩傳明使者將至，伏櫪之驚，躍躍鉦鼓。往事如夢，不足細陳，某所深自幸賀者，三間風雨，託諸提封，小人有母，繼自今得安於其子之養，是則君子錫類之賜，服之無斃。堂堂在目，即聽匪伊，輒以書先，精神孤往。《文

與吉州繆知府元德書 一

某昔侍同朝，自詭相好，茲不得又以繁縟爲疎遠，惟公勿深訝。某行吟孤嶼，回首吳山烟雨中，書郵往來，時從泓穎叙尊仰。汰歸深密，姓字不到雲霞外，分正如此，非於名門有所簡也。階符在望，徒有稽首。某茲者伏審朱幡春動，紫馬星移。民樂耕桑，簡靜方安於晉國；州稱富庶，勤強更屬於張公。兩地送迎，二天今昔，恭惟懽慶。欽以某官霜明月湛，玉潔冰清。端嚴有大臣風，澄不清而撓不濁；循良入漢吏傳，寬有斷而愛有威。小停權於天津，頻合符於江國。歲之不易，民胡以生？將甦青社之飢，遂易淮陽之卧。竟上爭杜衍，雖去住之良難；席前問賈生，恐傳呼之已迅。自天子所，以我公歸。某茅屋三間，在萬山深處，借書沽酒外，一毫不以爲公私撓，獨蒔松百畝，日騎牛叩角其間。天惠仁侯，自此吏不打門，犬不夜吠，猿嘯鶴嘯，各適其適，則某受賜侈矣。候迎之初，不勝倚倚，謹具劄子，自陳燕雀之私。何當嗣狀。《文山全集》卷五。

與吉州繆知府元德書 二

某屏居一廛，耳目塗塞。忽蒙公牘，錄示省札。竊諗朝廷爲李秘丞諸公有請，特發諸項椿積〔一〕，賑我廬陵，而賢太守敬共其事，日夜講行之。仰惟施仁發政，朝廷甚盛惠也；救災恤患，鄉曲諸公甚盛舉也；承流宣化，切切然惟恐一夫不被其澤，君侯甚盛心也。某嘉與鄉邦父老人士同一贊歎。伏承不鄙，特有下問，以某之庸愚，不足及此。細玩諸公所陳，如隨縣闊狹，分撥米數，如發糶之直，只依元糶價錢，皆旨揮之所已許，而使府已遵而行之，甚善。至於戶口之多寡，編排之虛實，此則各都各保之事。所在都保委有奸欺，然物之不齊，物之情也，若以太守屑屑爲此計較，恐末流必至多事。此惟當嚴責之八縣宰，宰若親民，若其以實惠及人爲意，必能周思熟慮，以求稱塞明指，傳所謂「心誠求之，雖不中不遠」是也。一縣各有一縣風俗，一鄉各有一鄉事體，諸宰申請，惟各從其便，不患寡而患不均，彼必自能斟酌通融而爲之說。惟吾行所無事，自然所濟不細。但縣之於郡，往往勢分隔絕。若專靠公文行移，必有展轉遲滯之患。若使府明諭諸宰，此事今作一項措置，不比公事常程，每縣各給以數紫袋，置循環曆其中，使諸宰有所申明，只於曆中絡繹稟請，從書表司往達，君侯隨手應答，如回朋友書信，使爲宰者得依時稟承，其中便減吏奸八九分。且閭里細微，得嘗達於黃堂之前，物來事至，無不曲當，是則布宣德意之一大捷法也。某不當出位僭越，承問不敢不對，或者千慮一

得，惟君侯矜其愚而勿罪之。某繼此若有管見，馮恃寬貫，又得稟陳。《文山全集》卷五。
〔二〕特：原作「待」，據韓本、鄆本改。

回吉州西倅竇檢閱全器書

某昨歲待罪闕下，明公騎鸞驂鳳，下我青原，相望寥廓，不能以時刷翎振喙，從燕雀來。不圖天孫雲錦，飛墮几格，金聲玉色，參前倚衡，固不以既見未見爲間然也。某官歛岳翠以爲神氣，卷湘水以爲波瀾。駕蓮葉而味玉書，仙芳纚纚；拏芙蓉而弄斗柄，道運堂堂。長樂鼓鍾，西清帷幄，轆轤星辰，經緯雲漢，固其分也。風月神螺，小此盤礴，綠綈方底，王曰遄歸，某旦旦爲斯文屬目。昨承使者之來，即從脩門作意馳謝，會匆匆去國，出處殊科，歸卧悠悠，書尺盡廢。光陰不堪把玩，歲年如許，念厚意久不報，矍然薰沐，祇對主書。耕釣一塵，五雲在上，臨風詹泝之至。《文山全集》卷五。

回江州李都承與書

一 號南窗，關西人。

某頃風颿回薄，自湖入江，目穿高牙，恨臂不羽。一棹從湓浦來，五雲絢爛，照映清越。對桑落

而飲古人之酒，擊中流而聞夜覺之雞，至今使人意氣激昂，借力下風，飽我滿腹。乃以丙寅視篆芟舍下，塵埃抖擻，末繇面謝。軍將扣門，斜封三道，突入眼角。臺餽便蕃〔一〕，綈袍之私，何以持報！共惟某官關洛耆俊，韓范聲名。參井鉞旗，聯寶奎之錯落；江淮草木，被玉節之昭回。吟嘯庾樓，梅花噴薄。老熊當道，貉子不敢越一步。夷猶岸幘，蠡管莫涯。方面誅〔二〕，不敢辭圭錫，以須勒此堂堂燕然石。在某漫浪出山，落身枵瓠，問官官靡，問吏吏荒。而民氣則憤憤未醒，絲棼莫理，如之何其淑後也！明公惠念疇昔，肘後丹訣，其肯爲某愛邪？臨風切切，亟拂吏笏，具酬潦約。歲晚寒驕，願言金玉體府，壽此宗廟社稷之身。宣豈無飢餓者，三肅以請。《文山全集》卷五。

〔一〕便：原作「使」，據庫本改。

〔二〕誅：庫本作「詠」。

回江州李都承與書 二

某去年在宣州，一江上下幸甚，數數相聞。然所甚恨者，過湖口時，不能轉江西四十里拜屏下，共登琵琶亭，以庶幾英豪之下風也。未幾召去。又未幾汰歸。一出一處，爲天下笑，知心千里外，當亦謂何？某比者伏審晉承密旨，升直淵圖，詔璽申褒，鋒車交趣，共惟驩慶。某官關西遺老〔一〕，江

表偉人。崎嶇諸葛之兵間，氣吞河渭；偃蹇元規之坐處，日盡江淮。天方祚宋，襄戍解嚴，公歸本朝坐帷幄，老成謀國，處置得宜，使姦雄伐謀，兵端不開，將社稷實受其福。某縻緯小心，一飯三禱。屏伏深山，幸不見棄於君子，專使遠來，持書問勞，將意孔厚，猿鶴爲驚。區區拜高誼，而杜門齷齪，未知所以爲報也。九江未除人，想當宁急賢，應不俟代，某嘉與海內延頸大用。倘得衣被餘光，遂爲太平安民，公賜大矣。江空如許，執筆茫然，相望一方，精神馳往。《文山全集》卷五。

〔二〕遺：原作「遣」，據庫本改。

回潘檢閱書

某伏以歲華晼晚〔二〕，春事權輿，共惟某官鏤玉晶熒，凝旒簡注，神之相之，台候動止萬福。某濃熏鵲尾，酬敬腆施。曩從集英殿門，吾榜得人，以執事重。海臺沙合，雲月相輝，至今斗牛猶有光氣。顧山林僻左，繫鴈悠悠，天際碧雲，明發不寐。千里眉目，忽照宛陵，爲之蹙然以喜。欽以某官歛崑崙以爲神氣，捲溟渤以爲波濤。玉質金相，宛乎無自眩之色；泉清松茂，浩然有難進之風。乃今細石室之秘藏，爲籀書而出色。視周六典，作宋一經。南豐以史學稱，進裁大典；安定非他人比，宜在經筵。某鶴夢正驪，起廢出坎，循墻弗獲，被命于征。郡枵然虛，真山涸水瘵處也，敏手爬梳，猶

懼不旤，况不穎之尤者乎？不規而頌，非所敢望於同年也。稟酬崖經〔二〕，寧不嗣音？願言努力明德，對揚王休。有昭亭委戒，其敢不肅！《文山全集》卷五。

〔二〕晚：原作「晚」，據韓本、鄔本改。

〔三〕經：庫本作「約」，當是。「崖約」猶「崖略」也。

回鍾編校堯俞書

字君俞，號方巖。

某曉汲凍清，以贄萬一之謝，首干穹勺。某兩年山中，風月晃朗，望太乙光氣九霄，吾書無翰，不能時一飛到。梅花月影，忽疑是君，而米家第二帖至矣。施稠報眇，自省欲如。尊執事以黼黻雲漢之胸，試金玉典墳之手，駕輕就重，拾級升高，此逢掖之至榮，而搢縉之交羨。曾子固晉裁大典，爲史學優；胡康侯宜在經筵，非他人比。某鶴夢正寒，大化驅之出。自湖涉江，風帆回薄，四十程乃抵宣。山凋水瘵，眇兮愁予。敏手爬梳，猶懼不旤，况不穎之尤者乎！高明局外之見，何以教之？滿硯冰澌，濡毫如帚，尚規嗣音，以寫繾綣。《文山全集》卷五。

回吳制帥革書

號恕齋

某林慚澗愧，貿貿此來，幸甚在玉節照臨之末。九華山下，蹉跌望塵，拜手雙魚，分隔雲漢。敢圖下士盛心，超越昭代，襄報鄭重，闕位貌於不有。方驚喜未定間，五雲寵靈自玉麟堂翩然賁之，所施所蒙，非敵己以下所可得。道德之味，流注翰墨，使人之意也消。恕齋先生允文允武之才，有體有用之學，以王謝之衣冠，而接風流於江左，以朱程之講貫，而窺闔奧於魯東。顧今吏道便熟，袂帷成雲，崇詩書而抑刀筆，坐俎豆而行甲兵，鐵壁東南，公其天人也耶！經制西事，當在朝廷錫命，師中不如歸袞，某敢誦所聞。某生也晚，於一世封胡羯末之勝，幸甚皆得下拜，而於恕齋，識獨早，眷尤厚。癸亥之望神皋，戊辰之陪紫橐，又其後來事也。今則以列郡而事崇垣，何敢仰綴？宿昔食芹之美，豈無是心，非所得僭，詎謂臺餽駢羅，光照下國。自上而施之，足以爲德，某敢不三肅使人，恭承嘉貺。若夫以往復爲禮，則誼之所不敢出也。謹三熏三沐，祇酬主書。干瀆清嚴，臨風愧悚。《文

山全集》卷五。

回宣州洪倅書

某馳想芝山屹立，如鸞坡鳳閣，代有英妙，不自意天惠宛陵，朱紱斯皇，乃肯共堂下探梅清致。亭亭雲月，邀我敬山，不後不先，未有如斯之巧者也。伏惟執事日光玉潔之襟，繩直準平之度，車堅御良之材，真所謂喬木百圍，秀色干霄。望清都太微之垣，維尺有咫；課丹峴緹屏之最，當階而升。胡尚縮於緋魚，來同看於黃鶴。意者康沂之歌，愈出愈偉，有相之道，實畀之以藥石，枵然郡政之闕者乎？思昔潁水霄立其間，而正獻以賢行佐理，至今談者猶橋舌不下。某於鄉之典刑，無能爲役，而吾執事則真其人也。前茅在道，旗旄舒舒，願疾其驅，降此未見。至於乘珠委貺，鄭甚於先施，覺光氣炯炯，衝貫斗牛矣。懼弗敢當，亟鍾鼎而歸於瑤華之側。區區甫此滌篆，排冗占酬，崖略是慙。

《文山全集》卷五。

回吳直閣書

履齋之子

某少之時，聞東南二石筍玉立九霄，陵陽蒼蒼（一），實爲綠野，午橋佳處，鸞鶴神清，縹緲何許。老成遠矣，尚有典刑。仰惟某官揚休山立之韻，日光玉潔之襟。文獻堂堂，代有英妙，未既見只，神

爽一方。某卧青原山中，驅馳良倦，上恩俾郡，越在鳴珂，循走彷徨，連符趣赴。不量此來，未知所以淑後。喬木婆娑，五雲絢畫，尚祈薤藁，俾就玉成。某遠奉瑤音，緘貺駢錦，先施倒置，曾是爲容。既什襲巾衍，輒鍾鼎以歸太乙之府。望履非遙，臨風翬翬。《文山全集》卷五。

〔二〕原脫一「蒼」字，據韓本、鄆本補。

與游提刑汶書

某以良月之望，舉棹東下。江空見底，乃章貢源頭，諸水怒長。未幾，光燄五朵，與空同雲俱來，往颿順風。航波瀾之澎湃，灑石鍾之清越，寵靈張王，迄抵雙溪。子月丙寅，俯祇賤役〔二〕。瓣香西望，敬謝所蒙。明公卷其十二峰之神氣，軒軒磊磊，照耀東南。以宰相才，學宰相事，天下久望其爲家氈出色，轡絲周道，肯復倭遲？惠露瀼瀼，江之民幸矣，如溥寰何！會有溫綸，四輩馳下。某不善爲斲，得郡復枵。至之日，視官官靡，視吏吏荒，民氣憤憤如也。爬剔棼絲，顧氣力所至，終覺五技易窮。肘後神奇，不敢以望之他人。惟故山松菊，衣被綵雲，亦已過數。矧茲隴蜀，微惠未涯，微疇昔不及此。相望二千里外明月，此心懇懇，側釐掛一漏萬。惟青陽時動，緜綠光華，式金式玉，以副前禱。此豈無勛，辱戒爲榮。《文山全集》卷五。

〔一〕祇：原作「抵」，據庫本改。

與趙知郡孟適書

號菊山

某頃從南浦亭邊，抖擻殷函，道所蒙荷，且矯首于太乙之府。穹林冥坐，縹緲絳霄，江塗漫漫，勞我宵棚。執事以玉雪界之精神，臨睨八極，朝閔風，夕玄圃，識者猶竊遲之。錦衣照道，紫淦橫舟，蕩漾柳風，噓吸竹露，澗阿樂矣，如顒顒望歲者何！建章夜半，尺一堂堂，畫省紅雲，著公高處，惟日望之。某不善爲斲，得郡復枵，以子月丙寅視篆昭亭下。視官官靡，視吏吏荒，洗垢爬痒，亦曰視吾氣力所至。然山澗水瘵，非刀圭可療。肘後神奇，惠徼大福，某不敢以望他人也。焚蕤瀾雪，西鄉奉書，以謝以祈。鼎珍履絢，願言金護玉持，對揚王休。臨風悵結。《文山全集》卷五。

賀前人得盱守書

某昨在宣州拜書，亡何客携琳琅來京師，欣浣如對。匆匆去國，不成報襄。歸里以來，杜門深念，又無從嗣音爲謝，徒有清夢夜遶金峰。忽讀邸狀，欣審丹鳳揚綸，銀菟擁鎮。八百國封爵，莫如同姓之親；二千石起家，共讚惟良之牧。先聲載道，闔境爲春，伏深歡忭。欽以某官景緯光華，仙潢

清潤。淮南桂樹，了無貴介之風；李白桃園，綽有神仙之韻。軒陛宜當於三錫，轅和肯泣於十同？睠惟東旰，實介南服，紅泉碧澗，髣髴丹丘，白玉紫烟，參差繡陌。聊商羊於朱紱，供衍燕於青香。大宗維翰，价人維藩，丕動袴襦之喜；九卿執羔，三公執璧，言觀袞舄之歸。某辱在眷知，助喜百倍。既不能振翎刷喙，從燕雀來，謹奉書寄便申慶。迓兵當已在道，不知開藩涓卜何日？某尚當屢賀不一，臨風馳泝。《文山全集》卷五。

與趙監丞淇書

號平遠

某乃歲之秋，緹騎來山中，嶽翠蒼寒，琳琅照映。章不成報，內有欲然，寧不嗣音，僻左之以。世道如許，風起雲飛，中夜人物之思，爲此耿耿。上念井絡，丹詔起家。峽月棧雲，先聲浩蕩，蓋有望木牛流馬，再立武侯之事業。又壁窺萬一，意必與南山泊予秀諸公上下雲龍，共此光明俊偉之舉。縮袖間，臨睨天半，此其大本領、大經綸，政不易涯之。野水橫舟，蒼虬縹緲，山君川后，日有疏附，即日恭惟台候萬福。某漁隈半席，自分小休，誤渥自天，俾尋庾、謝舊盟。意此是捋拭笏簪之陋耳。三辟弗可，乃以陽月之望，束書出山。涉重湖，越大江，整整四十日抵戍。以是月丙寅祗賤事〔一〕。凋城敗屋，枵然大瓠耳，搔首踟躕，望洋氣縮。維宣距鄴，僅隔一雲，東望熏香，奉尺書候起處。惠徼藥石，立我沈痼。梅花晴昊，拄笏神馳。《文山全集》卷五。

〔一〕祇：原作「抵」，據文意改。

慰趙監丞淇書

某昔讀《檀弓》，文子之喪，既除喪而後越人來弔，其居使之然也。伏惟先太傅大丞相冀國公之喪既有日矣，地不千里，不能往弔，一介奉禮，今也而後能來，死罪死罪！嗚呼，皇天祚宋，國有元老。數百年宗社之靈長，千萬里風寒之險要，蛟龍在淵，虎豹在山，屹然長城，爲此突兀。天乎不使慙遺，遽奪之去！主上震悼，傾動朝野。伏想生平翹館之英俊，舊日麾下之將士，與夫三邊之百姓，四塞之英豪，見碑而淚，望城而悲者，不能已已。矧夫家門之奇禍，父子之至情，攀擗奈何，嗚呼痛哉！某生也晚，當公佩天下安危，分不得勇往執鞭，今而追恨，則已無及。獨念袖有瓣香，歸依平生，亦既不克爲公壽，惟有爲天下慟哭，敢西望靈輅，揮淚百拜而獻之。公而可作，尚其我許，嗚呼悲哉！親喪所自盡也，抑先王制禮之意，是有節文。士君子爲孝之道，在於顯揚。伏惟執事重致意焉，即日孝履支持。某頓首奉狀起居，臨紙哽塞。《文山全集》卷五。

回安福趙宰與拈書

一 號勿齋

某追記疇昔同到蓬萊，慈恩之題、杏園之宴，吾以故不與焉。然同年之情，豈以四海九州爲藐然哉！王孫乃龍種〔一〕，世有籀雲鱗。今不遡紫清，上岵嶽，顧得百里之地而君之，簾陰晝寂，千室鳴絃，實鄰吾父母。國人誦子產，今其時乎！某私獨念，今天下豈有可爲之縣？縣不可爲，而可爲者人。如君者，以可而臨不可，於是知材具之超常流百倍矣。長書下貽，燁然春華，溜若清風，與我之厚，昭初至情，多言不足以殫謝意也。某守郡無補，誤渥爲郎，縮縮循墻，行且歸里，當觀棠陰，以與邦人共談政化之微。亟推吏塵，具報記室，揆諸來施，不敏流汗。《文山全集》卷五。

〔一〕種：原作「鍾」，據韓本、鄆本改。

回安福趙宰與拈書

二

比一馬二僮，日在泉石深處，聞山外塵埃，亦頗作惡。坐對浮雲，亦開口笑，不自己耳。君解墨綬去，意紅光紫氣，冉冉帝側，乃猶廬陵客，琅晝至前，矍然起仰。黃柑紅柚，二美并貺，杏苑論

情，我之懷矣。冬江雪涸，萬里安流，目送征鴻，知有順帆，天際如駛。伏楮拳拳，中書不中書。復字蕪類，併希錫察。《文山全集》卷五。

回寧國交代孟兵部之縉書

某去國之前一二日，宣州弛征之命下。某既爲桐鄉百姓頓足起舞，即拜書望雙溪疊嶂，爲賢主人賀。吾輩讀書臨民，正爲今日行志，凡此者各盡其分，固非相與爲賜也。既汰斥歸里，即閉門不與人事，山巔水涯，翛然獨往。而使者忽持五雲來，君子之有情於人也。即勞問之，將以厚禮，復申其綢繆焉。某誠不自知其何以得此也。宣人歌舞賢侯之德教，冠冕像設，祝廣成千二百年，令公二十四考。蓋人心之天也。某何人斯，偶以一日出位言語，乃得因見大夫，以自附於去思之義。某微德以堪，回首碧落，山川鬼神，猶有餘愧。宣敗壞至矣，弛之則期會散，繩之則撫字虧。公折回蟻封，從容不迫，期年而變，古語不誣。方今論選表，無出潁川右者，曷不均弘，俾執事樞？某一飯三禱。使者之歸也，謹東望熏祓，身心致敬。陵峰堂下，有日延見父老，尚願道山林不忘之私，與其所以不敢當之意。進之惟命，退之惟命。某臨書不勝拳拳。《文山全集》卷五。

全宋文卷八三〇六

文天祥 九

回寧國陳節推容書

去年闕下拜書，稍得數數，未幾，聞捧檄校文，不知陶鑄何處人物。某自是即汰斥去，閉門深山，遂無復鱗鴻一日之便。忽使者來山中，欣得妙帖，見示《小錄》，方知昨者衡鑑所嚮。近想歸舟蕩漾彭蠡^(一)，吾知心正在香爐峰白雲下耳。宣之弛征，執事首從臾之，幸而集事，僅足了吾輩之責，非相與爲賜也。書來，乃知宣人以此爲多，祠之以識其不忘之意。怵惕於孺子之入井，豈爲內交要譽設？抑桐鄉父老此意，亦能使人感激耳。宣爲郡凋劇，極力扶持，幕畫間想見勞苦。盤錯糾結，以試利器，天下事正有賴於方來耳。某前冬一出，去秋一歸，進退行藏，惟其所遇，而無心焉。則今奉親課子，彈琴讀書，流水青山，悠然獨往，不煩故人江雲渭樹之思也。《史記》見貺，家藏本皆不及，尚當朝夕，以稱所蒙。《明善錄》一部，謾侑歸牋。臨墨馳泝之至。《文山全集》卷六。

〔一〕「想」上原有「思」字，據庫本刪。

與吳提刑觀書

某頃待罪闕下，薄奉函書，襪被來歸，嗣音杳邈。上下人物感念世道，未嘗不與門墻拳拳也。某比者伏讀邸報，欣審玉陛出綸，繡衣移節。夜醉長沙，曉行湘水，已著平反；風酣章貢，日麗崆峒，更煩輕熟。江湖相望，原隰增輝。某官宣慈而惠和，高明而正直。義豐授受，孔孟氏之淵源；江左聲名，王謝家之門第。蚤立登於閭闔，遄坐厭於蓬萊。竹馬相呼，春生襦袴；星輅所至，雨卧桁楊。茲游捧於英函，乃肯臨於梓部。刺史故人按事飲酒，情法相當；忠臣孝子畏道驅車，君親交盡。靡需席暖，已趣詔溫。某杜門深山，去城郭甚遠，而於太和差近。初謂旦夕使輿，泝贛石而前，可於快閣上下，迎候一拜。忽傳英篋小駐青原，某揆之始望，則蹉跌矣。瞻睇行臺，輒易奉狀，代叙燕雀之萬一。若夫揚清激濁，洗冤澤物，閭閻欣欣，無所患苦，使屏退之蹤，亦得從畎畝以自放適，是則某之所自賀者也。臨楮切切。《文山全集》卷六。

與湖南陳提舉合書

號中山

某猶記乙丑之夏，從江西提幹得往來行書。江闊雲空，斗光如水，每懷世道，上下人物，未嘗不中夜耿耿。某茲者恭審奉少府節，駕常平車。衡嶽連雲，遠挹海山之秀；天囷麗漢，近垂楚分之光。原隰春深，旌旗風動，伏惟歡慶。某前年與公同除郎，去年與公同除節，不才安得追附名勝，自分却立下風。猶幸時論不磨，得公輩落落參錯，使民物吐氣，國庶幾耳。相望千里，北斗在天，何時執鞭，寫此忡惓〔二〕。《文山全集》卷六。

〔二〕忡：原作「冲」，據韓本、鄢本改。

回林學士希逸書

號竹溪

某夙有幸，獲與介弟爲寅恭，因之有以詢居處著作之萬一。不戚戚得喪，而言語文章足以詔今傳後，竹溪先生何憾哉！一日之赫赫者多矣，千載而赫赫者幾人？爲一日計者無千載也，決矣。云

云〔一〕。《文山全集》卷六。

〔一〕云云：原無，據韓本、鄢本補。

回贛守李宗丞雷應書

號樓峰

某偃薄林阿，不虞使者之涉吾境也，迺自空同來，顧我猿鶴。米家書畫，光怪滿山，此豈四海九州同年無情者邪？僕家青原深處，實與君侯黃童白叟接畛而處。自下車以來，但見年穀獨登，黜黜屏息，不需數月，報政赫然。茲豈千里能事，環君侯四境鷄鳴犬吠，晝夜相聞，實共受賜。僕也彈琴讀書於其間，其賜多矣。敢圖高誼厚鎮撫之，委貺盈箱，非所當得。睇瞻霄立，頓首知歸。吾鄉宰邑於使天之下者三人焉，其一爲陳行夫，若羅子遠、蔡濟甫皆曲江齊盟者，奉令承教，必有可觀。廬陵一歉，異於常年，田里憔悴，不堪舉目。惟章貢素無糴事，而得歲又偏，鄉人顛頓者往往相率而趨。治國民食關繫，苟可通融，兼愛秦晉，公之惠也。謹復書。空山白雲，無足持報，薄言采藻，臨風如馳。《文山全集》卷六。

回交代湖南憲新除湖北漕李宗丞書

某既專鱗幅奉起居，猶有腹心，不嫌裔孽。某屏卧寬閑，無復山外想，公朝念其流落，畀節起

家，使之繼明公印綬之後，聞命慙然，不知所爲。堂有重譖，蓋年耄矣，湘行且千里，舟車迎侍，不堪顛頓，是以懇悃丐祠，冀便私養。天高聽邈，促旨且頒，叱馭回車，進退維谷。將從鶴髮而來耶，則非養志；將又以香火請耶，是何爲者，而爲是瀆也？謀之乃心，稟之親老，旦夕姑以旨甘屬弟輩，單車將指，以明不敢自棄於明時；而復以不得將母重告之造命，俟驅馳數旬，即乞身以歸，爲臣子稍盡己分耳〔一〕。某於門墻知己論文非一日，天又開之以奉令承教之機，是其與四海九州之同年，其有情益倍倫等，誠不圖解后及此。古之君子，其爲人也，謀之必忠，愛其人也，惟恐其不入於德。故敢亶亶陳出處之槩，惟執事啓誨而圖利之。言不盡意，臨風如馳。《文山全集》卷六。

〔一〕己：原作「幾」，據庫本改。

與江西黃提刑震書

某幸托年盟，夙依塵部，竊跡萬山底，衣被末光，飲墜露，餐落英，粗安半菽，公之餘也。久疎晤寫，滿目春雲，一水盈盈，遡詹河漢。某茲者共審出綸鳳闕，移節虎城。春信初傳，立變桁楊之舊；天光下照，重瞻禮樂之新。依然故部之江山，籍甚先庚之號令，伏惟驩慶。某官剛不吐而柔不茹，寬有斷而愛有威。發爲文章，正諧韶濩，勁沮金石，凜然節概。光垂虹霓，聲揚紫微。早分潁川

二千石之符，就秉天囿十三星之節。據案叱吏，笑比黃河清；開門賑飢，功過中書考。上久簡孟博登車之志，公遂爲勝之持斧之行。春風遍地而狴犴虛，夜月當天而鷖鷖伏。載馳載驅，維驥維駱，靡憚周咨；來游來歌，如圭如璋，言觀肆覲。某避影杜門久矣，不作山外想。不圖元會之日，上恩覃及流落，畀相讞於珠玉之側。虎鼠同器，猿鶴笑人。云云。《文山全集》卷六。

回林司業應炎書

某夢想巍巍堂堂，於朝花院柳間追隨，猶昨日事也。玉烟劍氣，轆轤崢嶸，杳然在碧雲崔嵬之外，江月流水，實照泫泫。某官以冰輪金井之心胸，發黼黻火龍之光燄，而又慥慥乎言行，皦皦乎進退，若汲長孺，若陸敬輿，若慶曆、元祐諸賢。充公之爲，表裏庶幾其無愧。領袖斯文，旗翼元命，天下以此望公者，殆人人同願玉立以需之。某自歸來乎山中，俯仰半菽，不復得與四方書牘從事。比從戶曹黃文得誨函〔一〕，草木同味，玉雪照心，欣懌之餘，感慨係之。某蹉跎之蹤，何可爲者？大化驅之，一節誤落湘雲。避走陳情，俞音竟闕。單車徊徨，且此首涂，行復求返吾屠羊而已。渺渺天一方，重此懸泝，專容陸續貢敬。《文山全集》卷六。

〔一〕文：疑當作「丈」。

回信豐羅宰子遠書 一名椅，號澗谷。

某去年聞雙鳧南上，落落空山，不如燕雀之爲有情也。大化驅人，作江東客數月，爬梳枵瓠，未見端倪。會誤恩召環，洿班過當，亡何狼狽而去。蓋疎闊以來，居多道路之日，出處乖方，滋可爲笑。杜門息影中，高情厚鎮撫之，專介持書勞苦，臨風馳感。可人天一方，信豐山水邑，見謂讀書松竹，晝影滿簾，著吟人其中，所謂「予方有公事」，此豈錢穀吏比耶？勿需終更，西清有詔。璧弟何爲者，赴新昌且百日，商鉅馳河，未知攸濟。惠徼如天之福，寡過多取數矣。贛、瑞皆佳邑，藹藹吉人，鼎立空同，真一時之盛。當路或令舉所知，某幸甚有以藉手。薄言修布，小附芹心，非敢謂報。倚筆詹泝。《文山全集》卷六。

回信豐羅宰子遠書 二

某臘前函書往來，庶幾契闊之意。年光冉冉，驚見雙璧。蓋曾兄季困專紀綱寔來，仰惟同年長者所以惠綏荒寒，皆可感也。某雲卧深山，世意落落，一起一仆，非人爲之。上天蓋高，匪怒伊教，敬威念咎，安得不力？執事昔爲之助喜，今亦有以救其不逮乎？敢請。季困值儒者之窮，執事以氣類遇

合，所以位置之者寵甚。萬間寒士，公將溥其施於一時，所謂兆足以行矣，某爲之斂衽。新年喜雨，燈前報命，馳想一方，臨紙悁悁。《文山全集》卷六。

回羅子遠就賀除京權書 一

某俯仰歲年，甚知聞問。頃知捲旆來歸，衣錦有爛，且趣舍人裝，于于然東矣。亟欲擘牋所思，雲頹鶴倦，不可拈拾，竟墮夢寐外。時一動寥廓，想江邊鷗鷺，爲之悵然。忽得手書，賁我空谷，華袞流離，辟易久之。共審帝闕出綸，天京司轄，姑養籓駕之望，佇博峨豸之音，伏惟驩慶。明公契古胸襟，吞雲夢者八九，外物瑣瑣，遲速何心。積之厚，發之弘，宇宙間華軌清貫將次第而取之，以其時考之則過矣。某風雨深山，避影却走，乃元會之日，公朝以一節起其流落。回首三湘，驚心蕉夢，請隸香火，旨更趣行。慈親以遠役爲憚，進退維谷，莫甚此時。旦夕黽勉拜命，姑單騎之戍，驅馳數旬，乞身歸卧綿上。同年有情，不隔四海九州之遠，毋金玉爾音，冀一語以自壯。拂拭過情，非所敢當也。占對梗槩，尚猷嗣牋。《文山全集》卷六。

回羅子遠就賀除京榷書 二

某一之日既端拜，敬謝芳題，并報信豐簿攝雩之概。二之日謹遣介馳諸席間，寅奉起居，不敢繁叙，首祈委鑑。某臨歲入湘後，墮身徽纆中，詹沂宇下，闊焉嗣音。繼聞趣戒朝裝，榮司京榷。某念欲賤忱賀厦，以申風雲發軔之慶，一春屑屑行路，浸墮因循。既抵空同後，潼川趙同年來爲縣，實在河陽舊桃李處，鴻沙指爪，猶記東西。所以告新者甚厚，因得切諗修門近況。大帶深衣，長身玉立，道德福澤，方來而未艾也。吾鄉諸老，行輩落落，巋然靈光，惟今澗谷先生依星辰，傍日月。一日騎麟翳鳳，朝閔風，夕玄圃，勢正順耳。某枌陰杏集，素辱心期，慕王陽之回車，學毛義之捧檄。得郡山深，俯仰半菽，君師天地之造，知己錫類之餘也。惟是求牧力綿，未知攸淑。回首蔽芾，我愛桐鄉，豈無一言，益其故人，并寄父老。因風東向，頓首以請。《文山全集》卷六。

與汪安撫立信書

號紫源

某仰惟曠度絕人，不作邊幅，僕安得以書生刀尺從事，高明幸察之。某昨者爲高安，受容受察於玉斧之下，公不以衆人畜我，我實德公。未幾公去之，而僕亦以憂患，連年卧山中，蹤跡跋扈，不足

爲知心道也。撫念江流人物如此，未嘗不中夜耿耿。某茲者伏審揚綸九陛，建纛三湘，人無異辭，國有生氣，共惟慶愜。欽以某官名高九牧，氣蓋群公。江左管夷吾，足係英雄之望；軍中范老子，能寒寇賊之心。往者金湯中流，忠績簡在，上方以南事爲慮，詔公方面，隱然長城，一代數人，百年幾見？公不得不力，紀勳旂常，歸袞廊廟，自此等而上之。某退在漁樵，未忘嫠緯，聞公此來，爲世道擊節。偶逢黃君強立長沙便介，率然上狀，仰闕賀床。強立名至道，某昨嘗薦至館下，強立每謂公以意氣動人，能使人不愛其軀，其感激知己可見。今茲適在冀府，從諸公遊。公不以生客視強立，強立奉筆墨以佐大闢，豈直一日之長而已。憑筆僭越，向風如馳。《文山全集》卷六。

回汪安撫立信書

某望五雲多處，以駑劣下乘，幸甚自託於禮樂之下風。既奉儷函，布親牘，修大闢府之敬，迺不我後先，使者銜命，即之於深山中。翰墨陸離，光動蔀屋，拜而後敢讀，讀已而亟拜。居今天下論人物，一方一曲之士，隨世以就功名，謂之無益於成敗之數可也；當大方面，建大將旗鼓，使國有龍虎，馬不敢南向，其周公瑾、祖士雅之流乎！天子召拜樞近，脩勞還故事，少府且出節，付以西北，煩公辦此。金戈凱馳，歸袞廟堂，作太平六典，四海以此望公，亦公志也。某少也驅馳，嘗有意事功，鷄鳴奮發，壯懷固在，然而亦少衰矣。被旨行湘，顛倒繡衣，豈堪重著！惟宿昔於門墻，辱知己

厚，惠徼宇下，恃此敢求。適三月移卜先塋，有山間之役，受印之期，尚在夏五。竊聞四輩在道，車馬有行色，天殆嗇其一見之機乎，何爲屢得之而屢失之也！退憶前年，自直廬汰歸，公以書存問，推許不薄，海內時流得此於名公者，正恐無幾。今承獎翰，益佩卷卷。江濤渺然，事會何極，何時執鞭，寫此傾蓋！某臨風無任馳泝之至。《文山全集》卷六。

與胡都承穎書

一 號石壁

某已端具儷櫝，候敬籤房，心之精微，敢嗣陳之。某於當代知名，夙有取履結韉之願。寄書梅外，嘗寫我心，遠道報襄，如見顏色。伏自牙纛卷零雨而還，鴈闊湘深，馳泝寥廓。伏惟以任重道遠爲心，以難進易退爲節，巍巍堂堂，卓然佩安危而繫輕重。乃今聖哲馳驚，上下焦然，《金城圖》、《出師表》，微公孰與於斯？追鋒在道，不俟駕行矣。某家畏壘山下，麋鹿之與群，而猿狖之爲曹也。公朝起其流落，山衣易繡，舊夢恍然，一節走趨。幸在通德里，九轉寵靈，疊疊肘後，某行當掃門以請。拜狀梗概，臨風卷卷。《文山全集》卷六。

與胡都承穎書 二

某一節出山，指碧雲崔嵬，八風吹不動處，知爲神龍卧洛所也。前者幸甚，脫履堂下，進瞻芒寒。適子之館，授子之粢，胸中經綸之奇，傾倒敷露。中夜慷慨，音落九霄，使人驚且喜，今而後知宇宙間未嘗無劉玄德輩。某持以去岫巖，襟袖尚有萬丈光，此殆未可與俗人言也。某以疎決故，一葦下長沙，初約先拜見而後往帥垣下，偶有牽制，稍違息壤之舊。今茲回棹潭濱，將由便道，單車負荆門屏之外，輒遣一介，先道其私。幸豫戒猿鶴，勿以俗駕爲拒。率然馳控，倚卜面叙。《文山全集》卷六。

慰饒州胡通判書 石壁之姪

某茲者不圖先令叔某官石壁先生遽捐里館，風馳上征。哲人云亡，邦國殄瘁。執事者骨肉至慟，爲國受弔，撫孤大誼，定力如山，足可以對岳雲之崔嵬矣。顧惟某落落後出，辱二阮之知，乃在一日之間，老仙用意，慷慨與之，上下古今，撫念人物，袖中瓣香，僅僅拈出一再，老仙所以命之者更在度外。爨桐之音方希，而化人之裾已不可追矣。出聲慟哭，悲不自持。謹哀綴壹鬱，洩爲奠詞。往者

如生，尚爲我惻。惟一賜宣燎，豈勝感涕之至。《文山全集》卷六。

與安撫李大卿芾書

號肯齋

某已專具儷櫝，申敬記室，私心梗槩，不嫌裔襃。某辱知愛門墻，非一日之故。風流雲散，一別如雨，每一念此，神爽飛馳。江湖一雲，本不甚相隔，彼此出處，解后參差，至闊絕乃爾，僕之罪多矣！明公當世人物，卷韜山林，四方顛顛，望其一出。方時多艱，嫠緯忘食，然見王茂弘者，固以爲江左有管夷吾，某有計日以俟鋒車耳。某避影深山，久不作馳驚想，公朝念其流落，畀節起家。釋綿上耒而于征，未知所以淑後。幸甚區區走趨，實在中台之里。十年契闊，一旦逢迎，豈命物者開其親炙之機而惠顧之乎？如聞閉門謝客，雅意絕塵，然待故人，固自有情，猿鶴必不我拒。相望寢近，凝泝如馳。《文山全集》卷六。

回永州楊守履順書

巨源之後

某嘗論一世人物，紫朱其綬，唱呵車塵，若是者駢肩矣，求其忠義貫日月，處漢賊危疑之間，臨大節而不可奪，至於殺賊奴，取纍纍金印，此事付度外，豈不凜凜大丈夫哉！父母講傳，百年間吾見

先太師一人而已。某官鍾岷峨之秀，嗣彝鼎之勳。忠臣之門，天人之所共祐；國士之器，君相之所柬知。石崖齊天，唐中興頌功處也，公來其間，寧不感慨！今蜀道難，蜀道難，公收拾群人，手揮天戈，一節之還，從甘棠刻第二頌，旂常濯濯，光于前聞人，某何幸身親見之。歸隱空山，望湘雲千里，不圖使者遽涉吾竟。仰惟明公主張斯文〔二〕，經始棘院，以相龍飛興賢之盛，大張門顏，使某也得執事從。君侯所以厚我，不同他人，小人雖無能爲役，烏乎敢辭？「貢院」二字，僭易奉上，進之退之惟命。未諧握手，往來心聲，庶幾古道之槩。臨紙拳拳。《文山全集》卷六。

〔二〕主張：原作「張主」，據庫本乙。

回林侍郎卿孫書

號雲屋。在臺時。

某從望闕山，矯首五雲多處，寢疎起居。長沙少府傳仙書惠，并繳貺琳琅之翰。仰惟緇衣宛變，古道顏色，爲之歆拜。傳仙不肯望然而來，以書先訂出處，此意亦頗謹重。已遣禮聘之，且告以初筮，如九層臺基，須令堅壯可耐，靜以待次，不失雅道。未知傳仙何所嚮，若其來訪，敢不惟命戒之共。《文山全集》卷六。

回前知衡州楊秘監文仲書

某已端飭儷櫝，致敬心之精微，不嫌裔擘，首祈垂炯。某於足下，非敢以氣類詭流俗之縱。尚想疇昔，載色載笑，相遇不同他人，至今歷歷在夢。時方孔艱，荆吳多壘，坐廟朝，籌帷幄，折衝俎豆，正張、趙、韓、范之事業。湘水以西，勤勞一障，天子曰歸，借徑斯文本色，俾執事樞，歎見之晚。某閉關念咎，不復作馳驚想，公朝出節，誤及荒濱，回顧黔驢，曷對湘鴈？趣命且斂，單車于役，稍盡君親之誼，即尋香火之緣。衡雲照人，垂執鞭弭，乃天上笙鶴，不復顧鷄犬矣。所恃襟期有素，且未忘甘棠，則其居中，庇之誨之，某與蒸湘之人均利賴焉。昂首慶雲，伏楮耿耿。《文山全集》卷六。

與劉尚書黻書

某夜拜文昌，朝馳函敬，感激亶亶，不嫌裔擘，首祈穹采。某庚午待罪底班，望英躔萬丈於絲綸閣，天章潤色〔一〕，衣被青黃，隳永味言稱於天下，曰知己。歸伏山阿，分霄壤絕，不敢以世俗書尺候主進吏，熏香宣夜，北斗以南。共惟某官，文章稷言而皋謨，器度商彝而周鼎，陶鎔帝皇，轆轤造

化，燭六合，蕩八垠，吾道之福，布濩流行。翠幄青瑣之從容，文劍紫荷之凌厲，由八座而間兩社，使天下再見希文、稚圭之風流，某嘉與人士旦日稽首。某瓠落之蹤，一意返哺，夢寐不到山外。公朝未忍捐棄，扞拭而起之，復令效湘節牛馬走。烟霄流眄，不進不止，蓋疇昔之盛心未悠也。某始以私養丐閑廩，天高聽邈，且趣之再，奉明命以趨。一之日甫履回鴈，布宣德意唯謹。湘人尚力抵氣，未俗輕生，蘇息而調服之，既竭吾力焉。垂天之雲，覆燾其上，訖濟我後，某爲之夙夜願言。因謝有祈，臨風悃結。《文山全集》卷六。

〔二〕潤：原作「澗」，據庫本改。

與陳察院文龍書

一 號如心

某夙在眷知，屢踐契闊。杓粲奎明，經緯碧落，曉夕詹馳。伏惟執事以光明俊偉之胸，負法家拂士之望，鳳鳴朝陽，萬物吐氣，氈厦密勿，熙明日新。陸贄處中，汲黯居禁，精神強而本根充，外難不足平也。上方屬以經濟，俾執事樞。某歷落之蹤，豈堪使事？公朝不忍終棄，盡出噓揚。始以私計，不使迎侍，冒干閑廩。趣旨且放，單車于役，以五月一日受印司存。既見父老，具宣上德意。然兇猾相挺，山凋水瘵，扶持調習，庶幾一日非晚，且再陳情，爲歸養計。「侯誰在矣，張仲孝友」，儷

語循比藉手，不足以當劍首之一映。臨楮無任。《文山全集》卷六。

與陳察院文龍書 二

某輒有稟瀆。某昔者以臬敗，由書生本色，只當在斯文一邊，不應以刑獄爲職。故凡寬厚惻怛處，人皆由之而不知，其有不可以詘令甲者，則譁然以爲過當，所處非其位故也。自後諸公速有論列，皆不實知其人，不過以前疏濶色而爲之辭。某嘗願一日有以自見於天下，使知吾所謂衡氣機者，而未易遂也。今年復除憲，實不願就。丐祠不遂，銳欲再請。又念起自廢閑，豈當重瀆已甚，故且黽勉驅馳，亦謂姑以平平處之可也。既入竟，乃知湖南風俗大不然。某若以身事懲創，靡然風采，懼無以肅一路觀聽，又坐失職。故初至，不免見之榜揭，謹錄本以達台覽。夫如此，初未嘗有嚴厲之事，特示之以警戒之意，蓋於職分不得不然。然才作此差遣，便是惡滋味。兩日刷具一路獄案，數日甚多，莫非劫掠嘯聚等事。他時審覆既圓，皆不容付之輕典，某且獨奈何哉！某此來，不及侍親，處此亦大不安。俟疎決後，惟有乞身歸養。所恃知己，肝膽相照，臨書不憚傾倒。念其久要，其必有以教之。嚮風卷卷之至。《文山全集》卷六。

與鄧校勘林書

某頃繇春中走赫蹠，闖輦下，知上徹五雲閣久矣。一節奔走行役，曠焉嗣音，矯首河漢，盈盈一水。某蒙賴如天之庇，以孟夏八日辭膝下，五月朔吉受印於衡陽。初見吏民，既宣上德意，退坐棘木塵中，與徽纒相爾汝，爲之弊弊焉。江去湖不甚相遠，始者殊不念其風氣之悉〔一〕，至此始知尚力抵氣，以血人爲嬉，九城一波，莫障其瀾，某以爲怒之而不教，非古祥刑意也。見諸榜揭，嚴而不爲殘，楚人亦頗爲動悟，其肯繁中也。然某以書生爲之，非其本色，不諒者衆。此十年所以有申韓之謗，以至于今日，是安得而忘吹蠶之想乎？且重闡以老不得就養，單車彷徨，雲舍切切，旦夕疎決後，且即丐還屠羊，使叱馭回車，於君親兩不爲失。此其所以謝夙昔君子之教，而庶幾乎年盟之盛心也。厚德錫類，某惠徼福于宇下，蓋方新焉。偶逢便武，亟詢起居，且叙其所以跛躄馳驅者。遙對清切，臨楮泝詹。《文山全集》卷六。

〔一〕悉：疑當作「惡」。

與陳直院維善書 一名合，號中山。

某隰睇紫霄，寅致儷櫝，心之精微，敢嗣陳之。某昨承鵲袍出使，驛騎歸班。嘗領廬山下所賜手書，光氣垂虹，下照空谷。撫歲年而如雨，恍河漢之一色也。中山先生文運斤而成風，氣振策而奔電。元龍湖海，突兀宇宙，支架明堂。曲摺萬丈光芒，緯國典，華帝制，天下固以爲未也。大明奎壁，晉執事樞，使士者顛顛，歌仲淹、弼，一夔一高。某落落青山，自返吾哺，公朝未忍捐棄，畀之一節，使與衡鴈相周遭。草木吾味，一引手馮翼之，端出緇好。某始以私計求閑廩，聖恩闕俞，且趣之載道，遂以朔日見吏民，宣德意。然楚俗尚力抵氣，殺人爲嬉，撫存而調習之，未易爲力。明公夙昔褰帷，棠陰如屋，五雲緯霄，影落衡杜，某爲之夙夜願言。因謝有祈，臨風依遡。《文山全集》卷六。

與陳直院維善書 二

某頃侍親抵郡，輒持尺素，專貢紫清，懷今雨之綢繆，望下風而慷慨也。璧弟來京師，拜夫子之門，黃河、泰、華，天下鉅麗之觀，璧也所遇多矣。今天下稱文章大手筆，落落可數。平園、西山諸老之風流，散在三光五岳間，日月磅礴，河漢經緯，吾紫微公實當之。南州之士，僕將帥以聽。某讀

書涉獵，筆墨空疎。方青山蕭然，水上之風猶若意會〔一〕，一行作吏，此事便廢。間於故牘中掇拾親親長長之說，見於行事。邇來千里民氣，覺稍洽和。書生不知向方，能終不迂闊於事否？昔人云：未識意，先感水火流燥，記吾味久矣。教思無窮，勿替引之。某豈勝惓惓。《文山全集》卷六。

〔一〕若：原作「吾」，據庫本改。

與曾縣尉先之書

字孟參

某自前拜書後，回首鴈峰，不勝拳拳。水口吳權寨來，及承手書，備見繾綣故舊之意。百單二歲之姥，孟參發揚之，安序表章之，真足以爲衡陽一段佳話。某六月朔日祖母初度，亦及與一城老者相周旋。「人生七十古來稀」，是以自七十爲始。千數百名中，其最高者爲九十六，延此母於堂，進趨語言，殊覺不衰，惜未有過百者。鄉間有羅提幹存叟祖母，去歲滿一百歲，某嘗偕朋友十餘人往拜之，當時有詩歌成軸，今年又百單一矣。此母大家，諸孫皆儒者，提幹登科，有福有壽，又非衡嫗比，劉守却未知。某旦夕亦當爲文以白之。贛斗絕，與湘問久相隔。適有自建昌來者，云五月二日廖恕齋過建昌，知五月末主人到臺觀上矣。司存事首尾關繫，無如孟參在，恕齋必不能相舍。安序權事半年，添此繁劇，想一旦釋重負，甚以爲喜。某於賀恕齋書中，已備道孟參一段。人將爭出我門下，此自無

說。但願足下斂以靜鈍，守以廉朴，一如平日，則天下之奇材，青雲之遠業也。贛事稍簡，親老以下俱安平，亶出雲庇。但有疲於竿櫓，以一人之寡，應四方之多，覺甚苦之。鄉人相過者隨分處之，亦不至甚相炒。中間只一榜禁假託，大者歸之臺，小者聽之縣，或以爲得體。贛只有出甲一項，未易杜絕。今春此輩在廣，聞某新上，皆急於歸就保五。乘其畏向之機，近日未免先事諭曉，度今冬可得安靖。湘中既獲諸渠魁後，想道州一帶已無事。湘鄉諸處寇攘之風，當是久已帖息。茲因專介，信筆傾倒，薄芹并瀆，向風如馳。《文山全集》卷六。

全宋文卷八三〇七

文天祥 一〇

與曾架閣書

某曠不奉狀者累月，杜門山居，無由四方上下以相從於顧盼咳唾之末。馳仰中得會李文復卿〔一〕，廉知起居之詳，甚慰。子曰：「苟患失之，無所不至。」百千年間，天地不位，萬物不育，推尋其咎，常於患失之私基之。閣下出其浩然之蓄積，與當世之大人論成敗，爭曲直〔二〕，言不合，艷然竟去。榮途引於前，禍機怵於後，而毅然不變。由閣下自處，則本心內事也，自惴惴持固者觀之，則豈不患此失哉！歐公所謂「我輩中人」，敬歎敬歎！因復卿歸，并介以有請。先通判託孤與先侍郎，先侍郎以其責歸之架閣，事至重也。執事不以某弟爲不穎，使昏名門，講好以來，涉四年矣。中間歲月雖多，機會甚少，以故告成吉禮，猶切遲之。獨至今日，則造物若有巧於其間者。執事當驅馳江淮，而某赴闕就道；執事卷風雲，藏林壑，而某恰亦骯髒來歸。兩家初意，誠不期有此暇也。某方尋香火之

緣，自分閑散，而執事氣宇槩諸公，名聲動中朝，扶搖九霄，匪蚤伊莫，則川駛月流，舟飛岸奔，非復有此之暇。執事終先子之託，而某了同氣之責，今其時乎！區區肺肝，已具告之復卿，并疏其事，冀以關徹，幸執事終惠之。《文山全集》卷六。

〔一〕文：疑當作「丈」。此本「丈」每誤作「文」。

〔二〕直：原作「尺」，據韓本、鄔本改。

回吉守王提舉似書

號敬巖

某僻居林薄間，望旌麾所泣，遠在霄漢。道德朝望，蔚乎輝光，可仰而不可親，是其分也。乃蒙寵戒，令有聞教之便，忻快何如！入冬暄寒相薄〔一〕，適有采薪之憂，莫酬隆厚，滋負皇恐，謹具狀謝。他容參謁，并叙區區。《文山全集》卷六。

〔一〕薄：原作「泊」，據韓本、鄔本改。

與廬陵龔知縣日昇書

號竹鄉

自螺水而東，望西山廬阜，與三江五湖如拱揖，知蜿蜒扶輿，有名勝宅其間。相去蓬弱，良覲差池，北斗芒耀，徒耿耿心目爾。不自意桑梓幸會，牛刀大手，姑爲此試。共惟明和介潔之譽，此邑不占已孚，跂予望之。艱難之秋，得君子之政，與拜燾覆之貺，滌篆云俶。未能躬闖賀庭，謹具劄子，代布忱悃，非晚當圖稟謝不敏。《文山全集》卷六。

與贛縣許權縣書

惟廬陵與安成爲比郡，山川同在吉志。今茲遂得自附於鄉黨之末，幸甚休甚！某往者於諸公間得聞政事一二，有司敬謹，莫重於獄，後世苟簡，幾以民命爲戲。濂溪爲小官，不肯殺人以奉其上；東坡謂今人爭減半年磨勘，雖殺人亦爲之。聖賢愚不肖之用心，其異如此！頗傳廉明與同州推官事前後照映，辱在同里，與切增氣。銅章墨綬，賁止空同，一同風化，姑此相屬。奏最匪伊，騰太清，凌扶搖，錢公之步武也。某疇昔學校，曾於名門子姪略有相知者，獨絢履末光，未有下拜之日，其如傾企何！適陳文成甫來〔一〕，以爲託身桃李之國，輒拜此以識惓惓，陳文并乞公庇也。率然上狀〔二〕，末

繇參侍，仍冀自愛不貲之寶，以須遠至。《文山全集》卷六。

〔一〕陳文：疑當作「陳丈」，下文同。

〔二〕然：原作「文」，據庫本改。

賀劉敬德補入太學書

名欽，號絜矩。

茲審捷來南渚〔一〕，聲振西雍。才名三十年，說屠龍之老手；冠帶億萬計，快走馬之修程。儒榮有開，士論稱服，共惟驩慶。某相期半生，聞榜折屐，無繇造慶，謹奉顛函，芝楮二百千，敬爲犒捷之助。不腆皇恐，臨風馳泝。《文山全集》卷六。

〔一〕渚：韓本、鄆本作「浦」。

賀鍾有謙補入太學

名山甫

茲審冰闡獻藝，璧水蜚聲。月旦評中，說八叉之老才；朝雲飛處，艷三合之修名。下同。《文山

全集》卷六。

與周德甫

爲季弟、從弟聘。

某比者牽率朝從，一相過兩日夜，陪接議論之末，極慰翹企，獨恨去之匆匆，未遑屬饜耳。中間妄欲以二弟相累陶冶，荷不鄙棄，許之以相周旋，甚幸甚休！鄰敵相交則有盟，市道相質則有券，吾徒相與，一諾已足，政不在要約區區也。然君子義以爲質，禮以行之。莘郊之幣，際可而幡，然雖虞人之微，非其招不往。非義無以將禮，非禮無以昭義。交際之道，不以節文將之，終必有弊，況爲弟子擇師乎！此書之所以不敢廢也。歲禮之數，息壤在前，無俟贅述。官楮一百貫，顓人送上，以少將聘致之敬，告幸麾頓。小弟差劣，不可大脫鈴束。燈前後早賜垂訪，乃所願望。觀德聽教，行有日矣，尚及傾倒其餘。《文山全集》卷六。

與文侍郎及翁書

號本心，川人，後參政。

某久曠起居，遞中連得誨帖（一），仰佩至愛。邸狀間屢見丐祠。尊性樂在簡淡，急流勇退，仙風道骨人也。但老文學爲諸儒典刑（二），真侍從爲朝路風采，上必不聽去耳。舍弟璧來拜侍，辱以家人進之，得與教誨玉成，實受尊賜。某向在湘，承命問一路書籍，後某去之匆匆，諸州來者不齊，今約

見存可二百冊。贛書爲一萬九千三百餘版，亦已陸續印背，別容一日專兵賚申。某治郡以來，書生迂闊之說，頗有效驗。祖母六月生日，集城中內外老人，自七十一至九十六，爲男女一千三百九十名，犒恤有差。老者既踴躍，而少者始皆知以老爲貴。禮遜興行，詞訟希省。又風雨以時，早禾甚稔，晚稻亦可望，諸縣民皆樂業，無持挺爲盜如宿昔者。稍追曠瘼，皆尊誨所逮。宗老去國後，今寄居何處？想甚清健。耻堂先生居雪川，近況如何？批示幸甚。遇郵拜書，不宣備。《文山全集》卷六。

〔一〕中：原作「申」，據韓本、鄢本改。

〔二〕典：原作「興」，據右引改。

與楊大卿文仲書

某頃繇岫嶠申敬群玉之府，爾後僕僕西還，爲空同之役。一息半期，海山一碧，秋風淩淩，翹企不勝五雲紛郁。比審疏榮文石，晉武頌臺，制作一新，縉紳交慶，伏深歡忭。某官貞元朝士，西學宗師。玉雪照天，寒露清冰之操；璧奎行世，懸黎垂棘之光。屬時訪落，朝有老成。真天聖之著龜，元祐之麟鳳也。入告辰猷，條天章十事，置之兩社，以福溥寰。某顛顛延睫，烏哺萬山間，於芻牧何補？亦惟召父、杜母之政，是則是倣，蒙被吾味，至於今茲。璧弟來修門，得親炙典型，以濯去舊

意，浸潤新雨。愛其兄，施及其弟，此感殆未易名言也。念間起居，輒此馳泝空明，並候所以教。尚祈金玉，式副前禱。《文山全集》卷六。

與趙戶部平遠書 一

某嫋嫋秋風中，若有天人噓新雨而沐之者。眄搖落之繽紛，把鉅麗而舒卷，則夏六月錦闥蛟龍字也。西平有子，惟我有臣。《春秋》書曰「季子來歸」，國人貴之。麒麟游泰時，鳳凰集阿閣之候乎。朝廷清明，再天聖、元祐，對揚訪落，爲東諸侯先，洗耳琅琅，爲天下誦之。某爲養承乏於此，何補芻牧？所以朝夕其民，亦惟親親長長之推，庶幾萬一云耳。諸邑大夫之相承，通融一家，痛痒一體，「緇衣之宜兮」。若田君，尤所謂用吾情者。執事惠以所知，於此見田君益奇，而某得納交，幸也。「結幽蘭兮延佇」，此意襃積，專猷嗣箋。《文山全集》卷六。

與趙戶部平遠書 二

某繇空同起睨海山，虹氣緯霄，靡罅不照，吾石樓，大地一粟也。輒倚空明，來詞起處，惟偉人照以度外。某惟明世雜還英賢，以綱紀生人，金玉新政。豈弟君子，來游來歌，經緯乎文武，轆轤乎

風雲，伯墳仲篋，叔出季處，無非《吉日》《車攻》間真實經濟。臂指西北，本在中書，植之風聲，旂常世世，某拭目延和殿新綸之下。烏哺且半期，餐素祇益愧耳。旦夕歸命香火，奉輕車，歸即所安，居中引重，允然終惠之望。泚筆廉泉，馳訊碧落，豈不嗣音。更僕以請，臨風無任悃結。《文山全集》卷六。

與陳侍郎伯大書

號篤齋

某熏沐薇露，闖敬高寒，惠徼五行俱下之矚。某玉峽撐空，水沙一碧，神仙人弭節其間。春花秋竹，鐘鼓餘閑，真神龍深卧處也。咫尺五雲，不得時候猿鶴，則吏鞅實丹黜之。夜瞻明河，自訟不置。仰惟一代翔鸞神駿，騰蹕凌厲，駕寥廓而振汗漫也。舒爲慶雲，卷爲清飈。其磅礴帝所，則福在海宇；其夷猶山澤，則望在廟朝。六合一握，天地一瞬也。厥今訪落廟謀，雲漢爲章，詔書出延和，公且兩社，某嘉與顛顛額手。某區區烏鳥之情，俯仰半菽，粉陰蔽芾，實持燾之。宿昔拊摩凋疲，曾微芒忽，而髮皤皤。間亦念家，旦夕皈命香火，奉輕車，即所安。玻瓈一江，光氣上下，某服媚之無斁。蕤禮寄之九霄間，忘其蒙瀆，倘沐涵茹，幸甚！《文山全集》卷六。

與宋衡州書

某介倚心知，不敢徒疊疊西曹，道邊幅，首祈紆省。某自抵空同，兩塵蜚翰，忽殷勤以寫心，折芳菲其寄遠，春風千里，著人如醉。至如骺骹之作，不足乎揚纁籍，而琮璜之大好，大慚退却三舍。顧區區定交才數月，宇宙意氣，不啻平生。忽飄風其相離，不勝回首，明河一方，如耿耿何！某官冰輪金井，雪栢霜松。西岷太白之精，九霄經緯；南平莫邪之氣，萬丈光芒。馳玉軼而坐朱陵，轡華絲而當銀漢，洗鷖鷖之窟穴，飽鴻鴈之稻粱。已收暴公子之威名，小燕汲淮陽之清淨。綠綈方底，竚垂岫嶼之雲；絳幘曉籌，催傍觚稜之月。某視郡印已十旬，初至如人家，風雨四壁，逐處經理，久之方成綸緒。日來甘霑應期，粗慰農望。想福星所次，時雨膏之，早熟必已可卜。恕齋新上，以同里而講交承，解后非偶然者。遠想楚觀五雲，衣冠玉立，不任馳羨。采采澗芹，薄旌一髮，不足當莞頓。「欲往從之湘水深」，三復是詩，神爽飛越。《文山全集》卷六。

與知江州錢運使書 一

某日戴五雲，苟且爲治。自省其私，則統部中一支壘也，等威有截，不得以杏園宿昔自詭。乃者

辱不彼，賜之書，草木吾味，篤實嘔喻，略分際之崇卑，申度外之繾綣。言念君子，終不可諉兮。某惟湓浦控上下流，古用武之國，陶士行、庾元規諸公藉此以鷹揚江表，虎視河洛。乃今天移福星，作鎮此土，激西江，蘇鮒轍，屹長淮而斷鯨波，作宋長城，真北平變化傑魁人也。東南金湯，施及虹翠，隸也受賜多矣。某私竊自念，贛山長谷荒，赤子龍蛇雜襲而處，芻牧之責，大恨不任。而欲以詩書揉強暴，衣冠化刀劍，書生迂闊，而不至敗缺者幾希。明公回首曲江，風誼一世，果不以九州四海之人例視之〔二〕，則鞭辟其不迨，包蓄其未閑，如天之福也，某頓首下風以請。謹馳一介〔三〕，上訶起居，薄采空青，以自附於潢汙有敬之誼。犯嚴忸然，控露潦略。《文山全集》卷六。

〔二〕州：原作「川」，據庫本改。

〔三〕謹：原脫，據韓本、鄆本補。

與知江州錢運使書 二

某撫搖落之繽紛，泝空明而延佇，龍光射牛斗，福星出虛危，殆一夕九起也。某之爲郡，寔隸照臨，月詔有典，當不懈益虔，寧不嗣音，童瀆是懼。五雲九霄，凌倒景而下空同，斂爲清冰，溥爲膏雨，地雖辟絕，而天人顧復之益深。「豈無他人，不如我同味。」足下墳簾五老之嶙峋，襟帶九河之汗

漫。要其胸中，磊磊落落，倬彼雲漢，爲章于天者，曾未究也。忽而身作長城，手提半壁，嘉與一道桑麻而菽粟之。西人之子，幸則幸矣，然六轡如濡，王事一方，孰與入坐中書，經制天下？聞延和殿議召公矣。某強顏芻牧，何補毫分？目前四境無虞，年穀粗豐，皆澄清餘潤所覃也，區區素餐是愧。倘使者猶以故人未即舉法，旦夕丐香火，奉輕軒，歸即所安，徼福年盟，尚終惠之。遠道寵賚，雜遝充庭，翠玉春暉，緹襲無斁，謹具劄申聞。伏覩新綸，專容郵賀。《文山全集》卷六。

與廣東曹提刑書

某曉挹薇露，注之赫蹏，上之東壁府，昭有敬也。某惟紫微雲烟，衣被炎海，若經若緯。紛郁輪囷，施及虹翠間，山媚川暉，浩蕩何極，隸也旦旦稽首。欽以某官才足以截蛟剗犀，文足以鏗鯨躍鳳，力量足以扶巨鰲之鼉虬，東都韓、呂家，聲猷奕奕。江濤如許，更當坐玉關，爲天子當一面。繡衣霄漢，尚透迤五嶺間邪？袖青冥之鈇鉞，行黃道之星辰，方底綠綈，已落天半。某不戴五雲，奉重暖空同小院，烏鳥私情，自揣逾分。起視四境，山長谷荒，赤子龍蛇，未易帖服，越鷄伏鵠卵，何以克濟？邇只臺容，如面鐵壁，某恃此無恐。郡中舊例，以八九月間申嚴編氓出甲之禁，往往此時凶儔陳脚已動，履霜不戒堅冰，柰何。近者妄意，預行曉揭，使家至戶曉，人人知所避就。今年僥倖梅關以南，無一草一木之驚，僕之責始塞。榜檢求教吏師，尚不彼發藥之。某比爲五羊羅僉判拜書強聒，

持寸莛撞巨鍾，多見其不知量。飛剡公車，不俟終日。明公有意天下士如此，感拜盛心，謹馳一价修詞節下，謝已往而祈方來，亶亶如也。東望芙蓉，玉立萬仞，伏楮神馳〔二〕。《文山全集》卷六。

〔二〕楮：原作「諸」，據韓本、鄆本改。

回汀州陳守書

某惟自古民流爲盜，有受病淺者，有受病深者。淺者調其血氣，時其餽飼，不待針艾而病已除。昔之人有行之者，龔少卿施於漢之渤海是已。深者參苓之所不能可，湯熨之所不能瘳，則大承氣湯證矣。昔之人有行之者，子太叔用於鄭之萑苻是已。今者使部弭盜一事，鰲峰先生豈弟之心，高明之識，見諸已行者，其成效固班班著矣。賞一人而勸者百，罰一人而戒者亦百。春風之和，秋霜之栗，施及鄰境，胥有嘉賴。特在更酌其受病之淺深，而斷以行之，是殆非浮想懸度者所敢與知也。贛之爲州，雖曰以五城兵馬鈐轄繫之銜，顧建立司存，本意不過爲贛民出他境，使郡將得行通制之權，要其實，則依然一列城也。若有所徵調，下郡稟承，實視朝命。謹布腹心，以謝委戒之辱，膏結恐悚。

《文山全集》卷六。

與趙大卿孟傳書

號松壑。前知贛州。

某汲廉泉，澡栗尾，通忝忝主書吏，昭初好也。某昨從湘花間奉盈尺牘，一舒泄其宿昔雲龍之私。明河七襄，流麗空碧，地中之山《謙》，水上之風《渙》，十襲九緹，至今耿耿光氣。蓬萊水清淺，縹緲環佩，渴心湧泉，一日千里。某茲者共審玉宸渙寵，金掌昇班。維城維翰維藩，磐石大宗之續；厥貢厥包厥篚，綱維六府之司。禁籞雲開，神塗風動，伏惟慶忭。欽以某官祥源異稟，若木殊輝。綺繡揮揚，汝陽天人之相；龍虎變化，北平魁傑之風。勞侍從而厭承明，經駘盪而出馭娑。公不淮海之薄，上爲宣室之思。玉珂金鑰之玲瓏，花綬藻衣之舄奕。徑摩馳道，渙周卿六命之頒；不出都門，竚唐相九人之拜。某頃單車馳岫嶺下，鶴髮重重，一夕九起，效贖洗馬，歷歷陳情。君師天地之造，爲擇便州。夫子奔逸絕塵，乃使隸也瞠若乎其後。雖鴻燕差池，不克面拜龜組，然天開百世之好，山川其忘諸？惟是求牧力綿，未知攸淑，一規一隨，賴有柯則在。我愛桐鄉，不隔風雨，肘後寵靈，不彼而惠綏之，此固憩棠中父老之所共望賜者也。謹具劄子，申詞起居，未諧良晤，願言金護玉持，式副前禱。應舊治要來，敢請其凡。《文山全集》卷六。

與前江西趙倉與楷書

號端齋

某澤露焚蕤，闖敬五畝花竹下，盡脫櫛彝，惟高明垂簷。某沐滕塵舊雨，今十六七年；立冀部下風，則又六年。僕以荒落之資，跼伏於青原山中，如商鉅馳河，遠莫致之。先生如驚雲游龍，舒卷九霄，其步武不可俄度，宜乎其欲往之而瞻望不可及也。區區九十之親，就養空同，今繡衣洛社中輩行也，間得訪問，獨樂起處。先生玩心神明之表，游日日月之上，蓄爲清氛，蒸爲非霖，一日舉而措之，沛然江河，孰能禦之？我有宗老，爲國之幹，訪于落止，以公歸兮。某半生出處，無足爲明公道。宿昔受教，所以護持其元龜者，至今不敢渝。世人自有一種毀譽，道眼自有一等高下，先生度外大觀，謂其人竟何如也？某因諗趙令君居中台之里，又出門下，值其良使，亟哀此墨，少叙戀思。臨楮馳泝。《文山全集》卷六。

與吉州劉守漢傳書

一

某澤穎拔蕤，寫恣恣銅壺閣下，昭鄰好也。某日從郵置，得澣我私。盈盈一水間，鼓宮宮動，鼓角角動，精神流注，絕出翰墨町畦，芳菲菲兮浩蕩何極。欽以某官吐吞玉櫃之風烟，披拂青藜之光

燄。卿雲甘雨，含天地之至和；古栢蒼松，炯雪霜而獨立。小駐星河之棹，頻分江國之符。春靄袴襦，神螺黼黻，雨籠絃誦，振鷺漣漪。鈍爲銛而頑爲廉，痿者膏而憤者醒。兵衛森畫戟，小宴清香；衣冠拜紫宸，佇班黃道。某宿盟園杏，又尾朝花，蒙霧一塵，稽首錫類。謁來空同，密倚五雲多處，楚波之及晉，魯柝之聞邾，川媚山暉，沐浴今雨。則所以講信脩睦者，奈何以簡陋廢？采采澗蘋，以明有敬，玻瓈一碧，此心俱東。《文山全集》卷六。

與吉州劉守漢傳書 二

某日摩挲空翠，端飭側厘，以進之集古主書之側。蓋於門墻辱好有三焉：園杏之齊盟也，朝花之末至也，三間風雨託於君侯之土地也；而豈但曰小國之於大國也，有交鄰之道焉？謙齋先生不以小人之美芹者爲僭，而察其明，有敬之私，是能容之，其弘多矣。介使踵來，辭日報聘，庭實維旅，芳菲彌章。是何君子施禮之周，執德之信，而僕何以當之？抑傳有云：「長者賜，不敢辭。」取數之多，亦祇以媿。贛去吉一水三百里，而氣候風土習俗事事不同。未春已花，才晴即熱，山川之綢繆，人物之伉健，大概去南漸近，得天地陽氣之偏。看來反不可以刑威懾，而可以義理動。書生出其迂闊之說，嘗試一二，觀聽之間，稍覺丕變。奉令承教於君子，尚願繼今有聞（二），以淑厥後。廬陵之政，識與不識皆云一佛出世。山川出雲，時雨流動，此爲霖之善者機也。民歌路謠，徹聞京師，天子明

聖，恩光言遠。某雖不敏，尚能取皇甫公韻歌和之。占謝之次，寫其輪囷，寧不嗣音，如此江水。
《文山全集》卷六。

〔二〕繼：原作「維」，據文意改。

回吉州趙倅書

某首春携便符歸省，道五臺下。華裾葱蒨，照我征衣，雪跨冰懸，灑灑清味，至今彷彿霄栩間。投膠沸糜，不克闖屏星西來，以修賀上之禮。琳琅金薤，忽落虹翠三過，趫然以喜。某茲者伏審緹軾行春，畫堂開曉，袖槐雲之五色，俎樓月之千峰，共惟歡慶。某官瑤簾簫鍾，秋濤瑞錦。駕玉虹，垂蒼兕，凌紫清而上之，固其所也，鞞鞞珮璫，乃翱翔石泉松雪間邪？輿藤簾繡，小燕屏題，方底綠緹，又看環召。某視郡印十旬，云云皆喬燾之賜也。自省於涓曹正負不敏，圓槭鄭重，此禮奚宜至哉？鯨錦卷還，猶有餘媿，折寄芳菲，今雨何厚！頓首拜嘉，謹謝將命，尚容專致厦成之慶。《文山全

集》卷六。

回袁州鄒倅書

朱明逾半，南薰之時，共惟襦袴行春，旌旗麗曉，有燕有翼。某對廉泉，飭側厘，東嚮以謝主書吏。某頃叨節南馳，得符歸省，三峽烟雨中，一再獲拜瑶林瓊樹之側，亶亶吾味，我心寫兮。執袪幾何時，明月千里，惠而好我，錯落華音，下照虹翠。赤脚踏層冰，忘其執熱也。共審龜臺借重，鳳岳凝清，時雨誦絃，和風條教，伏惟歡慶。某官東山芝蘭之韻，北斗梧竹之標。朝發軔兮扶桑，夕攬轡兮玄圃，識者已竊遲之，兩樓山水，能久著神仙人邪？竚文組之即真，以介圭而入覲。某楔前一日，奉重闈抵空同下。既三閱月，公事稍清，得小遂半菽歡，錫類之餘也。實筐勤斯，芳菲襲予，新雨洒濯，感在下風。采采一芹，效贖隴寄，非所以報也。馳遡一方。《文山全集》卷六。

回臨江婁倅書

夏鳴仲瑄，良苗懷新。共惟風月滿樓，江山入句〔二〕，百神僕价。某焚蕤瀹露，專謝中涓。若兩廂毳毼，五鼎芍藥，無庸爲仙人瀆。某於東都韓、呂家，鼎鑪獨無耳乎？頃一節湘行，獲從衡陽，廣文君亶亶簷花，情味甚春容也。清江之上，頡頏飛霞，獨不得四方爲雲，追軼清絕。琳琅金薤，光墮

玉虹，執熱以濯，我心寫兮。欽以某官冰壺玉露之泠泠，瑤林瓊樹之英英，黃琮蒼璧之熒熒。上之清都，盛之紫微，便當還家氈本色，石泉松雪，可久爲麒麟係耶？方底綠綈，自天子所。某將指罔功，叨恩便養。空同小院，粗可從容半菽歡，皆喬燾之賜。惟芻牧之才單，龍蛇之俗險，凜乎未知攸濟。渠渠遠道，頌不以規，既謝下風，尚沐新雨。畫堂高處，槐桂成行，春蚓秋蛇，覺我形穢。明公不以覆瓿而顯設之，鉅軸爛然〔二〕，一見頽發。謹復將命，不勝馳泝。《文山全集》卷六。

〔一〕句：原作「自」，據韓本、鄆本改。

〔二〕鉅：原作「鍾」，據右引改。

回隆興熊倅震龍書

某撫今雨，懷清風，其契闊未有甚於此時者也。挹色絲於浦碧，追流水於爨焦，其慰浣有甚於斯。今乎澹圃先生以冰懸雪跨爲風骨，以鸞漂鳳泊爲文章，以規圓矩折爲政事，挈其堂堂，著之高處，以經緯河漢，舟楫江濤，萬夫一喙也。陳仲舉千載風流，乃獨與歲寒結印。倅霆轟飈怒而起，有不磊磊落落者乎？時來則爲，當仁無遜。某雨別十年，無非俯仰林鳥之日。祖母行年八十有七，切切便養，承乏此來。公朝篤隸人紀之造，而諸君子錫類之餘也。第五閱朔于此，塵而入，鞅而出，於民

無絲分補。行矣，丐一縷香火緣，奉輕軒以歸。亶亶襟期，明月千里，折寄芳菲，厚意不敢不拜。薄將石間一髮，非所以爲美芹也。廬陵廣文，玉戛金鏗；長沙識衡山簿，猶昂昂鷄群之鶴。中峰有以服乎兩峰，觀者爲此瞻慄。何當簪盍，上下慷慨，目送征翰，臨染馳去。《文山全集》卷六。

與楊縣尉如圭書

某他日上下紫淦間，草木吾味，未必無解后之雅者也。廬陵少仙之庭，數有英游，發軔其間。而君年又不可及，當官風采，東西行者亶亶誦言，知爲清修，知爲績粟。培風怒飛，霄漢一碧，跂予望之。某誤恩便壘，夢繞松楸間。伏戎于莽，有乘虛而干法犯禁者，霜臺遽以煩執事，知敏手爲可託也。寒泉白骨，蒙賴方新，惟牽帥從者〔一〕，重愧重愧！草草持恩高明，臨染無任。《文山全集》卷六。

〔一〕帥：原作「師」，據庫本改。「帥」同「率」。

回唐書記書

某一節湘行，得挹寶烟玉氣於芙蓉池淥間，亶亶吾味，歡如平生。岸花催路，吹絮滿衣，燁其五

雲，落我店月。厚意久不報，所思遠道，回首慙然。執事以瓊琚玉佩，照映東西。鸞鳳先驅，朝闥風，夕玄圃可也。赤雲瑞氣，黃花歸期，當仁勿遜。某花朝前四日抵雲舍，又十日奉重闈沂灘而上，楔前一日抵空同。郡事稍簡，俯仰半菽，皆裔燾賜也。江湖寥落，鴻影參差，「安得素心人，相與數晨夕」，每誦此詩，明發不寐。輒持只赤，小澣我私。采采澗芹，臨風如結。《文山全集》卷六。

回黃強立書

某薄游空同，繾綣半菽，故人知心，千里寄瑤華音，以繅藉之。讀之宛然促膝接語也。強立以排淮決漢之胸，行駕風鞭霆之氣，鑄爲雄辭，能使京師紙貴。新豐舍中，誦天下事，一日騰上，風聲千載。某來此，訟簡事稀，餘力可及故讀。四境倍稔，絕南剽之跡，皆五雲所照映也。久缺報襄，輒郵專筒，薄將聊奉一笑。《文山全集》卷六。

回文教書 名寶

某久徯亢宗，無從通譜。璧弟幸托年盟，雲杏集中，不知曾得納拜否。己巳之歲，千騎過廬陵，有意來山中。時某適赴鶴書，取愧薜荔，失此交情，悵然一方之感。書來空同，陳誼天出，「欲往從

之湘水深」，令人亶亶。柳子厚謂南方之靈鍾而爲石，故有「多石少人」之論，某常以爲未也。地氣自北而南，古有斯語，意者人物之數，斯文之運，亦莫不然。玉簪羅帶之勝，中州山川所未有也，磅礴鬱積而振發之，以其時可矣，吾宗丈寔當之乎〔二〕！令業方來，雲湧川至，樹之風聲，快覩燄燄。某半生落魄，無足爲宗盟道。去年單車馳岫嶺下，堂有重慈，白雲間之陳情，至於一再，遂授今壘。闔門就祿，亶出過數，力綿求牧，未知向方。宗丈宦遊海外，坐隔一關，一介相先，是不以他人待同姓者。委貺所及，拜而受之，薄物非所以報，何當嗣音？《文山全集》卷六。

〔二〕文：原作「文」，據庫本改。

與胡節推幼黃書

某他日盤之中，辱玉山朗然照之。「舉帆凌斗牛，掛席拾海月」，已占吾成玉堂堂於此時矣。空同落葉間，快讀千佛，喜見榜花。雙峰巽山，嶙峋蒼翠，布濩鞦韆，何盛大如之！國家三百年，代有英傑，樹之風聲，五緯聚奎之符，彪炳未已。滅沒草根者固復何限，吾成玉一大振起之。青原剽空，忠節生氣，是則草木同味也。諭計畫繡娛雙親時，某當以奉祠歸里，尚從鄉稚耆候馬首遮慶。茲襍赫蹠寫此，茂悅亶亶。薄將祇瀆。《文山全集》卷六。

全宋文卷八三〇八

文天祥 二

繳奏藁上中書札子

時吳履齋當國

某惟軍國萬微，日至黃閣，不敢爲竿櫓，區區懼瀆威峻，惟鈞宥是祈。某頃罹人子之厄，曾拜仁人親親之恩，感激榮光，永矢無斃。不自意今春伏遇先生袞繡來歸，爲國柱石，遂得密邇陶鈞，以庶幾一日履屐之役，幸甚莫大。先生當國以來，上迎聖主悔悟之機，下慰蒼生蘇息之望，所謂垂紳不動聲色，而措天下於泰山之安，先生有焉。乃一日伏讀明詔，許中外臣庶得實封言事，皇心光明，言路軒豁，恭惟啓沃至深也。某私念今事變至此，衝決橫潰，使宗社有不測之憂者，誰實爲之？病根在內，膠結不去，終不可以爲國，是以積忱具書，先陳其愚慮之一，而痛哭流涕終之。人非不知愛身，何苦如此冒死？今日之事急矣，懼其至於一旦，則亦不免於死也。惟是言輶如毛，懼不足以感悟天聽，尚賴先生狗通國之心，出回天之力，以措世道於清夷光晏之域，某九殞無悔。謹繳奏藁具申，伏

惟鈞慈俯賜鑑察。《文山全集》卷六。

賀簽書樞密江端明古心書 一

某夏五之月，伏從下土，切聽朝命。共惟天子蒐選洪儒，布滿侍從，而先生以海內達尊，居然冠文昌之首。僕自惟念正人登崇，天下誠幸誠賀，不敢以草野自疎，輒奉狀以爲斯人之慶。記史登錄，及徹巖視，私心欣喜，莫可涯涘。山澤深遠，與廊廟本不相接，一日閭巷風傳歡吹，則謂先生以某日踐政地、參樞筦。主上聖明，君子終爲大用，莫不舉手加額，以爲共相天子，活百姓，遂在旦夕。以一方推而放諸，知權欣交通，人情莫不皆然。人望有所宗，而斯民之譽猶出於直道，僕爲之舞之蹈之，中夜以思，不能成寐。夫以穹壤之大，人倫之衆，而先生之進，大夫士庶民皆欣欣然相告，如其父兄親屬之得用，將有所利賴於己者。此其心豈千金之所可得，而家至戶曉所能同哉？我朝先正得此氣象，惟前有范文正，後有司馬公。范自諫府以來，以言事傾動中外，後來出帥西邊，入班兩地，巖穴之士，慕下風而望餘光，蓋皆延頸企踵，以庶幾其一日之爲相。司馬居洛中十餘年，當時兒童婦女，識與不識，競曰「司馬相公」。元祐初，衛士之感泣，都人之遮留，其所由來者漸矣，非一朝一夕之故也。范公得經世之望，司馬公得救民之望。嘗恨士大夫所以積望於平日，得望於當時，蓋幾世幾年而後得此二公，有以厭服天下之心口，聳動時人之耳目。而范公不及用，司馬公不及盡用，天之

未欲平治天下，其如之何哉！今先生早以言語妙天下，中以政事動中朝，後以氣槩風度上結人主之知，而下爲四海所傾慕，則先生都范、馬之望於一身。蓋二公之後，又凡幾世幾年而後得。此天下之所以責望於先生者，豈與佻佻眈眈，笑與秩終，而甘同草木俱腐者同日而語哉！方今西有叛將，東有逆離，而江淮與強敵爲鄰，強兵富財之道無所於講。主上不得怡，宰相以爲憂，其顯證莫過於此。而學士大夫私相擬議，痛心疾首，以爲方來無窮之變，伏於不足慮之中，而發於不測，而不可禁者，其幾尤切凜凜。天下無事，則代天理物之地，猶可從事於牽補架漏，以庶幾不至於敗缺。不幸搶攘憂危之間，倘非碩德重名積孚於人心，一日舉之以從民望，則鎮服危疑，收拾渙散，精神氣勢未能一旦動天下之聽也。今當揆身定大亂，奠安方極，不敢自以爲功，而方嘉與天下之賢者，共圖久安長治之策。先生從容於廟朝，訐謨於帷幄，則當揆所以隆體貌，敷腹心，未能或之先也。鄴侯所以舉代於平陽，茂弘所以深器於安石，其爲天下國家計者甚悉，豈曰身爲功業而已哉？則夫先生之一身，其關繫於方來之世道誠重且大。而閭閻之內，父子骨肉私憂過計，以爲脫有倉卒，則所以寄命而幸全者，非先生疇依？然則先生之望，近世以來絕無而僅有者。將范、馬不及爲之事，先生將來雖欲逃之而不爲，其亦何辭以謝天地神人之所期哉！僕鄙野無足道，又執方不通於世，修門之書，每視以爲甚重，而未敢輒發。其於先生獨躋躋不倦，自天下之公而言，則僕之喜談樂道，與人情若不相遠。自一身之私而言，則僕誠何人，而辱先生特達之知。此其所以伸紙行墨，樂爲四海誦其情，而不自覺其僭且瀆也。伏惟先生少垂察焉。《文山全集》卷六。

賀簽書樞密江端明古心書 二

某仰惟三台熒煌之精，藐在雲漢，下土之人，夜詹頷頷，曾無羽翰可飛，遙於經天光耀之側。間者不揆，雖荒繆之筆墨，時得以上登涓史，而觀道德，聽教誨，自謂未有疇昔，則左右亦以其人爲何如？先生度越常情，嘉惠後學，采於窮約之素，以爲可進而教之。廬陵之士，凡來謁先生者，未嘗不深念其姓名。至於造化人物之地，先生所以提撕薦進，使之得以齒下士於朝，則既有日矣。乃者秘府之命，從天而下，空山不穎之蹤跡，一日有聞於人。自宰相鈞陶而言，曾無所偏私。而某心口相謂，山澤之人何以及此？是蓋有所從來，而不敢忘也。當《泰》之世，必有均調皇極之輔，深思遠計，周及人物，雖遐遠僻陋如不肖，亦使之無所曠棄。九二曰「不遐遺，得尚于中行」，今當揆以之。《泰》之未成也，必有一陽爲之先，而後衆陽之氣類隨其汲引以進。今正人滿朝，大抵以先生爲朋來之倡。至於晚陋，亦得依乘以前。初九曰「拔茅茹，以其彙征」，先生當之。《屯》之六二曰：「匪寇婚媾，女子貞不字，十年乃字。」一嫌於初，不願爲應，徘徊不字，至於十年。某雖不足語此，顧惟劫而從之者衆矣。蓋至今日，得先生爲之宗主，奉命驅馳，惟此時爲然。某他無能爲役，至於守其本心，不與流俗爲軒輊，以求上不負知己，下不負嵬瑣之所存，則或可無愧忤於此，尚惟先生終數之。某欽惟新命，亟應祇赴，顧以未服外庸，不敢即造朝班。區區欲俟宮觀兩考批滿日，徐拜恩渥。蓋已顛狀控

於朝矣，諒先生當許可之。遙睇清崇，未即詹侍，輒奉狀，臨拜懇悃。《文山全集》卷六。

與江端明古心書

時以前宰相帥湖南回。

某半生出門下，幸甚，乃從湖南以一節奔走闔部，去年此時拜長沙壽星，甫償分願。潭、衡相望，郵置信宿，奉令承教，王事一家。以父兄師弟子之情而行於連率方伯之際，湘人或云前未見此比，而某也受賜爲不貲矣。先生之入湘也，某後三數日而來，先生之出湘也，某後三數日而去，何其步亦步而趨亦趨也！璧弟於臨江候迓使舡，獨蒙一再予進，所以愛之誨之，不令兄弟無間然者。曾不自意先生及豐城以下，乃有門內之戚。盛德大業如山如河，存神過化之學，先生其講之也熟矣（一）。某所得郡，去家一葦，而近奉八十七之祖母與老母俱，闔門長幼無慮二百指，悉從官居，糜費俸粟，是皆公朝錫類之造。郡事頗簡，四方無竊發之告，日來風雨亦似調順，使苟祿之日，得免曠瘵，非大播之賜而誰賜？秦孟四者久焉逋誅，湖湘未了公事，殊切介介。比日來連得舊同官書，閤計議駐兵永明，誘孟四而生獲之，爲廣兵所奪，尋且告斃。經司取其屍，寸斬以謝兩路。先是田定二據平原，秦小九據鹽田，爲秦孟四聲援。引孟四以屠永明，正田定二之爲也。柯倅權全州，首禽二兇，磔於市。自二兇死，而孟四遂不能免。先生一番出師，其終條理如此。孟四不死，非但遺患南方，其於根本關係甚不細。且得竣事，功之在彼在此無足計也。蕭獻可失其令嗣如墳，廬陵生此士有數，可爲痛惜！

詹望泰階，中夕九起，薄言傾寫，有懷忡忡。伏乞鈞照。《文山全集》卷六。

〔一〕熟：原作「孰」，據韓本、鄆本改。

與吉守李寺丞芾書

號肯齋

某居廬陵南陬，蓋受塵之最遠者也。其於當世人物無所交際，惟從田間側聽輿論，則天下伯淳，雖隔在僻遠，烏得不聞風稽首？吾州自前守去後，無主宰幾一年。舞鱗號狐，郡政泥濁，斯人無辜，亦云甚矣。執事不鄙下土，惠然此來，天開日明，是在今日，某實爲鄉國稱慶。仰藉喬雲在上，區區非才，叨恩入館，極知負乘。月朔嘗造州關印申免，時聞千騎且入關，某遂止旅間，伺候攀迓前茅。繼聞少展，適頭目受病，旋暈不可耐，不得已載舟兼輿以歸。相距兩月，交臂失之，不敏之咎，其當何如！方僥倖平復，造謁以叙悃悞，顛駛及門，寵授翰墨。山林疎賤之人，乃得殊禮，郡大夫之德爲不可及，而某缺典之愧益加多矣。祇誦來辱，避席再拜，有懷輪困，具嚴初櫝，謹具劄子，繳申職事之記。所有台翰，謹謹歸璧，示不敢當也。修有草率，顛圖侍見以謝。《文山全集》卷六。

回廣東曹提刑書

伏以炎日正夏，薰風自南，共惟某官玉節霄明，華絲雲度，穆清簡炷，交壤萊扶，台候動止曼福。某淪穎廉清，通箋奎碧，惠徼書月，却立下風。某遙企芙蓉上插牛斗，儼繡衣之持斧，而瑠靡以爲糧，弘鋪太和，勿問元吉。某欽以某官簫鍾鏗夏，玉尺端方。廬阜青蒼，毓白石清泉之勝；北斗魁傑，挺碧梧翠竹之標。或弭節於人間，或影纓於帝所。既盤礴而鬱積，復周遊以逍遙。流水青山，奪司馬尋春之志；荒崖絕島，行濂溪流物之心。欽哉刑之，恤哉使也，言有先也。樓臺映白日，絲轡小馳；衣冠拜紫宸，綸音遄下。某起觀宣夜，跂敬明河。方闊焉北樹之題，乃贈以南金之寵。蹙然三復，愧此七襄。某頃綴楚輶，每懷綿末。牋天從欲，回邛坂之車；便地養親，得江南之舍。永惟錫類，不隔善鄰。襞積阻心，熒煌在目。某袖分蕤露，才劣錦雲。雜下俚於九成，發宗工之一莞。隄瞻蓬翠，工輯蕊珠。冰桃碧藕之清涼，福英祿華之郁穆。臺容所戒，鞭影是趨。《文山全集》卷六。

回陳侍郎書

某伏以回車邛坂，請自效於林鳥；得郡江南，取已捐之竹馬。綢繆錦覆，緹襲袞華。共惟某官麾

斥八極之風雷，卷懷九天之星斗。古靈袖中之藁，屢薦時賢；溫公洛下之評，不遺人物。遂使忝求芻之寄，從而諧啜菽之私。某半竹奚堪，儷花甚寵。想五畝青山之樂，願請訂金；懷四愁明月之詩，曷酬贈璧？謹具劄子申謝，伏乞台照。《文山全集》卷六。

與湖南交代廖提刑書

某汲濂香，裹側厘，裔忝忝于主進吏，昭交好也，首祈紆省。茲者伏審濡絲星轡，弭節霜臺。紫蓋撐空，開雲烟之五色；繡衣立漢，灑冰雪於九州。號令一新，江山胥動。共惟某官金井玉淵之丰度，簫鍾瑤篴之聲名。老氣崢嶸，吐鰲頭之山碧；清文流灑，貫龍影之潭星。凡踐敷中外以來，皆推行忠恕之學。惟刀劍狙楚氛之惡，賴旌旗指漢坂而驅。于疆于理于南，來宣王命；其刑其罰其審，曰惟民中。汲湘水而滌瘡痍，豁衡雲而燭幽枉。禮樂遣使臣也，於昭原隰之光；袞繡歸我公兮，遄任朝廷之重。某頃從岫嶠下一拜狀後，繼得旨，以臬事屬之宋使君。某遂於正月末解維而西，先花朝之四日抵雲舍，楔前奉重闈至空同上。俯仰半菽，皆裔燾賜也。第念夙緣結習，實開衣冠百世之好，乃不克迎拜馬前，面奉龜組。江海契闊，有足念者。近得之東西行人，始知歎節前玉節道盱境。以時考之，此際久建牙楚觀上矣，某不勝爲湖南一道賀舞。後木人蕭然音節，納之錦覆，過者化之，亦以自賀也。某春杪得府第所遣答書，仰佩篤叙。數月念念嗣音，相望沈寥，邃坐不敏。茲想建臺有俟，謹

跽下風，傾此襍積。臨拜無任馳泝之至，伏乞台照。《文山全集》卷六。

與前浙西安撫李大卿書

號肯齋

某頃從湘花間解維而西也，故人意厚，棹酒壺，三十里而飲餞之。風飄飄兮吹衣，芳菲菲兮襲予，响喻篤緻，一何勤也。回首江空，明月千里，因念向留楚觀，望午橋鍾鼓，不隔簷陰，從容玉塵，曾不能以數數。矧今去之汀洲杜若間，蓬弱三萬不翅，明河在天，瞻仰夙夜，如此悵結何！某共以某官懸黎垂棘，瑤簋簫鍾。崢冰雪，走雷霆，精神麾乎八極；沮金石，諧韶濩，文采被乎五音。維今江濤，正須人物，外之而北門筦鑰，內之而西府樞機，宜惟老成，具有經濟。青山五畝，未容寄傲之深；黃道九天，佇看傳呼之近。某丕承裔燾，先花朝之四日抵雲舍，又十日奉重闈泝灘而上，楔前抵郡邸。賤事乍入沸糜，不免轆轤。既三閱月，遂就簡平，親老安健如常。半菽俯仰，皆錫類之及。惟起視四境，長山谷荒，赤子龍蛇，未易帖服，商鉅馳河，凜乎其未濟。教思無窮，惟勿替宿昔，重訓飭之。秦寇一段，某未了事而去，日夜念此。半年師旅，數州杼柚爲空，疽根仍存，憂曷有極！今聞罪人斯得，黨類悉就殲夷。我愛桐鄉，屐齒爲折，顧撫摩凋瘵，鎮定危疑，湖嶺間方來正欠工夫耳。洛中花竹平安，悠然長思，當必及之。某數月念念，專襍上起居，及今方走一介，不敏甚矣。未繇佳晤，暑氣方殷，願言金護玉持，以副蒼生之望。孤臺有委，一唯鞭影所向。某臨風馳泝之

至。《文山全集》卷六。

〔一〕沮：原脫，據韓本、鄆本補。

與劉吉州漢傳書

某介恃薄雲之誼，忘其爲瀆，僭有願陳。吾鄉歐陽巽齋先生，講學天出，從游滿門。登科三十年，獨處環堵。晚見召擢，一再登朝，先生居之淡如也。其修於家，終日清言，接引後進，未嘗爲擔石謀。捐館之日，橐無贏貲，諸生爲集喪事。悠悠人生，惟死乃見真實。嗚呼，先生之風可使懦夫立也！其子浚，字資深，世先生之學，頽然而衣。禁路諸公每以鄉先生歿而無澤爲闕典，有欲從化地言者，人情好德，信不相遠。先生不以貨財遺其子，而資深亦復能守拙甘貧，酷與乃翁相似。區區謂文獻所屬，吾輩當相與輔成之。大監樂善若不及，又於巽齋爲庚年同朝。儻念其孤，時分廩俸，月資送之〔一〕，使先生有子不至乏絕，非惟使爲善者知勸，而名公念舊下士之盛心，所風厲遠矣。某旦夕亦謀具辭幣聘資深至郡齋，庶幾前輩之典刑，斯文之宿昔。念同志孰有如門墻者，故輒以書至焉。當暑紊聽，慚汗瀦流，伏乞台照。《文山全集》卷六。

〔一〕資：原作「質」，據庫本改。

回兩淮制使李端明庭芝書

伏惟龍虎魁傑，手提鈇鉞〔一〕，重鎮東郊。淮山崇崇，江水不波，施於南土。隸也跽敬階符，等威有截，不圖親灑袞翰賁之，榮光下土，伏讀感激。某仰承寵戒信豐趙宰，真古大臣勤小之威心。趙於某同年，宿相厚，今又得以郡邑聯好，人事結習非偶然。矧知出自晉公門下，他日稱吾榜得人，有所受之矣。謹具劄子，百拜控謝。藁秸萬罪，伏乞鈞照。《文山全集》卷六。

〔一〕鈇：原作「鐵」，據庫本改。

回岳縣尉書

惟中興之初，先武穆王手扶天戈，忠義與日月爭光，名在旂常，功在社稷。天報勳勞，克昌厥後，雖百世可知也。縣尉生北平龍虎家，而又偉然植立，誰不知敬！幸出結習，乃託一日之嘗僚。判諭批曆，亦既欽承，遠畀鱗緘，爲禮過矣！《文山全集》卷六。

與洪端明雲巖書 名燾

去歲在湘中，專人詣越拜起居，造沐報教。以門墻一介之舊，撫問所及，勿替引之。相望廓寥，感戴不可言喻。繼閱邸狀，欣審端殿陞班，安車就第。于疆于理，既了旬宣，某水某丘，逕歸遊釣，共惟驩慶。欽以某官中朝耆舊，前輩典刑。早歲驅馳，持國、子華之並出，晚年脫灑，盤洲、野處之所無。今世浮沉，畏途不知止足者勿論，固有掛冠請老，欲一日婆娑里門而不可得者。先生袖手版，還丞相，天目山中逍遙野服，獨立於得喪寵辱之表，真天人哉！左轄頻虛，上方側席，只恐禁中朝出傳宣，天使夕至，未容公久作碧山學士耳。某堂有重慈，今年八十有七。昨者將指而出，牽於行路，鶴髮不容迎養，歲晚力扣化地，乃畀麾章貢，家園相去三百里，一葦可杭，闔門二百指皆仰祿焉。此先生喬雲所覃。某到郡後，頗與郡人相安。日來四境無虞，早收中熟，覺風雨如期，晚稻亦可望。惟是力綿求牧，來日方長，凜乎淑後。先生襦袴舊譜，出其一二以惠綏之，蒙戴而行，敢不知賜。某於左右缺禮久矣，謹寅奉赤紙，申綠野平安之問。采采澗芹，犯嚴悚仄。未卜閭侍，願言觀頤視履，益扶神明，以慰中外屬望。臨風拳拳。《文山全集》卷六。

與贛州屬縣宰書

顓有公稟：保伍本領，在於隅團。比者郡家稟使者之命，欲於十縣從新整刷一番，見之公文，固已詳盡。所謂差過隅團，蓋所在積弊，有公差者，有買充者，正在賢令尹用其明焉。可因者因，可革者革，按之舊籍，參之僉言，一日而可決也。使者屢問及此，却望辦以敏手，月末如期申來。隅團定則保伍周，保伍周則盜賊弭，郡之所以蒙成也，而縣亦職有利焉。申嚴出甲榜，比想皆已家至，今有賞罰鏤榜，煩更徧揭。《文山全集》卷六。

回袁永州書

某引首三吾，環清匯碧，神仙人居之。坐隔千里，方嘆衡鴈之參差，緹騎秋風，落我虹翠，蹙然瑤華音之在耳也。共惟某官以羔羊素絲爲節槩，以清霜紫電爲精神，以布帛菽粟爲政事。自擁千車，來照二水，發舒家學一二，便足以破奸膽，甦民氣，期月而可，百廢具興。萬石山中，遂爲古潁川、渤海郡，真刺史敏手也。清廟訪落，諸侯來朝，風聲堂堂，歸植千載。某承乏便州，僥倖娛恃，庭空無事，年穀粗登，凡前此龍蛇之淵，皆屏跡絕影。要是奉教宿昔，陰有以惠利之。然親意亦復念家，

旦夕皈命香火，歸哺山之南水之北矣。遠道寄將，有實其庭，吾味之厚，不翅懷連城而佩明月也。臨風慷慨，亟此馳謝，尚猷緝繭，申候起居。伏乞台照。《文山全集》卷六。

賀京尹曾尚書書

某茲者共審露綸渙渥，星履陞華。東澗西瀍，冠十連之元帥；南昌北斗，表六典之地官。丹屏雲開，紅牙日麗。共惟某官依乘日月，吞吐江湖。直氣摩空，金天晶之錯落；清規照世，玉井水之紺寒。自噦噦於鸞聲，遄峨峨乎豸角。文章大手，南豐先生；政事十條，小范老子。出袖摩霜之鉞，坐吟卷雨之簾。真侍從歸拜於甘泉，慈父母來臨於京兆。乃由太一，徑陟文昌。冰懸雪夸而朝望孚，日暖潮平而民氣悅。儼衣冠於建禮，益鎮千幾；籌帷幄於延和，遄歸兩地。某喜傳除綍，阻趁賀綦。五緯明霄，望龍泉之秋色；九河流潤，懷虹翠之春暉。謹具劄子申賀，伏乞台照。《文山全集》卷六。

回曾知縣晞顏書

號東軒，後除御史。

某去秋知紫氣飛度鴈峰，法不得相候。西風徹棘，新雨來車，知必不我遐棄也。未幾，喜聞玉垣飛檄〔一〕，榮甚錦歸，交臂參差，殊重回首。今年出湘之日，乃千騎載，入湘之時，又不得相隨，鷄

豚社中，一數契闊相隔，耿耿心知。不圖帳犀，遠持五雲，下賁虹翠。筆墨淋漓，起敬英妙，而縑藉所及，不敢當，不敢當！某堂有重慈，自高安歸後，十年不克迎侍。昨歲叨節，本不能出，請祠不獲命，姑以單騎驅馳，非其欲也。轆轤白雲，情表連上，君師天地之造，畀之便州。非徼福隸遺，端不及此。千里遠將，折寄何厚，衣被重襲，其宏多矣。乍理糜沸，稟對皋晏，薄附芹心，非所以爲報也。蓬萊玉雪，小置之松竹間，會有新綸，倚布婁賀。《文山全集》卷六。

〔二〕聞：原作「開」，據韓本、鄢本改。

回曾連推宗甫書 名尹

某淪穎廉清，起而謝所蒙。東嚮疊疊，一拜幾何年，西方美人，豈不夙夜？飛鴻踏雪，闐其廓寥。去年漫浪行湘，於東軒公甚相厚；謁來入境，又日從巖山先生遊；獨於吾泰宇，何其闊如也！春榜既開，聞謝家鳳毛，世科盛事。芙渠勝處，僅隔庾梅，每念擘牋，寫此襞積，乍入沸糜中，墮此不敏。而琳琅金薤，卷五仙雲氣下之，言念知心，喜而不寐。吾泰宇以乾坤清氣，晶晶銀河，朝發軔兮咸池，暮曝鱗於沃焦，以其時可矣。河陽幕中，雲飛川泳，老子倚胡床，誇有此客。佇由黃金臺，徑上清瑣闥。某單車馳岫嶺下十閱月，太行白雲，繚繞清夢。陳情一再，天高聽下，畀以便符，奉重闈

抵空同，三見葇莢矣。郡稍簡靜，得遂半菽歡，皆錫類所及也。渠渠然頌不以規，望塵辟易。芳菲遠道，第懷我私。聞車馬行色，且旦夕出領，某尚未以罪去，得握手道舊，豈不快哉！占謝蕪如，馳遡一碧。《文山全集》卷六。

回李本中書

某一節稍疎聞問，千里相望，方賦所思，得手書讀之，展轉情話，慰此契闊。某數年以兒女講授，爲琴書累，發初啓蔽，作成方來。三世交遊，此意不敢忘。去區區出山，親老不任行役，雲龍隔絕，不得日奉從容。本中獨處寒齋，覺戶外履不至，靜中倍有方冊工夫。然門可張羅，庖隸自放，所以奉師者必甚鹵缺，負愧柰何！諭及小子年漸長，當學聲律，尤認真至；第此兒自以爲得師，甚欲從師學而學焉，又念吾先人以賦起門，重於改作貪賢，且柰何？今姑遵來教，擇賦師爲代。但未知來年有意他出否，倘有圖回，某雖江湖懸隔，豈無可效綿者？拳拳此衷，亦以屬之新昌弟，唯命東西矣。敬憑使稟控別牋，薄物少寄芹私。令祖困學老先生尊候多福，侍邊乞道起居。《文山全集》卷六。

回長沙傅縣尉合書

某他日接玉泉於涓涓中，去之十年，君且撫汗漫，神變化而爲龍。已高言軋霄，自當向上位置，需雲岳翠不淹，騰蹕乎豸府。知心貽書，道君出處之槩，廣文又緹襲琳琅以來，目中將快見緇之好也。敢不預戒行窩，汛掃以俟。雖然，落木荒涼之境，飄風瀟蕩之蹤，以君堂堂發軔，而肯相從於庖俎間，此意携持琬琰者不屑也。吾意不薄，惟君熟裁之。持對不敏，切惟照寬。《文山全集》卷六。

與府理錢昇叟書

天祥此番京師聚會，相與有加於丙辰，極以爲奇遇。在他鄉得此，可謂甚幸！依依之意，至今使人不忘。執事去之一日，奸腐恰有復用之命。國事至此，誼不容默，遂上封章，以求一去。當國者調停數四，迄未能動。三乞祠，三不允，正以爲苦，天生聖明，從諫不拂，初給之以假，繼許以假滿去之，於是而趣令復供本職。吾君之美，不容不將順，遂亟亟祇承，今一切又如初矣。執事才離國門，猶未至鄉國，詎料此半月，乃有一陣如此之擾！疇昔侍教，幾曾有一語及此等？事變輪雲，非人能測，有如此者。封事稟拜呈，不敢效孔光秉昇炎火，於以彰吾君天地之爲量也。方巖造化，初甚危

之，後來左司過堂一稟，化地乃謂初判聚字失記，已曾稟來；前既有兩編校恩例，今合當照行，更不必啓矣。前此兩月，徒爾皇皇，天下事皆不容人算度，吾徒作事只信天去，初無毫髮計校。或謂失策，觀方巖之事，益以自信。周起宗者，送至申狀一紙，見說內有差符，謹緘納。所有餘文，俟其趁逐到手，又以見授，當又訪問遣歸也。明裡之後，區區之跡，必可得請一出。此時梅嶺行事，尚或少遲，猶可合併，傾叙契闊。前數日待罪，甚有餘閒日，勝方巖棋，不以局數計。今茲再入鬧叢，又如前日倥偬不給。乘間作此，殊不能擇語，伏乞台照。正德九年張祥刻本《文山先生文集》卷一五。又見民國《吉安縣志》卷四七《金石略》。

燕山與外氏書

至元十八年五月〔一〕

甥天祥百拜，覆梅溪尊舅。天祥爲子不孝，老母已矣。誦「如母存焉」之詩，今惟此一舅，間闊以來，思慕所及，每一南望，蓋未嘗不爲之潸然也。天祥自國難以來，以爲爲臣死忠，古今通義，故間關兵革，鞠躬盡力，百折而不悔。天命不時，卒以喪敗，家國俱弊，謂之何哉！當倉皇時，仰藥不劑，身落人手，死生竟不自由。及至朔廷，抗辭決命，乃留連幽囚，曠閱年歲。孟子曰：「天壽不貳，修身以俟之。」如此而已。老母年方望七，客殯餘憾。然生榮死哀，粗慰人子之志，以此雖刀鋸在前，故應含笑入地耳。母喪歸葬，已戒仲氏，不肖孤不能躬畢大事，負此悲痛，天地鬼神諒昭鑑

之。八哥來，伏諗尊候萬福。然終年不得與八哥一相見，今且告歸，仰惟德人動履，神物護持，優游餘年，萬萬珍重。兒子道生不幸夭折，今立升姪爲子，凡百惟舅翁教之誨之。區區朽骨，已恨溝壑，當具衣冠，藏於文山之北，疇昔舅所指處也，并哀而窆之是望。謹奉書永訣，萬古萬古，不備。辛巳夏五，甥天祥百拜覆。元劉將孫《養吾齋集》卷二六，影印文淵閣四庫全書本。又見《文山全集》卷一八《拾遺》。

〔二〕《文山全集》題作《與方伯公書》。

答朱古平書

名填，字聖陶。

某初未來，先生亦藏一削以相待，某至之日，即推以與面前欲得者。某於老先生如此，則執事必察其真矣。當塗亦非久居，老先生進退何如，必返我屠羊，尚能接斯文秋浦之上，出歷子相示一笑。

《養吾齋集》卷二六。

正月書

天祥惶恐，奉稟制使都承侍郎。天祥至汀後，即建、福以次淪失〔二〕。朝廷養士三百年，無死節者，如心先生差強人意，不知今果死否？哀哉哀哉！坐孤城中，勢力窮屈，泛觀宇宙，無一可爲，甚負吾平生之念〔三〕。二年不見老母燈前，一夕，自汀移屯至龍巖，間道得與老母相見，即下從先帝游，復何云。都相公去年館伴，用情甚至，常念之不忘。故回書，復遣羅輝來。永訣永訣，伏乞台照。

《文山全集》卷一八《拾遺》。

〔二〕「建福」原作「移建」，「淪」原作「論」，據同卷《遺墨》改。

〔三〕「念」原作「志」，據右引改。

移陸秀夫書

天子幼冲，宰相遁荒。制訓敕令，出諸公口，奈何不恤國事〔二〕，以游辭相距耶？元劉岳申《申齋集》卷一三《文丞相傳》。又見《文山先生紀年錄》，《宋史紀事本末》卷一〇八。

〔二〕此句《紀年錄》作：「豈得不恤軍士。」

復王積翁謝昌元書

諸公義同鮑叔，天祥事異管仲。管仲不死而功名顯於天下，天祥不死而盡棄其平生，遺臭於萬年，將焉用之？《申齋集》卷一三《文丞相傳》。

獄中與弟書

祥興二年

廣州不死者，意江西可以去之。及出南安，繫吾頸，紮吾足，於是不食。將謂及吉州則死，首丘之義也。乃五日過吉，又三日過豐城，無飯八日，不知飢。既過吉，思之無義，且尚在江南，或尚有生意，遂入建康。居七十餘日，果有忠義人約奪我於江上，蓋真州境也。及期失約，惘然北行。道中求死，無其間矣。入幽州，下之狴犴，枷頸鎖手，節其飲食，今已二十日。吾舍生取義，無可言者。今千萬寄此及詩達吾弟，蓋絕筆也。《文山先生紀年錄》注，《文山先生全集》卷一七。

與弟訣別書

元至元十八年

潭盧之西坑有一地，已印元渭陽所獻月形下角穴，第淺露非其正。其右山上有穴，可買以藏我。如骨不可歸，招魂以封之。陞子嗣續，吾死奚憾。女弟一家流落在此，可爲悲痛。吾弟同氣取之，名正言順，宜極力出之。自廣達建康，日與中甫鄧先生居，具知吾心事，吾銘當以屬之。若時未可出，則姑藏之。將來文山宜作一寺，我廟於其中。《文山先生紀年錄》注。

全宋文卷八三〇九

文天祥 三

與包宏齋書

天祥皇懼頓首，三復□申侍讀尚書宏齋先生之坐前。天祥在瑞陽時，嘗以一介人往候先生盤所。先生錫之書，教以聖賢向上之學。若天祥者，雖非其人，先生不鄙夷之，蓋亦竊自啓發，而不敢自爲暴棄者也。「山林之日長，學問之功深」，味前輩此語，疑吏事之妨吾學。郡未一考，被召除郎，即丐香火以歸，不從；反得鄉節，辭，又不獲請，不得已任事。往時臬司所職者，才刑獄一項，獨去春新有秤提，又適值寇氛不靖，添此二事，而任大責重矣。天祥以楮爲本職第一事，日夜剗切利病，詳悉開諭百姓，惟恐拂戾，大概只以血忱至公，風動竟內，未嘗專事刑威，楮功之所以垂成也。贛寇猖獗，血江、閩、廣三路，十數年於此。天祥白手用兵丁萬人，聲罪致討，首尾三月，寇難以平。未幾，天祥以先人本生母之喪，即解印歸里。里之群不逞結爲一議，喧動京師，天祥遂因秤提，得威虐

之効。未幾，又謗天祥討捕之敗，又謗天祥隱匿重服，又裝點墻壁，數其貪私，不值一錢。然後知鄉鄙之甚難，而父母之國不可以行政矣。昔者，吾宏齋先生蓋嘗爲鄉漕矣，其所以能鎮服一路者，蓋出於宿德重望。蓋天祥小生乍出，其以召罵賈禍也固宜。往議論瀕洞之初，縉紳之號爲知己者亦皆爲紛紛所動，不復見察，訛以傳訛，宜其成閔。獨先生當是時適在綠野，凡天祥一時所行事，先生得之間閭耳目之近，果如人言之泰甚乎？噫，任事之難，尚矣！真實體國，以政事自見，乃謂之生事，乃謂之妄作；而虛虛徐徐，相招祿仕，百事廢弛，一切不問，反竊愛根本、卹人心之美名。曾不思根本在楮，人心在物價，無財用何以聚人？無政事何以立國？奈何其是非顛倒之甚邪！先生忠忱愛國者也，憤世疾邪者也。區區肺肝，安得從先生一日傾倒，求一語以自信！茲者伏聞先生以新天子蒲輪束帛之勤，爲時一出，自大司寇進長六卿，典事樞，顛政柄，使衛武公之爵之德之齒，千有餘歲之下煥然重光，僕何幸身親見之！天祥謹頓首爲國賀，爲世道賀，不獨爲先生賀也。天祥謗毀之餘，賴君相保全，無大督過，束禮書入深林，溫理故讀，爲吾所爲，蓋自是浩然方外之想矣。先生即日膏澤六合，僕也簞笠太平，與受公賜。臨書馳仰，神爽欲飛，伏乞台照。右謹具申。正月□日，承心制文天祥劄子。故宮博物院藏真蹟。又見《續書畫題跋記》卷三，《珊瑚網》卷七，《式古堂書畫彙考》卷一五，《六藝之一錄》卷三九六。

遺所知書

上缺未見何如運一棹也，回信在二十後則可定。

一、唐仁恐不測，有申述，宜速應之。或渠得章貢捷劄，宜即率二謝兵馳入城與之共守，却命報行府□□□萬兵即下，□事又在目矣。

一、諸處取到物色已有，幾無對證，無數證者固是難理寫，如優全所共如前，此項下有數目者，即與數行根究，須斬犯法者數人，然後取得起。若肯納還者，又可少寬其刑。如平素省劄，如印紙，他門收得亦何用？此納誥之人，誥在其手，則省劄印紙勅黃皆在焉。

一、徐妳同柳娘在劉千戶下，傳佗已親之。但伊榜不載，想徐妳託以爲別人女，不直指爲吾女也。徐妳有夫，此項可託其夫往贖，幸圖之。

一、環娘十歲，軍中既無名，想亦在民間。此項須遍劄永豐諸隅物色，方有出場。

一、在此無片楮可用，費力費力！全靠使司取些物色來，及靠舍弟與民章來，有些小攜帶，此外無策無策。

一、黃州周都統死於瑞金，可惜可惜！

一、在瑞金時，賤體一病，甚可憂。入汀以來，幸已勿藥。

一、合家書與舍弟，又一書達民章，又一書達□撫千戶送達。天祥皇恐拜筆。十月八日發。《清河書畫舫》卷一〇下。又見《式古堂書畫彙考》卷一五，《六藝之一錄》卷三九六。

與吳架閣劄子 一

天祥皇恐頓首，申稟府尉帥僉郎中台座前：天祥於鄉國聞修能，蓋嘗羅而致之，不可得，已屬目師行，求能給饋餉不絕糧道者，足下爲我任之。師次於洪，聞糴事先辦，益知利器發硯，小試即別。時方艱難，深願同力濟此事。會安仁作分之項，足下似亦許之。不腆馬幣，具之伴箋，耑介奉邀，式遄其至。臨風傾倚，切幾台察。民國《吉安縣志》卷四七《金石略》。

與吳架閣劄子 二

八月日，起復朝請郎、江西宣撫副使文天祥劄子：天祥僭以官會壹阡貫充發路，官會五百貫充夫脚。不鄙嘉納，爰疾其驅，幸甚！民國《吉安縣志》卷四七《金石略》。

與吳架閣劄子 三

天祥又申稟：所糴米費，大監已肯爲轉移糴，但要米至郡方可。今未免委重於執事，得沐處置，幸甚！公文已崑馳上，伏乞台照。天祥拜稟。民國《吉安縣志》卷四七《金石略》。

與妹書

收柳女信，痛割腸胃。人誰無妻兒骨肉之情，但今日事到這裡，於義當死，乃是命也，奈何奈何！塗中有三詩，今錄至。言至于此，淚下如雨！

邳州哭母小祥 九月七日

我有母聖善，鸞飛星一週。去年哭海上，今年哭邳州。遙想仲季間，木主布筵几。我躬已不閱，祀事付支子。使我早淪落，如此終天何！及今畢親喪，於分亦已多。母嘗教我忠，我不違母志。及泉會相見，鬼神共歡喜。

過淮

北征垂半年，依依只南土。今辰渡淮河，始覺非故宇。故鄉已無家，三年一羈旅。龍朔在何方？乃我妻子所。昔也無奈何，忽已置念慮。今行日云近，使我淚如雨。我爲綱常謀，有身不得顧。妻兮莫望夫，子兮莫望父。天長與地久，此恨極千古。來生業緣在，骨肉當如故。

亂離歌六首

有妻有妻出糟糠，自少結髮不下堂。亂離中道逢虎狼，鳳飛翩翩失其凰，將雛二三去何方？何虞國破家又亡，不忍捨君羅襦裳。天長地久遠茫茫，牛女夜夜遙相望。嗚呼，一歌兮歌正長，悲風北來起徬徨。

有妹有妹家流離，良人去後携諸兒。北風吹沙塞草萋，窮猿慘淡將安歸？去年哭母南海湄，三男一女同歔歔，惟汝不在割我肌。汝家零落母不知，母知豈有瞑日時！嗚呼，再歌兮歌孔悲，鵲鴿在原我何爲？

有女有女婉清揚，大者學帖臨鍾王，小者讀字聲琅琅。朔風吹衣白日黃，一雙素壁委道傍。鴈兒鴈兒秋無梁，隨母北去無人將。嗚呼，三歌兮歌愈傷，非爲兒女淚淋浪！

有子有子風骨殊，釋氏抱送徐卿雛。四月八日摩尼珠，榴花犀錢落繡襦。蘭湯百沸香似酥，歛隨

飛藿飄泥塗。汝兄十三騎鯨魚，汝今三歲知在無？嗚呼，四歌兮歌以吁，燈前老影明月孤。

有妾有妾今何如？大者手將玉蟾蜍，次者親抱汗血駒。晨粧靚服臨西湖，英英鴈蕩飄瓊瑤。風花飛墜鳥嗚呼，金莖沆瀣浮汙渠。天摧地裂龍虎徂，美人塵土何代無？嗚呼，五歌兮歌鬱紆，爲爾迎風立斯須。

我生我生何不辰，孤根不識桃李春。天寒日短空愁人，北風吹隨鐵馬塵。初憐骨肉鍾奇禍，如今骨肉更憐我。汝在空能嬰我懷，我死誰當收我骸？人生百年何醜好，黃梁得喪俱草草。嗚呼，六歌兮勿復道，出門一笑天地老。

一、讀此三詩，便見老兄悲痛真切之情。事至於此，爲之奈何！兄事只待千二哥至，造物自有安排。一、可將此詩呈嫂氏，歸之天命。仍語靚粧、瑤英，不曾周旋得，毋怨毋怨！徐妳以下，皆可道達吾此意。當此天翻地亂，人人流落，天數，奈何奈何！一、可令柳女、環女好做人，爹爹管不得。淚下哽咽哽咽！一、此詩本仍可納之千二哥。兄天祥家書，達百五賢妹。《趙氏鐵網珊瑚》卷四。

又見《戒庵老人漫筆》卷四，《式古堂書畫彙考》卷一五，《宋詩紀事》卷六七。

上權郡陳通判高謝解啓

是邦大夫賢者，聿新道藝之賓興；吾黨小子斐然，得遇功名之主宰。僧彌出法護之右，越石居楚

金之先。人羨二難，己叢百媿。竊惟奎開我宋，箕壽斯文。堯叟以壯歲拏魁，堯咨爲之接武；子由以弱冠登第，子瞻至於聯芳。孫何齊孫僅之名，宋祈遜宋郊之榜。韓家閥閱，吳氏簪纓，皆一時兄弟之傑然，乃我朝科目之盛者。甲於江右，未若廬陵。名耀帖金，以一門而五董；筆香氈墨，不十歲而七劉。或踵接於童科，或肩摩於胄監。輝煌簡冊，雜遝衣冠。至今文水仁山，猶想流風遺俗。雖巫步亦期似禹，然賜賢何敢望回？如某者技等飛鼯，才長縮蚓。故家喬木，借秭歸舊峽之陰；宦錄雲萍，分白鷺餘波之潤。勘皇祐榜帖，久寒石室青氈；閱癸丑狀頭，曾入本心墨譜。恐負前人之弓冶，勉爲今日之箕裘。有嚴君焉，唾棄萬年之諂味；難爲弟者，誓齊兩到之英聲。故唯諾怡愉之間，皆切磋琢磨之地。晨窗花露，滴乾硯眼之鵠；夜帳木油，剔盡按頭之蠹。以孝弟忠信爲實地，以功名富貴爲飄風。非六六餘子之儔，有飄飄凌雲之氣。自染指時文之鼎，即梯身季考之階。愈出愈奇，頗類黃絹外孫之蠶白；屢選屢中，幾成翰林學士之葫蘆。遂令伯氏吹埴，仲氏吹篴；過辱庖人繼肉，廩人繼粟。方嗟雌伏，未遂雄飛。適槐粟之揉黃，偕棣華而拈采。擲番骰子，同拏喝六之籌；彎起弓絃，共上中紅之垛。天開雙眼，地放一頭。渴睡漢平白解嘲，揶揄鬼分明束首。二旬賜第，皆以沈內翰相期；十八奏名，僉謂劉學士可繼。使小子自此升矣，皆先生進而教之。茲蓋恭遇某官秀孕天台，英蜚帝學。萬乘器可繫唐柱，五色線要補舜裳。器古壘於盆盎之中，韻黃鍾於雜優之地。一從分刺，名雖沂郡之王祥；兩屈護麾，實則潁川之黃霸。斯民廣廈，吾道泰山。螺川醉多旨之春風，燕寢樂近民之暇日。政安赤子，解弄挺之亂繩；兵撫清人，戢攘釵之橫彘。雖借我二天之有幸，恐尹京五日以趣還。茲以

題輿，委之勸駕。至若豆箕之朽質，亦該花帖之榮恩。是宜拂楮雪以牋誠，候屏星而布謝。誓當鞭策，不負揄揚。諒大賢何所不容，知孺子尚或可教。晉公得二俊才士，不無汗赭於前修；古靈薦三十餘人，尚冀牙緋於後進。《文山全集》卷七。

上倉守李愛梅謝解啓

執鞭而御於君，風裁久欽司隸；推轂而輦其正，天人幸遇翰林。欲借方寸地，吐氣而言；敢操盈尺紙，循廊而進。切謂烏河陽方司鎮鉞，石生隨就禮羅；王豫章未下使車，荀爽已騰辟剡。蓋人非卞和，玉闕石竅；而世無伯樂，駒困鹽車。必假先容，乃梯後進。切念某策非魯客，材僅莊林。自垂髫逮二十年，知肄業爲第一事。家庭自爲庠序，要祖廬江興學之風；文字懶傍門墻，惟準石室立言之法。遙睇故家之木，勉爲良冶之弓。子玉應而父金舂，伯墳唱而仲簾和。夜按剪燈，帳幾成墨；凍窗呵筆，火不思爐。每因染教於芹香，屢獲聯輝於萼集。角能戰蟻，占序榜龜。朋社陽秋，過許洛中之陸；鄉評月旦，謂非吳下之蒙。曩踏黃槐，聊窺班管。合三萬餘於圍棘，爭六十八之帖花。如小子者車載斗量，况有司之沙披石汰？誰謂燭几駒窗之際，遽蒙黃鍾疊洗之褒？風健鷁披，騰北海一雙之鷗；雲橫鴈翅，搏漆園九萬之鵬。必侍郎氈筆噓而送之，則進士虎榜自此升矣。茲蓋恭遇某官百梅風格，八桂雲仍。羅貽門兵甲於胸中，漱淮水淵源於筆下。風檣陣馬，不足爲勇，長吉之文章；景星鳳

鳳，快覩爭先，王濬之名望。早躋顯第，徧歷要途。嘗膺北闕之詔綸，出領西江之衣繡。兒童猶誦君實，野老皆識元城。惟虎城舊治，嘗屈典麾；故螺水重來，又新持節。蘇疲民於恩露，清奸吏於壺冰。坐念鉛爲銛，跼爲廉；安有書如絲，官如眊？燦連檣，粧執樂，舊句重賡；繒閱庫，粟埋梁，新謠繼作。茲屈皇華之使，就延鳴鹿之賓。某忝以釜箕，玷茲玉笋，敢不淬庖人之刃，誓無荒陸氏之莊。云云。《文山全集》卷七。

賀吳丞相革啓

再登鉉路，首冠鈞庭。以進士爲名臣，兩朝倚重；以儒宗爲宰相，四海具瞻。天啓聖衷，國有生氣。某官洪深而肅括，光大而直方。喬嶽泰山，微細悉歸於涵育；青天白日，奴隸皆知其清明。頃天子以爲股肱，舉海內望其風采。霖雨未浹而收斂神功，泰階未平而韜闕光耀。共惜溫公之歸洛，猶期潞國之還朝。偃逸藩維，久鬱袞繡歸公之望；均調鼎味，復端鹽梅用汝之司。公卿大夫，交笏相慶；兒童走卒，舉手懽呼。顧中外不謀同辭，在今古未始多見。斯人之望既切，賢者之責方新。維今言路之不通，最爲天下之大弊。縉紳以開口爲諱事，城闕以游談爲危機。如人一家，情睽離而衆侮起；如人四體，氣壅底而百病生。多故之由，一類諸此。枿更子改，柁轉舟移。惟從衆謀，可以合天心；惟廣忠益，可以布公道。盡解群疑衆難之會，克有榮名成功之休。其惟我公，望在今日。某瞻依有素，

慕戀惟深。適造闕以戒嚴，聞揚庭而增抃。以書上光範，先伸賀厦之私；於人見歐陽，行展摳衣之敬。其爲懇切，罔既敷宣。《文山全集》卷七。

及第謝吳丞相啓〔一〕

渙號揚庭，方慶昭文之命；蒙恩詣闕，適修進士之恭。喜當風雲際會之秋，得囿天日照臨之下。輒陳短淺，爰叩高明。伏念某才不逾人，學未聞道。雖家庭唯諾之教，動欲行其本心；然山林樸野之資，知無補於當世。頃得備地官之貢，遂及登天子之庭。一第策名，既有慚於負乘；三年讀禮，幾無意於驅馳。宸命光華，自天而下；聖恩廣大，如海斯涵。遂令參京兆之謀，仍許奉團司之表。靖循僥冒，端出庇存。載冊戒行，將下天威之拜；彈冠稱慶，遽傳公袞之歸。重惟柳氏之碑，曾辱燕公之筆。讀聖主偏親之語，佩教方新；仰先生長者之風，銘恩莫報。矧復更新於弦轍，自今密邇於鈞陶。喜如其辭，有莫能贊。茲蓋恭遇某官兩朝舊德，一代偉人。金鼎調元，曾接沂公之轍；玉龍擎重，再持忠憲之鈞。屬逢當軸之初，與有得輿之慶。某敢不勉摭素學，圖報明時。仰台宿之麗天，既近輝光之照；占赤雲而赴幕，尚依覆燾之仁。《文山全集》卷七。又見《宋歷科狀元錄》卷八。

〔一〕原無「及第」二字，據《宋歷科狀元錄》補。

謝丞相啓

除秘書省正字日

竊祿叢祠，方重素餐之媿；備員蓬館，遽叨黃紙之除。由大鈞之無垠，故小子之有造。輒攄短淺，庸瀆高深。伏念某大江以西，一介之下。幼蒙家庭之訓，每欲行其本心；長讀聖賢之書，初何補於當世？從事一研，起身諸生。偶遭際於聖明，獲僥逾於科第。君恩天大，若爲報稱之圖；流俗波頹，常有激昂之志。當前年之赴闕，適強寇之臨江，親見主憂之時，不勝臣辱之義。陳師江滸，悵無一障以宣勞；奏疏公車，倘冀九重之易聽。奔命而歸田里，舉目而盡干戈。江迴川平，非賴整頓乾坤之手；糜沸雲擾，幾無戴履天地之身。骨肉幸全於山林，頂踵皆歸於造化。琳宮香火，揆始分而已逾；石室詩書，尋初心而未究。敢圖菲采，獲備茹連。使當登崇俊良之時，而秉校讎圖籍之筆。賢人在內，幸無正朋字之譏；世運方平，雅有讀秘書之暇。顧茲甚寵，非所宜蒙。有懷負乘之慚，無任循墻之懼。使之得進退之正，所以報知遇之隆。茲蓋恭遇某官勳在王家，澤被天下。圭瓚拒鬯，侈召伯之來宣；衮衣繡裳，大周公之歸相。既仗笞箠而定大難，將興禮樂而開太平。遂使乾清坤夷之餘，轉爲小往大來之會。至如公選，亦及凡材。某敢不勉企前修，恪持素節。彥博未至堂上，已先蒙許國之知；器之既入館中，當不辱溫公之薦。其爲懇悃，罔既敷陳。《文山全集》卷七。

謝皮樞密龍榮啓

領香火於祠宮，幸書下考；校丹鉛於冊府，誤玷中除。由泰階六符之光，爲廣廈萬間之地。輒裁牘記，仰謝鈞慈。切以登群玉山，夙號麒麟之勝；持三寸筆，將刊魚豕之訛。是爲朝露之清班，必極人材之公選。我聞在昔，公惟其人。晏殊之學問，楊億之文章，仲淹之聲名，器之之氣節，苟非其類，不在此科。伏念某學不知方，仕未能信。尋千年之蠹簡，早慕伊、顏；得一第之鵜梁，終慚晁、董。深考國家之典，每由館閣之途。知負乘之懷慚，恐顛躋之速咎。故方筮仕，已即丐祠。尚口乃窮，頗愛山深而林密；觀頤自養，徒羞月費以歲糜。敢圖楓陛之疏恩，俾處蘭臺而正字。正恐不免耳，其何以堪之！靖循僥冒之由，端出陶成之辱。茲蓋伏遇某官清朝良弼，名世大才。燮贊化原，大尊主庇民之道；均調皇極，普薦賢報國之心。遂使疏庸，與叨拔擢。某敢不恪持素節，勉企前修。讀木天汗漫之書，尚求指教；陪丹地深嚴之幄，何幸身親！懇悃采深，敷宣罔既。《文山全集》卷七。

謝何樞密夢然啓

范質傳衣，曾侈和公之遇；仲淹入館，復蒙元獻之知。使諸公而與同升，豈門生而不知報？輒伸

下悃，庸叩中樞。伏念某石室孤寒，青原落魄。幼被家庭之訓，頗欲得其本心；長讀聖賢之書，初無補於當世。從事一研，起身諸生。偶持觚翰於南宮，獲遇鑑衡於北面。鸞鳳杞梓，舉集權公之門；欵段駑駘，誤登伯樂之廐。名姓雖塵於函丈，足迹未造於仞墻。山斗之望彌久而彌穹，畎畝之蹤愈疎而愈隔。閉門自守，知尚口之乃窮；遯世無求，惟觀頤而自養。凡竊祿奉祠之日，皆省身念咎之時。承明之廬，著作之庭，未嘗意想；寂寞之濱，寬閑之野，遽拜寵光。胡爲乎來哉，是有其故矣。想木天之清峻，望丹地以凌兢。顧非麒麟鸞鷟之英，其如亥豕魯魚之謬？深有慚於負乘，敢自己於循墻？茲蓋恭遇某官名世鉅公，清朝良弼。持樞贊化，共調傅鼎之梅；報國薦賢，不種狄門之李。遂令公選，亦及凡材。某敢不勉企前修，恪持素節。就中書而見座主，將求一介之先容；以進士而爲名臣，尚賴終身之保任。《文山全集》卷七。

謝江樞密萬里啓

領祠宮之香火，敢望彈冠；掌冊苑之丹鉛，誤蒙推轂。薦非由於識面，事真可以語人。頂踵銜私，額手奏記。切以觀遠臣以所主，孟子以言進退之閑；遇大賢而相知，韓公以爲遭逢之盛。蓋受恩非天下之所少，而知己得君子之爲難。乃若初無左右之先容，獨受門墻之隆遇。以古道之相與，尤人生之至榮。伏念某才不逾人，學未聞道。雖家庭疇昔之教，動欲行其本心；然山林樸野之資，知無補

於當世。執經而後，承恩以來，念景行在四海之達尊，而科第非終身之能事，頗欲自拔於常人之類，庶幾無負於上帝之衷。頃趨闕下之時，適際江干之警。主憂臣辱，念我生之不時；外阻內訌，繫禍至之無日。因撫躬而思奮，遂投匭而獻言。當時破腦而刳心，何啻焦頭而爛額？有倉卒等死之慮，無毫髮近名之心。六太息之陳，豈曰賈生少年之過；三十字之獻，幸寬郇模東市之誅。逮時事之既平，滋人言之無據。小體者戚其失措，好事者高其得名。痛痒無知者以文采爲賢，操挾不正者以譁競爲議。匪躬之故，俱莫諒於初心；尚口乃窮，嗟難行於直道。既奉祠而竊祿，顛閉門而讀書。未可與俗人言，姑盡吾分內事。不謂見知於長者，遂勤延譽於諸公。承明之廬，著作之庭，未嘗夢想；寂寞之濱，寬閑之野，遽沐寵光。非華袞有一字之褒，何弊帚增千金之重？雖深慚於負乘，然幸出於鈞陶。永堅乃心，欲報之德。茲蓋伏遇某官清朝碩輔，昭代真儒。胸中括石渠東觀之藏，海內仰天球河圖之瑞。睠惟世道，深屬我公。整頓乾坤，共屹江流之柱；獻納日月，入旋斗極之樞。非徒耀不世之功名，將有意太平之禮樂。凡今小往大來之會，多出前推後輓之功。遂使疎庸，例叨拔擢。某敢不力持素節，勉企前修。稱彥博於都堂，幸借郇公之譽；薦仲淹於館職，敢忘元獻之知？《文山

全集》卷七。

賀江左相啓

大老造朝，元台正席。歸公有袞繡，我來自東；用汝作鹽梅，王置諸左。三台明概，八表清夷。洪惟我朝相業之隆，莫如元祐家法之懿。潞公平章軍國，司馬實位昭文；正獻議論廟堂，微仲嘗升左轄。或以學術真純而輔君德，或以人物直諒而當帝心。續遺響於先秦兩漢之前，文章鉅麗；挺雄姿於黃河泰山之上，器量崇深。此自古之難兼，蓋於今而獨見。共惟某官行關百聖，名塞兩間。於前輩人期之以伊尹、傅說，今從學者尊之如韓愈、孟軻。尚論公之平生，有報國之大節。以君子不用爲我耻，以小人未退爲己憂。童兒婦女知其血忱，縉紳大夫想其風采。自其驅馳外服，出入中朝，洛中偃仰之年，江上經營之日，以致贊先皇之大政，參嗣聖之初元。賢與不賢，一言定其可否；用或弗用，四海視以重輕。卓然一時人望之宗，展也三代王佐之事。屬登庸之伊始，問夢卜以孰賢。朕安得斯人哉，固無踰老臣者。乃申帝指，乃穆師言。金甌覆崔相之名，銀信趣鄴侯之覲。朝士舉笏相賀，都民遮道聚觀。天子引見以勞歸，東朝出饌以錫宴。遂由政路，徑秉國鈞。先天下而憂，斯能後天下而樂；有聖人之任，將以行聖人之時。莫難得者，海內相望之深；最罕遇者，君子氣類之合。方今師維尚父，右舉皋陶，贊襄於都兪之間，寅協於和同之際。鈞無垠而播物，相天地，理陰陽；鼎有足於承君，安國家，定社稷。昔講於洙泗者困道路之厄，而學於河汾者抱禮樂之慚。道之行歟，時則可矣。

俾我后五三之盛，真吾儒千一之榮。某猥在山棲，欣逢庭冊。親見上下龍雲之會，豈徒門闌燕雀之私？陽翟歸耕，回首舊時之學士；徂徠作頌，傾心今日之太平。慶抃情深，刊摩語淺。《文山全集》卷七。

賀馬右相廷鸞啓〔一〕 號碧梧

紫宸播告，金鉉登崇。歸周公於東，方來大老；舉皋陶於右，復得良臣。九鼎尊安，三靈開懌。自馬服君之著姓，至伏波氏之封侯。燧進侍中，特超居於外府；璘遷僕射，姑借重於將壇。惟賓王起自書生，在貞觀號爲真宰，然以草茅之疎遠，出於羈旅之遭逢。未有親拔魏科，素居清望，布衣之極，以一編爲帝師，都門之中，不十年至相位。於皇盛舉，復掩前聞。恭惟某官得聖人之和，抱王佐之學。高山蓄泄，有潤澤萬物之功；太極渾涵，無運用四時之迹。自顛昂縉紳之日，已雍容廟堂之風。告后惟良，有謀猷則順于外；敬王如我，非仁義不陳於前。其出處不可瑕疵，其喜怒未嘗形色。龍潛羽翼，栽培不世之風雲；鰲禁絲綸，醞釀後來之魚水。先帝留之爲宰輔之備，主上待之以師傅之尊。徑邁群公，徧登兩社。或主東廳之典故，或參西事之經營。鄴侯之跡大奇，安石之名愈重。兩宮明聖，一老辯章。既峻昭文之遷，遂正集賢之拜。朝家用元祐之故事，學館獻慶曆之頌詩。儒者之遇，僅有而絕無；天下之望，方來而未已。簡淡獨周於事物，晦叔所以有立於潞國、司馬之間；忠恕

不離於須臾，堯夫所以無媿於正獻、微仲之際。前哲之風流未遠，太平之幾會有開。豈特輝簡冊於二百年之前，直將植風聲於千萬世之下。某喜傳鴉字，驚起牛衣。知廊廟之有人，爲國家而增氣。昔通政府，無書或詭於門人；今誦相麻，交賀敢遲於朝士？其爲抃蹈，罔既刊摩。《文山全集》卷七。

〔一〕原無「賀」字，據文意補。

全宋文卷八三一〇

文天祥 一三

通章簽書鑑啓 號杭山

茲者恭審煥號明廷，普籌宥府。風生黃道，衛宸殿之凝嚴；星度紫清，煥斗杓之赫奕。真儒無敵，中國有人。竊惟我朝之盛明，最繫君子之翕合。永叔之參兵柄，在魏國位平章之時；堯夫之贊樞庭，當潞公判重事之日。於以笙磬治平之政，於以墳簞元祐之功。若稽前聞，復見今日。恭惟某官知周而道遠，仁熟而義精。和風甘雨，慶雲備四時之正氣；高山深林，鉅谷名一代之魁人。當屬者爲小官之初，已淵乎有大臣之器。誰起諸國人之謗，我衣而褚之；公真大丈夫所爲，匪席可卷也，匪石可轉也。突兀南都之鐵壁，卷舒滕閣之朱簾。在江湖，在朝廷，時人望其大用；爲臺諫，爲侍從，識者恨其已遲。六飛之馬莊重而不馳，萬斛之舟舒徐而後進。厥今天助順而人助信，大在廷而細在邊。江漢沔水朝宗，載揚我武；夙夜基命宥密，無競維人。遂陞兩社之班，爰贊五兵之本。宰

相計安宗社，大師時游廟堂。參之以運籌帷幄之神，輔之以折衝樽俎之密。衣冠盛事，具四方巖石之瞻；袞舄一堂，有三公鼎足之勢。遙觀大業，丕建隆平。某盥耳山棲，傾心廷播。親見天地雲龍之會，非爲門闌燕雀之私。傳江西宗派之圖，敢云入社；誦徂徠聖德之句，請繼作歌。抃蹈之深，敷菜則淺。《文山全集》卷七。

賀倉守趙編修端齋啓

侯藩課最，庾節陞華。常平專歛散之功，廉察展澄清之志。有識交頌，不謀同辭。恭惟某官璿派清流，玉班雅望。早贊樞庭之畫，遄躋府寺之崇。結知前旒，試庸外服。幸甚趙大夫之日，來臨歐六一之鄉。廟堂知其爲循良，田野誦其爲豈弟。二天不啻，兩年於茲，雖明公屢上丐閑之章，而天子正深倚重之眷。爰畀茶鹽之任，聿增麾節之光。鮮于一道福星，式快輿情之望；晉公三司真使，行膺御札之除。某仰席庇休，倍深欣抃。大厦成而燕賀，敢修奏記之恭；六轡沃而駟馳，實切執鞭之戀。其爲贊慶，罔既敷宣。《文山全集》卷七。

回瑞州羅權府啓

遙瞻松雪，久羨槩冰。簾捲西山，撫輿圖於錦水；書移東里，醒午枕於桐鄉。寵委新編，輝生棄弁。天高地迴，諒碧落之知心；日光月華，看紫薇之潤色。謝私何限，嗣敬以陳。《文山全集》卷七。

回吉州繆守送端午啓

端午賜衣，漸傳璽召；昌陽薦俎，忽沐珍頒。行人賁然來思，野老爲之驚見。某官心清於水，仁行如春。岐麥詠漁陽，方騰善政；角黍記荆楚，尚念流風。亦分百索之餘，遠及一塵之陋。某倏驚晚晚，良感慇勤。剪綵艾以爲嬉，強酬佳節；對燈花而作報，多謝故人。《文山全集》卷七。

回朱約山賀生日啓

鄉有達尊，獲在嫡孫之行；我生初度，誤蒙大老之知。庭實駢羅，使華驚見。共惟某官世間活佛，天上壽星。棄萬戶如張子房，而壽考遠甚；領諸孫似郭中令，而精神過之。尚憐蒲柳之新姿，分

以松椿之餘福。既受賜矣，細吟香山在三十六之詩，何以報之，還祝崆峒千二百之壽。《文山全集》卷七。

餽朱約山歲禮啓

歲無多子，驚爆竹之倏來；盤有五辛，喜屠蘇之未至。睽時大老，萃止繁禧。喧櫪馬，散林鴉，遙傳歲頌；卧籠兔，橫盤鯉，聊見鄉風。《文山全集》卷七。

回前人餽歲啓

一壑棲遲，不覺歲年之晚；五雲飛墜，頓生草木之春。分四老之玉塵，起初平之白石。某官陽和着物，壽極當霄。門有垂車，換桃符之新句；庭多戲綵，沸竹爆之驩聲。猶推椒柏之芳馨，散作茅茨之光寵。某肅登嘉貺，祇佩盛心。嘆巷北之椰榆，吾癡未醒；祝樽前之強健，翁醉何妨。《文山全集》卷七。

回前人賀生日啓

富公七十九歲，嗟九老之不如〔二〕；潘岳三十二年，覺二毛之已見。方揆余之初度，忽惠我以好音。疇昔折輩行之謙，從今悅親戚之話。永爲好也，長歌白雪之章；還以事之，願壽青山之約。《文山全集》卷七。

〔二〕嗟：原作「蹉」，據庫本改。

回彭知縣賀生日啓

潘岳閑居，已覺二毛之見；盧仝破屋，忽驚三印之來。愛之欲生，錫以難老。親戚情話，若是綢繆；宇宙吾生，不勝感慨。矧復贈我，永言好之。讀三星行，誰解嘲於南斗；壽八百歲，尚徼福於彭城。《文山全集》卷七。

回太和趙宰賀生日啓

三載淵明，幸相望於五柳；今年潘岳，覺已見於二毛。懷哉好音，賁我初度。愛之欲其生也，忠焉能勿誨乎？一鶴自隨，約青山於未老；雙鳧何許，感流水之相知。《文山全集》卷七。

回太和趙尉賀生日啓

潘岳閑居，已覺二毛之見；盧仝破屋，忽驚三印之來。爲此大小年之光，異哉神仙尉之寵。錫以難老，愛之欲生。陽春白雪之詞，真成寡和；流水高山之約，安得相逢？《文山全集》卷七。

回胡宣教賀生日啓

春華如水，驚三紀之流光；夏綠滿園，又一年之初度。方拾薪而煮瀑，姑擷草以供茶。敢意谷虛，有來庭實。錫之厨珍以起其牢落，將之筐厚以申其慇懃。門外桑弧，自嘆男兒之老；里中羊酒，敢忘親戚之情？《文山全集》卷七。

回蕭子蒼賀造居啓

東門掃軌，方尋歸隱之盟；依山結廬，聊作奉親之計。正辛勤於結構，辱折寄於芳馨。室虛分塊
北之春，庭實委繽紛之貺。想兒郎之歡喜，共舉草堂；謝介使之勤渠，寄將梅驛。《文山全集》卷七。

賀朱太博得祠啓

楓陛疏榮，蕊宮領秩。平分風月，暫橫綠水之舟；寄傲烟霞，新入壺天之宇。相羊得所，進退有
階。共惟某官一世精英，盛年華要。春風滿座，人知公揆之懷；雲谷讀書，我得晦翁之樂。聞已速夔
龍之武，未容高鴻鵠之飛。某同志有人，相期何許？卧箕簞谷，正尋白水之盟；望麻姑山，輒致黃冠
之賀。《文山全集》卷七。

送韋主簿成功赴宏詞科啓

徑辭矮屋，前赴大科。開五十難以試教官，是名上等；分十二體以取詞學，尤見宏材。慶熊魚之

得兼，觀龍象之第一。某冬烘自昔，晚歲相期。久此妙音，不到蓬宮之處；看君名第，又光杏苑之年。《文山全集》卷七。

回廬陵趙簿投贄啓

我輩蓬蒿，正堪羅雀；美人錦繡，上有棲鸞。懷哉六謙，持此三過。某官鳳其翩翩，麟兮振振。吹大乙之烟藜，歛然特起；織天孫之雲錦，燁乎相輝。有是簿耶，自此升矣。某細敲白石，遙想綠綈。看南山之雲，惠而好我；穿東郭之履，欲往從之。《文山全集》卷七。

回吉州陳守緯啓

台州人，葉西澗表親，太常丞。

分牧龍藩，此非子坐；退耕鶴隴，乃得公書。紛六轡之光華，亶一塵之榮寵。某官照人白雪，有脚陽春。蒙福凡十萬家，民歌載路；薦人至二千石，相譜滿門。籍甚嘘枯，居然起廢。某豈堪作吏，真足爲氓。儻一壑之無他，維五雲之在上。吟詩自樂，退求元亮之心；設榻相看，徒感陳蕃之意。稟酌不敏，摧謝未央。《文山全集》卷七。

賀前人除福建倉啓

藩條報政，庚節敷綸。雲閣森嚴，上接神奎之府；天囷明概，下臨須女之虛。天啓九遷，民爭二竟。共惟某官渾金璞玉，甘雨祥風。家有旂常，籍甚東山之名姪；身雖朱紫，依然太學之儒生。蚤騰駿馬於雲霄，遂主神螺之風月。人懷惠政，帝有恩言。奪南國之二天，遺東甌之一佛。常平典在，武夷之文獻可尋；宰相時來，文穆之聲猷孔邇。某退耕滕野，喜趣曹裝。輒持行李之恭，庸展塗芝之慶。事大夫賢者，庶自附於攀轅；以我公歸兮，將不勝其賀厦。其爲頌抃，曷竟敷陳？《文山全集》卷七。

賀劉省元夢薦登科啓

辛未省元，甲科第九人，衢教。

蘭宮拔穎，甲第傳臚。過千曰俊，過萬曰英，人間健筆；第一爲魁，第九爲弼，斗北脩名。柯峰翠濕於飛纓，泮水清搖於振鐸。行徹皋比之席，即歸鷺翻之班。某正僻耕寬，遂稽箋賀。賦雲山之紅樹，焉得往從；摩石室之蒼苔，不堪持贈。《文山全集》卷七。

迎寧國交代孟知府啓

共審肅將一札，言牧雙溪。紫馬西來，照旌旗而出色；玉麟外遣，覺篆籀之生輝。上日先庚，懽聲旁午，竊深慶抃。欽以某官羔裘豹袖，玉質金相。說書而動京師，素積行秘書之學；把麾而去江海，重爲賢刺史之勞。少稽漢郡之三公，嘉惠建州之千里。某久哉望歲，際此行春。宛水明樓，已敬虛於中舍；昭亭簇騎，敢先候於前茅。謹具申聞，伏惟丙照。《文山全集》卷七。

除湖南憲通交代李樓峰啓

李改除漕

東風一道，喜鵲錦之生花；元日十行，愧牛衣之換繡。幸甚葵丘之新好，託於杏苑之舊盟。一介施先，七襄敢後！共惟某官負宇宙之志，出文獻之傳。高山深林，世載其魁傑；青天白日，人知其清明。地望接乎西平，聲名垂於北斗。瑤編玉牒，參天上之神仙；紫界粉牆，隔人間之風雨。盍鳴珮而登馭娑，乃彌節而下崆同。民五袴而牛犢滿家，米萬檣而蠶桑遍野。屬凝旒之西顧，遂持斧以湘行。風動褰帷，祝融七十二峰之雲曉；星沉貫索，太微二十五宿之芒寒。江春洗蘅杜之愁，庭晝卧桁楊之影。方山搖而岳動，俄斗轉而星移。五丈原之流馬木牛，運於樽俎；八景畫之晚鐘沙鴈，同是江山。

我公之二界無爭，先君之四封如舊。然而江濤如許，原隰謂何。溫公嘆子駿之福星，不宜居外；文正服張公之大體，引以歸朝。爰重中權，式光前軌。某生而骯髒，分也嶽崎。飲蘭露，餐菊英，哺烏有味；裂荷衣，焚芰製，夢鹿何心？每爲梁甫之吟，有感長沙之賦。曩於飛輓，徒觸危機；今見平郊，猶驚曲木。賴有同年之宿昔，互爲一日之交承。春爲秋先，秋爲春後；甲入乙舍，乙入甲家。曲江會上之風流，南岳雲邊之禮樂。荆俗相傳於佳話，蕭規幸淑於前猷。睇駟駱之光華，敢云並駕；隨雲龍而上下，儻許執鞭。欣蹈之私，誦言莫既。《文山全集》卷七。

賀前人改除湖北漕兼知鄂州啓

日陞揚綸，冰輶作屏。北斗丹梯，勾陳玉檻，聯郎宿於天階；渚宮碧樹，巫峽青山，迎福星於江夏。光稠符玉，色動轡絲。恭惟某官鐵馬行空，金虬驚海。離離珠璧府，懸黎垂棘之光；耿耿斗牛虛，干將莫邪之氣。灑翠竹碧梧之韻度，發清霜紫電之神奇。太微二十五星，旌搖江漢；祝融九千餘丈，節倚雲霄。當驅馳吟遣使之詩，每慷慨讀出師之表。落落襄樊之事會，悠悠江漢之風寒。局面一新，機神頓聳。師垣制勝，集忠益而開誠心；帥閫請行，從便宜而上方略。武承先志，孰與明公。乃峻冰臺，乃陞寶屐。練鵠錦之廉車改觀，黃鶴樓之衛戟生風。餉高密之師，借恂河內；詔西平之子，贊度淮堧。節鉞合而氣勢張，弓矛重而精神壯。北伐歌功於六月〔一〕，中興刻頌於萬年。樓船過洞庭，

旌旗直下；閶闔開黃道，袞舄遄歸。某方協寅衷，喜傳卯詔。界上爭杜衍，想共戴於我公；方面待乖崖，將遂誇於吾榜。行行會弁，暨暨賀床。《文山全集》卷七。

〔二〕伐：原作「代」，據韓本、鄆本改。

賀前人生日啓

暢月先春，福星初度。朱綬錦艾，聯赤壁之六絲；蓬矢桑弧，絢紫微之五色。玉書吐燄，繡紱生輝。恭惟某官風骨清剛，精神大耐。仙人駕黃鶴，色照渚宮；老子跨青牛，氣浮函谷。壽八荒而哀福，律九寸以迎長。棠陰照岫嶼之央，十分翠曉；桃影近蓬萊之水，一朵紅雲。某夙分碧落之香，遠認瑤池之色。一車以南，一車以北，軫軫相望；千歲爲春，千歲爲秋，心心持壽。《文山全集》卷七。

賀化地冬啓

舞雲門而奏至，六琯函和；占星壁之正中，三階齊色。芝香丹禁，穀介黃扉。恭惟某官心見乾坤，身持元會。御床親捧，耀五龍夾日之光；寶鼎密調，胚萬象皆春之意。燦火城之鶴燄，領圭舄之

駕行。宜哀塊圮之和，茂集陶鈞之福。一陽出地，露玉燭之光芒；五色書天，開金穰之瑞慶。某叨繼乘輶之乏，殊慚把繡之長。絢色線於帝裳，乃心上袞；跂黃雲於仙轡，莫尾賀綦。頌詠情深，敷菜喙短。《文山全集》卷七。

賀化地正啓

帝堯授曆，肇開平秩之端；周公爲師，實主泰和之運。光華絕席，塊圮方維。恭惟某官玉燭際蟠，鈞陶動植。調元神鼎，心包太極之春；捧日扶桑，色照蒼精之角。條鬯東南之溫厚，塤簞上下之明良。拜晉國大夫，人慶祥符之真宰；邁潞公平章，事登元祐之昌期。億載敬休，八荒開壽。某囿身洪播，稽首獨班。三陽君子泰來，仰贊茹茅之盛；四牡王事靡盬〔二〕，俯同苞杞之生。致賀輪囷，牋忱稿結。《文山全集》卷七。

〔二〕盬：原作「監」，據韓本、鄆本改。

賀簽書冬啓

晷躔南陸，一線迎長；星麗西樞，三階齊色。哀時茨祉，穀我英髦。恭惟某官元會運之經綸，天地心之橐籥。黃雲乘轡，肅劍履於大昕；繡日補裳，領衣冠於亞歲。鼓舞黃鍾之雅，陶鎔緹幔之溫。萬物生輝，回餘光於草木；八荒開壽，鬯新渥於乾坤。某承乏湘輶，馳瞻魯觀。芸香透暖，尚憐采若之寒；梅意先春，預闖和羹之候。葵葵是祝，草草奚殫。《文山全集》卷七。

賀參政正啓

簽書樞密院兼

東角耀芒，開三朝之景運；西樞齊色，轉萬象之洪鈞。碩輔均弘，方輿錫羨。恭惟某官明謨贊化，熙績亮天。金鼎調元，共幹太和之運；玉衡測影，首參平秩之功。塤箎宥密之經綸，鼓舞明良之際會。薇歌中國，壽細柳之春風；花滿上林，揭扶桑之曉日。四方來賀，三壽作朋。某身逖馳驅，神傾塊圮。拔茅連茹，言觀君子之風；集杞方苞，尚念使臣之遠。輪囷致頌，藁桔箋忱。《文山全集》卷七。

賀江丞相除湖南安撫大使判潭州啓

舊弼起家，价藩建閩。姬公相周而爲左，方遂明農；召保分陝而守西，又新維翰。威行夷夏，運在東南。恭惟某官壽俊兩朝，禮樂四代。修名偉節，以日月爲明，泰山爲高；奧學精言，爲天地立心，生民立命。水火不爭於鼎鼐，泥金各就於陶鈞。本之身心，暴秋陽而濯江漢；措諸事業，膺戎狄而懲荆舒。起觀一世之安危，端繫大人之出處。當世道未寧之日，正遼人相戒之時，乃放一道之玉麟，乃授三公之金鵠。謂捍荆門，吞夏汭，寄莫重於星沙；豈挹浮丘，拍洪崖，閑可專於綠野？安石起東山而苻秦潰，孔明渡瀘水而孟獲擒。維茲銀濤青壁之雄，倚我錦艾朱紱之重。功隱存於宗社，書不盡於旂常。三軍百姓之歡迎，大開玉帳；一馬二童之促召，再築沙堤。佐興唐虞，誕保文武。某及門甚晚，知己何深。薦不識面官，每嘆先生之古道；自號報恩子，豈在衆人之下風？鳳凰出而羽毛朝，蛟龍驤而雲氣簇。一日偃藩之際會，同時誤節之走趨。方當聖哲馳驚之秋，無限師友從遊之感。孝子回車，忠臣叱馭。司空副相，將交盡於君親；太保上公，惟深期於造化。潔蠲拜下，傾倒由中。

《文山全集》卷七。

賀前人除特進啓

碩輔在藩，優恩加秩。撫淳熙左相之舊鎮，赫奕十連；冠元豐特進之新銜，巍峨一品。星馳汗號，雷動驩音。恭惟某官耆壽具瞻，宗師先覺。東問典故，西問文學，錦堂丞相之規模；公見庶僚，府見監司，潞國太師之度量。維時台宿，來茨軫邦。熊當道而貉子之膽寒，龍居淵而象罔之迹遠。上思舊德，時有恩言。進左右僕射之官，增詩書元帥之重。左師中吉，承天寵也；既都錫命之榮；以我公歸，有袞衣兮，即轉征東之馭。某猥塵馳轡，阻赴賀床。載鄙淥之清，指玉麟而爲壽；遡斗樞之紫，僊金鵲於方來。《文山全集》卷七。

回前人除特進送禮啓

上公國輔，相望龜紱之華；特進天人，忽枉鸞飛之字。溥乾坤之新渥，賁岫嶼之行雲。庭實煒煌，鈞和坱圠。芳洲杜若，被紫駝翠釜之榮；驛路梅花，看赤舄繡裳之覲。熏香跪謝〔一〕，伏繭沂馳。

《文山全集》卷七。

〔二〕跪：原作「詭」，據庫本改。

行部潭州謝江丞宴啓

古之學必有師，甫趨函丈，子使人歌而善，肅拜初筵。春風渭北之旗，夜月洞庭之樂。簫韶俗耳，冰雪征塵。《車攻》賡《六月》之詩，先聞吉語；帝所聽九成之奏，再相太平。《文山全集》卷七。

送前人九日禮啓

宴龍山九九之節，夙侈雄藩；開鶴林七七之花，今逢真宰。風清六纛，霜肅九州。共惟某官赤舄元圭，瑠戈錫盾。酌長沙酒，快春水之曉行；賦《北門》詩，喜秋花之晚看。小馳戲馬，重補袞龍。某記影星垣，驚心飈館。跂芙蓉之頂，想千乘之登高；折茱萸之房，爲三公而持壽。《文山全集》卷七。

回前人送九日禮啓

天開紫蓋，秋高淡圃之香；星下碧泉，春到長沙之酒。飛卷五雲之風雨，光華九日之山川。味也

采深〔一〕，恩斯曷稱。北門看菊，幸與分玉帳之清；內殿傳柑，聞已下金甌之信。《文山全集》卷七。

〔一〕味：原作「昧」，據韓本、鄆本、庫本改。

賀前人冬啓

春入重緹，欣聽雷鼗之奏；台明上袞，具瞻井鉞之輝。穀我龐臣，哀時疇祉。共惟某官量包元氣，心見先天。冠漢殿之仙班，火城如晝；補舜裳之五色，宮線猶香。卷舒昭文館之春風，布濩祝融峰之曉露。蒹蘭出色，芸荔含和。愛日迎長，開一氣八荒之壽；瑞雲促覲，領五更三點之朝。某迹囿轉鈞，心馳獻履。近依星軫，愧直指之繡衣；遙贊雲門，歸碩膚之赤舄。薄言燕賀，永矢螽鳴。《文山全集》卷七。

送前人折筵啓

肇九寸律，柄屬洪鈞；建十丈旗，光生几舄。馳想雲和之瑟，莫陪壽軫之觴。薄注鄙清，式歌魯瑞。出乘仙鞮，遙修南至之恭；入捧御床，預致東歸之慶。瀆嚴增惕，錫頓爲榮。《文山全集》卷七。

回前人送冬酒啓

噓嶰谷之陽，方覃鈞播；照鄴湖之渌，忽拜袞題。有華舞袖之春風，增賁繡絲之曉日。淺深存燮理，滿傾北斗之天漿；德澤布光輝，跪沐南山之雲氣。輪困鏤感，稟桔刊申。《文山全集》卷七。

賀前人正啓

龍杓麗曉，天開泰內之陽；驛騎明春，星起軫中之壽。和薰青瑄，喜動黃麻。共惟某官心會陽宗，身扶人統。黻明帝袞，迎瑞日於東郊；縑煥公主，照蒼精於左角。卷劍氣玉烟之彩，增繡裳赤舄之榮。東作有三百六旬，陶鈞一轉；中書歷二十四考，鼎鼎重新。戒前路之鸞凰，沸歡聲於童馬。某喜逢雞朔，隄贊熊旂。光近火城，又獻大椿之歲；寒噓雲舍，敢忘寸草之春？跂賀心馳，箋忱喙短。

《文山全集》卷七。

送前人酒啓

開條風於獻節，瑞藹三朝；介壽酒於公堂，春生四履。斂神光於雲岳，拓喜氣於沙堤。輒持鄙渌之窪樽，聊贊鈞天之和鼎。不匱錫爾類，懷哉萱草之詩；再入福蒼生，如此椒花之頌。薄將凌躡，賜頓欣榮。《文山全集》卷七。

回前人送春啓

春回太簇，開雲氣於南山；曉醉長沙，酌天漿於北斗。挹注偏提之潤，薰蒸統部之和。綠淨生香，洪鈞轉燠。八仙地隔，莫陪左相之杯；太乙風生，隄贊東皇之席。卷卷跂謝，草草箋忱。《文山全集》卷七。

賀前人赴召啓

銀信騰霄，金書照闔。映南雲之紫蓋，春滿江湖；歸東雨之袞衣，天開閭闔。行宮絡繹，統部歡

呼。共惟某官以大宗師，爲真宰相。文章若雷霆河漢，玉色金聲；言行質天地鬼神，丹心白髮。出納祝融峰之日月，卷舒昭文館之星辰。北門小煩魏公，盡寬上顧；中國再相司馬，坐懾衆心。仙人駕綵鳳以傳音，老子馭青牛而入覲。碧涵汀芷，曉清沙路之塵；黃把庭麻，夜轉火城之影。某囿身化治，舞手揚綸。大老盍歸乎來，共致巖瞻之喜；君子永錫爾類，終徼鈞播之私。跂賀欲飛，牋詞甚枯。

《文山全集》卷七。